


Kote New Testament



Portions of the Holy Bible in the Kote Language of
Mozambique

**Kote New Testament
Portions of the Holy Bible in the Kote Language of
Mozambique**

Porções da Bíblia Sagrada no Kote Língua Moçambique

copyright © 2005-2008 Wycliffe Bible Translators, Inc.

Language: Kote

Translation by: Wycliffe Bible Translators

O utilizador pode copiar e distribuir a obra.

You may copy and distribute the work.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-30

PDF generated using Haiola and XeLaTeX on 11 Nov 2022 from source files dated 9 Oct 2020

7eacf624-a9f0-59bc-b7bf-b6190a381fc4

Contents

FRT	1
Mwanzo	2
Olaawo	75
Yuunusa	103
Matewuzhu	106
Maaruku	153
Luuka	181
Yaahaya	236
Khaazi za Maswihaapa	275
1 Timootiyu	293

Koti Bíblia
Porções da Bíblia Sagrada no Koti língua Moçambique
Portions of the Holy Bible in the Koti language of
Mozambique
Koti Bíblia
 Kote

Koti Bíblia

Porções da Bíblia Sagrada no Koti língua Moçambique

Portions of the Holy Bible in the Koti language of Mozambique

[eko]

Kote Bíblia

Porções da Bíblia Sagrada no Koti língua Moçambique

Portions of the Holy Bible in the Koti language of Mozambique

[eko]

Tradução: © 2005-2008, Wycliffe Bible Translators, Inc.

Edição para a Web

2017, Wycliffe Bible Translators, Inc.

www.ScriptureEarth.org

Creative Commons Licença

Atribuição-Uso Não-Comercial-Vedada a Criação de Obras Derivadas

Você pode copiar, distribuir, exibir e executar a obra sob as seguintes condições:

Atribuição. Você deve dar crédito ao autor original, da forma especificada pelo autor ou licenciante.

Uso Não-Comercial. Você não pode utilizar esta obra com finalidades comerciais.

Vedada a Criação de Obras Derivadas. Você não pode alterar, transformar ou criar outra obra com base nesta.

<http://creativecommons.org/licenses/by-nc-nd/4.0/>

Mwanzo

Ophattuchiwa w'oolumwenku na vitthu zooshi ziriimo

¹ Omwanzo, Nluku aphattucha pinku na vathi. ² Olumwenku waari ohineeyane matthentto na khayaarimo hatha ethtu, yaariyo yiizaru vatulu wa pahari yawiicha. Rooho ya Nluku yaari ozukulela vatulu wa maati.

³ Aphano Nluku khuri: "Yiiyervo nuuru!" Khwiiyavo. ⁴ Nluku khoona yoori nuuru yaari yooshapweya; khuvalula nuuru na yiiza. ⁵ Nuuru khutthaja "nthana", yiiza khutthaja "osikhu". Khuripa khucha, siikhu yamwanzo.

⁶ Aphano Nluku khulupa theenya yoori: "Wiiyervo mwaawanyo vakatthi wa maati onvalulaaye maati na maati!" ⁷ Nluku khuretta mwaawanyo ovaluliyeeyo maati vathi na vatulu. Khurettikhana etthiipo. ⁸ Mwaawanyo opule, Nluku khutthaja "pinku". Khuripa khucha, siikhu yaphiiri.

⁹ Nluku khuri: "Akusanyeye maati apa ari vathi wa pinku vahali vamote epuwe tuulu yawuuma!" Khurettikhana etthiipo. ¹⁰ Tuulu yaya ethiito yawuuma khutthaja nzina la "tuniya", maati apale aakusanyeyiyeyo khutthaja n zina la "pahari". Nluku khoona yoori pi zooshapweya. ¹¹ Nluku khulupa theenya yoori: "Tuniya yootthele tthuttu: waaza nyaani ziniimaaye peewu na miithi ziniimaaye mishumo, wakhula nshumo na phunje yaya!" Khurettikhana etthiipo. ¹² Tuniya khoottihela tthuttu: nyaani ziniimaaye peewu, miitthi ziniimaaye mishumo. Nluku khoona yoori pi zooshapweya. ¹³ Khuripa khucha, siikhu yattaathu.

¹⁴ Aphano Nluku khuri: "Otulu ziiyewo vimwasikhelo yoori ovaluleye nthana na osikhu! Ziye alama zinthoonyezaaye elimwe na mwiita, siikhu na nyaakha. ¹⁵ Vimwasikhelo ziriye otulu ziiye zoomwasikhela vathi." Khurettikhana etthiipo. ¹⁶ Nluku khuphattucha vimwasikhelo piiri kхуulu. Emwasikhelo eti khuulu yaya yoori esala elokozela nthana, eti ttithi esala elokozela osikhu. Na theenya khuphattucha matthottowa. ¹⁷ Nluku khutthaawo vimwasikhelo epile otulu yoori zisala zimwasikhela vathi, ¹⁸ na olokozela nthana na osikhu, zaawanye nuuru na yiiza. Khoona yoori pi zooshapweya. ¹⁹ Khuripa khucha, siikhu yanneye.

²⁰ Aphano Nluku khuri: "Mpahari ziiyemo zumpe za waatta za wiiyana ohaayi, na eeyeve anyannyi anvavaaye otulu!" ²¹ Nluku khumpa zumpe z'ooahaayi khuluzeene za mpahari, na jaati zooshi za zumpe zineettetaaaye na ziniitaalaaye mpahari. Khumpa theenya jaati zooshi za anyannyi. Nluku khoona yoori pi zooshapweya. ²² Nluku khuparikhya araka: "Mwittheerelane mwaattelane, mwiitaale mpahari, na anyannyi aattelane vatuniya!" ²³ Khuripa khucha, siikhu yathaau.

²⁴ Aphano Nluku khuri: "Ziiyemo ntuniya jaati zooshi za zumpe za wiiyana ohaayi, nyama za ntthuttu, mifuwo za vaje na nyama zoojipurula!" Khurettikhana etthiipo. ²⁵ Nluku khumpa nyama za ntthuttu za wakhula jaati, zoojipurula za wakhula jaati, na mifuwo za wakhula jaati. Khoona yoori pi zooshapweya.

²⁶ Nluku khulupa theenya yoori: "Nimumpe pinaatamu woonishapihi wa wiya nkhamma Fweeyo! Yoori eeyane owahi wooshintta swi za mpahari na anyannyi o'tulu; mifuwo za vaje na nyama za ntthuttu mpakha nyama zooshi zinjipurulaaye vathi."

²⁷ Aphano Nluku khumumpa pinaatamu

wa wiiya nkama Ye;
nlume na muukha ompiwa ti Ye.

²⁸ Nluku khuwaaparikhya khuwooza yoori: "Mwivokolelane, mwaattele mwiitaale voolumwenku! Mwiiyane oshintta vatuniya, swi za mpa-hari, anyannyi o'otulu na nyama zooshi zineettettaaye vathi!" ²⁹ Nluku khulupa theenya araka: "Yoori mweeyo mwiiyane etthu-yooja, kini-winkhani nyaani zooshi za ntuniya ziniimaaye pewe, miithi zooshi ziniimaaye mishumo na phunje zaya. ³⁰ Kininkha mathapa ooshi nkama vitthu-zooja za nyama zooshi ziriina ohaayi: anyannyi ooshi o'otulu na nyama zooshi mpakha epile zinjipurulaaye vathi." Khurettikhana ethiipo. ³¹ Nluku khoona yoori pi zooshapweya channu. Khuripa khucha, siikhu yasiitha.

2

¹ Ti nanna yiishisiweeo ophattuchiwa pinku na vathi na zooshi ziriimo. ² Nluku amarisiyeevo khaazi yawe, siikhu yasaapa khuvumula. ³ Siikhu ethiito yasaapa, Nluku khuparikhya na khuttakatthisa mwaasa woovumula khwa khaazi yawe aakholiyeeyo yoophattucha. ⁴ Eti hatiithi yoophattuchiwa pinku na vathi.

Nanna apuwyeeeo pinaatamu

Siikhu Mbwana Nnyizinku aphattuchiyeovo pinku na vathi, ⁵ vatuniya khawaarivo hatha muutthi wala nyaani zaari zihinootthe, maana Mbwana Nnyizinku aari ahinanyisele vuula vathi na khaarivo hatha ntthu woolima tuniya. ⁶ Ila maati aari opuwa vathi khusala anaanisa tuniya yooshi. ⁷ Aphano, Nnyizinku khumumpa pinaatamu khwa ottophe wa vathi. Khunvitelela mphula mwawee khumwinkha phuumu y'oohaayi, pinaatamu khwiya yumpa haayi.

⁸ Mbwana Nnyizinku khuzala wooratha nti wa Eeteni, phantte y'ookhu lntthamuwaawo njuwa, khunthaamo pinaatamu otule aamumpiyeeyo. ⁹ Mbwana Nnyizinku khotthisa miitthi za wakhula nanna, zooshapweya woona na zootuva oja mishumo zaya. Vakathhi wa woorotha khuzalavo muutthi woohaayi, na muutthi onjuwisaaye yooshapweya na yootakhala.

¹⁰ N'Eeteni ntumpho waarimo muuttho waari okhuwaraaye woorotha opule; muuttho othuupo khwaawanyeya khupuwavo nyuuttho mine. ¹¹ Wamwanzo oniitthiwa Pishoni, opo wazukulela nti wooshi wa Havila, ohali wa waattawo thahapu*. ¹² Thahapu za nti opo pi zooshapweya na theenya ewaakho miitthi enlazaaye manlela oonukhela na mawe ootafikhana†. ¹³ Muuttho opu waphiiri oniitthiwa Kihoni, ozukuleliyeeyo nti wooshi wa Kuushi. ¹⁴ Muuttho opo wattaatthu, onviraaye phantte lntthamuwaawo njuwa ya nti wa Shuuru, oniitthiwa Tiikiri. Opu wanne Efwarathi.

¹⁵ Mbwana Nnyizinku khunthuula pinaatamu otule khuntha nwoorotha wa Eeteni yoori asala alimela na weekesela. ¹⁶ Mbwana Nnyizinku khunruma pinaatamu otule yoori: "Miithi epi ziriye nwoorotha mphu oje mishumo zaya woohiina hatha shaakha. ¹⁷ Ila muutthi opo woojuwisa yooshapweya na yootakhala ohije; siikhu ontelaaye oja satakithu onta ofwa."

* ^{2:11} Leelo eti thahapu weero. † ^{2:12} Mawe apa awaara aari wiithiwa oniikisi.

¹⁸ Aphano Mbwana Nnyizinku khuri: “Khahi yooshapweya pinaatamu wiiya otthwe, kintta omumpa pinaatamu wa wiiya nkhamma ye asala ankhiza.” ¹⁹ Paata ya Mbwana Nnyizinku wumpa khwa ottophe wa vathi nyama zooshi za ntthuttu na anyannyi apa o’otulu, zooshi khuntiisela Adamu[‡] yoori amoone nanna aari weettelaazo otthaja; wakhula yumpe aari otthajaaye, nzina laya laari wiiya ntthinttho. ²⁰ Adamu khutthaja mazina mifubo za vaje, anyannyi o’otulu na nyama zooshi za ntthuttu. Ila khuhipuwivo hatha moote ya wiiya nkhamma ye yaari weettelaaye onkhiza.

²¹ Aphano, Mbwana Nnyizinku khuntiisela Adamu osikizi wa waatta. Eettaka olala, khunlaza likhonkolo limote la pavu yawe, aphale vaya aalaziyeevo khuttiyavo na nyama. ²² Likhonkolo limote la pavu anlaziyeyo Adamu, Mbwana Nnyizinku khumumpa muukha, khumwinkha Adamu.

²³ Ye khuri:

“Ahee! Ntthi likhonkolo la likhonkolo laka
na nyama ya nyama yaka.
Nka eethiwaka oriwa muukha,
maana alaziwa vamwiili wanlume.”

²⁴ Ti eto nlume oninlikha papaaawe na mamaawe khukusanyeya na muukhaawe oowiiri khwiiya nyama moote. ²⁵ Oowiiri, Adamu na muukhaawe aari wiiya waazu woohiina haaya.

3

Waaza wa twampi na ohoowa

¹ Nyookha yaari nlavilavi zayita nyama zooshi za ntthuttu Mbwana Nnyizinku ompiyeyeo. Khumuuzela muukha eraka: “Atthi Nluku alupa yoori mwihiye mishumo za miitthi zooshi ziriye nwoorotha mphu?”

² Muukha otule khujipu yoori: “Ninaaye ruhusa yooja mishumo za miitthi ziriye nwoorotha mphu, ³ ila Nluku anuza yoori: ‘Nshumo wa muutthi oriiye vakathhi wa woorotha mwihiye wala mwihisape. Mwijaru mwintta ofwa.’”

⁴ Aphano nyookha khumuuzza muukha otule yoori: “Hatha khamwim-fwa! ⁵ Maana Nluku ajuwa yoori siikh muwinttelaaovo oja nshumo opo antta ofunuwa maasho enu, mweeyo mwinttelaaovo wiiya nkhamma Ye, ojuwa yooshapweya na yootakhala.”

⁶ Muukha khoona yoori muutthi opule waari wooshapweya, mishumo zaya zaari zooshapweyela oja na zaarina fwayita yoojuwisa. Attaapho, khushuma khuja, khumwinkha mannawe na-ye khuja. ⁷ Paata ya toowo, oowiiri khufunuwa maasho aya khujuwa yoori ari waazu. Khurukela mathapa a muutthi oniitthiwaaye mfikeera* khuretta wiiya kuwo zaya.

⁸ N’oosiila shintto ya Mbwana Nnyizinku eettettaka nwoorotha mphule, wakathi wa pheevu ya matulayi njuwa-looveva, pinaatamu na muukhaawe khujivitha na miitthi nwoorotha ntthinttho yoori Mbwana Nnyizinku ahiwoone. ⁹ Mbwana Nnyizinku khunkhuvela pinaatamu khumuuzela yoori: “Ori vayi?”

¹⁰ Ye khujipu araka: “Keetta osiila shintto yawo nwoorotha mphu, miiyo khoova na khujivitha mwaasa wa wiiya waazu.”

[‡] **2:19** ‘Adamu’ nzina nttho khwa luuka ya Meebereewu lina maana a nlume. * **3:7** Nfikeera muutthi woolattanana muuyu oriina mishumo zootuva zinjiwaaye pi athhu.

¹¹ Mbwana Nnyizinku khumuuzela theenya yoori: "Wooziwa paani yoori ori waazu? Nshumo wa muutthi opule kookhattaziyeeyo yoori ohije weetta oja?"

¹² Pinaatamu khujipu yoori: "Muukha otu okinkhiyeeyo yoori asala akikhiza, ti ye akinkhiyeeyo nshumo aya opo miiyo khuja."

¹³ Mbwana Nnyizinku khumuuzela muukha araka: "Niini eto orettiyeeyo?" Muukha khujipu yoori: "Nyookha ti ye ekittettekhiyeeyo miiyo khuja."

¹⁴ Aphano Mbwana Nnyizinku khuza nyookha yoori:

"Wiiya waretta vitthu epi,
woolaanikha ti weyo vakathi wa mifuwo za vaje na nyama zooshi za ntthuttu,
nka weettettanaka erukulu na ojaka ottophe siikhu zooshi z'oohaayi awo.

¹⁵ Kintela otthaavo wuumani weeyo na muukha;
peewu yawo na peewu ya muukha.

Peewu ya muukha nka yuuvulalisaka eeshwa yawo,
na weeyo nka ottovolaka ekwakuno yaya."

¹⁶ Mbwana Nnyizinku khumuuzla muukha yoori:

"Kintta ozitisa thwaapu yawo
amana wiimittha ompatthaka mwaana.
Weeyo onlawa watake onlokozela mannawo,
ila mannawo onlawa ooshintte."

¹⁷ Ye khumuuzla Pinaatamu yoori:

"Wiiya wansiileza muukhaawo
kuja nshumo wa muutthi opu kookhattaziyeeyo,
yalaanikha tuniya yooshi mwaasa wa weeyo,
nka okholaka khaazi yoolipa
yoori opatthe ethu-yooja
ohaayi awo wooshi.

¹⁸ Tunya eniwinkha wakhula nanna ya miiwa,
weeyo nka ojaka mishumo za ntthuttu.

¹⁹ Okholaka khaazi yoovujuwela
yoori opatthe ethu-yooja yawo
mansha awo ooshi.

Maana weeyo wompaniwa ottophe,
n'oofwa mpakha orutele voottophe."

²⁰ Pinaatamu khuntthaja muukhaawe nzina la Haawa[†], mwaasa wa wiiya maama wa anaatamu ooshi. ²¹ Mbwana Nnyizinku khwaattala kuwo za shapala khunwalisa pinaatamu na muukhaawe.

²² Mbwana Nnyizinku khuri: "Mpakha apha pinaatamu wampattha wiya nkhamma fweeyo, ajuwa ethu yooshapweya na yootakhala. Ye ahiliikeleliwe oshuma nshumo wa muutthi w'oohaayi aja yoori eeyane ohaayi wa mileele." ²³ Paata ya toowo, Mbwana Nnyizinku khumwiikaramo nwoorotha wa Eeten, yoori asala alima ottophe otthuupule ompaniweeyo.

²⁴ N'oomwiikaramo pinaatamu nwoorotha phantte linnthamuwaawo njuwa

† **3:20** Nzina la Haawa lina maana oohaayi.

ya Eeteni, khutthaamo kerupiina[‡] na phanka ya moottho yaari ozukule-laaye. Ye aarettiye toowo yoori esala yeekesela tarikhi yaari weettaaye okhule oriwo muutthi w'oohaayi.

4

Ovokoliwa wa Kayiini na Apeelee

¹ Adamu khurapalelana muukhaawe Haawa, khwiimittha khumpattha mwaana khunthaja nzina la Kayiini*. Ye khulupa yoori: "Khwa otakha wa Nnyizinku kampattha mwaana wanlume." ² Khwiimittha theenya khumpattha mwaana nkina wanlume, ttwiye Kayiini. Khunthaja nzina la Apeelee.

Apeelee khwiiya makhampuzi wa pwittipwitthi, Kayiini khwiiya namalima. ³ Siikhu moote, Kayiini khutiisa mishumo za mmashapa oteela omwinkha zaakha Nnyizinku. ⁴ Apeelee na-ye zwaamu yawe khutiisa pwittipwitthi etile yaari yamwanzo ottheeriwa ya nliphanko mwawe, khushija khuthawula phantte epile zoosamini waya oteela omwinkha zaakha Nnyizinku, Ye khwiiya wootueliwa ti Apeelee na zaakha yawe. ⁵ Ila Kayiini na zaakha yawe etile aatiisiyeeyo, Nnyizinku khuhitueliwi. Kayiini khukatipukha khujiinamela.

⁶ Nnyizinku khumuuzela araka: "Wakatipukhela-ni khujiinamela? ⁷ Amana weeyo weetteta saana akinuukhupalela? Ila amana weeyo oheettetti saana, ojuwe yoori twampi eri vanlako entta wuuwejela yoori ewiirkhele yuushintte. Weeyo enuuhithajiyi oshintta twampi yaya eto."

⁸ Aphano Kayiini khumuza ttwiye Apeelee yoori: "Nlawe ntthuttu." N'oofiya khunzukuluwela khumuula.

⁹ Paata ya toole, Nnyizinku khumuuzela Kayiini araka: "Ttwiyo Apeelee ori vayi?" Khujipu yoori: "Akijuweeni! Namweekesela wa ttwiyyaku ti miyo?"

¹⁰ Nnyizinku khumuuzela theenya araka: "Waretela-ni ethu nkhamma eti? Huula ya taamu ya ttwiyo entta okikhuwela vathi. ¹¹ Nasaapi ethiiti, woolaanikha ti weyo vatuniya ethiito enywiyyeyo taamu ya ttwiyo. ¹² Amana weeyo olima nka ohiruweraka. Vatuniya weeyo nka weettaka ojeettettela nkhamma ntthu wootthira."

¹³ Kayiini khumuza Nnyizinku yoori: "Hukhumu yaka khuluyeeene channu akinkhitiri. ¹⁴ Leelo wakiikara vatuniya apha yoori kihiiye vamote na-weyo, miiyo kinttela ojeettettela nkhamma namathira vatuniya na wakhula anttelaaaye okisikana ontta okuula."

¹⁵ Nnyizinku khunjipu yoori: "Wala! Khahiyo toowo! Wakhula otule anttelaaaye owuula oniyya woohukhumwiwa swaafu sapa." Ye khunthha alama vamwiili yoori wakhula aninsikanaaye ahimuule. ¹⁶ Aphano Kayiini khwumwazeyanan Nnyizinku khulawa khwiikhala nti wa Nooti[†], okhu linnthamuwaawo njuwa phantte ya Eeteni.

¹⁷ Ye khurapalelana muukhaawe, khwiimittha khumpattha mwanawee Enookhi. Kayiini khujeka sitati khunthaja nzina ntthintthile la mwanawee Enookhi. ¹⁸ Enookhi khunvokola Eraati, Eraati khunvokola Mehuyayele, Mehuyayele khunvokola Lameekhi

¹⁹ Lameekhi khuwaarala aakha awiri, mmote nzina lawe laari Aada. Otu nkina lawe laari Siila. ²⁰ Aada khumpattha mwanawee khunthaja nzina la Yapaali, paapa wa atthu apale aari wiikhalaaye mmaheema aari

[‡] 3:24 Kerupiina malayikha aneekeselaaye vitthu ttakathiifu. * 4:1 Nzina nttho la Kayiini linlattana ntthakuzi linraaye kampattha † 4:16 Nooti nzina nttho maana aya ojeettettela.

ofuwaaye nyama. ²¹ Ttwiiye nzina lawe laari Yupaali, oto aari paapa wa atthu apale ooshi animpiyaaye tthakare na apale ampiyaaye phivi. ²² Siila khumpattha mwaana khuntthaja nzina la Tupaali-Kayiini, ye aari funti wa waattala zaana za khoopiri na zuuma. Tupaali-Kayiini aarina nlupuwe aari wiitthiwaaye Naama.

²³ Lameekhi khuwooga aakhaawe yoori:

“Aada na Siila!

Mwikisiileze aakhaaka:

Kamuula ntthu mwaasa wookivulalisa,
na shapu mmote mwaasa wookiluwattha.

²⁴ Amana Kayiini ariphawa hukhumu swaafu sapa,

Lameekhi onttela oriphawa swaafu sapiini na sapa.”

Ovokoliwa wa Seethi

²⁵ Adamu khurapalelana muukhaawe theenya khumpattha mwaana khuntthaja nzina la Seethi[‡], Haawa khuri: “Nnyizinku akinkha mwaana nkinoko wonriphelavo Apeele otule ooliweeyo ti Kayiini.” ²⁶ Seethi na-ye khumpattha mwaana khuntthaja nzina la Enooshi.

Wakathi aya otthuupo phi laaziyeovo waaputwiwa nzina la Nnyizinku.

5

Peewu ya Adamu

¹ Eti warakha yoovokola wa peewu ya Adamu.

Wakathi Nluku amumpiyeyo pinaatamu, aamumpiyeyo wa wiiya nkhamya ye; ² nlume na muukha ti ye awompiyeyo. N'owompa khuwaaparikhya. Khuwaatthaja nzina la “anaatamu”.

³ Adamu afiyyeovo nyaakha miiya na talaathiini khumpattha mwaana wa wiiya nkhamya ye na khwa wumpo awe khuntthaja nzina la Seethi. ⁴ Paata yonvokola Seethi, Adamu khwiikhala theenya nyaakha miiya naane khuwaapattha aana a waatta aalume na aakha. ⁵ Adamu afwa arina nyaakha miiya tiisiya na talaathiini.

⁶ Seethi afiyyeovo nyaakha miiya na mithaanu, khunvokola Enooshi.

⁷ Paata yonvokola Enooshi, Seethi khwiikhala theenya nyaakha miiya naane na sapa khuwaapattha aana akina aalume na aakha. ⁸ Seethi afwa arina nyaakha miiya tiisiya na khumi na miwiri.

⁹ Enooshi afiyyeovo nyaakha tiisiini, khunvokola Kenaani. ¹⁰ Paata yonvokola Kenaani, Enooshi khwiikhala theenya nyaakha miiya naane na khumi na mithaanu, khuwaapattha aana akina aalume na aakha. ¹¹ Enooshi afwa arina nyaakha miiya tiisiya na mithaanu.

¹² Kenaani afiyyeovo nyaakha sapiini, khunvokola Mahalaleeli. ¹³ Paata yonvokola Mahalaleeli, Kenaani khwiikhala theenya nyaakha miiya naane na arupaiiini, khuwaapattha aana akina aalume na aakha. ¹⁴ Kenaani afwa arina nyaakha miiya tiisiya na khumi.

¹⁵ Mahalaleeli afiyyeovo nyaakha siithiini na mithaanu, khumpattha mwaana khuntthaja nzina la Yareeti. ¹⁶ Paata yonvokola Yareeti, Mahalaleeli khwiikhala nyaakha miiya naane na talaathiini khuwaapattha aana akina aakha na aalume. ¹⁷ Mahalaleeli afwa arina nyaakha miiya naane na tiisiini na mithaanu.

[‡] **4:25** Nzina nttho la Seethi khwa luuka ya Meebereewu linlupaaye yoori ‘oninkha’.

¹⁸ Yareeti afiyeevo nyaakha miiya na siithiini na miwiri, khumpattha mwaana khunthaja nzina la Henookhi. ¹⁹ Paata yonvokola Henookhi, Yareeti khwiikhala nyaakha miiya naane, khuwaapattha aana akina aalume na aakha. ²⁰ Yareeti afwa arina nyaakha miiya tiisiya na siithiini na miwiri.

²¹ Henookhi afiyeevo nyaakha siithiini na mithaanu, khumpattha mwaana khunthaja nzina la Methuseela. ²² Paata yonvokola Methuseela, Henookhi khulotta mwentto wa Nnyizinku nyaakha miiya ttatthu, khuwaapattha aana akina aalume na aakha. ²³ Ye eekhaliye nyaakha miiya ttatthu na siithiini na mithaanu. ²⁴ Henookhi aarina osilana nwulweene na Nluku. Ye eettiyi woophaziwa ti Nluku.

²⁵ Methuseela afiyeevo nyaakha miiya na thamaaniini na sapa, khunvokola Lameekhi. ²⁶ Paata yonvokola Lameekhi, Methuseela khwiikhala nyaakha miiya sapa na thamaaniini na miwiri, khuwaapattha aana akina aalume na aakha. ²⁷ Methuseela afwa arina nyaakha miiya tiisiya na siithiini na tiisiya.

²⁸ Lameekhi afiyeevo nyaakha miiya na thamaaniini na miwiri khumpattha mwaana mmote. ²⁹ Mwaana otule mmote ampatthiyeeyo khunthaja nzina la Nuuhi*, ye khulupa yoori: “Khwa khaazi zoolwaaza ninkholaa zo nilimaka tuniya eti elaaniveeyo ti Nnyizinku, mwaana otu ti ye anttela wiitthaaza rooho zethu.” ³⁰ Paata yonvokola Nuuhi, Lameekhi khwiikhala theenya nyaakha miiya thaanu na tiisiini na mithaanu, khuwaapattha aana akina aalume na aakha. ³¹ Lameekhi afwa arina nyaakha miiya sapa na sapiini na sapa.

³² Nuuhi eekhaliye nyaakha miiya thaanu khuwaapattha aana aalume khuwaathaja mazina: Sheemu, Haamu na Yafeeti.

6

Otakhala rooho wa anaatamu

¹ Wakathi anaatamu aaziyeovo waattelana muulumwenku na khuwaavokola aana aakha, ² mahaakhimu* khuwoona yoori aakha apale aari ooshapweya, wakhula mmote wa yo khusala awaathuula apale aari owaatakhaaye. ³ Aphano Nnyizinku khuri: “Akintela onlikhela pinaatamu phuumu z’oohaayi khwa mileele, maana ye nyama ya taamu; siikhu zawe enttela wiiya nyaakha miiya na eshiriini.”

⁴ Wakathi aya opo muulumwenku aarimo atthu awulu-awulu na oozi-vala, aruteliye wiiyavo theenya. Aari aana aalume aavokoliweeyo pi mahaakhimu n’oorapalelana aana aakha a anaatamu. Aana atthaapo, pa yo aari atthu oozivala na ootafikhana.

⁵ Nnyizinku khoona yoori vatuniya zootakhala za anaatamu zeetta ovira zeekezeleyaka; Mentrezi aya ooshi aari ooretta vitthu zootakhala wakhula siikhu. ⁶ Aphano Nnyizinku khukasirikha mwaasa woomumpa pinaatamu vatuniya, khwiiya woolemeliwa nroho mwawee. ⁷ Khuri: “Kintta owaafujavo anaatamu aya apa kiwompiyeeyo voolumwenku apha; waaza anaatamu, nyama, anyanyama, na anyannyi o’tulu, kiwookasirikha mwaasa woowumpa.”

⁸ Ila Nuuhi khwiyya ntthu aapathiiyeeyo rehema omaasho wa Nnyizinku.

* ^{5:29} Nzina nttho la Nuuhi khwa luuka ya Meeberewu lalattanana na ntakhuzi liriina maana a rehema. * ^{6:2} Mahaakhimu apa anlupiwaaye mphu aari atthu ookhomaala na oolepisana, aari wiithiwa yoori aana a Nluku; na aarina ofwalume nwulweene.

Aaraka wa Nuuhi

⁹ Eti hatiithi ya Nuuhi. Vakatthi wa atthu ooshi ye otthwe paasi ti ye ari ntthu w'eekhweeli na washariya, aari weettettelaaye mwentto wa Nluku ¹⁰ Nuuhi awaavokoliye aanaawe aalume attatthu; Sheemu, Haamu na Yafeeti.

¹¹ Olumwenku waazukuleliwe pi vitthu zootakhala na zoohusuti omaasho wa Nnyizinku. ¹² Nnyizinku khweekesa olumwenku khusala oona ori wooharipweya, maana zumpe zooshi zaari zooharipweya menttezi aya.

¹³ Nnyizinku khumuza Nuuhi yoori: "Kintta wiishisa zumpe zooshi z'oohaayi, vamote na olumwenku aya kipweche. ¹⁴ Weeyo omwaatale aarakat† nwulweene na thaapwa za mpila, onremule onthe kaathi, onkokotte onthe piriniisi oje waya na nkaththi. ¹⁵ Omwaattale nanna eti: phiima miiya na talaathiini na thaanu olepa waya, phiima eshirii ni na piiri na nuusu owula waya, phiima khumi na ttatthu chanka yaya. ¹⁶ Ontthe tarato enfiyaaye nuusu ya phiima vatulu waya. Waawanye tarato moote vathi, moote vakatthi, kinoko vatulu, onthe nlako mpavu mwaya.

¹⁷ Onjuwa! Miyo kasaleela ozamisa olumwenku wooshi na maati a nyeri, kiishise zumpe zooshi ziriina phuumu z'oohaayi ziriye vathi wa pinku. Zooshi ziriye vatuniya zinttela ofwa. ¹⁸ Ila wahati aka kinretta na-weyo, onttele weetta mmwaarakka, weeyo, muukhaawo, aanaawo na aakhaaya. ¹⁹ Othuule nyama wakhula jaati piiri-piiri, yeelume na yekha opakhire mmwaarakka mwawo yoori ziiye haayi vamote na-weyo. ²⁰ Wakhula jaati ya anyannyi, wakhula jaati ya nyama, wakhula jaati ya epile zinjipurulaaye vathi, zooshi piiri-piiri ziiye vamote na-weyo yoori ziiye haayi. ²¹ Othuule vitthu zooshi zinjiwaazo opwehe yoori osala oja weeyo na nyama epo zooshi."

²² Nuuhi khuretta zooshi epile aarumiweezo ti Nnyizinku.

7

Nuuhi na ajamaaze ampakhira mmwaarakka

¹ Aphano Nnyizinku khumuza Nuuhi yoori: "Weeyo na ajamaazo ooshi opakhire mmwaarakka. Vakatthi wa atthu apa ooshi ariivo, Miyo kawoona weeyo paasi wiiya ntthu washariya. ² Othuule nyama za halaali sapa zeelume na sapa zeekha ila epile zoohiiyi za halaali othuule piiri-piiri yeelume na yekha. ³ Owaathuule theenya anyannyi sapa eelume na sapa eekha yoori jaati yaya ehaashikhe. ⁴ Mmana zivira siikhu sapa kinlawaa kanyisele vuula vatuniya siikhu arupayiini nthana na osikhu, kipweteche zumpe zooshi kumpiyeezo."

⁵ Nuuhi khuretta zooshi epile Nnyizinku anrumiyeezo.

⁶ Wakathi maati aazamisiyeevo tuniya, Nuuhi aari oretta arina nyaakha miiya sitha. ⁷ Ye khupakhira mmwaarakka vamote na muukhaawo, aanaawe na aakhaaya mwaasa wa maati a nnyeri aari oteelaaye ozamisa olumwenku. ⁸ Nyama za halaali na zoohiiyi za halaali, anyannyi na nyama epile zinjipurulaaye vathi, ⁹ khupakhira mmwaarakka vamote na Nuuhi piiri-piiri zeelume na zeekha, nkhamma ethiipo Nnyizinku aamuuziyeozo. ¹⁰ Ziviriyeevo siikhu sapa, maati oozamisa olumwenku khwaaza opuwa vatuniya.

¹¹ Siikhu Nuuhi afiyeevo nyaakha miiya sitha, mweezi waphiiri orina siikhu khumi na sapa, khuphutuwa matthatta a vathi ooshi apale awiicha

† **6:14** Aaraka yaari kalawa yawaattaliwa nkhamma kaasha.

na milako za pinku khufukuwa. ¹² Khunya vuula vatuniya siikhu arupayiini nthana na osikhu.

¹³ Siikhu ethiito Nuuhi, muukhaawee, aanaawe Sheemu, Haamu, Yafeeti, na aakha attatihu a aanaawe aarettiye ari mmwaaraka. ¹⁴ Nuuhi aapakhiriye nyama zooshi za ntthuttu, mifuwo zooshi za vaje, nyama epile zooshi zinjipurulaaye, na anyannyi a wakhula jaati na epile zooshi za wiiyana mapaphelo. ¹⁵ Zumpe zooshi ziriina phuumu z'oohaayi khupakhira piiri-piiri mmwaaraka mphule vamote na-ye. ¹⁶ Nyama zooshi zeettiyeemo zaari zeekha na zeelume za wakhula jaati nkhamma ethiipo Nluku anrumiyeezo. Nawiisha opakhira, Nnyizinku khufuka nlako wa aaraka.

¹⁷ Nnyeri weeshiye siikhu arupayiini vatuniya. Maati khuvira ekezelyaka mpakha khweeleela aaraka ¹⁸ Maati eetta ovira atepaka waatta mpakha aaraka otule khusala eeleela vatulu a maati. ¹⁹ Khwaatta channu mpakha khufiyelela ozamisa nyaako. ²⁰ Maati khuvikana nyaako epile kiyasi ya phiima sapa. ²¹ Zumpe zooshi z'oohaayi zaari vatuniya khufwa; anyannyi, mifuwo za vaje, nyama za ntthuttu, epile zinjipurulaaye vathi na anaatamu ooshi. ²² Zumpe zooshi epile zaariina phuumu y'oohaayi, zaari ovumulaaye voolumwenku apha khufwa. ²³ Nnyizinku khupwetechu zumpe zooshi z'oohaayi zaari vatuniya. Pinaatamu, nyama za ntthuttu, na epile zinjipurulaaye vathi na anyannyi o'tulu zooshi khupwetehya. Khusala Nuuhi otthwe na ajamaaze na nyama epile zaari vamote na-ye mmwaaraka.

²⁴ Maati aarupaziye vatuniya siikhu miiya na hamusiini.

8

Okukuthala wa Nnyeri

¹ Ila Nluku khuhinsahawu Nuuhi na nyama epile za ntthuttu na mifuwo za vaje epile aarinaazo mmwaaraka, khuperekha pheevu yoori evitelele vatuniya, maati khwaaza ovwa.

² Matthatta apale awiicha na milako za pinku khufukiwa, vuula khwaamus, ³ maati khwaaza ovwa vattiithi-vattiithi mpakha siikhu miiya na hamusiini. ⁴ Siikhu khumi na sapa ya mweezi wasaapa aaraka otule khuphweruwa vanyaako za Araraati. ⁵ Maati apale khusala avva paasi mpakha siikhu yamonsi mweezi wakhumi khwaaza wooneya mithoma za nyaako.

⁶ N'oovira siikhu arupayiini Nuuhi khufukula ettakha* ya aaraka etile aattaliyeeyo. ⁷ Khumfukulela nakhuku khusala avava azukulelaka mpakha maati ovwa. ⁸ Elottelanaka khufukulela jiwa yoori yoone nkhamma maati avva vatuniya. ⁹ Ila jiwa etile khuhisikani puuro yoomorela khurutela mmwaaraka, mwaasa yoori tuniya nalelo yaari ehinavuuwe. Jiwa khurutela wa Nuuhi, khusarula nkhone awe khukhola jiwa etile khuvirisa mmwaaraka. ¹⁰ Nuuhi khuvira awejaka mpakha siikhu sapa, khuruma jiwa ethiitile swaafu yaphiiri. ¹¹ Khuruti njuwa-looveva elumiye nthapa liwishi l'ooluveera, aphano Nuuhi nawoona khujuwa yoori maati avva vatuniya. ¹² Khuweja theenya siikhu sapa khuruma jiwa ethiitile opheya, ila swaafu eti khuhiruti.

¹³ Siikhu yamonsi ya mweezi wa mfunko monsi wakathi Nuuhi aarinaavo nyaakha miiya sitha na mmote, maati apale aazamisiyeeyo tuniya khukakhamela. Nuuhi khufunula tarato ya aaraka khoona yoori nshaka

* **8:6** Ettakha eleelo eti enriwa janelia.

wooma. ¹⁴ Siikhu eshiriini na sapa ya mweezi waphiiri, tuniya khuuma saaneene.

¹⁵ Aphano Nnyizinku khumuza Nuuhi yoori: ¹⁶ “Wiishukhemo mmwaaraka mpho weeyo, muukhaawo, aanaawo na aakhaaya.

¹⁷ Wiishushe nyama zooshi oriinaazo waaza anyannyi, nyama na epi zinjipurulaaye vathi. Osarule zimwazeyele vatuniya, zittheerelane zaattelane.”

¹⁸ Nuuhi na muukhaawe, aanaawe na aakhaaya khwiishukha mmwaaraka mphule. ¹⁹ Khusarulamo nyama epile zooshi zinjipurulaaye vathi, anyannyi ooshi, na zooshi ethiipile zineettetaaye vatuniya, wakhula moote na jaati yaya.

²⁰ Nawiisha, Nuuhi khunjeka alitaari woorettavo twaha yoomwinkha kafwara Nnyizinku. Ye khuthawula nyama epile kinoko zaya za halaali, na anyannyi a halaali akinoko aya, khushija, khulawa khuretta twaha yoolukuzi vaalitaari. ²¹ Nnyizinku khusiila arufu yonkhurunusha rooho khulupa mwennyewero yoori: “Akintele orutela theenya olaani tuniya mwaasa wa pinaatamu, eeyaru pure wootakhala rooho ovokoliwa-wene. Akintele orutela opwetechazumpe zooshi nkhama nanna eti kirettiyeozo.”

²² Mmana olumwenku wiiyakavo oniiyana
wakathi woozala na wa wuurula,
woozizima na wa haari,
elimwe na mwiita,
nthona na osikhu,
vitthu epo khinteela wiisha.”

9

Wahati wa Nnyizinku na Nuuhi

¹ Nluku khumparikhya Nuuhi na aanaawe awoozaka yoori: “Mwivokolelane mwaattelane mwiitaale voolumwenku. ² Nyama zooshi za voolumwenku, epi za ntthuttu, anyannyi o’otulu, epi zinjipurulaaye vathi, na swi za mpahari, zinttela wiiya zoowoonani mweeyo channu. Zooshi epo mwinttela oshintta. ³ Zooshi zinoonaaye na zineettetaaye zinttela wiiya ethu-yooja yenu, nkhama ethiipo kiwinkhiyeeenini mathapa, zooshi kawinkhani.”

⁴ Ila mwihije nyama na taamu yaya, maana taamu ohaayi. ⁵ Wakhula nyama enimuulaaye ntthu, na pinaatamu animuulaaye nzaawe, anttela ojipu mmakhono Mwaka.

⁶ ‘Mwaasa yoori Nluku amumpa pinaatamu ajilattanisaka mwennyewe,
otule animuulaaye pinaatamu
na-ye ontta wuuliwa ti pinaatamu.’

⁷ Ila mweeyo mwivokolelane mwaattelane mwiitaale voolumwenku.”

⁸ Aphano Nluku khumuza Nuuhi vamote na aanaawe araka: ⁹ “Nasaapi eti Kinretta wahati aka na-weyo na peewu yawo, ¹⁰ na zooshi ziriinaazo ohaayi opakhuwaniyeeyo mmwaaraka ziriye vamote na-weyo: anyannyi, mifuwo, nyama za ntthuttu na zumpe zooshi za ntuniya. ¹¹ Kinretta wahati aka na-mweyo; akintelea opwetechazumpe zooshi na maati a nnyeri, wala tuniya khinteela ozama theenya na maati a nnyeri.”

¹² Nluku khulupa theenya: “Eti alama ya wahati aka miiyo na-weyo na zumpe zooshi ziriye vamote na-weyo, khwa mileele: ¹³ katthaamo

nkankanyaama mmawiku yoori wiiye alama ya wahati miiyo na tuniya. ¹⁴ Amana kifinikha pinku na mawiku, khupuwa nkankanyaama, ¹⁵ phi kinttelaye wuupuwela wahati aka miiyo na-weyo na zumpe zooshi. Khanrutela theenya maati a nnyeri ozamisa zumpe zooshi z'oohaayi. ¹⁶ Nkhankanyaama n'opoowa mmawiku, nka kifikhiraka wahati opule kiretiyeeyo wa mileele miiyo na zumpe zooshi z'oohaayi ziriye vatuniya.”

¹⁷ Nawiisha Nluku khumuza Nuuhi yoori: “Eti alama ya wahati kirettiyeyo miiyo na zumpe zooshi ziriye vatuniya.”

Attu ooshi ariye ntuniya peewu yaya yo

¹⁸ Aana a Nuuhi aapakuwaniyeyo mmwaarakha mphule pi apa: Sheemu, Haamu na Yafeeti. Haamu aari paapa wa Kanaani. ¹⁹ Apa attatthu aari aana a Nuuhi, attu ooshi amwazeyeliyeyo vatuniya avokoliwa khwa yo.

²⁰ Nuuhi aari namalima, ye ti thakuzi wozala mirayi za wuuvuva. ²¹ Siikhu moote, khunywa viinyu ya nshumo opule khunhapala khuvuleya kuwo zawe zooshi nheema mwawe. ²² Haamu, paapa wa Kanaani, khuvira nheema khoona owaaza wa papaawe. Khulawa khuwooza attwiize apale awiri aari vaje. ²³ Aphano khulankha Sheemu na Yafeeti khuthuulaza juupa khuvikela mmafuzi mwaya khusala eettetta na enyokonyoko yoori ahoone owaazu wa papaaya n'oofiya khumfinikha.

²⁴ Wakathi Nuuhi emwaamuviyeyo viinyu etile, khujuwa mattakhuzi aaviriseliweeyo ti mwanawе otu w'eefutti. ²⁵ Aphano ye khuri:

“Woolaanikha ti Kanaani,
onttela wiiya mwiiththaana wa
amwiiththaana a attwiize.”

²⁶ Theenya khuri:

“Asifwiwe Mbwana Nnyizinku wa Sheemu,
anrette Kanaani wiiya mwiiththaana wa Sheemu.

²⁷ Nnyizinku anwulise Yafeeti;
khapila yawe yiiye vamote na ya Sheemu,
Kanaani eeye mwiiththaana aya.”

²⁸ Paata yawiisha nnyeri, Nuuhi eekhaliye nyaakha miiya ttatthu na hamusiini. ²⁹ Nuuhi afwa arina nyaakha miiya tiisiya na hamusiini.

10

Aana a Nuuhi

¹ Eti warakha ya peewu ya Sheemu, Haamu na Yafeeti, aana a Nuuhi. Yo aawaapatthiye aana wakathi opule wiishiyeeyo nnyeri.

² Aana a Yafeeti aari apa: Komeeri, Makooku, Matayi, Yavani, Tupaali, Mesheki na Tirasi. ³ Aana a Komeeri aari apa: Ashikenazi, Rifwathi na Tokaama. ⁴ Aana a Yavani aari apa: Elisha, Tarishishi, Kitimu na Rotanimu.

⁵ Khwa aana atthaapo, attu khumwazeyela nkerekhere wa ntima na mvisura. Eti peewu ya Yafeeti wakhula khapila na lihimo laya na nti aya na luuka yaya.

⁶ Aana a Haamu aari apa: Kuushi, Misuri, Puuti na Kanaani. ⁷ Aana a Kuushi aari apa: Seepa, Havila, Saapita, Raama na Sapiteeka. Aana a Raama aari apa: Sheepa na Tetaani.

⁸ Kuushi khunvokola theenya Ninrooti, otu ti ye aaziyeeyo wiiya ntthu wooshintta vathi apha. ⁹ Ye aari namasaya wookhomaala omaasho wa Nnyizinku. Ti eto enlupiwaaye yoori “Ntthu nkhamma Ninrooti, namasaya wookhomaala omaasho wa Nnyizinku”. ¹⁰ Ofwalume awe waaza nti wa Babeeli, Ereki na Akati, zooshi epo zaari nti wa Shinaari. ¹¹ Khulankha nti wa Shinaari khulawa mpakha Ashuuru khujeka sitati ya Neniive, ya Rehopoothi-Yiiri na ya Kaala, ¹² na sitati ya Reseeni, sitati khuluyeene yaari vakatthi wa sitati ya Neniive na ya Kaala.

¹³ Misuri khunvokola Aluti, Anaamu, Alehaapi, Anafituhu, ¹⁴ Apaturusi na Akasuluhi (apa pa yo awaavokoliyeeyo Afiliishiti) na Akafitoori.

¹⁵ Kanaani khunvokola Sitooni mwanawewe wa mwanzo na Ahiiti, ¹⁶ theenya na Ayepuzi, Amoori na Akirikashi, ¹⁷ Ahivi, Ariki, Asiini, ¹⁸ Aravati, Azemaari na Ahamati.

Khwa ethiipo lihimo la Akanaani khumwazeya. ¹⁹ Mwiinano wa Akanaani waaziye Sitooni olawaka Keraari, mpakha Gaaza, na phantte ya Sotooma na Komoora, Atima na Sepooyimu mpakha Laasha.

²⁰ Apa aari aana a Haamu na mahimo aya, luuka zaya, miti zaya na khabila zaya.

²¹ Sheemu ntunkhulu wa Yafeeti, na-ye aawaavokoliye aana; Sheemu aari pwaapu wa aana a Heebere*.

²² Aana a Sheemu aari apa: Elamu, Ashuuru, Arifwakisaati, Luthi na Aramu. ²³ Aana a Aramu aari apa: Wuuzi, Huuli, Keteeri na Maashi.

²⁴ Arifwakisaati khunvokola Sheela, na-ye Sheela khunvokola Heebere.

²⁵ Heebere khuwaavokola aana awiri: mmote khunthaja nzina la Peleekhi† mwaasa yoori siikhu zawe tuniya yeettiye waawanyiwa. Otu waphiiri khunthaja nzina la Yokitaani. ²⁶ Yokitaani khunvokola Alimotathi, Shelefu, Hazarimawethi, Yeera, ²⁷ Hatoramu, Yuzaali, Tiikala, ²⁸ Opaali, Apimayeeli, Sheepa, ²⁹ Ofiri, Havila na Yopaapu, ooshi apa aana a Yokitaani. ³⁰ Apa aari wiikhala waaza nti wa Meesha mpakha nnyaako phantte ya malawa-juwa nti wa Sefaari. ³¹ Apa aari aana a Sheemu na mahimo aya, luuka zaya, miti zaya na khabila zaya.

³² Opu ojama wa aana a Nuuhi, waawanyeyiyeeyo khapila khwa khapila na peewu yaya paata yawiisha nnyeri. Khapila zooshi zimwazeyeliyeeyo voolumwenku zalankha voojama otthuupo.

11

Otapanyeeya wa Luuka

¹ Wakathi aya opo olumwenku wooshi waarinna luuka moote na nanna moote yoottakhula.

² Atthu aalankhiye malawa-juwa khusikana ntta po la Shinaari khwiikhala attaapho.

³ Khusiilana yoori: “Nlaweni nuupe thizolo nooche saaneene.” Thizolo epile khuretta wiiya mawe, piriniisi khunretta wiiya mattakha. ⁴ Theenya khuri: “Nlaweni nijeke sitati yawiifyana korofwa khuluyeene enkomaaye pinku, yoori nzina letthu liiye loojuwanikha, nihiyiye woomwazeyela olumwenku wooshi.”

* ^{10:21} Aana a Heebere pi atthaapo azaniyeeyo nzina la Hebereeewu. † ^{10:25} Nzina nttho la Peleekhi maana aya waawanyiwa.

⁵ Paata ya toole, Nnyizinku khwiishukha yoori oone sitati ya korofwa etile aari ojekaaye attu apale. ⁶ Ye khuri: “Moone! Athu apa amoteru, ooshi anttakhula luuka moote. Eti arettiyeeyo eetta waaza, khaavo anttelaaye owaakarawela etile awaziyeeyo. ⁷ Nlaweni niishukhe navirikanise luuka anttakhulaaye yoori ahisala asiilana mmote na nzaawe.”

⁸ Ethiito, khukaraweleya ojekiwa sitati etile, Nnyizinku khuwaamwazela olumwenku wooshi. ⁹ Ti eto sitati etile khutthajiwa nzina la “Babeeli*”, mwaasa wa Nnyizinku ovirikanisa luuka ya anaatamu ooshi. Attaapho, Nnyizinku khuwaamwazela olumwenku wooshi.

Peewu ya Sheemu

¹⁰ Eti peewu ya Sheemu. Sheemu afiyyevo nyaakha miiya khunvokola mwanawewe Arifwakisaati, nyaakha miwiri paata ya nnyeri ovira. ¹¹ N'onvokola Arifwakisaati, eekhaliye nyaakha miiya thaanu, khuwaavokola theenya aana aalume na aakha.

¹² Arifwakisaati afiyyevo nyaakha talaathiini na mithaanu, khunvokola Sheela. ¹³ Paata yonvokola Sheela, eekhaliye nyaakha miiya nne na mittathu, khuwaavokola theenya aana aalume na aakha.

¹⁴ Sheela afiyyevo nyaakha talaathiini khunvokola Heebere. ¹⁵ N'onvokola Heebere, eekhaliye nyaakha miiya nne na mittathu, khuwaavokola theenya aana aakha na aalume.

¹⁶ Heebere afiyyevo nyaakha miiya nne na talaathiini khunvokola Peleekhi. ¹⁷ N'onvokola Peleekhi, eekhaliye nyaakha miiya nne na talaathiini, khuwaavokola theenya aana aalume na aakha.

¹⁸ Peleekhi afiyyevo nyaakha talaathiini khunvokola Reewu. ¹⁹ N'onvokola Reewu, eekhaliye nyaakha miiya piiri na tiisiya, khuwaavokola theenya aana aalume na aakha.

²⁰ Reewu afiyyevo nyaakha talaathiini na miwiri khunvokola Serukhi. ²¹ N'onvokola Serukhi, eekhaliye nyaakha miiya piiri na sapa khuwaavokola theenya aana aakha na aalume.

²² Serukhi afiyyevo nyaakha talaathiini khunvokola Nahoori. ²³ N'onvokola Nahoori, eekhaliye nyaakha miiya piiri khuwaavokola theenya aana aalume na aakha.

²⁴ Nahoori afiyyevo nyaakha eshiriini na tiisiya khunvokola Teera. ²⁵ N'onvokola Teera, eekhaliye nyaakha miiya na khumi na tiisiya, khuwaavokola theenya aana aalume na aakha.

²⁶ Teera afiyyevo nyaakha sapiini, khunvokola Eburamu, Nahoori na Hara.

²⁷ Eti peewu ya Teera. Teera khunvokola Eburamu, Nahoori na Hara. Hara khunvokola Loothi. ²⁸ Hara khufwa sitati ya Wuuri, nti wa Babilooniya tuniya aavokoliweewo, ila papaawe khusala ari haayi. ²⁹ Eburamu na Nahoori khuloola. Muukha wa Eburamu aari wiithiwa Suhuriiya, na-ye muukha wa Nahoori nzina lawe aari Miilika, mwaana wa Hara, aarina mwaana nkina theenya aari wiithiwaaye Ishika. ³⁰ Ila Suhuriiya khaarina aana mwaasa woohiina mavokozi. ³¹ Teera khulankha sitati ya Wuuri, nti wa Babilooniya, eettaka Kanaani. Alawaka khunthuula mwanawewe Eburamu na ntuliuwe Loothi, mwaana wa Hara, vamote na nkhwewe Suhuriiya, muukha wa Eburamu. Ila afiyyevo sitati ya Harani khuhivikani, khwiikhala ottuukho. ³² Teera khufwa Harani arina nyaakha miiya piiri na mithaanu.

* ^{11:9} Babeeli enlattanana nttakhuzi liriina maana ootapanyeya”.

12

Okhuweliwa wa Eburahiima ti Nnyizinku na waahitiwa wawe

¹ Siikhu moote, Nnyizinku khumuza Eburamu araka: “Olikhe tuniya yawo, na ajamaazo, na vaje wa apapazo olawe tuniya kinttelaaaye wuuthoonyeza. ² Kinteela wuuretta wiiya paapa wa peewu ya waatta, kinteela wuuparikhya na onteela wiiya woojuwanikha, kinteela owaaparikhya attu akina mwaasa wa weeyo. ³ Kiniwaaparikhya apale anuu-parikhyaaye, na kininlaani otule anuulaanaaye. Khwa weyo enteela wiiya zooparikhijiya khatipa zooshi za voolumwenku.”

⁴ Eburamu khulankha khusala alawa nkhamma ethhiipo Nnyizinku arumiyezo. Ye aalawiye vamote na Loothi, wakathi aaliyyeewo Harani aari oretta arina nyaakha sapiini na mithaanu. ⁵ Khunthuula muukhaawe Suhuriya na Loothi mwaana wa ttwiye, na mali zawe zooshi aariinaazo, vamote na amwiithwaana awe aawaapatthiyeeyo Harani, khusala alawa tuniya ya Kanaani. N’oofiya tuniya ya Kanaani, ⁶ ye khuvira eettettaka tuniya aya etile, khulawa mpakha Shekemu, phantte ya Moore ohali waariiwo muutthi nwulweene*. Wakathi aya opule Akanaani aari oretta eekhalaka tuniya ethiitile.

⁷ Nnyizinku khunteela Eburamu, khumuza yoori: “Tuniya eti kinteela winkha peewu yawo”. Aphano Eburamu khunjekela alitaari† Nnyizinku attaphale. ⁸ Eeshiyeevo, khusala eetta phantte ya kusini onyaako wa malawa-juwa ya Beetele. N’oofiya onyaako okhule, khweemesa heema yawe. Beetele yaari okhu lintupweelaawo njuwa, Aayi yaari okhu linthamuwaawo njuwa. Ye khunjekela alitaari Nnyizinku khwaaputu nzina la Nnyizinku. ⁹ Aphano, ye khusala avira alawaka mpakha Nikeepu, phantte ya kusini ya Kanaani.

Eburamu na Suhuriya antta tuniya ya Misuri

¹⁰ Tuniya ya Kanaani yaapuwiywero jala ya waatta, aphano Eburamu khulankha khusala alawa tuniya ya Misuri yoori eekhalewo siikhu vattithiiru. ¹¹ Asaleelaka ofiya, khumuza muukhaawe Suhuriya yoori: “Osileze, miyo kajuwacha yoori weeyo o muukha wooshapweya. ¹² Amisuri n’oowoona anttelu olupa yoori weeyo o muukhaaka, antta okuula yoori weeyo osale na-yo. ¹³ Amana wuuzeliwa olupe yoori nlupwaaka, ahikuule na akihole saana mwaasa wa weeyo.”

¹⁴ Wakathi Eburamu afiyyevo, Amisuri khumoona Suhuriya yoori aari muukha wooshapweya channu. ¹⁵ Mifwalume za Firawuuna, amooniyeevo muukha otule, khulawa omuuza Firawuuna yoori amoona muukha wooshapweya. Pi aphi khunthuula khunlawana wa Firawuuna. ¹⁶ Eburamu aakholiwe saana ti Firawuuna‡ mwaasa wa muukha otule, khwinkhiwa pwittipwitthi, mompe, amwiithwaana aalume na aakha, apuuru na khavaloo.

¹⁷ Ila Nnyizinku khunhukhunu Firawuuna, khuntisela pala ya waatta na ajamaaze, mwaasa wa Suhuriya muukha wa Eburamu. ¹⁸ Aphano, Firawuuna khunkhuelisa Eburamu, khumuuzela yoori: “Mwaasa aya niini okirettelaka toono? Wahaakuuziye yoori otu muukhaawo? ¹⁹ Khi

* ^{12:6} Muutthi opo nwulweene, waari vahali aari olompakaavo Akanaani na opiiyavo sako. ‘Moore’ maana aya ‘mwanlimu’. † ^{12:7} ‘Alitaari’ meeza a mawe othateliwa vahali yaari orettiwakaavo twaha yoolukuziwa ya Nnyizinku. ‡ ^{12:16} Firawuuna: Khwa luuka ya Meebereewu nzina nttho lina maana la mfwalume wa Misuri.

apho waari olupaaye yoori ti nlupuwo? Mwaasa wa weeyo ori nlupuwo, ti eto yaakipatthisiyeyo onrala. Apho muukhaawo otu, onthuule olawe!"
²⁰ Aphano Firawuna khuwaaruma atthu awe omperekha Eburamu yoori aleemo mmuti mphule na muukhaawe na vitthu zawe zooshi.

13

Omwazeyana wa Eburamu na Loothi

¹ Aphano Eburamu khulaawo Misuri khweetta phantte ya kashikhazini khulawa mpakha Nikeepu, ye na muukhaawe na vitthu zawe zooshi, vamote na Loothi. ² Eburamu aari thaajiri nwulweene. Aarina nyama za waatta, na feeta na thahapu.

³ Ye khulaawo Nikeepu, khulawa phantte ya kashikhazini ajeettette-laka wakhula phantte mpakha nti wa Beetele, attaaphale eemesiyeovo heema yawe omwanzo, nakatthi-nakatthi ya Beetele na Aayi. ⁴ Attaaphale anjekiyeevo alitaari, ye khwaaputu nzina la Nnyizinku. ⁵ Na-ye Loothi otule aari weettettanaaye Eburamu, aarina pwittipwitthi, mompe na heema za waatta. ⁶ Khayaari owaheya wiikhala vamote mwaasa yoori nti opule khawaarina tthuttu yoofiyela ojisa nyama zaya. ⁷ Pi apho, khupuwa onyakulisana amakhampuzi a Eburamu na amakhampuzi a Loothi. Wakathi aya opo Akanaani na Aperizi aari oretta eekhalaka nti otthuupule.

⁸ Eburamu khumuua Loothi yoori: "Ohiiyeko ohisiilani miiyo na-weyo, wala amakhampuzi aka na awo, mwaasa yoori ojama ethu mmote. ⁹ Tunya yooshi khiri mmakhono mwawo? Nlawe nimwazeyane, othawule phantte ontakhaaye olawa. Weeyo weettaru nkhone-nkha, miiyo kintta nkhone-nlume, weettaru nkhone-nlume miiyo kintta nkhone-nkha."

¹⁰ Loothi khulansa maasho awe khoona ntta po la muuttho Yorotaani lihiniishaaye maati liri looripelela mpakha nti wa Zowaari. Nttapo ntthile laari nkhamma woorotha wa Eeteni, na loolattanana tunya ya Misuri. Wakathi aya opo Nnyizinku aarettiye ahinapweche nti wa Sotooma na Kommoora. ¹¹ Aphano, Loothi khuthawula ntta po la Yorotaani, khumwazeyana na Eburamu, khusala alawa phantte ya malawa-juwa. ¹² Eburamu khusala eekhalo tunya ya Kanaani, Loothi khweemesa heema zawe waattamana na Sotooma, kharipu na sitati za nkerekhere wa ntta po la Yorotaani. ¹³ Ila atthu a Sotooma aari ootakhala rooho, aari annya-twampi ooziti mmakhono wa Nnyizinku.

Nnyizinku onimwaahiti Eburamu tunya ya Kanaani.

¹⁴ Paata ya Loothi olawa, Nnyizinku khumuua Eburamu araka: Olanse maasho awo attaapho oriivo, weekese kashikhazini na kusini, na okhu lint-thamuwaawo njuwa mpakha lintupweelaawo. ¹⁵ Tunya eto yooshi onoon-aaye kinteela owinkha weeyo na peewu yawo khwa mileele. ¹⁶ Kinteela waattisa peewu yawo nkhamma mishaka za voolumwenku, nkhamma ethiipo ahinteelaaye wiyyavo ntthu wa waalaka mishaka za voolumwenku, na peewu yawo khinteela waalakeya. ¹⁷ Olankhe ozukulele tunya eti woone olepa waya na owula waya, mwaasa yoori kinttela owinkha weeyo.

¹⁸ Aphano Eburamu khuthamisa heema zawe, khulawa khwiikhala aphale zaariivo miitthi miwulu-miwulu nti wa Manre sitati ya Heporooni. Attaaphale ye khunjekela alitaari Nnyizinku.

14

Viiithaya afwalume na okholiwa wa Loothi

¹ Wakathi aya opo Amirafeele aari mfwalume wa Shinaari, Ariyookho mfwalume wa Elazaari, Ketonilameeri mfwalume wa Elamu, na Titaali mfwalume wa Koyiimu, ² khulankhaza olawa wuumanana viittha Peera mfwalume wa Sotooma, Piirisha mfwalume wa Komoora, Shinaapu mfwalume wa Aatima, Shemeepere mfwalume wa Zeboiyimu, na mfwalume wa sitati ya Peela, yaari wiitthiwaaye Zowaari. ³ Afwalume apa athaanu khuwaakusanya anajanka aya nttaopo la Siitim (liiyieeyo ntthatta la maati majiphwaani). ⁴ Mfwalume Ketonilameeri, aawaashinttiye afwalume apale athaanu khwa nyaakha khumi na miwiri, ila mwaakha wakhuumi na ttaatthu aya khunzukuluwelaza.

⁵ Mwaakha wakhuumi na nne Ketonilameeri khuta vamote na afwalume apale aaphakanyeyaniyeeyo, khuwaashintta Arefayi o'Ashiteroothi-Karinayimu, Azuuzimu o'Haamu, na Aheemi o'Shave-Kiriyatayimu. ⁶ Theenya khuwaashintta Ahoori omwaako wa Seyiiri, khuwiikarisa mpakha Paraani ohali yaaziyeewo yaara. ⁷ Arutaka khuviraza Kateeshi waari wiittheliwakaawo Emishipathi, khuwaattapwattha atthu ooshi a nti wa Amalekiita na theenya Amoori aari wiikhalaaye nti wa Hazaazoni-Tamara.

⁸ Aphano khulankha mfwalume wa Sotooma, mfwalume wa Komoora, mfwalume wa Atima, mfwalume wa Zeboiyimu, na mfwalume wa sitati ya Peela (eti yaari wiitthiwaaye Zowaari), khulankha olawa wuumanisa viittha nttaopo la Siitim. ⁹ Aari wuumanaza na Ketonilameeri mfwalume wa Elamu, Titaali mfwalume wa Koyiimu, Amirafeele mfwalume wa Shinaari, na Ariyookho mfwalume wa Elazaari. Aari afwalume athaanu aari wuumanaaaye afwalume wane. ¹⁰ Nttapo la Siitim laarina milipu za waatta za piriniisi. Wakathi aari otthiraavo afwalume a Sotooma na Komoora, anajanka aya eetta okwela mmilipu, apale akinoko aya khuthhirela nnyaako. ¹¹ Afwalume apale wane aashinttiyeeyo khuthuula maali zooshi za Sotooma na Komoora na vitthu-zooja zaya khulawaza. ¹² Na theenya khunthuula Loothi, mwaana wa ttwiye Eburamu na mali zawe zooshi, mwaasa aya ye aari wiikhala Sotooma.

Eburamu onimuuusuru Loothi

¹³ Aarivo mwinyi mmote oosurukhiyeeyo, ye khulawa khumweeleza zooshi Eburamu Mwiibereewu, aari wiikhalaaye kharipu na miitthi miwulu-miwulu za Manre Mmori. Manre na attwiize, Sikhoole na Aneeri, aari atthu oosiilana na Eburamu. ¹⁴ Asiliyeovo Eburamu oriwa ntuluwe akholiwa, khuwaathuula alume miya ttatthu na khumi na wanaane aawaakhupaliyeeyo, oovokoliwa vaje vawe, khusala aweekarisa afwalume apale wane mpakha nti wa Daani. ¹⁵ Ye khuwaawanya alume apale khuntti-khuntti, khuumanisa viittha osikhu mpakha owaashintta maatuwi aya, khuweekarisa mpakha nti wa Hoopa, phantte ya kashikhazini ya Tamaashiku. ¹⁶ Khuwaanyakanya maali zooshi aathuuliyeeyo, khunthuula Loothi ntuluwe na mali zawe, vamote na aakha na atthu akinoko aakholiweeyo khuwaarutisa.

Melikiseeteki onimparikiya Eburamu

¹⁷ Wakathi Eburamu anshinttiyeovo mfwalume Ketonilameeri na afwalume aaphakanyeyaniyeeyo, mfwalume wa Sotooma khusala alawa ompokherela nttaopo la muuttho Shaawe liniitheliwaaye "Nttapo la

Mfwalume". ¹⁸ Aarivo mfwalume wa nti wa Salemu, aari wiitthiwaaye Melikiseetekhi*. Khutiisa phaawu na viinyu. Ye aari haakhimu wa tiini ya Nluku Nwulu wa Pinkuuni, ¹⁹ khumparikhya Eburamu araka:

"Aparikhiiyiwe Eburamu
ti Nluku Nwulu wa Pinkuuni,
otu ompiye pinku na vathi.
²⁰ Woottithimisiwa eeye Nluku Nwulu wa Pinkuuni,
otu awinkhiyeeyo owaashintta
maatuwi awo."

Aphano, Eburamu khulaza lifunku lakhuumi khwa zooshi epile aataniy-eezo, khumwinkha Melikiseetekhi.

²¹ Mfwalume wa Sotooma khumuza yoori: "Miiyo okinkhe atthu paasi. Maali zooshi osalane weeyo."

²² Eburamu khunjipu mfwalume araka: "Kalansa makhono aka kin-lanselaka Nnyizinku, Nluku Nwulu wa Pinkuuni ompiye pinku na vathi, ²³ na kinlapha yoori akinsalana hatha ethtu yaawo, wala luuzi wala nliza wa jampali, ohiri nawiikhala, olupa yoori 'Eburamu kanreelisa'. ²⁴ Miiyo khina ethtu moote kintakhaaye, yoohiiyi etile ajiyiye atthu aka. Ila apale aaphakanyeyieeyo na-miyo, Aneeri, Sikhoole na Manre, apa ana ya wi-iyana lifunku laya".

15

Wahati wa Nnyizinku khwa Eburamu

¹ Paata ya vitthu epile, Nnyizinku anttakhalaniye Eburamu nkathhi wa ezimu amuuuzaka yoori: "Eburamu ohooy! Miiyo ki namwaakisa awo, na tthuwo yawo enteela wiiya yooziti owula."

² Eburamu khujipu: "Mbwanaaka Nnyizinku ontakha okinkha-ni na miyo akina hatha mwaana wa waarithi aka? Antakhaaye orithi vaje vaka ti Elizeeri wa Tamaashiku. ³ Khukinkheeni mwaana; apho, karumeya wa vaje vaka ti ye anttelaaye orithi vitthu zaka."

⁴ Aphano Nnyizinku khunjipu: "Namarithi vitthu zawo khanttela wiiya oto, ila mwaana woovokoliwa ti weyo ti anttelaaye orithi." ⁵ Khunsarulamo neema mwawe khumuza yoori: "Weekese otulu, waalake matthottowa nkhamma anaalakeya. Peewu yawo enteela wiiya eththiipo."

⁶ Ye khumwaamini Nnyizinku, na-ye khukhupaliwa ti Nnyizinku wiiya ntthu wa shariya.

⁷ Nnyizinku khumuza Eburamu theenya: "Miiyo ki Nnyizinku kuulaziyeeyo Wuuri nti wa Babiloniya yoori kiwinkhe tuniya eti orithi."

⁸ Eburamu khumuuzela yoori: "Oo Mbwanaaka Nnyizinku, kihakikhi toovi yoori kinteela orithi tuniya eti?"

⁹ Nnyizinku khujipu: "Okitiisele mwaana wa mompe, wa puuzi, na wa pwittipwithi, zooshi za wiiyana nyaakha mittathu, na theenya likhoko na jiwa moote".

¹⁰ Ye khutiisa nyama epile zooshi, khusala ashija vakatthi wakhula nyama n'oothata wakhula erikitthili omaasho wa erikitthili kiina yaya. Ila likhoko

* **14:18** Kwa luuka ya Meebereewu, nzina nttho lina maana a "mfwalume aka ti wa shariya"

na jiwa khuhishiji vakatthi. ¹¹ Mirepo* khusala ziishukhela mphule zaari-imu nyama epile zooshijiwa, ila Eburamu khusala eekara.

¹² Njuwa leettelaka otupweela, Eburamu khunkhola osikizi wa waatta khusala oona yiiza ya waatta na woova. ¹³ Aphano Nnyizinku khumuuzza yoori: “Ojuwache yoori peewu yawo enteela omaka nti woohiiyi waaya, enteela orettiwa omwiithwaana na ohoochiwa nyaakha miiya nne. ¹⁴ Ila miiyo kintelela owaahukhumu atthu apo anttelaaaye oretta omwiithwaana, na enteela olaawo na maali za waatta. ¹⁵ Weeyo ontela wuuluvala ori wooparikhiiywa na onteela ofwa na heeri. ¹⁶ Paata yoovira nyaakha epo miiya nne, peewu yawo enteela orutela tuniya eti, amana Amoori apa aniikhalaaye ntumphu atepa oretta vitthu zootakhala, miiyo kintelela owaahukhumu na kiweekare.”

¹⁷ Litupweeliyeevo njuwa, waariipiye vathi khupuwa loosi la njocho na mweeke wa mootto khuvira vakatthi wa virikitthili za nyama epile zaashijiweezo. ¹⁸ Siikhu ethiitile, Nnyizinku khuretta wahati na Eburamu, khumuuzza yoori: “Tuniya eti kintelela winkha peewu yawo, waaza muuttho wa Misuri mpakha muuttho nwulu oniithiwaaye Efwarath, ¹⁹ otthaamo nti wa Akeni, wa Akenizi, wa Akatemoni, ²⁰ wa Ahiiti, wa Aperizi, wa Arefayi, ²¹ wa Amoori, wa Akanaani, wa Akirikashi na wa Ayepuzi.”

16

Ovokoliwa wa Esumayila

¹ Wakathi aya opo, Suhuriyya muukha wa Eburamu khaari ovokola. Ye aarina njaazi mmote wa Misuri aari wiithiwaaye Hajira. ² Siikhu moote, Suhuriyya khumuuzza mannawee Eburamu yoori: “Nnyizinku khanikinkha mwaana, apho orapalelanel njaazi aka, khinjuweya kimpatthaka mwaana khwa ye.” Asiiliyeevo toole, Eburamu khukhupalela mattakhuzi apale a muukhaawee. ³ Suhuriyya khunthuula njaazi otule khumwinkha Eburamu yoori eeye muukhaawee waphiiri. Vitthu epi zarettikhana Eburamu arina nyaakha khumi eekhalaka tuniya ya Kanaani. ⁴ Eburamu khurapalela na Hajira, ye khwiiya wa wiimittha. Ooniyeevo yoori eemittha khwaaza ontwayifu nhano awe. ⁵ Suhuriyya khumuuzza Eburamu yoori: “Miiyo kan-thuula njaazi aka khuwinkha, ye n’oojuwa yoori eemittha aaza okitwayifu. Okitwayifusha opu anikirettelaaye Hajira, khahi ethu ya shariya, ti weyo onintakhelaaye. Nnyizinku ti aniphuke miiyo na-weyo.”

⁶ Eburamu khunjipu Suhuriyya yoori: “Ye nalelo njaazi awo, onrettele khwa nanna ontakhaazo.” Aphano Suhuriyya khwaaza ontarawu Hajira mpakha khufiyelela othira.

⁷ Nlayikha la Nnyizinku khunsikana Hajira n’yaara eemeliye kharipu na naattuutu wa maati aattameliyeyo tariki ya Shuuri. ⁸ Nlayikha ntthile khumuuzela liraka: “Weeyo Hajira njaazi wa Suhuriyya! Onlankha vayi wala onnta vayi?” Ye khujipu: “Keetta othira vaje wa nhano aka Suhuriyya othuuto.”

⁹ Nlayikha khumuuzza yoori: “Orutele wa nhano awo, wanshututele.”

¹⁰ Khumuuzza theenya yoori:

“Kinteela waattisa peewu yawo
 khwa nanna ehinalakeyaaaye.

¹¹ Apho wiimitthiyeovo onteela ompattha mwaana

* ^{15:11} ‘Mirepo’ anyannyi awulu-awulu anjakaaye nyama zoofwa (zoovutta).

ontthaje nzina la Esumayila,
mwaasa yoori Nnyizinku oona
ohoowa wawo.

¹² Ye onteela wiiya woohisiilaneyi
nkhamma nyama ya ntthuttu;
onteela wiiya muumani wa atthu ooshi,
na-yo anteela wuumana na ye,
na onteela wiiya wa waattuwana
na attwiize.”

¹³ Hajira khujuuzela mwennyeweru yoori: “Kamoona Nluku, nalelo kiri haayi?” Aphano khunkhuwelela Nnyizinku nzina liriina maana a “Nluku anikoonaaaye”. ¹⁴ Pi aphi nlipu aya opule oniittheliwa “Peeri-Lahayi-Rooyi”*. Nlipu aya opu ori enakatthi-nakatthi ya Kateeshi na Peereti.

¹⁵ Hajira khumpaththa mwaana wa Eburamu. Eburamu khunththaja mwaana otule nzina la Esumayila. ¹⁶ Wakathi Hajira ampatthiyeovo mwaana otule, Eburamu aarettiye arina nyaakha thamaaniini na sitha.

17

Okhiriya alama ya wahati

¹ Wakathi Eburamu aphiyeevo nyaakha tiisiini na tiisiya, Nnyizinku anteeliye khusala amuuza araka: “Miiyo ki Nluku Woowahi Zooshi: weettettele mwentto kintakhaaye miiyo, wiiye ntthu nkemaani, ² yoori kirette wahati miiyo na-weyo, na kinteela owinkha peewu ya waatta.”

³ Aphano Eburamu khukokhora khulawa sijita, Nluku khusala anttakhlana ye araka: ⁴ “Wahati opu kinrettanaaye weeyo, phantte yaka kiniwaahiti yoori onteela wiiya paapa wa khapila za waatta. ⁵ Waaza leelo nzina lawo khahiy Eburamu*, ila Eburahiima ti linttelaaye wiiya nzina lawo, mwaasa yoori kinttela wuuretta opaapa wa khapila za waatta. ⁶ Kinteela waattisa channu peewu yawo, khwa weyo kinretta khapila za waatta, akinoko aya anteela wiiya afwalume. ⁷ Wahati opu kinretttaaye na-weyo na peewu yawo, ontela wiiya wa mileele; Miiyo ki Nluku awo na wa peewu yawo. ⁸ Kinteela owinkha tuniya eti oniikhalaaye, weeyaru pure mmalapo. Tuniya yooshi ya Kanaani kinteela winkha peewu yawo khwa mileele, na-miyo kinteela wiiya Nluku aya.”

⁹ Nluku khurutela omuuza yoori: “Phantte yawo ona yooshututela wahati aka, weeyo na peewu yawo khwa mileele. ¹⁰ Wahati ont telaaye oshuka, waaka Miiyo na-weyo na peewu yawo pi opu: wakhula mwaana wanlume ona yookhiriysiwa. ¹¹ Okhiriya waya opo, alama ya wahati aka miiyo na-mweyo. ¹² Wakhula mwaana anvokoliwaaye wanlume vakatthi wa peewu yawo, n'ooifiya siikhu yanaane ona yookhiriysiwa, hatha nkhamma karumeya woovokoliwa vaje vawo, mpakha amwiiththaana apale amalapo a wuuzanyiwa na apale oo hiiyi a peewu yawo. ¹³ Hatha nkhamma pi apa ovokoliwa vaje vawo mpakha apa a wuuzanyiwa ana yookhiriysiwa. Alama eti yookhiriya vamwilli venu, enthoonyeza wahati aka na-mweyo khwa mileele. ¹⁴ Otule ahinttelaaye okhiriya eekariwemo muumathi mwenu, mwaasa yoori akattha wahati aka.”

* ^{16:14} “Peeri-Lahayi-Rooyi” khwa luuka ya Meebereewu nzina ntthi lina maana a “nlipu wa Mwenyewe oo haaayi anikoonaaaye” * ^{17:5} Eburamu nzina ntthi maana aya “paapa woottithimisiwa.” Eburahiima nzina ntthi maana aya “paapa wa atthu a waatta”.

¹⁵ Nluku khumuza Eburahiima theenya yoori: “Muukhaawo khanteela wiiithiwa theenya Suhuriiya, ila nka eetthiwaka Suhura. ¹⁶ Kinteela omparikihiya na kimwinkhe mwaana wawo; khweele, miiyo kinimparikihiya na onteela wiiya maama wa khapila za waatta, afwalume anteela opuwa khwa ye.”

¹⁷ Aphano Eburahiima khukokhora khusijiti, ila khusala ajitheyela nroho mwawe ajuuzelaka toono: “Nlume wa nyaakha miiya eeyane mwaana? Khi Suhura ariina nyaakha tiisiini ate ampatthe mwaana?” ¹⁸ Eburahiima khumuza Nluku: “Omparikihiye Esumayila, eeye namarithi aka.”

¹⁹ Ila Nluku khunjipu: “Miyo kiniwuza khweele yoori, muukhaawo Suhura onteela ompattha mwaana, ontthaje nzina la Esiyaakha[†]. Kinteela oshuka wahati aka na-ye, na peewu yawe entaaye khwa mileele. ²⁰ Kasiila oveka wawo khwa Esumayila. Kinteela omparikihiya na kinteela omwinkha peewu ya waatta. Ye onteela wiiya paapa wa mifwalume khumi na awiri, khwa ye enteela opuwa theenya khapila ya waatta. ²¹ Ila wahati aka kinteela oshuka mmakhono wa Esiyaakha, otu anttelaaaye ovokoliwa ti Suhura wakathi otthuupu wa mwaakhani.” ²² Nawiisha ottakhula na Eburahiima, Nluku khulawa.

²³ Siikhu ethiitile, Eburahiima khunthuula mwanawe Esumayila na ooshi aavokoliweeyo vaje vawe na apale aawuzanyiyeeyo. Khulawa owaakhiriysi, nkhamma ethiipo Nluku aamuuziyeezo. ²⁴ Wakathi aakhiriyaziyevo, Eburahiima aarettiye arina nyaakha tiisiini na tiisiya ²⁵ na mwanawe Esumayila aari oretta arina nyaakha khumi na mittatthu. ²⁶ Eburahiima na mwanawe aakhiriysi siikhu moote, ²⁷ vamote na apale aavokoliweeyo owawe, mpakha amalapo apale a wuuzanyiwa.

18

Nnyizinku onimwaahiti omwinkha mwaana Eburahiima

¹ Siikhu moote, Nnyizinku aattiye ottakhula na Eburahiima vahali zaariivo miitthi miwulu-miwulu za Manre. Yaari elukuluku na yaarivo haari ya waatta, Eburahiima aarettiye eekhaliye vanlako wa heema yawe. ² Ye khulansa maasho awe khuwoona alumbe attatthu eemeliye kharipu. Aphano awooniyeovo khulankhavo aphale vaya, khusala awaathirela. Awaafiyeliyeevo khukokhora khulawa sijita.

³ Khuwooga yoori: “Mbwanaka, nkhamma kinaaye sehemu mmakhono mwenu, kinuuvekelani yoori mwihibikane vaje vaka, mwihibumuleeni vattitthiiru. ⁴ Mwiikhale vamwiivuuli wa muutthi opu mwivumule, antta ottisiwa maati vattitthiiru moose moolweenu, ⁵ wiiya mwavira vaje wa karumeyeenu, kintta weettela ethu ttiithiiru mwisapeye, yoori mwipatthe kuvu yoorutela safwari yenu.”

Yo khujipu yoori: “Kemaani! Erettikhane khwa nanna onlupaazo.”

⁶ Aphano Eburahiima khuththira eettaka nheema mwawe khumuza Suhura yoori: “Othuule miphimo miwulu mittatthu* z'oofu wa tiriku yooshapweya, okhatte wooche phaawu wa waakuuvavo.”

⁷ Nawiisha, khuththirela onzizi wawe khunthuula mwaana wa mompe woonenevacha, khumwinkha karumeyaawe yoori anshije na amwiipikhe wa waakuveyavo. ⁸ Eburahiima khunthuula mompe etile yawiipikhiwa

[†] **17:19** Nzina ntthi la Esiyaakha khwa luuka ya Meebereewu lina maana a “ye atheya”. * **18:6** Wakhula mphimo waari ofiya kiilu sapa.

saana, manteeka na leethi khuwenkha aletto apale, ye khweemela nshini wa muutthi kharipu na aletto apale eettaka oja.

⁹ Yo khumuuzela: "Khi muukhaawo Suhura ori vayi?"

Eburahiima khujipu: "Ori nheema mpho."

¹⁰ Mmote wa yo khuri: "N'oovira mwaakha, kinrutela vaje vavo attaapha, na muukhaawo onretta ampatthiye mwaana."

Suhura aari oretta ari vanlako wa heema onyoko wa Eburahiima, eettaka osiila mattakhuzi apale aari ottakhuliwaaye. ¹¹ Eburahiima na Suhura aari a wuuluvala na kuvu, na Suhura zanvireliye siikhu zoovokola. ¹² Ye khusala ajitheyla nroho mwawee otthwe ajuuzelaka yoori: "Khwa nanna eti nuuluvaliyeezo miiyo na mbwanaaka, kinteela wiiyana furaha yaya eto?"

¹³ Aphano Nnyizinku khumuuzela Eburahiima yoori: "Muukhaawo ontheya-ni? Wala alupisiwa-ni yoori 'kinteela ompattha toovi mwaana kuuluvaliye?' ¹⁴ Ewaapho ethu yoolipa mmakhono wa Nnyizinku? Nkhamma ethiipo kilupiyeyeo yoori n'oovira mwaakha kinta wuuthotola, wakathi aya otthuupo Suhura onteela ompattha mwaana wanlume."

¹⁵ Mwaasa wa woova Suhura khusala akhana yoori: "Akitheyenee." Ye khuri: "Khahie toowo, khweele weeyo watheya."

Nnyizinku onimuuzza Eburahiima opwechiwa wa Sotooma na Komoora

¹⁶ Wakathi alumbe apale attathu alankhiyevo eeshukhelaka nti wa Sotooma, Eburahiima alankhiye khusala awaaperekha alawaka oleezanana.

¹⁷ Aphano Nnyizinku khujuuzela mwennyeweru yoori: "Akinta kimuuze Eburahiima ethu kinttelaaye oretta? ¹⁸ Khweele-khweele Eburahiima onteela wiiya paapa w'oomathi nwulweene woowahi; khwa ye, kinteela oparikiya khapila zooshi za voolumwenku. ¹⁹ Maana miiyo kanthawula ye yoori awaanozele aanaawe na omathaawe, weettettela saana tariki ya Nnyizinku, arettaka etile yiyyiye ya shariya na yoolotteya, yoori miiyo Nnyizinku kirette khwa Eburahiima etile kaahitiyeeyo." ²⁰ Nnyizinku khumuuzza Eburahiima yoori; "Kinsiila nkhuwo yoori atthu a Sotooma na Komoora anretta vitthu zootakhala na twampi zaya pi zozoziti. ²¹ Kineetta ottuukhu kilawe koone kхиima za twampi epo anrettaazo nkhamma khweele pi ethiipo kinsilaazo, kinttela ohakiki." ²² Attaaphale, alumbe apale awiri khusala alawa Sotooma, ila Nnyizinku khusala ari vamote na Eburahiima.

Eburahiima oninvekela Nnyizinku oswaamihiva nti wa Sotooma na Komoora

²³ Eburahiima khunsusela Nnyizinku khumuuzela yoori: "Onttela owooleela vamote anashariya na anapaathuli? ²⁴ Khi amana eeyawo atthu hamusiini anashariya, ompwecha sitati etile? Khunteela owaaswaamihi mwaasa wa atthu apo hamusiini anashariya? ²⁵ Ohiyiwe weeyo wooretta ethu nkhamma eto, yoowuleela vamote anashariya na anapaathuli. Kawaari oteela owaahukhunu anashariya mwaasa wa vitthu zoorettiwa pi anapaathuli. Weeyo o namaphuka w'oolumwenku wooshi, khunteela ophuka na shariya?"

²⁶ Nnyizinku khujipu araka: "Amana kifiya Sotooma kiwaasikana anashariya hamusiini ari nsitati ntumphule, kinttela oswaamihiva sitati yaya etile kiiswa ya yo."

²⁷ Eburahiima khurutela ottakhula araka: "Okiswaamihiva na ruhusa kirina yoottakhulana weeyo Mbwanaaka, keeyaru ottophe na fuutha. ²⁸ Khi amana asaleelaka athaanu yoori afiyele hamusiini, onipwecha sitati etile mwaasa wa apa ansaleelaaye?"

Mbwana khuri: "Amana kiwaasikana arupayiini na athaanu akimpwecha."

²⁹ Khumuuzela theenya; "Khi amana owaasikana arupayiini?"

Mbwana khujipu: "Wala, akimpwechawo mwaasa wa apale arupayiini."

³⁰ Khuvira amuuzelaka theenya: "Mbwanaaka, ohikatipukhe amana kirutela ottakhula: khi amana owaasikana anashariya talaathiini?"

Mbwana khuri: "Amana kiwaasikanawo talaathiini akinretta hatha ethu."

³¹ Eburahiima khurutela olupa yoori: "Okiswaamihi na nthiti kiriinaayo la wuuttakhulana Mbwanaaka, khi amana owaasikana anashariya eshirini?"

Ye khuri: "Akimpwechawo mwaasa wa anashariya apale eshirini."

³² Khulupa theenya Eburahiima: "Mbwanaaka, ohikatipukhe, kiniwuuzela swaafu moote ethiiti paasi; khi amana owaasikanawo anashariya khumi?"

Ye khunjipu: "Akimpwechawo mwaasa wa anashariya apale khumi."

³³ Nawiisha Nyizinku ottakhula na Eburahiima, khulankha khusala alawa. Na-ye Eburahiima khurutela owawe.

19

Opwechiwa sitati ya Sotooma na wuusurukha wa Loothi

¹ Malayikha apale mawiri khufiya Sotooma makaaripi, Loothi aarettiye eekhaliye vanlako^{*} wa sitati ethiitile, ye nawoona malayikha apale khusala athepeesa atthirelaka. N'oofiyela khukokhora khusijiti. ² Khuwooza yoori: "Ambwana zaka kookholani moolu, kintakha mwisapupe owaka miyo karumyeen; moose moolweenu na mwilale, mwilawé meesho supuyene."

Yo khujipu yoori: "Khinhithajiya, fweeyo ninwahi olala vaparasa vee-takale."

³ Loothi khuwaakhanyerela na kuvu mpakha yo okhupali olawa omaka owawe. Ye khurumisa wiipikhiwa ethhu-yooja ya nnofu na khoochiwa phaawu yoohiina fwaramento, aletto apale khuja.

⁴ Ila ahinalawé olala, eetta ota alumé ooshi a sitati ethiitile waaza attunkhulu mpakha mashaapu khuzukulela nyuupa ya Loothi. ⁵ Khusala anyakula ankhuwelaka Loothi araka; "Alume apa atiiyeyo nnyupa mwawo mphu osikhu otthuupu ari vayi? Owaasarulele vaje apha, fweeyo nintakha niwaalalane".

⁶ Loothi khusaruwela vaje, khufuka nlako awe afukelaka onyoko wawe.

⁷ Khuwooza yoori: "Safwatali ajamaazaku; mwihirette ethu eto otakhala

⁸ Mweyo! Miyo kinaaye aanaaka awiri ahiniwaajuaaye alumé. Kintta owinkhani atthaapo, mwiwaarettele wakhula etile mwintakhaaye. Ila mwihiwaarettele ethu yootakhala aletto apa ata nnyupa mwaka, na miyo kina yoowiinanel."

⁹ Yo khuri: "Oleevo apha! Weeyo o mmalapo mmuti mphu, ontakha ojinkhe ofwalume na mmuti mwetthu? Fweeyo nintta wuurettela vitthu zooziti epi naari otakhaaye owaarettela apo." Aphano yo khunsukhuma Loothi, khusala asusela nlako awe yoori apwechaze. ¹⁰ N'ooreetta toole, aletto apale khunkhola Loothi khumfutthela nnyupa khufuka nlako, ¹¹ na

* ^{19:1} 'Nlako wa sitati' yaari puuro yaazoweriweevo zaari ottakhuliwakaavo milattu na vitthu za zanshara.

khuwoola maasho alumé apale a Sotooma aari vanlako wa Loothi. Waaza attunkhulu mpakha mashaapu khusala apapasela nlako khuhisala asikana.

¹² Alume apale khumuuzela Loothi: “Onaaye ajaama akina nsitati mphu? Oleemo, owaathuule aanaawo, akhwewo, muukhaawo na ooshi apale eeyiye aawo, ¹³ mwaasa aya nateela opwecha sitati eti. Nnyizinku asiila nkhuwo nwulweene wa vitthu zootakhala anrettaazo atthu a Sotooma, apha aniruma yoori nite nipweche sitati yaya eti.”

¹⁴ Aphano ye khulawa owooza akhwewe, apale aari weettelaaye owaarala aanaawe yoori: “Mwileemo nsitati mphu, maana Nnyizinku ontela opwecha.” Ila akhwewe apale khusala oona nkhamma nzaha.

¹⁵ Lifwajiri, malayikha apale khusala amuuza Loothi antumereraka yoori: “Olankhe nasaapi ethiiti, onthuule muukhaawo na aanaawo oowiiri mwileemo mphu. N’oohiretti toowo, amana etaka hukhumu nsitati mphu mweeyo mwintta ofwa.”

¹⁶ Khusala arupaza, malayikha apale khuwaakhola makhono, ye na muukhaawe na aanaawe oowiiri khuwaalawana othetekeli, mwaasa wa Nnyizinku wiiyana huruma na-ye. ¹⁷ Paata yoolaziwamo nsitati mphule, nlayikha limote khumuua yoori: “Tthira wuusuru ohaayi awo, na oheeke se nyuma wala oheemele hatha vahali ohifiyeeni omwaako yoori ohipweth-eye.”

¹⁸ Loothi khujipu; “Toowo wala safwatali ambwana zaka! ¹⁹ Wakirettela saana, khukoonela huruma venkivene, khuusuru ohaayi aka. Ila onyaako khu woolepawo, opwechiwa wa sitati eti ontta okisikana kihinafiye. ²⁰ Kharipu apho ewaapho sitati ttiithhiiru, kinwahi otthirela ottuukho. Hatha nkhamma yeetta opushuwa, mwiliklikhe kitthirele ottuukho kuusurukhe.”

²¹ Nlayikha khujipu yoori: “Kakhupali eto ovekiyeeyo, akinteela opwecha sitati yaya eto olupiyeeyo. ²² Ila waakuve olawe nasaapi ethiiti, miyo akinretta hatha ethu, weeyo ohifiyeeni ohali ontaawo.” Ti eto sitati yaya eto eniitheliwaaye Zowaari†.

²³ Njuwa litthamuwaka na-ye Loothi afiyaka nti wa Zowaari. ²⁴ Aphano Nnyizinku khukwisa mawe a moottho otulu, akwiselaka Sotooma na Komoora. ²⁵ Khupwecha sitati epile na miti zaattamananiyeeyo, na atthu aya apale aari wiikhalaamo na tthuttu yaya. ²⁶ Ila muukha wa Loothi khuzukuluwa khweekesa onyoko ohali aari olankhaawo, khuthatuwa khwiya sanamu ya mwiinyu.

²⁷ Supuyeene Eburahiima aalankhiye khulawa puuro etile aari ottakhlanaavo Nnyizinku. ²⁸ Khweekesa phantte ya Sotooma na Komoora na miti zooshi za shiini yaya etile, khusala oona loosi la waatta leettaka otthuwela mmuti mphule nkhamma njocho lookhoziwa.

²⁹ Nkathi woopwecha sitati zooshi za tuniya etile, Nluku khufikhiri etile aavekeliweeyo ti Eburahiima, khumuusuru Loothi vakatthi wa pala yaaretikhaniyeeyo sitati etile aari wiikhalaaye.

Peewuya Loothi, na nchina la Amowaabu na Amooni

³⁰ Loothi eetta woova wiikhala Zowaari, khuthama na aanaawe oowiiri khusala eekhala omwaako. Oottaatthu khusala eekhala nlikurakuza.

† ^{19:22} “Zowaari” khwa luuka ya Meebereewu nzina ntthi lina maana a “ttiithhiiru”.

³¹ Siikhu moote, mwanawe otu nwulu khumuza otu ntiitthi yoori: “Papeetthu ooluvala na nti opu niriyo khaamo alume oonirala yoori niwaapatthe aana, nkhamo enrettikhanaazo olumwenku wooshi. ³² Nlawe nituhule viinyu ninnywise papeetthu ahapaliwe, niwahi orapalelana anivokolele aana, yoori peewu ya papeetthu ehiishe.”

³³ Osikhu otthuupule khuthuula viinyu khunnywisa papaaya, mwaana otu nwulu aya khulawa khulalana papaawe. Papanthu woohijuwi wakathi arapaleliyeevo wala alankhiyeevo.

³⁴ Mmeesho mwaya, otule nwulu khumuza ttwiye: “Taana osikhu karapalelana paapa, apho osikhu opu wa leelo nlawe nihapalise na weeyo olawe warapalelanelane zwaamu yawo. Anivokolele aana yoori peewu ya papeetthu ehiishe”. ³⁵ Osikhu otthuupule khumwinkha papaaya viinyu swaafu yaphiiri, na-ye otu ntiitthi aya khulawa khulalana, theenya papant-thu khuhijuwi wakathi arapaleliyeevo wala alankhiyeevo.

³⁶ Aana apale oowiri khwiimitta erukku ya papaaya. ³⁷ Otu nwulu aya khumpattha mwaana wanlume khuntthaja nzina la Mowaabu, ye paapa wa Amowaabu apa ariiwo mpakha leelo. ³⁸ Elottelanaka otule ntiitthi aya khumpattha mwaana wanlume khuntthaja nzina la Ben-Ami[†], ye paapa wa Amooni, apa ariiwo mpakha leelo.

20

Eburahiima na Apimeekhi

¹ Eburahiima aalankhiye Manre khulawa nti wa Nikeepu, khwiikhala enakaththi-nakaththi ya Kateeshi na Shuuri. Khuthamela theenya nti wa Kerari. ² Ottuukhule, Eburahiima aalupiye yoori Suhura nlupuwe, khupe ari muukhaawe. Aphano Apimeekhi mfwalume wa nti aya opule, khuruma weetteliwa Suhura, ye khunthuula.

³ Osikhu aya, Nluku khunteela Apimeekhi khusala amuuza nkatthi wa jozi yoori: “Ontta ofwa mwaasa wa muukha otu onthuuliyeeyo, ye onaaye mannawee.”

⁴ Ila Apimeekhi aari ahinarapalelanelane muukha otule, ye khujipu: “Mb-wana, onttela okuula miyo na atthu aka woohiivo hatha paathuli? ⁵ Ti Eburahiima aakuuziye yoori Suhura nlupuwe! Na Suhura khukuza ethiipo yoori nlupuwe. Miyo karetta eti na rooho y'ookemaani woohijuwivo ethu.”

⁶ Nluku khunjipu njozi ntumphule yoori: “Miyo kajuwa yoori vitthu epi wareeta na rooho y'ookemaani. Ti eto miyo kiwiinaneliyeyo yoori ohikikose, pi apho kihuutakheleeni onsapa muukha oto. ⁷ Apho, onrutisele mannawe muukha oto. Ye napiyu, ontta wuulompela yoori ohifwe, ila amana ohinrutiseli kiniwuza khweele yoori ontta ofwa weeyo na zooshi epi ziiyiye zaawo.”

⁸ N'oolankha mmeesho mwaya supu, Apimeekhi khuwaakhuwela mawaziiri awe khusala awooza epile aalotthiyeezo, yo khwiiya awooova channu. ⁹ Nawiisha, khuruma okhuweliwa Eburahiima khusala amuuzelaa yoori: “Niini eti oniretteliyeeyo? Kookosela-ni okikwiselaka paathuli ya twampi khuluyeene nkhamo eti, miyo na atthu aka? Ethu okiretteliyeeyo khinrettelaniwaka. ¹⁰ Woopuveliye niini okirettelaka vitthu nkhamo epi?”

¹¹ Eburahiima khunjipu: “Miyo kaari woona yoori atthu a nti opu khani-moova Nluku, antta okuula mwaasa wa muukhaaka. ¹² Na khweele phantte kiina nlupwaaka, mwaana wa paapa ila khahiyoo mwaana wa maama. Ti

[†] **19:38** Ben-Ami khwa luuka ya Meebereewu nzina ntthi lina maana a “mwaana wa jamaayaku”.

nanna afiyeleliyeeyo wiiya muukhaaka. ¹³ Wakathi Nluku akilaziyeemo mmuti wa apapazaku, kaamuuziye muukhaaka yoori: ‘Safwatali kintta wuvukela, wakhula vahali nimfiyaavo osala olupa yoori nlupwaaka’.”

¹⁴ Aphano Apimeleekhi khuthuula pwittipwithi, mompe na amwiith-waana aalume na aakha khumwinkha Eburahiima na theenya khunrutisela muukhaawe. ¹⁵ Apimeleekhi khuri: “Nti opu pu waaka ohiiyane shaakha, wikhale wakhula vahali ontakhaavo.”

¹⁶ Khumuza Suhura yoori; “Kamwinka nlupuwo mizurukhu za feeta alufu, ajamaazo ooshi ajuwe yoori khutthekeeni hatha etthu, na ahiiyeye antakhaaye owaakanyerela.”

¹⁷⁻¹⁸ Nnyizinku aawaarettiye aakha ooshi a vaje wa Apimeleekhi yoori ahisala avokola, mwaasa wa epile zanrettikhaneliyeeyo Suhura muukha wa Eburahiima. Aphano Eburahiima khunvekela Nluku zwaamu ya Apimeleekhi, Nluku khunvonisa vamote na muukhaawe na akarumeyaawe aakha yoori asala avokola.

21

Ovokoliwa wa Esiyaakha

¹ Paata ya toole, Nnyizinku khumparikiya Suhura, khunrettela etile aamwaahitiyeeyo. ² Suhura khwiimittha khumpattha mwaana wa Eburahiima ari wa wuuluvala, wakathi otthuupule Nluku aamuuziyeeyo. ³ Mwaana otule aavokoliweeyo ti Suhura, Eburahiima khuntthaja nzina la Esiyaakha*. ⁴ Siikhu yanaane, Eburahiima khunthuula mwaana otule khulawa onkhiriysisa nkhama ethiipo Nluku anrumiyeelo. ⁵ Wakathi Eburahiima ampatthiy-eovo mwanawee Esiyaakha, aarettiye arina nyaakha miya.

⁶ Suhura khuri: “Nluku akinkha otheya, na atthu ooshi apale anttelaaye osiila anttela otheya vamote na-miyo.

⁷ Paani aari waakanyeraaye yoori Eburahiima aari oteela ompatthela mwaana Suhura? Na wuuluvala wawe, miyo kampatthela mwaana!”

⁸ Mwaana otule khusala awula mpakha ofiyelela oligha nziwa. Alikhiyeovo nziwa mwaana otule, papaawe khuretta njampo la furaha.

Wiikariwa wa Esumayila na Hajira

⁹ Ila Suhura khumoona Esumayila mwaana wa Hajira mmisuri, otule aavokoliweeyo ti Eburahiima anveyisaka mwanawee. ¹⁰ Suhura khulawa omuuza Eburahiima yoori: “Omwiikare njaazi otule na mwanawee. Ye khanteela orithi vamote na mwanaka Esiyaakha.”

¹¹ Eburahiima khwiija woozinkireya na kuvu na mattakhuzi apale mwaasa wa Esumayila wiiya mwanawee. ¹² Aphano Nluku khumuza Eburahiima yoori: “Ohizinkireye mwaasa wa mwanawo na njaazi awo, osiileze etile aniwuzaaye Suhura, mwaasa yoori peewu yawo enttela olankha vakatthi wa Esiyaakha. ¹³ Mwaana wa njaazi otule onteela wiiyana omathi wa waatta mwaasa yoori na-ye peewu yawo.”

¹⁴ Mmeesho mwaya, Eburahiima khuthuula phaawu na ttompwiyo ya maati, khunvikelisa Hajira khunleeza vamote na mwanawee. Yo khusala alawa ajeettettelaka n'yaara ya Beeresheba ahijuwaka ohali anttaawo.

¹⁵ Wakathi amwiisheliyeovo maati ntompwiyo, ye khunlikha mwanawee nshini wa muuuthi. ¹⁶ Khulankha khulawa khwiikhala ohali woolepawo vattiithiiru na okhule aariwo mwanawee, mwaasa yoori khaari otakha omoona mwanawee afwaka. Eekhaliye ethiipile, khusala alila.

* ^{21:3} ‘Esiyaakha’ maana aya ‘atheya’.

¹⁷ Nluku khusila theenya huula ya mwaana otule eettaka olila. Nlayikha la Nluku khukhuwa pinkuuni linkhuwelaka Hajira, khumuza yoori: “Wakafilikhela-ni Hajira? Ohoove, Nluku asiila huula yawe mwaana oto alilaka vahali ariivo. ¹⁸ Olankhe onlanse mwanawo onkholele nkhono, phantte yawe kinteela waattisa omathaawee.”

¹⁹ Elottelanaka Nluku khunthroonyeza Hajira nlipu wa maati, khulawa khuttekhelela ttompwiyo yawe khunnywisa mwanawee.

²⁰ Esumayila khusala awula mmakhono wa Nluku. Ye aari wiikhala n'yaara na aari njuwi wa weesa mattetthe. ²¹ Aari wiikhala n'yaara ya Paraani, mamaawee khumweekesela muukha wa Misuri khunlooza.

Osiilana wa Eburahiima na Apimeeleekhi

²² Wakathi aya opo, Apimeeleekhi aalokoziwe ti Flikhoole namalokozela wa anajanka, khumuza Eburahiima yoori: “Nluku ori vamote na-weyo khwa wakhula etile onrettaaye. ²³ Nasaapi ethiiti olaphe khwa nzina la Nluku yoori khunteela okihata miiyo wala aanaaka ama otuulwaka, nkhama ethiipile kuuretteliyeego zooshapweya, na-miyo okirettele ethiipo na mmuti mphu oniikhalaamo.”

²⁴ Khujipu Eburahiima araka: “Miiyo kinlapha”.

²⁵ Attaaphale Eburahiima khusala ajiliza mwaasa wa nlipu aanyakanyiweeyo pi akarumeyaawe Apimeeleekhi. ²⁶ Apimeeleekhi khunjipu: “Miiyo akaajuviyevo etthu na khawaakuukiye, kintta osilaru nasaapi ethiiti.”

²⁷ Aphano Eburahiima khuthuula pwittipwithi na mompe khumwinkha Apimeeleekhi. Oowiiri aya khusilana. ²⁸ Elottelanaka Eburahiima khuphakula pwittipwithi sapa za nliphanko lawe. ²⁹ Apimeeleekhi khumuuzela yoori: “Pwittipwithi epo sapa omphakulaaye maana aya niini?”

³⁰ Eburahiima khujipu: “Okhupalele pwittipwithi epi sapa kiniwinkhaaye khwa lifunku looshaahiti yoori nlipu opu ti miyo kithipiyeeyo.”

³¹ Pi apho puuro yaya eto eniitthiwaaye Beeresheba[†], mwaasa yoori oowiiri aya aalaphisaniye attaapho.

³² Paata yawiisha oosilana opule Beeresheba okhule aariwo, Apimeeleekhi na Flikhoole namalokozela wa anajanka, khurutela nti wa Afiliishiti. ³³ Eburahiima n'oosala Beeresheba okhule khuzala muutthi wa nkolokope, khumwaaputu Nnyizinku, Nluku wa Mileele. ³⁴ Ye khwiikhala nti wa Afiliishiti khwa nyaakha za waatta.

22

Nnyizinku ontakha woona amini ya Eburahiima

¹ Paata yoovira nyaakha, Nluku aamweeziye Eburahiima, khunkhuwela araka: “Eburahiima!”

Ye khujipu: “Lapeekha!”

² Nluku khumuza araka: “Onthuule mwanawo Esiyaakha, othuto mmote oriinaaye onimphetachaaye, olawe mpakha nti wa Moriya, vamwaako oriilye ottuukho kinttelaaye wuuthoonyeza, onrette twaha yoolukuziwa”.

³ Ye khulankha mmeesho mwaya lifwajiri khunthuula puuru awe khufukavo zaana zawe, khuwaathuula akarumeyaawe awiri na mwanawee Esiyaakha. Khurema khuuni zoolawa orettela twaha yoolukuziwa, khusala

[†] **21:31** Beeresheba maana aya “nlipu woolaphisaniwa” ama “nlipu wa sapa”.

alawa ottuukhule Nluku aamuuziyeewo. ⁴ Siikhu yattaatthu, Eburahiima khweesa maasho awe khoona puuro etile ari ohali woolepawo. ⁵ Ye khuwoza akarumeyaawe apale yoori: "Mwisale attaapha na puuru oto, miiyo na shapu oto nintta aphale, ninttela omwaaputu Nluku. Amana niisha nintta oruti nite niiye vamote na-mweyo."

⁶ Eburahiima khuthuula khuuni epile aari weettelaaye orettela twaha yoolukuziwa, khuntikha Esiyaakha mmafuzi mwawee. Ye khuthuula eesu na moottho khusala alawa. ⁷ Esiyaakha khunkhuvela papaaawe yoori: "Mweyo paapa!"

Ye khujipu: "Lape mwanaka!"

Aphano Esiyaakha khumuuzela papaaawe: "Nathuula moottho na khuuni, khi pwittipwithi yoolawa otwahi eri vayi?"

⁸ Ye khujipu araka: "Nluku ti ye anjuwaaye pwittipwithi ninttelaaye orettela twaha yoolukuziwa mwanaka." Yo khusala alawa vamote.

⁹ N'oofiya ohali okhule aathoonyeziweewo ti Nluku, khunjeka alitaari vatulu vase khuthatelavo khuuni. Khumfuka mwanawee Esiyaakha khuntha vatulu wa khuuni. ¹⁰ Khuthuula eesu, khulansa makhono awe yoori antwahi mwanawee. ¹¹ Ila nlayikha la Nnyizinku khukhuwa pinkuuni liraka: "Eburahiima! Eburahiima!"

Ye khujipu: "Lapeekha!"

¹² Khumuza yoori: "Ohimwaavulele eesu shapu oto, na ohinrettele hatha ethtu. Aphano kinjuwa yoori onimoova Nluku, mwaasa woohikikhattazi mwanawo mmote othuuto oriina."

¹³ Eburahiima khuzukuluwa khoona pwittipwithi ewaiyiye manyaka aya valikukhu. Ye khulawa khuthuula khurettela twaha yoolukuziwa khwa zwaamu ya mwanawee. ¹⁴ Aphano khutthaja nzina puuro etile "Nnyizinku ti ye anjuwaaye". Mpakha eleelo eti oniittheliwavo yoori: "omwaako wa Nnyizinku ti ye anjuwaaye".

¹⁵ Elottelanaka, nlayikha la Nnyizinku khukhuwa theenya pinkuuni linkhuvwelaka Eburahiima. ¹⁶ Khumuza yoori: "Nnyizinku ari: 'Kinjilaphela ki mwennyeweru, mwaasa weeyo oretta etile kiwuuziyeeyo, ohikikhattazi mwanawo mmote paasi oriinaayo, ¹⁷ khweele, kinteela wuuparikhiya na kiwinkhe peewu ya waatta nkhamma mathttowa o'otulu na mishaka za mmattima, yo anteela othuula nti wa maatuwi aya. ¹⁸ Atthu ooshi a voolumwenku anteela oparikhiyiwa, mwaasa wa peewu yawo, maana weeyo wakishututela.'

¹⁹ Eburahiima na Esiyaakha khurutela aphale aawaalikhiyeevo akarumeyaawe. Ooshi khurutela Beeresheba ohali Eburahiima aari wiikhalaawo.

Aana a Nahoori

²⁰ N'ooovira vitthu epile khuuziwa Eburahiima oriwa: "Miilika avokoleliwa aana ti ttwiyo Nahoori; ²¹ w'oomwanzo aya nzina lawe ti Wuuzi, na ttwiyo Buuzi, khulotteliwa ti Kemuweeli, papaaawe Aramu, ²² Keseeti, Haazo, Pil-itashi, Yitalafu, na Betuweeli." ²³ Betuweeli khunvokola Repeekha. Aana apo wanaane aawaavokoliye ti Miilika na Nahoori ttwiye Eburahiima. ²⁴ Nahoori aarina muukha nkinoko aari wiithiwaaye Rewuma, na-ye avokoleliye aana; Teepa, Kahaamu, Tahaashi na Maaka.

¹ Suhura eekhaliye nyaakha miiya na eshiriini na sapa. ² Khufwa Kiriyati-Aarapa (oniittheliwaawo Heporooni) tuniya ya Kanaani. Eburahiima khusala alila na ojikhupanyera ofwa wa Suhura.

³ Ye khunlikha muukhaawe ari woofwa, khulawa ottakhulana Ahiiti yoori: ⁴ “Miiyo ki mmalapo na ki nletto mmuti mphu; ila kinuuvekelani okinkha ruhusa ya wiifyana vilalo yaka mmuti mwenu mphu, yoori kinzikhemmo muukhaaka.”

⁵ Ahiiti apale khunjipu Eburahiima yoori: ⁶ “Osileze mbwaneetthu, fweeyo niniwinkha hishma nkama mfwalume wa Nluku. Apho olawe wanzikhe muukhaawo wakhula vilalo etile enuufwayaaye. Khaavo mmote wa fwexo antakhaaye wuukhattaza khapuri yonzikhavo muukhaawo.”

⁷ Aphano Eburahiima khulankha khwiinama omaasho wa Ahiiti, ennyewe nti opule. ⁸ Khuwuza yoori: “Nkama khweele mwinaaye niiya yookikhupalela onzikha muukhaaka, mwikivekelele Eforoni, mwaana wa Zohaari, ⁹ yoori akuuanyeze likurakuza la Makhipeela liriye mmwiinano wa nshapalawe. Miiyo kininripha hisapu yoolikanā mooshi moonaka, yoori likurakuza laya nthno liiye vilalo yoowaazikhamo ajamaazaku”.

¹⁰ Eforoni, Nhiti otule, aarettiye eekhaliye vamote na attunkhulu a sitati ethiitile, ye khunjipu Eburahiima vakatthi wa Ahiiti ooshi aari vanlako wa sitati ethiitile yoori: ¹¹ “Wala mbwanaaka! Okisileze, miiyo kiniwinkha nshapa na likurakuza liriye ntumpho, kiniwinkha atthu ooshi apa ariiye apha eettaka woona. Olawe wanzikhe muufwi awo.”

¹² Eburahiima khwiinama swaafu yaphiiri, omaasho wa atthu apale a mmuti mphule. ¹³ Ye khumuuzu Eforoni atthu ooshi eettaka osiila yoori: “Safwatali mwikisileze, kintta oriphia hisapu la nshapa nthile. Okhupalele yoori kiwahi onzikhamo muukhaaka.”

¹⁴ Eforoni khunjipu Eburahiima yoori: ¹⁵ “Okisileze mbwanaaka! Nti aya opo pu wa mizurukhu za feeta miiya nne. Eto yaya niini miiyo na weeyo? Wanzikhemmo muufwi awo.”

¹⁶ Hisapu etile aalupiyeeyo Eforoni atthu ooshi asiilaka, Eburahiima khukhupalela. Khuphima miphimo miiya nne za mizurukhu wa feeta khumwinkha, nkama ethiipo aari ophimakaazo anamuuzanyisa.

¹⁷⁻¹⁸ Waaza attaapho nshapa la Eforoni laariiye Makhipeela kharipu na Manre, na likurakuza laariimo na miitthi zooshi khwinkhiwa Eburahiima. Ahiiti ooshi apale aari vanlako wa sitati etile eettaka woona. ¹⁹ Wakathi enkhiweeo nti aya opule, khunthuula muukhaawe Suhura khulawa khunzikha nlilikurakuza la Makhipeela kharipu na Manre eriiye Heporooni, tuniya ya Kanaani. ²⁰ Khwa ethiipo, khuhakikihiwa nshapa nthile na likurakuza laya pi Ahiiti wiiya vilalo ya Eburahiima.

24

Ooola wa Esiyaakha

¹ Eburahiima aarettiye ooluvaliye arina nyaakha za waatta, Nnyizinku amparikhiyiye khwa zooshi. ² Siikhu moote, khumuuzu karumeya nwulu wa vaje vawe aari weettettisaaye mali zawe zooshi aariinaazo, araka: “Othuule nkono awo otthe vathi wa liphaja laka yoori ³ kuulaphise khwa nzina la Nnyizinku, Nluku wa pinkuuni na vathi, yoori khunteela omweekesa muukha wa nti otthuupu kiniikhalaaye wa wiiya mwaana wa Akanaani. ⁴ Ila olankhe olawe nti w'owaka wamweekese muukha vakatthi wa ajamaazaku, ate eeye muukha wa Esiyaakha.”

⁵ Karumeya otule khumuuzela yoori: "Khi amana muukha aya oto ahitakhi ota na-miyo mmuti mphu, kinthuule mwanawo kinlawane nti otthu-upo olankhiyeeyo?"

⁶ Eburahiima khunjipu: "Phoole! Hatha vattithiiru ohirette onlawana mwanaka.

⁷ Nnyizinku, Nluku wa pinkuuni akilaza vaje wa apapazaku nti wa ajamaazaku khukaahiti na olapha araka: 'Nti opu kinttela winkha peewu yawo.' Ye ontta operekha nlayikha lawe yoori luulokoze, omweettele muukha yoori ate araliwe ti mwanaka Esiyaakha. ⁸ Amana muukha aya oto ahitakhi ota na-weyo, olapha wawo oniiya woofujeya. Ila ohiyi wonthuula mwanaka onlawana." ⁹ Aphano karumeya otule khuthuula nkhono awe khuttha vathi wa liphaja la Eburahiima mbwanaawe. Khulapha yoori aari weettela oretta ethhiipile ooziveezeo.

¹⁰ Karumeya otule khuthuula enkamiiya khumi za mbwanaawe na majathi apale enkhiweeyo khusala alawa nti wa Mezapotaaniya sitati ya Nahoori. ¹¹ Afiiyeevo, njuwa looveva wakathi opule aakha anttelakaaye ottekha maati, khukokhorisa enkamiiya zawe epile onlipu kharipu ya sitati.

¹² Attaaphale khusala alompa araka: "Oh! Nnyizinku, Nluku wa mbwanaaka Eburahiima, kinuuvekela yoori siikhu eti ya leelo okiparikhije, na onthonyeze pheta ya waamineya mbwanaaka Eburahiima.

¹³ Onikoonelaavo apha kiri wa weemela kharipu na nlipu, aanaakha a atthu a sitati eti antakaavo ottekha maati. ¹⁴ Mwaari othuuto kinttelaaye omuuza yoori: 'Wiinamise yuuku yawo okimeele maati kinywe,' ye khulupa yoori: 'Apa nywa, na kintta onywisa enkamiiya zawo,' eeye othuuto onthawuleliyeeyo Esiyaakha. Ti ethtu enttelaaaye okiuyisa yoori wanthonoyeza pheta ya waamineya mbwanaaka Eburahiima."

¹⁵ Ahineeshe olompa, nasaapiru onimoona Rapekha mwaana wa Betuweeli eettaka ota alankhaka nsitati athuuliye yuuku attkiye valifuzi. Betuweeli aari mwaana wa Miilika muukha wa Nahoori, ttwiye Eburahiima.

¹⁶ Rapekha aari mwaari wooshapweya channu woohinjuwi nlume, ye khwishukhela vanlipu khuttekha maati khwiitaaza yuuku yawe khuwelela.

¹⁷ Karumeya otule khulankha khusala anthirela, khumuuzza yoori: "Safwatali kimeele maati apo ari n'yuku mwawo kinywe."

¹⁸ Ye khujipu araka: "Mwiinyi apa mwinywe." Khurula yuuku khukholelala mmakhono khumwinkha khunywa.

¹⁹ Nawiisha omwinkha maati, khumuuzza yoori: "Kinttela ottekha makina theenya kinkhe enkamiiya zenu zinywe mpakha zooshi ziishe" ²⁰ Nasaapiru khwiitthela maati apale n'yopo zaari onywaamo nyama, khwaakuva khulawa vanlipu ottekha swaafu za waatta yoori zinywe enkamiiya zooshi. ²¹ Mwinyi otule khusala anyamaliye amweekesaka mwaari otule saanene yoori ajuwe nkhamma Nnyizinku aparikhija safwari yawe ama wala.

²² Ziishiyeevo onywa enkamiiya epile, khulaza kharawu ya thahapu ya karaama sitha na kakhana piiri za thahapu zaari ochiraaye karaama miyya olemela waya khunwalisa mmakhono mwawewe. ²³ Khumuuzela yoori: "Weeyo o mwaana waani? Safwatali nkakuuze nkhamma wa papaawo ewaakho puuro y'oolalawo miiyo na ashirkhaaka apa."

²⁴ Ye khujipu: "Miyo ki mwaana wa Miilika na Nahoori. ²⁵ Onti ewaakho puuro yoolalawo mweeyo, na nyaani za waatta zooya enkamiiya zenu."

²⁶ Aphano karumeya otule khukokhora khumwaaputu Nnyizinku, ²⁷ araka: "Asifiwiwe Nnyizinku, Nluku wa mbwanaaka Eburahiima,

ahisahaweeni onthoonyeza pheta yawe ya waamineya, maana akilokoza mpakha vaje wa ajamaaze mbwanaaka.”

²⁸ Aphano mwaari otule khutthira eettaka owawe, khuwooza ajamaaze vitthu zaarettikhaniyeezo. ²⁹ Rapekha arina nlupuwe aari wiithiwaaye Labani. Ye khutthira eettaka onlipu yoori amoone ntthu aya otule. ³⁰ Mwaasa wa woona kharawu na kakhana aawalisiweeyo nlupuwe, na khusiila vitthu ooziweeyo Rapekha ti nlume otule, ye khulankha khusala alawa omoona nlume otule ottuukhule aariwo na enkamiiya zawe nshini wa nlipu. ³¹ Labani khuri: “Ote okhuno, weeyo wooparikhiiyiwa ti Nnyizinku! Weekhalela-ni veetakale apho? Kawaattalele puuro ontì na vahali woopwehavo enkamiiya zawo.”

³² Labani khuta na karumeya otule mpakha owawe, khuruma wiishushiwa mapwattha vankamiiya epile na khwinkhiwa nyaani yoori zije. Khwinkhiwa maati yoori oose moolu awe na atthu apale aarinaaye. ³³ Nawiisha khutiisiwa ethu-yooja khwinkhiwa, ila karumeya otule khuri: “Akinja kihaazeeni olupa eti kaateeliyeeyo.”

Labani khumuuzu yoori: “Haya lupa.”

³⁴ Aphano khwaaza olupa araka: “Miiyo ki karumeya wa Eburahiima. ³⁵ Nnyizinku amparikhya venkivene, amwinkha maali khwiya woojuwanikha; onaaye pwittipwitthi na mompe, feeta na thahapu, akarumeya aalume na aakha, enkamiiya na apuuru. ³⁶ Suhura muukha wa mbwanaaka Eburahiima, anvokola mwaanaa ooluvaliye. Mwaanaa aya oto amwinkha vitthu zooshi ariinaazo. ³⁷ Mbwanaaka khukilaphisa araka: ‘Nti opu kiniikhalaaye ohimweekesemo muukha wa aana a Akanaani. ³⁸ Ila olawe wa apapazaku vakatthi wa ajamaazaku wamweekese ottuukho muukha yoori ate araliwe ti mwanaka.’

³⁹ Aphano miiyo khunjipu mbwanaaka: ‘Khi muukha aya oto amana ahitakhi ota na-miyo?’

⁴⁰ Ye khukijipu yoori: ‘Nnyizinku otu kininrumelaaye ontta operekha nlayikha luulokoze, na ontta oparikhya safwari yawo yoolawa omweekesa muukha wa wiiya jamaayaku na wa vaje wa apapazaku yoori ate araliwe ti mwanaka. ⁴¹ Amana ofiya wa ajamaazaku yo khuhitakhi owinkha, eti koolaphisiyeeyo entta owiishela.’

⁴² Phi kiriyeveo n'ooifya onlipu leelo, khusala kimuuza Nnyizinku kiraka: ‘Oo Nnyizinku! Nluku wa mbwanaaka Eburahiima, nkhamma safwari eti kineettaaye otakha wawo, okijaaliwe. ⁴³ Nasaapi eti miiyo kiri apha nshini wa nlipu opu wa maati; mwaari othuuto antelaaye ottekha maati amana kinvekela yoori: “Kimeele maati ariye n'yuko mwawo,” ⁴⁴ ye khukuza yoori: “Apa onywe, na kinttela ottekha makina kinkhe nyama zawo,” eeye othuuto muukha aya athawuliweeyo ti Nnyizinku yoori araliwe ti mwaana wa mbwanaaka.’

⁴⁵ Ahineeshevo mattakhuzi apale oolompa varoho vaka, kinimoona Rapekha athuuliye yuuku valifuzi vawe eettaka vanlipu ottekha maati, miiyo khumuuzu yoori: ‘Safwatali kimeele maati kinywe.’

⁴⁶ Ye khwiishusha yuuku yawe nasaapiru khukuza yoori: ‘Apa onywe, na kintta winkha enkamiiya zawo zinywe.’ Khukinkha miiyo khunywa na khwiinkha enkamiiya zaka khunywa.

⁴⁷ Aphano miiyo khumuuzela yoori: ‘O mwaana waani?’ Ye khujipu yoori: ‘Miiyo ki mwaana wa Betuweeli mwaana wa Nahoori na Miilika.’ Etiito miiyo khunwalisa kharawu vaphula vawe khunwalisa kakhana makhono awe. ⁴⁸ Miiyo khukokhora, khwiinama khumwaapitu Nnyizinku,

khunshukhurwela Nnyizinku, Nluku wa mbwanaaka Eburahiima akeettisisiyeeyo tarikhi yooshapweya yoori kimweettele mwaana wa ttwiye mbwanaaka ate araliwe ti mwanawе. ⁴⁹ Aphano, nkhamma mwatakha onthoonyeza pheta ya waamireya mbwanaaka Eburahiima, mwikuze. Nkhamma khamweepu, mwikuuze kijuwe ethtu yooretta.”

⁵⁰ Labani na Betuwele khujipu araka: “Epo zalankha wa Nnyizinku, fweeyo khanina ethtu yoowaza. ⁵¹ Rapekha aya otu ari apha, onthuule alawe eeye muukha wa mwaana wa mbwanaawo, ethhiipo Nnyizinku alupiyeego.”

⁵² N'ooсиila mattakhuzi apale karumeya wa Eburahiima khukokhora khwiinama khufiyisa ajihi vathi omaasho wa Nnyizinku. ⁵³ Elottelanaka khusarula vitthu za feeta na za thahapu na kuwo khumwinkha Rapekha, khulaza vitthu kiina theenya za mali khumwinkha nlupuwe na mamaawe. ⁵⁴ Nawiisha, yo khuja na khunywela khulala mpakha supu.

N'oocha karumeya otule khulupa yoori: “Mwikilikhe kirutele wa mbwanaaka.”

⁵⁵ Ila nlupuwe Rapekha na mamaawe khumuuzu yoori: “Mwaari otu eekhale attaapha na-fweyo nenkawu siikhu khumi, nawiisha osala olawa saana.”

⁵⁶ Ye khuri: “Mwihikirupazise maana Nnyizinku ashapweyisa safwari yaka. Mwikilikhe kirutele wa mbwanaaka.”

⁵⁷ Aphano yo khunjipu: “Nintta onkhuwela mwaari oto nimuuzele mwenyewe.” ⁵⁸ Khukhuweliwa Rapekha khuuzeliwa: “Ontakha olawa na mwinyi otu?”

Ye khujipu yoori: “Kakhupali.”

⁵⁹ Ajamaaze khuleezanana Rapekha na yaaya awe na karumeya wa Eburahiima na attu apale aataniyeeyo. ⁶⁰ Khuparikhiiya Rapekha na mattakhuzi apa:

“Weeyo nlupweetthu wiiye maama
wa peewu alufu alufu zene;
Peewu yawo eto eshintte
sitati ya maatuwi aya.”

⁶¹ Rapekha khulankha na akarumeyaawe a aakha khuwela enkamiiya zaya khusala alawa na nlume otule. Attaaphale karumeya khunthuula Rapekha khusala alawa.

⁶² Esiyaakha aarettiye arutaka onlipu oniitthiwaaye Layi-Rooyi, aari wiikhala Nikeepu, phantte ya kusini ya Kanaani. ⁶³ Siikhu moote, njuwalooveva wakathi Esiyaakha aari othepealaavo mmashapa, khulansa maasho khoona enkamiya zeettaka ota. ⁶⁴ Rapekha khulansa maasho khumoonaa Esiyaakha, ye khwiishukha vankamiiya vawe. ⁶⁵ Khumuuzela karumeya: “Khi mwinyi otule anlankhaaye mmashapa mphule ataka okhuno niriiwo ti paani?”

Ye khujipu araka: “Ti mbwanaaka.” N'ooсиila toole ye khuthuula nshukwi lawe khujifinika.

⁶⁶ Karumeya khumuuzu Esiyaakha zooshi epile ziviriyeego. ⁶⁷ Esiyaakha khunthuula Rapekha khuntha nheema etile yaari ya mamaawe Suhura. Khunrala khwiifa muukhaawe wompheta. Aphano Esiyaakha khumpattha ntthu wonkhiza paata yoofwa mamaawe.

25

Peewu kiina ya Eburahiima

¹ Eburahiima khunrala muukha nkina aari wiitthiwaaye Khetuura. ² Ye khunvokolela aana apa: Zimraani, Yokishaani, Medaani, Midiyaani, Ishibaaki na Shuuwa. ³ Yokshaani khunvokola Sheeba na Dedaani, aana a Dedaani aari Waashuur, Waletushi na Walewumi. ⁴ Aana a Midiyaani aari Eefa, Eferi, Hanooki, Abiida na Eelida. Ooshi apa aari aana na atuulu a Khetuura.

⁵ Eburahiima khumwinkha Esiyaakha vitthu zooshi aariinaazo. ⁶ Ila aanaawe apale aawaavokoleliyeeyo na aakha akina, ari haayi nalelo, khuwenkha vitthu zaya na-yo, khuweekarela phantte ya malawa-juwa yoori ahiikhale vamote na mwanawе Esiyaakha.

Ofwa wa Eburahiima

⁷ Eburahiima eekhaliye nyaakha miiya na saapiini na mithaanu. ⁸ Ye afwa ari wa wuuluvala arina nyaakha za waatta, khulawa khuzikhiwa vamote na ajamaaze apa afwiyyeeyo. ⁹ Esiyaakha na Esumayila, khunthuula khulawa khunzikh nlikurakuza la Makhipeela kharipu na Manre, nshapa la Eforoni mwaana wa Zohaari nniiti. ¹⁰ Nshapa ntintthile oozanyeziweeyo Eburahiima pi Ahiiti, pi ottuukho azikhieewo ye na muukhaawe Suhura. ¹¹ Paata ya Eburahiima ofwa, Esiyaakha aari wiikhala nti wa Peeri-Lahayi-Rooyi, Nnyizinku khusala amparikhiya.

Peewu ya Esumayila.

¹² Eti hatiithi ya peewu ya Esumayila mwaana wa Eburahiima, aavokoli-weeyo ti Hajira wa Misuri karumeya wa Suhura.

¹³ Apa mazina a aana aavokoliweeyo ti Esumayila: Nebayoothi, mwaana wa mwanzo wa Esumayila, Kedaari, Adibeeli, Mibisaamu. ¹⁴ Miishima, Duuma na Maasa. ¹⁵ Hadaadi, Teema, Yetuuri, Nafishi na Kedeema. ¹⁶ Apa aana Esumayila khumi na awiri, pi atthaapo aari afwalume, wakhula mwaana na lihimo lawe na nhali aari omakaamo. ¹⁷ Esumayila eekhaliye nyaakha miiya na talaathiini na sapa. Khufwa khulawa khuzikhiwa vamote na ajamaaze apa afwiyyeeyo. ¹⁸ Peewu yawe yeekhaliye waaza Hawila mpakha Shuuri kharipu na Misuri tarikihi yaweeetta Ashuuru. Yo aari woohisilani na ojama nkina wa Eburahiima.

Ezawu na Yaakhumpa

¹⁹ Eti hatiithi ya peewu ya Esiyaakha mwaana wa Eburahiima: Eburahiima khunvokola Esiyaakha. ²⁰ Esiyaakha n'oopattha hirimo ya nyaakha arupaiini khunrala Rapekha mwaana wa Betuweeli, nlupuwe Labani. Yo aari Araamu aari wiikhalaaye Paata-Araamu, tuniya ya Mesopotamiya.

²¹ Mwaasa wa muukhaawe ohiina mavokozi, Esiyaakha khulompa wa shariyavo anvekelaka Nnyizinku. Ye khusiila lompa yawe Rapekha khwiimitha. ²² Aana awiri khusala oomana mwiirukulu mwawe. Ye khushanka khusala ajuuzela yoori: "Niini enrettikhanaaye mwiirukulu mwaka, nkhamma pi toono keemittihela-ni?" Aphano ye khumuuzela Nnyizinku.

²³ Nnyizinku khunjipu:

"Mahimo mawiri pi ariiyе mwiirukulu mwawо."

Weeyo ontela ovokola khapila piiri zoohisilani:
moote enttel ariya ya kuvu zayita eti kiina.

Nttunkhulu onteela onrumeyela nsimaana."

²⁴ Zifiyeevo siikhu zoopattha ekumi, khuwaavokola aana a maphapo. ²⁵ Otu woovokoliwa mwanzo aari wookhuttuwa na wa waatta ovuzi, ti maana yootthajiwa nzina la Ezawu*. ²⁶ Elottelanaka khuvokoliwa ttwiye, nkhono awe okholeliye ekwakuno ya Ezawu. Ti maana yootthajiwa nzina la Yaakhumpa†. Ampattikanaru aana aya apa, Esiyaakha aarettiye arina nyaakha siithiini.

²⁷ Aana apale khuwula, Ezawu khwiya namasaya nwulu na aari wontuvela weetteta ntthuttu, ila Yaakhumpa aari ntthu woonyamala wontuvela wiikhala vaje. ²⁸ Esiyaakha aari ompheta Ezawu, mwaasa wontuvela orafuna nyama epile aari osayaazo. Ila Rapekha aari ompheta Yaakhumpa.

²⁹ Siikhu moote, Yaakhumpa khwiipikha sekuseku, wakathi aya opo Ezawu aarettiye eettaka orutiru ntthuttu ari wookholiwa ti jala na wooshokhera. ³⁰ Ye khumuuzu Yaakhumpa yoori: “Okinkhe vitthu epo oniipikhaazo zookhuttuwela kije. Kintakha ofwa jala!” Ti eto Ezawu enkhiweeyo nzina la Edomu.

³¹ Yaakhumpa khumuuzu yoori: “Waaze okuuanyeza lifunku lawo l'oomwaana w'oomwanzo khpula.”

³² Ye khumuuzu yoori: “Lina fwayita-ni lifunku laya nttho la wiiya mwaana wa mwanzo, miiyo kitakhaka ofwa jala!”

³³ Yaakhumpa khusala ankhanyarela yoori: “Olaphe.” Ye khulapha, khumuuzanyeza Yaakhumpa lifunku lawe l'oomwaana wa mwanzo.

³⁴ Aphano ye khumwinkha Ezawu phaawu na sekuseku y'eepwiri. Khuja khunywela, khusala alawa safwari zawe.

Woohooneeli fwayita lifunku l'oomwaana wa mwanzo.

26

Esiyaakha na Rapekha nti wa Geraari

¹ Yaapuwiye jala nti opule nkhama ethiipile yaapuwiyeego wakathi wa Eburahiima. Ti eto Esiyaakha khulawa nti wa Geraari okutthanana Apimeleekhi mfwalume wa Afiliishiti. ² Nnyizinku khunteela, khumuuzu yoori: “Ohilawe tuniya ya Misuri; weekhale nti kintakhaaye owuuba. ³ Ottuukho miiyo kinttela wiiya vamote na-weyo na kinttela wuuparikhiya. Weeyo na peewu yawo kinttela owinkhani nti opo wooshi, kilipiselaka wahati opule kaalaphiyeyo kimwaahitaka papaaowo Eburahiima. ⁴ Kinttela waattisa peewu yawo nkhama matthottowa o'tulu, na kinttela winkha tuniya yooshi eti. Mwaasa wa peewu yawo, khapila zooshi za tuniya zinttela wiiya zooparikhiyiwa; ⁵ maana Eburahiima asiileza huula yaka, ashututela oruma waka, mwentto aka, kano zaka na masomi aka.”

⁶ Aphano Esiyaakha khusala eekhala nti wa Geraari. ⁷ Atthu a nti opule n'oomuuzelwa monkonzi wa muukhaawe, ye khuri: “Nlupwaaka.” Mwaasa yoori Rapekha aari wooshapweya, Esiyaakha eetta woova olupa yoori muukhaawe. Ye aari wuupuwela yoori alume a mmuti mphule eetta omuula asale na Rapekha.

⁸ Esiyaakha eekhaliye Geraari siikhu za waatta. Siikhu moote, Apimeleekhi mfwalume wa Afiliishiti eetta outhurumela veettakha khumoona Esiyaakha ampapasaka muukhaawe. ⁹ Aphano Apimeleekhi

* ^{25:25} Nzina nttho la Ezawu khwa luuka ya Meebereewu lina maana la mwiili wa wiitala ovuzi.

† ^{25:26} Yaakhumpa khwa luuka ya Meebereewu linlattanana na ntakhuzi liriina maana a ekwakuno na theenya lina maana oottettekha.

khunkhuvula Esiyaakha khumuza yoori: "Otu, khweele muukhaawo! Khi aphi waari oraaye nlupuwo?"

Ye khujipu yoori: "Kaari woova wuuliwa mwaasa wa ye."

¹⁰ Apimeekhi khuri: "Epo zaya niini oniretteliyeeyo? Khi eriwaka ntthu mmote wa fweyo eettiye olalana, weeyo waari oniththa paathuli?"

¹¹ Apimeekhi khuwooza atthu ooshi yoori: "Wakhula otule antakhaaye onsapa mwinyi otu ama muukhaawe ontta ofwa."

¹² Esiyaakha khulima nshapa lawe nti otthuupule, mwaasa wa Nnyizinku omparikhya mwaakha otthuupo khuurula vitthu swaafu miiya zooziti epile aazaliyeeko. ¹³ Ye khureela, khusala evira zeekezeleyaka mali zawe, khwiya thaajiri nwuulweene. ¹⁴ Aarina maphanko a pwittipwithi, puuzi, a mompe na aarina akarumeya a waatta, ti nanna Afiliishiti laawaatiyeeyo nrima. ¹⁵ Milipu zooshi epile aathipiyeeyo akarumeya a Eburahiima paapa wa Esiyaakha ari haayi, khusirelaza.

¹⁶ Siikhu moote Apimeekhi khumuza Esiyaakha yoori: "Oleemo mmuti mphu, maana wareela na kuvu waniziti fweeyo."

¹⁷ Aphano ye khuthama nti opule, khulawa khumaka ntta po la Geraari khwiikhala ottuukho. ¹⁸ Khuthipa opheya milipu epile zaathipiweeyo wakathi wa Eburahiima, khusireliwa pi Afiliishiti paata yoofwa Eburahiima, Esiyaakha khwinkha mazina milipu epile atthaapale papaawe aatthajiyeeyo.

¹⁹ Siikhu kiina, akarumeyaawe khuthipa mmattapo ntumphule, khunsikana naattuutu wa maati. ²⁰ Amakhampuzi a Geraari khusala anyakulisana na amakhampuzi a Esiyaakha araka: "Maati apa pi eethu," ti eto Esiyaakha aatthajiyeeyo nzina la Eseki nlipu aya opule, mwaasa yoori weetta wuumaneliwa. ²¹ Akarumeyaawe khuthipa nlipu nkina, ila amakhampuzi apale a Geraari khupuwisa wuumanitheenya, ye khutthaja nzina la Sitiina (milattu). ²² Aphano khulaavo aphale vaya khulawa khuthipa nlipu nkina, khuhiiro hatha ntthu mmote wa wuumanelana. Ye khutthaja nzina la Rehopoothi araka: "Aphano Nnyizinku aninkha puuro ya nafwaasi, na ninteela oruwera saaneene nti otthuupu."

²³ Attaaphale Esiyaakha khulawa Beirisheba. ²⁴ Osikhu Nnyizinku khunteela khumuza yoori: "Miiyo ki Nluku wa papaawo Eburahiima. Ohoove, kiri vamote na-weyo. Kintta wuuparikhya kaattise peewu yawo mwaasa wa papaawo karumeyaaka."

²⁵ Attaaphale ye khunjeka alitaari, khwaaputu nzina la Nnyizinku. Khweemesa heema yawe na akarumeyaawe khuthipavo nlipu.

Osiilana wa Esiyaakha na Apimeekhi

²⁶ Apimeekhi aalankhiye nti wa Geraari na shawuriya awe Ahuzaathi na Fikhoole namalokozela wa anajanka olawa okutthanana Esiyaakha.

²⁷ Esiyaakha n'oowoona khuwooza yoori: "Mweeyo khamwintuveliwa ti miyo mweettiyi okiikara mmuti mwenu. Khi mwafela-ni?"

²⁸ Yo khunjipu araka: "Neetta woona yoori Nnyizinku ori vamote na-weyo. Khuupuwela yoori enshapweya olapha na winkhana wahati weeyo na-fweyo. ²⁹ Osiilana waya pi opu: Olaphe yoori khunnirettela zootakhala nkhama ethiipo na-fweyo nihuurettelleeni, nooretella zooshapweya na khuulikha olawa na heeri. Weeyo o wooparikhiiwa ti Nnyizinku."

³⁰ Esiyaakha khuwenkha ethu-yooja yooshapweya khuja khunywela.

³¹ Mmeesho mwaya supuyeeene khulaphisana. Esiyaakha khuwaaleeza, yo khusala alawa na heeri.

³² Siikhu ethiitile khuta akarumeya a Esiyaakha oteela omuuza hapari za nlipu opule aathipiyeeyo yoori: "Napattha maati." ³³ Nlipu aya opule Esiyaakha khutthaja nzina la Sheba. Mpakha leelo sitati yaya etile eniitthe-liwa Beeresheba.

³⁴ Wakathi Ezawu apatthiyeveo nyaakha arupayiini khunrala Yudiithi mwaana wa nniiti aniiitthiwaaye Beeri, na Basemaathi mwaana wa nniiti nkinoko aniiitthiwaaye Elooni. ³⁵ Aakha apo awiri, anshukulikhisiye Esiyaakha na Rapekha.

27

Esiyaakha onimparikiya Yaakhumpa na Ezawu

¹ Esiyaakha ooluvaliye, maasho awe aashokheriye khuuhisala oona. Khunkhwuela Ezawu mwanawewe otu nwulu araka "Mwanaka!"

Ye khujipu: "Lape!"

² Khumuuzu yoori: "Miiyo kooluvala siikhu kimfwaavo khijuweyeeni.

³ Othuule ntetthe lawo olawe ntthuttu wasaye nyama. ⁴ Wiipikhe saana wookitvelavo okitiisele kije, kuuparikhie kihinafwe."

⁵ Ezawu khulankha khulawa ntthuttu osaya nyama yoori antiisele pa-paawe. Rapekha aari onsiila Esiyaakha attakhulanaka mwanawewe Ezawu,

⁶ ye khumuuzu mwanawewe Yaakhumpa araka: "Weyo! Kansiila pa-paawo amuzaka ttwiyo Ezawu yoori: ⁷ 'Okitiisele nyama ya wiipikhiwa wookitvelavo kije, kuuparikheye mmakhono wa Nnyizinku kihinafwe.'

⁸ Mwanaka, osiileze mattakhuzi apa kinuurumaaye, nasaapi eti ⁹ olawe oliphanko la nyama wa waathuule aana a puuzi awiri ooneneva, kite kiweepikhe saaneene anttelaaye ontuvela papaawo. ¹⁰ Onlawanele aje, ooparikhie ahinafwe."

¹¹ Yaakhumpa khunjipu mamaawe Rapekha yoori: "Ezawu ti wa waattana ovuzi, miiyo akina. ¹² Paapa amana akipapasela ahikisikanani ovuzi kintela wiiya ntthu woohata, toowo khankiparikhya onnta okilaani."

¹³ Mamaawe khumuuzu yoori: "Laana yaya eto ti ekitwele miiyo mwanaka. Ila orette eti kiuuzyeeyo: weettele puuzi epile kuurumiyeozo."

¹⁴ Ye khulawa khuthuula puuzi khuntiisela mamaawe, khwiipikha wootuvavo waari weettelaaye ontuvela papaawe. ¹⁵ Aphano Rapekha khuthuula kuwo epile zooshapweya za Ezawu mwanawewe otule nwulu zaari owawe, khunwalisa Yaakhumpa mwaana otu ntiitthi aya. ¹⁶ Khumfinikha na shapala ya puuzi makhono awe na phantte ya mmwisiko mwawee wahaariimo ovuzi. ¹⁷ Khuthuula etthu-yooja yootuva etile eepikhiyeeyo na phaawu khumwinkha mwanawewe Yaakhumpa.

Ye khulawana aphale aariivo papaawe khunkhwuela: "Paapa!"

Ye khujipu: "Lape! Weeyo o mwanaka-ni?"

¹⁹ Yaakhumpa khunjipu papaawe: "Miiyo ki Ezawu mwanenu wa mwanzo. Katiisa eti mwaakirumiyeeyo. Mwilankhe mwije nyama eti kitisiyeeyo, nawiisha mwikiparikhie."

²⁰ Esiyaakha khumuuzela mwanawewe yoori: "Wapattha toovi nasaapiru mwanaka?"

Ye khujipu: "Nnyizinku Nluku eenu eetta okiperekheza."

²¹ Khumuuzu yoori: "Nkakisusele apha kuupapasale, kuujuwe nkhamma khweele o mwanaka Ezawu."

²² Yaakhumpa khunsusela papaawe. Esiyaakha khusala ampapasela, khumuuzu yoori: "Huula ti ya Yaakhumpa, ila makhono pa Ezawu." ²³ Ye

khuhinjuwi mwaasa wa makhono awe wiiyana ovuzi nkhama apa a ttwiye Ezawu.

²⁴ Ahinamparikhiye khumuuzela theenya: “Mwanaka Ezawu ti wey-eena?”

Ye khujipu: “Aa, ti miyo.”

²⁵ Aphano khuri: “Okitiisele apha nyama yaya eto osayiyeyo kije, yoori kuuparikhiye.”

Yaakhumpa khumweettisela khuja na khumwinkha viinyu khunywela.

²⁶ Esiyaakha khumuuzo yoori: “Okaattame mwanaka okipatikhe.”

²⁷ Yaakhumpa khumwaattama papaawe khumpatikha. Esiyaakha khusila muuru wa kuwo zawe, aphano ye khumparikhiya araka:

“Muuru wa mwanaka
muuru wa nshapa
looparikhiyiwa ti Nnyizinku.

²⁸ Nnyizinku awinkhe
mmatte wa pinkuuni
na oruwera wa vathi,
peewu ya waatta na viinyu ya waatta.

²⁹ Khapila za waatta zuurumeele weeyo,
na mahimo a waatta oookohorele.

Wiiye mbwana wa attwiizo,
na aana a mamaawo oookohorele weeyo.
Oolaanikha pi apale anttelaaye wuulaani,
na ooparikhiyiwa
pi apale anttelaaye wuuparikhiya.”

³⁰ Paata Yaakhumpa oparikhiyiwa ti Esiyaakha papaawe, ye alaakavo aphale, nasaapiru ttwiye Ezawu khufiya alankhaka wuusaya. ³¹ Na-ye khwiipikha ethuu-yooja yootuva khuntisela papaawe, khumuuzo yoori: “Milwankhe paapa mwijie nyama eti keetteliyeeyo osaya mwikiparikhiye.”

³² Papaawe khumuuzela: “Weeyo o paani?” Ye khuri: “Ti miyo Ezawu, mwanenou tu wa mwanzo.”

³³ Esiyaakha khusuthuwa channu khusala athukumela khulupa yoori: “Khi otule apatthiyeeyo nyama khukitiisela ti paani? Miiyo kaja keesha weeyo ohinate. Kamparikhiya, ti wooparikhiyiwa!”

³⁴ Ezawu n'oosiila mattakhuzi apale a papaawe khwiiphiiriwa khulila venkivene, khunvekela papaawe yoori: “Na-miyo paapa mwikiparikhiye!”

³⁵ Ye khulupa yoori: “Aatiyeye ttwiyo apha khukittettekha, khuthuula parakha yawo.”

³⁶ Ezawu khulupa yoori: “Eto swaafu yaphiiri akishinttaka. Ti maana ootthajiwa nzina la Yaakhumpa. Yamwanzo akinyakanya lifunku laka l'oomwaana wa mwanzo. Apho theenya akinyakanya parakha yaka. Paapa khamwikiparikhiya na miiyo?”

³⁷ Esiyaakha khujipu: “Miiyo kanthawaza Yaakhumpa yoori eeye mbwanaawo weeyo na ajamaazo ooshi anttela onrumeele ye. Onteela wiiyana tiriku ya waatta na viinyu. Kuurettele niini miiyo mwanaka?”

³⁸ Ezawu khumuuzela papaawe: “Mweeyo paapa khamwisalaneeni hatha parakha? Na miiyo mwikiparikhiye!” Khusala alila anyakulaka.

³⁹ Aphano Esiyaakha khunjipu:

“Weeyo ontella wiikhala
ohali woolepelana na miti zooruweriwa,

ohali woorthowawo mmatte wa pinkuuni.

⁴⁰ Yoori weeyo opatthe meekhazi
onttela wumanana phanka yavo
na onttela onrumeela ttwiyo.

Amana ojilipisa
ontta olaamo nthwaapu* mwaya mphu.”

⁴¹ Ezawu khwiya wa wiiphiiriwa ti ttwiye mwaasa wa parakha etile enkhiweeyo ti papaawe. Khusala oopuwela toono: “Siikhu za matthaka a paapa ziri kharipu. Amana afwa miyo kintta omuula ttwiyyaku Yaakhumpa.”

⁴² Wakathi asiiliyeevo Rapekha mattakhuzi apale aari ottakhulaaye mwanawе otu wa mwanzo Ezawu, ye khunkhuwela mwanawе Yaakhumpa otu nttiithi aya khumuza yoori: “shawuri ariinaazo Ezawu pi zootakha owuula. ⁴³ Aphо weeyo mwanaka osiile eti kiniuuzaaye. Ottire nasaapi ethiiti, weette wa nlupwaaka Labani aniikhalaaye nti wa Harani. ⁴⁴ Weekhale ottuukho mpakha ttwiyo omwiishe okatipukha wawe. ⁴⁵ Amana omwiishela okatipukha wawe na asahawu eti onretteliyeyo miyo kintta wuuperekheza nhupi yoori ote. Akintakha okipwetheyaaanaaka oowiiri siikhu mootel!”

⁴⁶ Aphano Rapekha khulawa omuua Esiyaakha yoori: “Akituveliweeni ohaayi aka wooshi mwaasa wa aakha a Ahiiti apa awaaraliyeyo Ezawu. Amana Yaakhumpa na-ye awaarala aakha a tuniya ethiiti miyo kinhithari ofwa.”

28

Ottira wa Yaakhumpa

¹ Esiyaakha khunkhuwela Yaakhumpa khumparikhya, khumuza yoori: “Ohinrale hatha muukha mmote wa Kanaani. ² Olankhe olawe nti wa Paata-Araamu owawe Betuweeli pwapwiyo. Olawe wanrale mwaana wa Labani nlupu wa mamaawo. ³ Nluku Woowahi Zooshi ooparikhya, awinkhe mavokozi na peewu ya waatta, yoori khwa weyo epuwe khabila za waatta. ⁴ Awinkhe weeyo na peewu yaho parakha etile aahitiweeyo Eburahiima, wiiye mwennyewe nti opu oniikhalaaye nkhamma nletto enkhiweeyo Eburahiima ti Nnyizinku.” ⁵ Paata ya toole, Esiyaakha khumuza Yaakhumpa yoori aphano eta. Ye khulawa Paata-Araamu owawe Labani mwaana wa Betuweeli Mwaaramu, nlupuwe Rapekha maama wa Yaakhumpa na Ezawu.

⁶ Ezawu aajuwiyiye yoori Esiyaakha amparikhiiye Yaakhumpa, khumuza yoori alawe nti wa Paata-Araamu, amweekese muukha w'oottuukho anrale. Na khusila yoori papaawe amuza Yaakhumpa yoori ahinrale muukha wa Kanaani. ⁷ Khujuwa theenyi yoori Yaakhumpa anshututela papaawe na mamaawe alawa Paata-Araamu. ⁸ Ti nanna ye ajuwiyeozy yoori papaawe khaari ontuvela aakha a Kanaani. ⁹ Aphano Ezawu khulankha khulawa owawe Esumayila mwaana wa Eburahiima, khunrala Mahalaathi mwaana wa Esumayila, nlupu wa Nebayoothi, oohiiyi aakha apale akina aarinaaye.

Joziya Yaakhumpa Beetele

¹⁰ Yaakhumpa khulankha Beeresheba khusala alawa Harani. ¹¹ Eettaka olawa ethiipile, n'ootupweela njuwa ye khufiya puuro yaya eto yoori alale attapho. Khuthuula liwe laari attaphale khuretta nsaawu khurapalela.

* **27:40** Thwaapu yaya eti olaamo nhukhumu.

¹² Khulottha khoona yeemesiwe shikatta vathi, janka yaya yaari okomaaye pinku. Malayikha a Nnyizinku aari owela ethiito na wiishukha. ¹³ Nnyizinku ari kharipu na-ye khumuza araka: “Miiyo ki Nnyizinku, Nluku wa pa-paawo Eburahiima na wa Esiyaakha. Nti opo orapaleliyeyo kinteela owinkha weeyo na peewu yawo yooshi. ¹⁴ Peewu yawo enteela wiiya ya waatta nkhamma mishaka za voolumwenku, enteela omwazeyela malawa-juwa, makaaripi, kashikhazini na kusini. Khwa weyo na peewu yawo khapila zooshi za voolumwenku enteela oparikhiyiwa. ¹⁵ Woone! Miiyo kiri vamote na-weyo, kinteela owiinanelo wakhula vahali oneettaavo, na kinteela wuurutisela tuniya ethiiti, akiniwanswi khhiretteeni epile zooshi kiwaahitiyeelo.”

¹⁶ Yaakhumpa asisimuwiyevo aphale aari olalaavo khuri: “Khweele, Nnyizinku ori puuro ethiiti, miiyo akaajuwiye.” ¹⁷ Ye khwiyya wa woova channu, khulupa yoori: “Puuro eti ti yawoopisa! Nyuupa ya Nluku, na nlako wa pinkuuni.”

¹⁸ Mmeesho mwaya supuyeene, Yaakhumpa khuthuula liwe ntthile aaphiteeziyeeyo, khweemesa khwiithela mafuttha vatulu vaya. ¹⁹ Khutthaja nzina puuro yaya etile, la “Beetele”, ila raku sitati yaya etile yaari wiithiwa “Luuzhu”.

²⁰ Yaakhumpa khwaahiti yoori: “Amana Nluku eeya vamote na-miyo, eenanelo safwari yaka eti, khukinkha ethu-yooja na kuwo zoowala, ²¹ khukirutisela vaje wa paapa kiri nkumi, Nnyizinku onteela wiiya Nluku aka. ²² Liwe ntthi keemesiyeyo apha nkhamma nrifu linttela wiiya nyuupa ya Nluku, na wakhula etile onikinkhaaye kiwinkhaka lifunku la khuumi.”

29

Ofiya wa Yaakhumpa nti wa Harani

¹ Yaakhumpa khurutela safwari yawe khulawa mpakha nti oriye phantte linththamuwaawo njuwa. ² Siikh moote, khweekesa nkerekhere wa ntta po khoona nlipu mmote ozukuleliwe ti maphanko mattathu a pwittipwithi zirapaleliye. Waari nlipu zaari onywisiwaavo maati, liwe laari ofinikhani-wakaaye nlipu opule laari liwululene. ³ Ti eto amakhampuzi aari owe-jelanakaaye yoori asusise liwe ntthile enkhe nyama zaya maati oonywa, nawiisha khurutiselavo liwe ntthile.

⁴ Yaakhumpa khuwoozela amakhampuzi apale araka: “Mweeyo attwizaku, mwaavayi?”

Yo khujipu araka: “Fweeyo nti ethu Harani.”

⁵ Ye khuri: “Mwininjuwa Labani ntuulu wa Nahoori?”

Yo khujipu araka: “Aa, nininjuwa!”

⁶ Khuwoozela theenya yoori: “Nkumi?”

Yo khujipu yoori: “Aa, nkumi! Mwanawee Rakeele ti oto antaaye apho na pwittipwithi za papaawe.”

⁷ Yaakhumpa khulupa yoori: “Nalelo khunaripe, khunafiye wakathi wookusanya maphanko. Mwinkhe maati pwittipwithi epo mwilawee mwa-jise opheya.”

⁸ Ila yo khujipu araka: “Khaninwahi, nina yoowejela pwittipwithi zooshi zikusanyeye attaapha nisusise liwe ntthi lifinikhaniweeyo nlipu, ninkhe pwittipwithi zethu maati zinywe.”

⁹ Eettaka ottakhula ethiipile khusala ata Rakeele na pwittipwithi za papaawe, mwaasa yoori aari nshuki. ¹⁰ Yaakhumpa n'oomoona Rakeele

mwaana wa halwiye Labani eettaka ota na pwittipwithi, khulawa khu-funula nlipi khwinkha maati pwittipwithi za halwiye. ¹¹ Nawiisha khumwinkha penezhu khusala alila. ¹² Aphano Yaakhumpa khumuza Rakeele yoori: "Miiyo ki jaama wa papawo, ki mwaana wa Rapekha." Ye khutthira alawaka omuuza papaawe.

¹³ Labani n'osisila hapari za Yaakhumpa mwaana wa nlupuwe, khusala athira alawaka okutthanana. N'onsikana khumpatikhā khumpejari, khunthuula khusala alawana owawe. Ye khumuza Labani zooshi epile zanvireliyeezo. ¹⁴ Aphano Labani khulupa yoori: "Weeyo khweele ojamaayaku, taamu yetthu moote."

Yaakhumpa khwiikhala mpakha wiisha mweezi ari ottuukho. ¹⁵ Elottelanaka Labani khuri: "Hatha nkhamma ojamaayaku, onakhola khaazi mahala? Kuuze phakari yawo."

¹⁶ Labani aarina aanaawe awiri aakha; otu nwulu aari wiithiwa Liiya. Ntiitthi aya aari wiithiwa Rakeele. ¹⁷ Liiya aari woosizila maasho, ila Rakeele aari wooshapweya mwili awe na omaasho wawe. ¹⁸ Yaakhumpa mwaasa wootveliwa ti Rakeele, khulupa yoori: "Kintta okhola khaazi nyaakha sapa okilooze mwanawo otu ntiitthi aya."

¹⁹ Labani khujipu yoori: "Kemaani! Ti yooshapweya wuulooza weeyo zayita onlooza ntthu nkinoko. Osala wiikhala attaapha na-miyo."

²⁰ Yaakhumpa khukhola khaazi nyaakha sapa yoori anrale Rakeele. Nyaakha epile sapa ye khoona nkhamma siikhu vattitthiiru mwaasa wootveliwa channu.

²¹ Ye khumuza Labani yoori: "Aphano kiloozeni muukhaaka, maana zafiyela siikhu naasiilaniyeezo."

²² Labani khuwaakhuwela atthu a waatta a mmuti mphule khuretta njampo. ²³ Ila n'ooripa khunthuula mwanawo Liiya khumwinkha Yaakhumpa khurapalelana. ²⁴ Labani khumwinkha karumeyaawe Ziilipa mwanawo Liiya yoori asala anrumeela.

²⁵ Ochiyyevo, Yaakhumpa khumoona yoori ti Liiya. Ye khulankha olawa omuuzela Labani yoori: "Niini epi okiretteliyeezo? Miiyo akaari okhola khaazi mwaasa wa Rakeele? Khi kiiswa yaya niini okittetekhaka?"

²⁶ Labani khunjipu yoori: "Fweeyo mmuti mwethu mphu khanizow-ereeni onlooza otu ntiitthi ntunkhulu ahinaraliwe. ²⁷ Amana zivira siikhu sapa za njampo ntthi, nintta wuulooza otu nkina, paata onaahitaavo okik-holela khaazi theenya nyaakha sapa."

²⁸ Ye khukhupali, khuvira siikhu epile sapa za njampo la harusi ya Liiya, Labani khunthuula Rakeele khunlooza. ²⁹ Khunthuula karumeyaawe Biila khumwinkha mwanawo Rakeele yoori asala anrumeela. ³⁰ Yaakhumpa khurapalelana Rakeele khwiiya wontuvela zayita Liiya. Khurutela theenya onkholela khaazi Labani mpakha nyaakha sapa.

Aana a Yaakhumpa

³¹ Nnyizinku nawoona yoori Yaakhumpa khaari otuveliwa ti Liiya, khumwinkha mavokozi. Ila Rakeele khaari ovokola. ³² Liiya khwiimittha khumpattha mwaana wanlume, khunthaja nzina la Ruubeni*. Khuri: "Nnyizinku oona ohoowa waka. Aphano phi kinttelava ophetiwa ti man-naka."

* ^{29:32} Nzina ntho la Ruubeni khwa luuka ya Meebereewu linlattanana huula enraaye "omoone mwaana mmote"

³³ Khwiimittha theenya khumpattha mwaana nkinoko, khuntthaja nzina la Simiyooni[†]. Khulupa yoori: "Nnyizinku asiila ohituveli waka, akinkha mwaana nkina." ³⁴ Khwiimittha theenya swaafu kiina khumpattha mwaana khuntthaja nzina la Leevi[‡], khulupa yoori: "Aphano mannaka onttela wiiya wookusanyeya na-miyo mwaasa wompatthela aana attathu."

³⁵ Khurutela wiimittha theenya, khumpattha mwaana khulupa yoori: "Swaafu eti kinttela onsifu Nnyizinku." Ti eto antthajieeyo nzina la Yuuda[§]. Aphano khumwiishela mavokozi.

30

¹ Rakeele ooniyeovo yoori Yaakhumpa khaari ompatthela mwaana, khusala anlilela wiivu ttwiye. Khumuuzza Yaakhumpa yoori: "Okipaththele mwaana, n'oohiiyi ethiipo kintta ofwa!"

² Yaakhumpa khumwiiphira, khumuuzza yoori: "Weeyo onikoona nkhamma Nluku? Ye ti ahiniwinkhaaye mavokozi."

³ Rakeele khumuuzza yoori: "Kinaaye karumeyaaka Biila, onthuule othuuto orapalelane yoori ampatthe mwaana zwaamu yaka, kiiye maama khwa ye."

⁴ Rakeele khunthuula Biila khumwinkha Yaakhumpa khwiiya muukhaawe. ⁵ Khwiimittha khumpattha mwaana. ⁶ Rakeele khulupa yoori: "Nnyizinku akirettela wa shariyavo, asiila lompa yaka akinkha mwaana." Khuntthaja nzina la Daani.

⁷ Biila karumeya wa Rakeele khwiimittha theenya khumpattha mwaana waphiiri. ⁸ Rakeele khulupa yoori: "Kaarina viitha khuluyeene na nuunu, ila kanshintta." Mwaana otule khuntthaja nzina la Nafitaali.

⁹ Liiya nawoona yoori alikha ovokola, khunthuula karumeyaawe Ziilipa khumwinkha Yaakhumpa khwiiya muukhaawe. ¹⁰ Ziilipa karumeya wa Liiya, khupattheliwa mwaana ti Yaakhumpa. ¹¹ Liiya khulupa yoori: "Kashapweiyiwa mwaani!" Khuntthaja nzina la Gaati.

¹² Ziilipa karumeya wa Liiya khunvokola mwaana nkinoko theenya.

¹³ Liiya khuri: "Kafurahi mwaani! Mpakha aakha akina anteela okuuza yoori kenkhiwa furaha!" Mwaana otule khuntthaja nzina la Asheeri.

¹⁴ Wakathi wa wuurla tiriku Ruubenii aalankhiye khusala alawa omashapa, khusikana mishumo eniitthiwaaye mathunkuja*, khuthuula khulala khumwinkha Liiya mamaawe. Rakeele khunvekela araka: "Safwatali, kimeeleni mathunkuja vattithiiru apo atiisiyeeyo mwanenu."

¹⁵ Ye khujipu araka: "Wanthuula mannaka, khootosheeni? Theenya ontakha othuule mathunkuja apa atiisiyeeyo mwanaka?" Rakeele khunjipu araka: "Kemaani! Nlaweni nipatili, mwirkinkhe mathunkuja apo, osikhu opu Yaakhumpa mwilawe mwarapalelane mweeyo."

¹⁶ Njuwa-looveva Yaakhumpa arutaka omashapa, Liiya khunthepeesa khusala amuuza yoori: "Leelo onttela orapalelane miiyo, maana keetta wuurentteri na mathunkuja atiisiyeeyo mwanaka." N'ooripa Yaakhumpa khulala vamote na Liya.

[†] 29:33 Simiyooni nzina lintaaye khwa ntakhuzi la Meebereewu liriina maana oosiila. [‡] 29:34 Nzina nttho la Leevi khwa luuka ya Meebereewu linlattanana huula enraaye "okusanyeya, olutta".

[§] 29:35 Nzina nttho la Yuuda khwa luuka ya Meebereewu linlattanana ntakhuzi liriina maana oosifu. * 30:14 Atthu a raku aari wuupuwela yoori mathunkuja aniihsusa tafyawuthi zoohivokoli.

¹⁷ Nnyizinku khusiila lompa ya Liiya, khwiimittha khumpattha mwaana wathaanu wa Yaakhumpa. ¹⁸ Liiya khulupa yoori: "Nnyizinku akitthuva mwaasa wonthuula karumeyaaka khumwinkha mannaka." Ti eto khuntthaja nzina la Esakhaari.

¹⁹ Khwiimittha theenya khumpattha mwaana wasiitha. ²⁰ Ye khuri: "Nnyizinku akinkha etthu ya fwayita, aphano mannaka onteela otuveliwa venkivene ti miyo mwaasa wompatthela aana sitha." Ti eto mwaana otule khuntthaja nzina la Zabulooni.

²¹ Wiishela waya Liiya khumpattha mwaana nkina wankha khuntthaja nzina la Diina.

²² Nnyizinku khumuupuwela Rakeele, khusiila lompa yawe khumwinkha mavokozi. ²³ Ye khwiimittha khumpattha mwaana. Khulupa yoori: "Nnyizinku eeshisa haaya yaka." ²⁴ Khunthaja nzina la Yuusufu, alupaka yoori: "Nnyizinku ti akinkhe mwaana nkina."

Labani na Yaakhumpa ansiilana opheya

²⁵ Paata ya Rakeele ompattha Yuusufu, Yaakhumpa khumuuzza Labani yoori: "Kilikheni kirutele nti kivokoliweeyo. ²⁶ Mwikinkhe aakhaaka apa kiwaakholeliyeeyo khaazi na aanaaka kilawe. Mweeyo mwinjuwa khaazi kuukholeliyeenini."

²⁷ Labani khujipu yoori: "Safwatali nkama onikisileza ohilawe, miyo sako zaka zakuuza yoori Nnyizinku akiparikhya mwaasa wa weeyo. ²⁸ Apho okuuze phakari ontakhaaye kisala kuuripa."

²⁹ Yaakhumpa khunjipu: "Mweeyo mwinjuwa khaazi kuukholeliyeenini yoori ti ya waatta na nanna kaari oshukisaazo nyama zenu mpakha waatta. ³⁰ Miyo kihinate nyama zenu zaari vattithiiru leelo pi za waatta: Nnyizinku ooparikhiyani mwaasa wa miiyo. Khi ajamaazaku kinttela owaatthantta lini?"

³¹ Labani khumuuzela yoori: "Kuuriphe niini?" Khujipu Yaakhumpa: "Mwihikiriphe hatha ethtu. Kintta orutela oshukisa nyama zenu amana nisilana saana. ³² Leelo kinttela woona maphanko ooshi a nyama zenu, kilazakamo pwittipwithi zooriipa, zoottweeela na za malepa, puuzi zootweeela na za malepa. Eto ti enttelaaaye wiiya phakari yaka. ³³ Etthiipo enttelaaaye woona okho ninttaawo nkama ki wa waamineya. Wakathi mwinttelaaye woona nyama zaka, amana yiyyamo nliphanko mwaka puuzi yoottweeela ama yoohiina malepa ama pwittipwithi yoohiiyi yooriipa, mwintta ojuwa yoori keetta wiiya."

³⁴ Labani khuri: "Osilana wetthu wiiye etthiipo olupiyeezo." ³⁵ Siikhu ethiitile, Labani khuphakula puuzi zeelume na zeekha zaariina malepa oolakala, na pwittipwithi epile zaariina malepa ooriipa khuwenkha aanaawe oshukisa. ³⁶ Labani khuruma osusisiwa liphanko ntthile, khulawaniwa ohali woolepawo kiyasi ya siikhu ttathu ntthu ari nsafwari na okhule aariwo Yaakhumpa. Yaakhumpa khusala ashukisa nyama za Labani epile zaasaliyeezo.

Nanna ariphiweezo Yaakhumpa ti Labani

³⁷ Yaakhumpa khushija virapi piishi za miitthi mittatthu zoofwarikhana khuswaka, ³⁸ Ye aajuuviye yoori vahali aari onywaayo maphanko a nyama phi vahali zaari opepheranaavo. Ti eto aari otthaakaaye puutta epile zoophaka omaasho waya amana zinywaka. ³⁹ Amana zipepherana paata yawoona puutta epile, aana zaari owaapatthaaye aari wiiya oophaka, oottweeela, na a malepa. ⁴⁰ Yaakhumpa khuphakula nyama epile khutha mphule zaariimo pwittipwithi zeekha zoolakala yoori zisala zeekesa

okhule ziriwo epile zooriipa na za malepa za nliphanko la Labani. Khufuwa maphanko awe khuphakula khuhikusanyi na epile za Labani. ⁴¹ Amana zipepheriwaka epile zeekha za ruthupa, ye eetta otthaka puutta omaasho waya vahali zaari onywakaavo yoori zisala ziimitta zoonaka puutta epile. ⁴² Ila nawoona yoori nyama eti ti yawootta khaari ottheela puutta. Epile za wootta zaari wiiya za Labani ila epile za ruthupa zaari wiiya za Yaakhumpa. ⁴³ Wa nanna ethiito aari orettaaye, ye khwiya thaajiri nwulweenee khwiyyana maphanko a waatta a nyama, akarumeya aakha na aalume, nkamiiya na apuuru.

31

Nnyizinku oninruma Yaakhumpa orutela nti wa apapaze

¹ Yaakhumpa khuuziwa mattakhuzi aari olupaaye aana a Labani araka: "Yaakhumpa athuula zooshi paapa aariinaazo, areela mwaasa wa maali za paapa". ² Yaakhumpa khoona yoori Labani khaari omweettettisa saana nkhamma aari omweettettisaazo raku.

³ Nnyizinku khumuuzu Yaakhumpa yoori: "Orutele nti wa apapazo okhu ovokoliweewo, miiyo kinttela wiiya vamote na-weyo."

⁴ Yaakhumpa khuruma okhuweliwa Rakeele na Liiya yoori alawe otthuttu okhule aari ojisaawo nyama zawe. ⁵ N'oofiya khuwooza yoori: "Kinoona yoori papeenu khanikeettettisa saana nkhamma raku. Ila Nluku wa paapa ori vamote na-miyo siikhoozooshi. ⁶ Mweeyo mwinjuwa yoori kakhola khaazi ya papeenu khwa kuvu zaka zooshi. ⁷ Papeenu khukittetekha na khuzukulisa phakari yaka swaafu khumi, ila Nluku khuhintakheli yoori akirettelle zootakhala. ⁸ N'oolupa yoori nyama epile zooshi za wiiyana malepa phakari yaka, nyama epile khusala ziwaapattha aana awiiyana malepa paasi. N'oolupa yoori nyama zootweleela pi zaawo, nyama epile khusala ziwaapattha aana oottweleela. ⁹ Nluku othuuto ti ye athuuliyeeyo nyama za papeenu khukinkha miiyo.

¹⁰ N'oofiya wakathi zaari wiimitthaavo nyama epile, kooniye muulotha mirurumpi zaari opepheraaye ziri za malepa, zootweleela na zooriipa. ¹¹ Nlayikha la Nluku khukikhuwela muulotha liraka: 'Yaakhumpal!' Miyo khujipu: 'Lape!' ¹² Nlayikha nthile khulupa yoori: 'Olanse maasho awo woone nyama zimpepheriwa pi mirurumpi za malepa, zootweleela, na zooriipa.' Miyo koonoza mwaasa yoori kinoona zooshi epile Labani anuurettelaaizo. ¹³ Miyo ki Nluku otule oopuweleliyeeyo Beetele okhule waavaaziyewe mafuttha liwe na khukaahiti. Oleemo mmuti mphu nasaapi ethiiti orutele nti ovokoliweewo.'

¹⁴ Rakeele na Liiya khujipu araka: "Fweeyo khanina hatha etthu yoarithi mmakhono wa papeethu. ¹⁵ Oninoona nkhamma amalapo! Anuuzyanya, nzurukhu etthu wa mahari wooshi aja. ¹⁶ Maali epi zooshi Nnyizinku alaziyeeyo mmakhono wa papeethu pi zeethu fweeyo na aaneetthu. Apho orette zooshi epi Nnyizinku awuuzyeyo."

¹⁷ Yaakhumpa khuwaapakhira aanaawe na aakhaawe vankamiyya.

¹⁸ Khuthuula nyama zawe na mali zawe zooshi aapathhiyeeyo Paata-Araamu, khusala alawa wa papaaawe Esiyaakha tuniya ya Kanaani.

¹⁹ Wakathi Labani alawiyeeyo okasa ovuzi wa pwittipwithi zawe, Rakeele khwiyya sanamu za papaaawe aarettiyeeyo wiiya miluku zawe. ²⁰ Ti nanna Yaakhumpa anrettelyeezo Labani Mwaarameewu, khutthirawo owawe woohinleezi. ²¹ Khutthirisa vitthu zawe zooshi arinaazo, khulokha muuttho wa Efwarathi khusala alawa nti wa nyaako Gileyaadi.

Labani onimwiikarisa Yaakhumpa

²² Eviriyeovo siikhu ttatthu, Labani khuuziwa yoori Yaakhumpa athira. ²³ Ye khuwaathuula ajamaaze khusala amwiikarisa Yaakhumpa mpakha siikhu sapa, khunsikana onyaako wa Gileyaadi. ²⁴ Aphano Nnyizinku khunlotthisha Labani osikhu eettaka olala yoori: "Phoole! Ohimuuze ethu yooshapweya Yaakhumpa ama yootakhala."

²⁵ Labani khunsikana Yaakhumpa eemesiye heema zawe onyaako wa Gileyaadi ye na ajamaaze, n'ooifya khumaka kharipu na attaphale aamakiy-eovo Yaakhumpa. ²⁶ Ye khumuuzela Yaakhumpa yoori: "Epi okiretteliyezo niini, zookittetekha khuwaathuula aanaaka nkhamma atthu ookholiwa viitha?" ²⁷ Wakittetekhela-ni khutthira sirini? Okijuwiisiye khaneetta oleezana na furaha niipaka maliipo, koma na tthakare? ²⁸ Weeyo khuhikiweji khpula kileezanana aanaaka na atuulwaka! Epi orettiyezo vitthu zoololo. ²⁹ Miyo kinaaye owahi wa wuuhoowisa, ila osikhu wa taana Nluku wa papaawo khukuza yoori: 'Phoole! Ohimuuze ethu yootakhala ama yooshapweya.' ³⁰ Aphano nkhamma weeyo watthira mwaasa wa wuunukhela wa papaawo, miluku zaka weeyela-ni?"

³¹ Yaakhumpa khunjipu Labani araka: "Keetta woova, kaari wuupuwela yoori mwintta okinyakanya aaneenu. ³² Amana mwinsikanana ntthu miluku zenu epo, ahiye haayi. Mashaahiti ajamaazethu apa; n'oosikana ethu ya wiya yeenu kirina miyo mwithhuule." Yaakhumpa khaajuwiyeh yoori Rakeele ti ye eeyiyeoyo miluku epile.

³³ Labani khuvira nheema wa Yaakhumpa na nheema wa Liiya na etile ya akarumeya apale awiri, ila khuhisikanimo. Asaruwiyeemo nheema wa Liiya, khweetta nheema wa Rakeele. ³⁴ Rakeele aarettiye atthiye vathi wa nsaawu wa enkamiiya eekhaleliye. Labani khuwaathola mmaheema wooshimo khuhivaasikani. ³⁵ Rakeele khumuuzza papaawe yoori: "Mwhikatipukhe mbwanaaka mwaasa woohilankhi n'oowoonani, keetta wiya mwimeezi." Ye khweekesa miluku zawe epile ila khuhipatthi.

³⁶ Yaakhumpa khwiiphiiriwa, khusala ammaruwela Labani yoori: "Niini kitthekiyeeyo? Wala kakosa-ni yoofiyelela okiikarisa mwiri wookatipukhawene? ³⁷ Mapwattha aka ooshi mwathola, mwasikanamo niini ya wiya yeenu? Nkhama mwasikanamo ethu yeenu mwitiise apha ariivo attwiizaku na attwiizenu aniphuke fweeyo awiri.

³⁸ Nyaakha eshiriini kiri vamote na-mweyo. Khina pwittipwitthi yenu wala puuzi yenu enaharipweye erukulu yaya na akinarafune hatha pwittipwitthi moote ya liphanko lenu. ³⁹ Akinootiseleni hatha nyama moote yoovulalisiwa khufwa: miyo keetta oriphelaka. Mweeyo mwaari oveka oriphewa wakhula nyama yaari wiyyawaaye osikhu na nthana. ⁴⁰ Nthana keetta ohoowa mwaasa wa haari, osikhu keetta ohoowa mwaasa wookizizima, osikizi khawaari okikhola. ⁴¹ Ti nanna miyo keekhaliyeeyo vaje venu nyaakha eshiriini: kookholelani khaazi nyaakha khumi na mine yoori eeye mahari a aaneenu oowiiri, na nyaakha sitha kishukisaka nyama zenu phakari yaka yiyyaka nyama ethiipo, ila mweeyo khuzukulisa phakari yaka swaafu khumi. ⁴² Eriwaka khaari Nluku wa paapa, Nluku wa Eburahima otu amooviyeeyo Esiyaakha, wiiya vamote na-miyo, mweetta okikara woohikinkhi ethtu. Ila Nluku khoona ohoowa waka na khaazi kikholiyeeyo, taana osikhu Ye khuulikhisan."

Wahati wa Yaakhumpa na Labani

⁴³ Labani khunjipu Yaakhumpa yoori: "Aakha apa aanaaka, aanaaya atuulwaka, nyama epo oriina pi zaaka. Zooshi epi onoonaazo pi zaaka. Miyo

kiwaarettele niini aanaaka na aanaaya apa awaavokoliyeyo? ⁴⁴ Apho, nirette wahati miiyo na-weyo, otthuupo wiye pi oshaahiti ethtu.”

⁴⁵ Aphano Yaakhumpa khuthuula liwe khweemesa nkhamma nripi. ⁴⁶ Ye khuwooza ajamaaze yoori: “Mwilokotthele mawe muukele.” Yo khulokothela, khwiikhala khusala aja nshini wa mawe atthaapale ookeliyeyo. ⁴⁷ Labani khutthaja nzina puuro yaya etile la Yakaare Sahatuuta, na-ye Yaakhumpa khutthaja nzina la Kaleeti.

⁴⁸ Aphano Labani khulupa yoori: “Mawe apa nuukeliye apha leelo, os-haahiti ethtu miiyo na-weyo.” Ti eto yaari wiitheliwaaye nzina la Kaleeti.

⁴⁹ Khusala yiitteliwa theenya nzina la Misipha, mwaasa ye woolupa araka: “Nnyizinku asala aneekesela amana naattuwana. ⁵⁰ Amana owaahazula aanaaka na khuweekesa aakha akina oohiiyi yo, hatha nkhamma khajuweeni ntthu, wuupuwele yoori Nnyizinku shaahiti ethtu.”

⁵¹ Labani khumuuzu Yaakhumpa yoori: “Woone mawe apa ariiye apha na nripi ntthi keemesiyeyo vakatthi vettu miiyo na-weyo. ⁵² Kulu eti ya mawe na nripi, oshaahiti yoori akintelea wiirukhela kaapu yawo oteela wu-uharipwela, wala weeyo ohiirkhe otaaka kaapu yaka oteela okiharipwela. ⁵³ Nluku wa Eburahiima, Nluku wa Nahoori, Nluku wa papaawo ti aniphuke miiyo na-weyo.”

Yaakhumpa khulapha khwa nzina la Nluku wa Esiyaakha otule aari omoovaaye. ⁵⁴ Yaakhumpa khuretta twaha vamwaako khuwaakhuwela ajamaaze ooshi aariinaaye yoori aje vamote, n'ooja nawiisha khulala vamwaako attaapho.

⁵⁵ Mmeesho mwaya lifwajiri Labani khulankha khuwaapejari aanaawe na atuuluwe, khuwaaparikhya, nawiisha khusala arutela owawe.

32

Yaakhumpa onjilokotthela yoori alawe akutthanane Ezawu

¹ Yaakhumpa khulankha khusala alawa safwari yawe khukutthanana malayikha a Nnyizinku. ² Ye nawoona khuri: “Eti puuro ya anajanka a Nluku.” Aphale vaya khutthajavo nzina la Manayimu*.

³ Yaakhumpa khuwaaruma akarumeyaawe yoori alokoze wa ttwiye Ezawu nti wa Seyiiri tuniya ya Edomu. ⁴ Khuwaaruma yoori: “Mwilawe mwamuuze mbwanaaka Ezawu yoori karumeyaawo Yaakhumpa alupa toono: ‘Keekhala vaje wa Labani siikh za waatta mpakha leelo.

⁵ Kapatthawo mompe, apuuru, pwittipwithi na puuzi, akarumeya aalume na aakha. Aphano kinimperekheza hapari epi mbwanaaka yoori akipokherele wooshapweyavo.”

⁶ Akarumeya apale khurutela wa Yaakhumpa khumuuzu yoori: “Naalawiye mpakha wa ttwiyo Ezawu. Nanlikha eettaka ota, ontana atthu awe miiya nne oteela okutthanana weeyo.”

⁷ Ye khwiiya wa woova na wooshukulikha, khuwaawanya atthu apale ariina na maphanko a nyama khuntti piiri, pwittipwithi, puuzi, mompe, na enkamiiya. ⁸ Arettaka toowo oopuweliye yoori: “Ezawu amana ata okumananana khushintta khuntti moote, eti kiina entta otthira.”

⁹ Aphano Yaakhumpa khulompa araka: “Nluku wa paapa Eburaikiima na Nluku wa paapa Esiyaakha, Oo Nnyizinku okuuziyeeyo yoori: ‘Orutete nti wa apapazo miiyo kinttela oweetettisa saana’, ¹⁰ akinsuhi pheta yawo ya waamineya khwa nanna okikholiyeozo miiyo karumeyaawo; wakathi kaari olonhaavo muuttho Yorotaani miiyo kaathuuliye pakhora yaka paasi,

* ^{32:2} Manayimu maana aya heema piiri.

aphano kapattha khuntti piiri za atthu na nyama. ¹¹ Okuuusuru mmakhono wa ttwiyyaku Ezawu, maana kinimoova oteela okuula vamote na aakha apa na asimaana. ¹² Ila weeyo wakaahiti yoori onttele okeettettisa saana, na waattise peewu yaka nkhamma mishaka za mmattima epi zihinalaakeyaaye.”

¹³ Waari osikhu, ye khulala attaaphale. Mmaphanko wa nyama zawe khuthawulamo nyama zoomwinkha ttwiyye Ezawu: ¹⁴ miiya piiri puuzi zeekha na mirurumpi eshiriini, miiya piiri za pwittipwithi na mirurumpi eshiriini, ¹⁵ enkamiiya talaathiini zeekha na aanaaya awaamwa, mompe zeekha talaathiini na zeelume khumi, apuuru eekha eshiriini eelume khumi. ¹⁶ Wakhula liphanko la nyama epile khusala amwinkha karumeya mmote, khuwooga yoori: “Mwilokozise, maphanko apa mwaattawanise.”

¹⁷ Otule aalokoziyeeyo khumuza araka: “Weeyo onlawa wakutthanane ttwiyyaku Ezawu. Amana awuuzela yoori ‘Nyama epi pi zaani wala weeyo onnta vayi?’ ¹⁸ Weeyo onjipu yoori, ‘Pi za karumeyeenu Yaakhumpa, vitthu animperekhezaaye mbwanaawe Ezawu, ye aya onta ota nyuma wetthu.’”

¹⁹ Khunruma otule waphiiri na wattaatthu na apa akinoko aya aari operekhaaye maphanko a nyama, awoozaka yoori: “Amana mwikutthanana Ezawu, mooshi mwimuuze ethu moote. ²⁰ Mwihisahawu olupa yoori: ‘Yaakhumpa karumeyeenu onnta ota onyuma wetthu okho.’” Maana Yaakhumpa aari wuupuwela yoori: “Kintta onnyamaza wiiphiiriwa wawe Ezawu mwaasa wa vitthu epi kilokozisiyezo. Amana kikutthanana talili onteela okipwekherela saana.” ²¹ Khulokozisa vitthu epile, ila ye khulala attaaphale aamakiyeovo.

Wuumana wa Yaakhumpa nti wa Peniyeelo

²² Osikhu otthuupule Yaakhumpa khulankha kihuwaathuula aakhaawe oowiri na akarumeyaawe apale awiri aakha, na aanaawe khumi na mmote, kihuwaalosa muuttho wa Yabokhi. ²³ Kihuwaalosa atthu apale na vitthu zawe zooshi aariinaazo. ²⁴ Yaakhumpa khusala otthwe, khumpuwelela nlume mmote khusala oomanana mpakha ocha. ²⁵ Nlume otule ooniyeovo yoori khaari onkhitiri khumpiya n'yuuunu mwawe khukurukunyuwa liphaja lawe eettaka wuumana. ²⁶ Aphano nlume otule khuri: “Okilikhe kilawe wacha.” Ye khuri: “Akinuulikha olawa ohikiparikhieeni.”

²⁷ Nlume otule khumuuzela yoori: “Nzina lawo o paani?”

Khujipu araka: “Miiyo ki Yaakhumpa.”

²⁸ Nlume otule khutukhuru yoori: “Khunteela wiitheliwa theenya nzina la Yaakhumpa, ila nka okhuweleliwaka Ezirayeele. Mwaasa yoori weeyo woomanana Nnyizinku na atthu, khushintta.”

²⁹ Yaakhumpa khumuza yoori: “Kakhola moolu kuuzeni nzina lenu.”

Ye khujipu araka: “Ontakha oretta-nne nzina laka?” Khumperikhiya attaaphale.

³⁰ Yaakhumpa khulupa yoori: “Miiyo kamoona Nnyizinku wuuso khwa wuuso ila nalelo kiri haayi.” Ti eto khutthaja nzina puuro etile la Peniyeelo[†].

³¹ Yaakhumpa lanthamuwelie njuwa alankhaka Peniyeelo eettaka okokoja muulu mmote. ³² Ti eto mpakha leelo atthu a Ezirayeele khanja ntika wa nyama opu onluttaaye liphaja, mwaasa yaari phantte ya mwiili wa Yaakhumpa waapiweeyo khukurukunyuwa.

33

Okutthana wa Ezawu na Yaakhumpa

[†] 32:30 Peniyeelo maana aya ‘wuuso wa Nnyizinku’.

¹ Yaakhumpa khweekesa okhule aari weettaawo khumoona Ezawu eettaka ota na atthu awe miiya nne. Khuwaawanya aanaawe khumwinkha Liiya, Rakeele na akarumeyaawe apale awiri aakha. ² Khuwaalokozisa akarumeyaawe apale na aanaaya, khusala allotwi ti Liiya na aanaawe, khwiishela Rakeele na Yuusufu. ³ Yaakhumpa khuwaalokozela, khukokhara khwiinama swaafu sapa mpakha ntunkhulu awe ofiya aphale aariivo.

⁴ Ezawu khutthira khulawa khumpatikha khumpejari, oowiiri khusala alila. ⁵ Ezawu khulansa maasho khuwoona aakha na aana, ye khuuzela yoori: "Khi apa apaani?"

Yaakhumpa khunjiyu: "Aana apa rehema Nnyizinku amwinkhiyeeyo karumeyeenu."

⁶ Aphano akarumeya apale na aanaaya khumwaattama khukokhara khwiinama. ⁷ Elottelanaka Liiya khuta attaphale na aanaawe khukokhara khwiinama. Wa wiishela aari Yuusufu na Rakeele, na-yo khuta khukokhara khwiinama.

⁸ Ezawu khuuzela yoori: "Nyama epile zooshi kisikaniyeeyo ntarikhi ontakhela-ni?"

Yaakhumpa khujipu: "Kintakha kipatthe osuhi mmakhono mwenu mbwanaaka."

⁹ Ezawu khulupa yoori: "Miyo kinaaye pure ttwiyyaku, epo zaawo osalane omwennyewe."

¹⁰ Yaakhumpa khusala ankhanyarela araka: "Mwihikatthale! Nkhamakinsu mmakhono mwenu safwatali pokherani vitthu epi, maana n'oooonani mweeyo koona nkhama kimooniye Nnyizinku khwa nanna mwituveliweezo ti miyo. ¹¹ Kinuuvekelani yoori mwipokherele vitthu epi kuutiiseliyeenini mwaasa yoori Nnyizinku akiparikhya, akinkha zooshi epile kinhhajiyaa." Ye khunkhanyarela Ezawu mpakha okhupali.

¹² Ezawu khuri: "Nlawe nivire neettettaka."

¹³ Ila Yaakhumpa khuri: "Mbwanaka, mwinijuwa yoori aana apa nalelo asimaana na kinaaye pwittipwitthi na mompe zinaamwisaaye. Amana kikhanyarela weettettisa channu zooshi zintta ofwa siikhu moote. ¹⁴ Apho mwilokoze mbwanaka, miiyo kintta ota vattiithi-vattiithi khwa mwentto wa aanaaka na nyama zaka, mpakha ofiya nti wa Seyiiri."

¹⁵ Ezawu khuri: "Kintakha atthu aka akina kuulikhele weeyo."

Yaakhumpa khuuzela yoori: "Mwaasa wa niini? Khinhithajya. Ehtiiti mwikipokhereliyeeyo saana paasi."

¹⁶ Siikhu ethiitile Ezawu khulankha khusala arutela owawe Seyiiri.

¹⁷ Yaakhumpa khulankha khusala alawa Sokoota. Ottuukhule khujekanyauppa yawe na mazizi a nyama zawe. Ti eto atthajieevo nzina la Sokoota*.

Yaakhumpa onta Shekemu

¹⁸ Yaakhumpa arutiyeovo Paata-Araamu khufiya Shekemu tuniya ya Kanaani ari nkumi, khweemesa heema zawe kharipu ya sitati ethiitile.

¹⁹ Khuuzanya phantte moote ya nshapa puuro ethiitile eemesiyeovo heema zawe, na aana a Hamori, paapa wa Shekemu, khwa hisapu miiya nzurukhu wa feeta. ²⁰ Attaaphale khunjeka alitaari khuntthaja "Nluku yoori Nluku wa Ezirayele."

* ^{33:17} Sokoota maana aya masaasa ama mapantta.

34

Ojiwamo wa Tiina

¹ Siikhu moote, Tiina mwaana wa Yaakhumpa na Liiya, aalankhiye olawa owaathotola aanaakha a nti otthuupule. ² Shekemu mwaana wa Hamori nhivi mfwalume wa nti aya opule, n'oomoona, khunkhola khunjansili. ³ Erettiyeevo toole khwiya wootuveliwa ti Tiina mwaana wa Yaakhumpa, khumpheta, khumuza mattakhuzi oomwiitthaaza rooho. ⁴ Shekemu kumuza Hamori papaawe yoori: "Mwakuurele mwaari otu kinrale."

⁵ Wakathi Yaakhumpa asiiliyeevo yoori mwanawе Tiina ajansiliwa ti Shekemu, aarettiye aanaawe ari ntthuttu ashukisaka nyama. Ye khunyamala khusala awaaweja aanaawe mpakha oruti.

⁶ Khulankha Hamori paapa wa Shekemu olawa ottakhulana Yaakhumpa. ⁷ Wakathi arutiyeevo aana a Yaakhumpa ntthuttu, n'oosiila vitthu epile yo khwiya ooshanka channu, khuweephira mwaasa yoori Shekemu aarettiye ethu yoopatthisa haaya vakathi wa Meezirayeele, onjansili mwaana wa Yaakhumpa; eto ethu yahaari orettiwayao.

⁸ Hamori khuwooga yoori: "Mwanaka Shekemu atuveliwa ti mwanenu, apha safwatali mwinlooze eeye muukhaawe. ⁹ Nirette ojama; aaneenu awaarale aaneetthu, na apa eetthu awaarale eenu. ¹⁰ Mwiikhale vamote na-fweyo, nti opu pu weetthu mwithawule wakhula phantte mwintakhaaye. Mwiikhale ntumphu mwurette zanshara zenu mpakha muuzanye nti eenu."

¹¹ Aphano Shekemu khumuza papaawe Tiina na alupuwe yoori: "Safwatali mwikikhupalele mattakhuzi apa, kintta owinkhani wakhula etile mwinttelaaye olupa. ¹² Mwilupe mahari a waatta a mwanenu na tthuuo mwintakhaaye, kintta wuuriphani khwa nanna mwintakhaazo okuuza, ila mwikilooze."

¹³ Aphano aana a Yaakhumpa khunjipu Shekemu na papaawe wonhatavo, mwaasa wonjansili nlupwaaya Tiina. ¹⁴ Khunjipu yoori: "Khaninwahi onthuula nlupweethu khunlooga nlume woohikhiriyi koma, enttela wiya haaya. ¹⁵ Fweeyo ninkhupali wuuloozani nlupweethu amana alume ooshi a mmuti mwenu eeya ookhiriya koma nkhamma fweeyo. ¹⁶ Toowo phi ninttelava wuuloozani aaneetthu na-fweyo owaarala aaneenu, ninttela wiikhala vahali vamote niiye ojama mmote. ¹⁷ Ila amana mwihikhupali okhiriya koma, nintta onthuula mwanetthu nileemo mmuti mwenu." ¹⁸ Mattakhuzi apale Hamori na mwanawе Shekemu khukhupalela. ¹⁹ Shekemu, shapu wooshitahiwa pi atthu ooshi a vaje wa papaawe, khuhirupazi khulawa khuretta etile aavekeliweeyo mwaasa wontuvela mwaana wa Yaakhumpa.

²⁰ Hamori na mwanawе Shekemu khulankha khulawa vanlako* wa sitati ethiitile owooza alume ooshi araka: ²¹ "Atthu apa pi oosiilaneya, nlaweni niwaalikhe eekhale mmuti mwetthu mphu arettaka zanshara zaya. Nti opu nwulweene ewaamo puuro eniwaafiyelaaye, anilooze aanaaya na-fweyo niwaaloze aaneetthu. ²² Ila yo ankhupali wiikhala vamote na-fweyo khwiya ajamaazethu amana alume ooshi akhiriya koma nkhamma ethiipo na-yo akhiriyyeego. ²³ Nyama zaya zooshi na mali zaya zooshi zinttela wiya zeetthu; nlaweni nikhupalele shawuri zaya yoori eekhale vamote na-fweyo."

* ^{34:20} 'Nlako wa sitati' yaari puuro yaazoweriweeyo zaari ottakhuliwakaavo milattu na vitthu za zanshara. Moone suura 19v1.

²⁴ Alume ooshi apale aakusanyeyiyeeyo vanlako wa sitati khukhupalela mattakhuzi apale aalupiyeeyo Hamori na mwanawee Shekemu; alume ooshi a sitati ethiitile khukhiriya koma.

Alupuwe Tiina aneekesa ojiriphwa mwaasa wa nlupwaaya

²⁵ Siikhū yattaatthu, wakathi alume apale aari woonachaavo olwaaza, aana awiri a Yaakhumpa, Simiyooni na Leevi alupuwe Tiina, khuthuula phanka zaya, khweeta ntitati mphule woohijuwipi ti hatha ntthu. Khuwoola alume ooshi. ²⁶ Khumuula Hamori na mwanawee Shekemu. Khunthuulawo Tiina owawe Shekemu khusala alawa. ²⁷ Khuta aana a Yaakhumpa apale akina ositati ottuukhule ooliweewo atthu, khuttagwaththa vitthu za mali mwaasa woojansiliwa nlupwaaya. ²⁸ Khuthuula liphanko la pwittipwitthi, la puuzi, mompe, na apuuru, na vitthu zaari ntitati ntturnphule na epile zaari omashapa. ²⁹ Yo khuwaathuula aakha na aanaaya na vitthu zooshi za mali zaari mmamanyupa mwaya.

³⁰ Aphano Yaakhumpa khumuuzela Simiyooni na Leevi yoori: "Mweeyo mwakizinkula! Mwaretta yoori atthu apa aniikhalaaye nti otthuupu, Akanaani na Apirizi asala eephiiriwa ti miyo. Fweeyo khanaatteeni, yo amana akusanyeya ateela okuumanana antta okuula na ajamaazaku."

³¹ Yo khujipu araka: "Ti yooshapweya yo onretta omalempe nlupweet-thu?"

35

Yaakhumpa oninjeka alitaari wa Nnyizinku Beetele

¹ Nluku khumuuzala Yaakhumpa yoori: "Olankhe olawe Beetele weekhale ottuukho, wanjekewo alitaari wa Nluku otu oopuweleliyeeyo wakathi waari ontthiraavo ttwiyo Ezawu."

² Yaakhumpa khuwooza ajamaaze na atthu apale aariina yoori: "Mweese-lele okho miluku zenu epo zoohifwayi mwiriinaazo, mwijitwaharishe mwiwale kuwo kiina. ³ Nilankhe nilawe Beetele, ottuukho kinlawaa kanjekewo alitaari woomwaaputuvu Nluku otu aakipuweleliyeeyo siikhū epile kaari mmashakha, otu aakilokoziyeeyo tarikhi zooshi kiviriyeozo." ⁴ Yo khumwinkha Yaakhumpa miluku zaya zooshi epile zoohifwayi ariinaazo, na pirinku epile aawaliyeeyo aakha ooshi, ye khuthuula khuthipela nshini wa muutthi nwulweene waari nti wa Shekemu. ⁵ Wakathi yo alankhiyeevo attaawaka, Nluku khuweeshushela woowa atthu a sitati epile aattamananiyeeko, mphule aari oviraamo, yo khuhiiweekarisi aana a Yaakhumpa.

⁶ Yaakhumpa khufiya na atthu awe ooshi nti wa Luuzu oniithiwaaye Beetele, tuniya ya Kanaani. ⁷ Khunjeka alitaari, puuro yaya etile khuthajavo nzina la Nluku wa Beetele mwaasa yoori Nluku aajithoonyeziye attaphale wakathi opule Yaakhumpa aari ontthiraavo ttwiye.

⁸ Deebora, yaaya wa Rapekha khufwa, khuzikhwa kharipu ya Beetele nshini wa muutthi nwulweene oniitheliwaaye Aloonni-Pakuuti*.

⁹ Yaakhumpa n'ooruti Paata-Araamu, ari Beetele, Nluku ampuweleliye swaafu yaphiiri khumparikhya. ¹⁰ Khumuuzala yoori: "Nzina lawo o Yaakhumpa ila waaza leelo walikha, aphano nzina lawo o Ezirayeele." Ti nanna Nluku antthajiyeeyo nzina la Ezirayeele.

¹¹ Nluku khumuuzala theenya araka:

"Miiyo ki Nluku Woowahi Wooshi,

* **35:8** Aloonni-Pakuuti maana aya muutthi zaakwisiweeveo mishozi

mwivokolelane na mwaattelane.
 Khwa peewu yawo weeyo
 enteela opuwa khabila
 na khuntti ya khabila za waatta
 na anlawa apuwevo afwalume.

¹² Nti kimwinkhiyeeyo Eburahiima na Esiyaakha
 kinteela owinkha weeyo na peewu yawo.”

¹³ Nawiisha ottakhulana Yaakhumpa, Nluku khulawa.

¹⁴ Yaakhumpa khweemesa nripu la mawe vahali attaphale aattakhulaniyeovo Nluku. Khwiitthela viinyu nripu laya ntthile na khuvaaza mafutha. ¹⁵ Ye khutthaja nzina la Beetele puuro yaya etile aari ottakhulanaavo Nluku.

Ovokoliwa wa Bejami na ofwa wa Rakeele

¹⁶ Yo khulankha Beetele, nalelo ahinafiye Efwarata Rakeele khwiiyana tafwawuthi khuluyeene ya woona olwaaza asaleelaka ompattha mwaana. ¹⁷ Oonaka olwaaza channu, mwaatanif khumuuzu yoori: “Ohoove! Weeyo wampattha mwaana nkina theenya wanlume.” ¹⁸ Ettaka oshakhi ahinattiye phuumu, khunthaja nzina mwaana otule la Benooni‡, ila papaawe na-ye khunthaja nzina la Bejami§.

¹⁹ Aphano Rakeele khufwa khulawa khuzikhiwa tarikhi ya Efwarata (yiyyiye Belemu). ²⁰ Yaakhumpa khutthaavo alama ya nshuhuti vakhapuri ya Rakeele, mpakha leelo eti liwaapho.

²¹ Ezirayeele khulankha khuvikana korofwa ya Eeteri khulawa khweemesa heema zawe.

²² Siiku moote, Ezirayeele eekhalaka nti otthuupule, mwanawewe Ruubeni khulawa khulalana Biila, mwiithwaana otule aari muukha nkina wa papaaawe, ila hapari epile khumfiyela papanttu. Ezirayeele aarina aana khumi na awiri.

Aana a Yaakhumpa

²³ Aana aavokoleliweeyo Liiya ti Yaakhumpa pi apa: wamwanzo ti Rubeni, allotiwaka ti Simiyooni, Leevi, Yuuda, Esakhaari na Zabulooni.

²⁴ Aana aavokoleliweeyo Rakeele: ti Yuusufu na Bejami.

²⁵ Na-ye aana a Biila karumeya wa Rakeele pi apa: Daani na Nafitaali.

²⁶ Aana a Ziilipa karumeya wa Liiya pi apa: Gaati na Asheeri.

Aari atthaapo aana a Yaakhumpa awaapathhiyeeyo nti wa Paata-Araamu.

²⁷ Aphano Yaakhumpa khurutela wa papaawe nti wa Manre kharipu na Kiriati-Aarapa wiyyiye Heporooni, ohali aari wiikhalaawo Eburahiima na Esiyaakha. ²⁸ Esiyaakha eekhaliye nyaakha miiya na thamaaniini. ²⁹ Afwa ari wa wuuluvuala arina nyaakha za waatta, aanaawewe Ezawu na Yaakhumpa khunzikha.

36

Peewuya Ezawu

¹ Eti peewu ya Ezawu anjuwaniwaaye nzina la Edomu.

² Ezawu khuwaarala aakha a Kanaani. Mmote aari wiitthiwa Aada aari mwaana wa Elooni, nhiiti. Nkinoko aari wiitthiwa Olipama mwaana wa

† ^{35:17} mwaatanif: pariteera ‡ ^{35:18} Benooni maana aya mwaana woopattikhana na tafwawuthi

§ ^{35:18} Bejami maana aya mwanaka wa nkhono-nlume.

Anahi ntuulu wa Zipyiooni Niihi, ³ na Basemaathi mwaana wa Esumayila nlupuwe Nepayoothi.

⁴ Aada aavokoleliwe mwaana ti Ezawu khunthaja nzina la Elifazi, na Basemaathi khunvokola Rewele. ⁵ Na Olipama khunvokola Yewuushi, Yalaamu na Koora. Apa aari aana Ezawu awaavokoliyeeyo tuniya ya Kanaani.

⁶ Ye khuwaathuula aakhaawe na aanaawe na atthu ooshi aari wiikhalaaye na vitthu zooshi aapathiiyeego tuniya ya Kanaani waaza pwit-tipwirthi zawe, puuzi na mompe zawe zooshi, khumwazeyanana ttwiye Yaakhumpa khulawa khwiikhala nti nkina. ⁷ Ye khuthama mwaasa wa nti opule aari wiikhalaaye khawaarina ethhu-yooja yoofiyela oja nyama zaya zooshi, mali zaya zaari za waatta kuhisala ewaheya wiikhala vahali vamote. ⁸ Ezawu, otu aniiithiwaaye Edomu, khuthama khulawa khwiikhala onyaako wa Seyiiri.

⁹ Eti peewu ya Ezawu paapa wa Meedomu aniikhalaaye onyaako wa Seyiiri.

¹⁰ Apa mazina a aana a Ezawu:

Elifazi mwaana wa Aada muukha wa Ezawu, Rewele mwaana wa Basemaathi muukha wa Ezawu.

¹¹ Apa mazina a aana a Elifazi:

Teemani, Omari, Zeefo, Katamu na Kenaazi.

¹² Tinna, muukha nkina wa Elifazi mwaana wa Ezawu, aavokoleliwe mwaana aari wiitthiwaaye Amaleekhi. Apa atuulu a Aada muukha wa Ezawu.

¹³ Apa aari aana a Rewele:

Nahathi, Zeera, Shaama na Miiza. Apa atuulu a Basemaathi muukha wa Ezawu.

¹⁴ Apa aana a Olipama muukha wa Ezawu, mwaana wa Anahi, ntuulu wa Zipyiooni:

Yewuushi, Yaalamu, na Koora.

¹⁵ Apa mahaakhimu a mahimo a peewu ya Ezawu:

Elifazi, mwaana wamwanzo wa Ezawu, aanaawe aari apa:

Haakhimu Teemani, haakhimu Omari, haakhimu Zeefo, haakhimu Kinaazi, ¹⁶ haakhimu Koora, haakhimu Katamu, na haakhimu Amaleekhi. Apo aari mahaakhimu a peewu ya Elifazi nti wa Edomu. Aari atuulu a Aada.

¹⁷ Aana a Rewele, mwaana wa Ezawu aari apa:

Haakhimu Nahathi, haakhimu Zeera, haakhimu Shaama na haakhimu Miiza. Apa mahaakhimu a Rewele nti wa Edomu na atuulu a Basemaathi muukha wa Ezawu.

¹⁸ Aana a Olipama muukha wa Ezawu, aari apa:

Haakhimu Yewuushi, haakhimu Yaalamu na haakhimu Koora. Apa mahaakhimu a peewu ya Olipama muukha wa Ezawu mwaana wa Anahi.

¹⁹ Ooshi apa mahaakhimu na aana a Ezawu otu anjuwaniwaaye nzina la Edomu.

Peewuya Seyiiri

²⁰ Apa aana a Seyiiri, nhoori aari wiikhalaaye nti otthuupule; Lotaani, Shobaali, Zipyiooni, Anahi, ²¹ Diishoni, Eseeri na Diishani. Apa aari mahaakhimu a nti wa Hoori, aana a Seyiiri nti wa Edomu.

²² Aana a Lotaani aari apa:

Hoori, Hemani, na Tinna nlupu wa Lotaani.

²³ Aana a Shobaali aari apa:

Aluvani, Manahati, Ebali, Shefo na Onamu.

24 Aana a Zipyooni aari apa:

Aaya na Anahi othuuto ooneliyeeyo nlipu wa maati oolukuza n'yaara ashukisaka apuuza za papaawe Zipyooni.

25 Aana a Anahi aari apa:

Diishoni na Olipama.

26 Aana a Diishoni aari apa:

Hemetaani, Eshipaani, Ethirani na Keerani.

27 Aana a Eseri aari apa:

Bilani, Zaawani na Akani.

28 Aana a Diishani aari apa:

Wuuzi na Araani.

29 Apa aari mahaakhimu a Ahoori:

Lootani, Shopali, Zipyooni, Anahi, **30** Diishoni, Eseeri na Diishani. Apa aari mahaakhimu a ahori, ti nanna aawanyeyiyeezo mahimo aya nti wa Seyiiri.

Afwalume na mahaakhimu a nti wa Edomu

31 Apa afwalume aariina yenzi nti wa Edomu ahineeyevo hatha mfwalume mmote wa mwiizirayeele.

32 Beela mwaana wa Bewoori ti ye aathawaliyeeyo tuniya ya Edomu, sitati yawe yaari wiithiwa Dinaapa. **33** N'oofwa Beela, khuthawala Yobaabu mwaana wa Zeera wa sitati ya Bozara.

34 Yobaabu khufwa, khuthawala Hushaamu wa nti wa Temaani.

35 Khufwa Hushaamu, khuthawala Hadaadi mwaana wa Bedaadi aawaashinttiyeeyo Amidiyaani nti wa Mowaabu. Sitati yawe yaari wiithiwa Avithi.

36 Hadaadi khufwa, khuthawala Samula wa nti wa Masareka.

37 Samula khufwa, khuthawala Shawulu wa nti wa Rohopoothi waat-tameliyeeyo muuttho Efwarathi.

38 Shawulu khufwa, khuthawala Baali-Hanani mwaana wa Akiboori.

39 Afwiyeeyo Baali-Hanani mwaana wa Akiboori khuthawala Hadaari, sitati yawe yaari wiithiwa Paawu, muukhaawe aari Mehetabeeli mwaana wa Matereeti ntulu wa Mezahaabu.

40 Mahaakhimu apa aari a peewu ya Ezawu, na mahimo aya na miti zaya:

Haakhimu Tinna, Aluvani, Yeteteeti, **41** Oholipama, Elaahi, Pinoni,

42 Kenaazi, Temaani, Mibizaari, **43** Makidiyeeli na Iramu. Apa aari mahaakhimu a Edomu; wakhula mmote aari wiikhala puuro efile aari othawalaaye.

Meedomu ooshi peewu ya Ezawu.

37

Joziya Yuusufu

1 Yaakhumpa aari wiikhala tuniya ya Kanaani ottuukho aasaafireliyeewo papaawe.

2 Eti hatiithi ya peewu ya Yaakhumpa.

Yuusufu arina nyaakha khumi na sapa, aari nshuki wa pwittipwithi na puuzi za papaawe vamote na attwiize aana a Biila na Ziilipa, aakha a papaawe. Yuusufu eetta omuuzaka papaawe vitthu zootakhala aari orettaazo attwiize.

³ Ezirayeele* aari ompheta Yuusufu zayita aana apale akinoko aya, mwaasa yoori ampatthiye ooluvaliye. Khunsonela ajapi ya kisawu za waatta. ⁴ Attwiize nawoona yoori oniiya ophetiwa ti papaaya zayita yo, khwaaza wiiphiiriwa ti ye khuhisala awahi ontakhuslana saana.

⁵ Siikhu moote, Yuusufu khulottha joshi, n'ooowooza attwiize yo khutepa wiiphiiriwa ti ye.

⁶ Ye khuwooza yoori: "Mwisileze joshi kilothiyeyo! ⁷ Kalottha niri mmashapa nifukaka misama za tiriku, nsama aka khweemela, misama zenu mweeyo khuzukulela khwiinamela opu waaka."

⁸ Attwiize khumuuzela yoori: "Apho niri weeyo ontela wiiya mfwalume ethu fweeyo? Ama niri ti weyo ontelaaye onilokozela?" Khutepa wiiphiiriwa mwaasa wa joshi etile na mattakhuzi awe.

⁹ Khurutela olottha khuwooza attwiize yoori: "Kalottha theenya! Njuwa, mweezi na matthottowa khumi na limote zikiinameliye."

¹⁰ N'oomuuza papaawe na attwiize, papaawe khunshowera araka: "Joshi-ni eto olotthiyeyo? Niri miiyo, attwiizo na mamaawo nintela wuukokhorela weeyo?" ¹¹ Waaza attaapho attwiize khuwaata nrimala na-ye, papaawe khusala aphereleza vitthu epile varoho vawe.

Wuuzyisiwa wa Yuusufu pi attwiize

¹² Siikhu moote, attwiize Yuusufu aalawiye oshukisa nyama za papaaya kharipu ya sitati ya Shekemu. ¹³ Aphano Ezirayeele khumuuzza Yuusufu araka: "Attwiizo anshukisa nyama kharipu ya Shekemu. Apho kintakha yoori weeyo olankhe olawe ottuukho."

Ye khujipu: "Kemaani, kasiila paapa."

¹⁴ Papaawe khumuuzza: "Wawoone nkhamma akumi na nyama zaya, ote okuuze." Yaakhumpa oninrumaru aarettiye ari mmujokowa wa Heporooni, Yuusufu khulankha khusala alawa Shekemu.

¹⁵ Asaleelaka ofiya Shekemu khuthowelela. Khusikanika ti mwinyi mmote eettaka ojeettettela ntthuttu khumuuzela yoori: "Weyo! Oneekesani?"

¹⁶ Ye khunjipu araka: "Kiniweekesa attwiizaku; safwatali kuuzeni ohali anshukisaawo nyama zaya?"

¹⁷ Mwinyi otule khujipu yoori: "Apha avikanavo, kawaasiila araka: 'Ninta Dotaani.'"

Yuusufu khusala aweekesa, khuwaasikana asaleelaka ofiya Dotaani.

¹⁸ Attwiize n'oomoona eettaka ota, ari peetiwene ahinawaafiyele khuwaza shawuri zoomuula.

¹⁹ Yo khuzzana yoori: "Ahee! Namalottha nwulu oto ontta ota! ²⁰ Aphano akhweya. Nlaweni nimuule nimweeselele valiphotto nalupe yoori eetta orafuniwa ti nyama za ntthuttu. Noone olottha wawe vahali ontelaaye wiishelavo."

²¹ Ruuben ni oosiila khumwaakisela khulupa yoori: "Nihimwankameze!"

²² Khulupa theenya yoori: "Nihimuule. Nimweeselele vanlipu oriye n'yaara mpho, ila mwihinvulalise." Ye alupaka toowo, aariye amuusuru ttwiye arutele wa papaawe ari haayi.

²³ Yuusufu n'ooowaafiyela attwiize, yo khunvula ajapi etile yooshapweya aawaliyeyo, ²⁴ khuntthempa khumweeselele vanlipu woohiivo hatha ethu na oohivo maati.

* ^{37:3} Ezirayeele nzina likina la Yaakhumpa. Moone kithaapu ya mwanzo suura 32v38.

²⁵ Yo khwiikhala yoori aje, khuwoona annya-zanshara eettaka ota ari ohali woolepawo, annya-esumayila aari olankhaaye Kileyaati na enkamiiya zaya apakhiriye viluko, paalasamu[†], na mafuttha oonukhela eettaka Misuri.

²⁶ Yuuda khuwoozela attwiize yoori: “Ena fwayita-ni omuula ttwiyyetthu khunvitha? ²⁷ Nihimuule, niwoozanyeze annya-esumayila apo, maana ye ti ttwiyyetthu, taamu yetthu moote.” Attwiize apale akinoko aya khukhupalela.

²⁸ Khunlazavo vanlipu aphale aamweeseleliyeevo, khuwoozanyeza annya-esumayila aari oviraaye, a nti wa Midiyaani, na nzurukhu eshiriini wa feeta. Yo khunthuula khusala alawana Misuri.

²⁹ Wakathi Ruubeni aruteliyeevo vanlipu aphale, khuthurumelavo khuhinsikanivo, attaphale khuvarula kuwo zawe athoonyezaka yoori ori nhuzuni. ³⁰ Khurutela aphale aariivo attwiize khuwoza yoori: “Mweyo! Shaapu otule khaavo vanlipu aphale! Kiri toovi?”

³¹ Khuthuula ajapi ya Yuusufu, khuula puuзи moote, taamu yaya khutukunttela. ³² N'oreetta toole, khuthuula ajapi etile ya waatta kisawu khumweettisela papaya, khumuuzu yoori: “Ajapi eti neetta olokotha. Nkoonani nkhamma khahiyu ya mwanenu.”

³³ Ezirayele khufwahamu khuri: “Ajapi ya mwanaka! Khweele-khweele nyama yoohusuti yeetta omuula khunrafuna.”

³⁴ Aphano Yaakhumpa khuvarula kuwo zawe khuwala saakhu khusala anlidele mwanawee siikhу za waatta. ³⁵ Aanaawe ooshi aalume na aakha khuteela onzuru, ila ye khukatthalaa ozurwiwa waya alupaka yoori: “Kiniikhala woolila ethiipi mpakha olawa okutthanana mwanaka aahera.” Khwiyya wonlilela mwanawee Yuusufu.

³⁶ Wakathi aya opo Amidiyaani aarettiye amuuuzanyisiye Yuusufu wa Potifwaari ntunkhulu wa anamweekesela a Firawuuna.

38

Hatiithiya Yuuda na Tamaara

¹ Wakathi aya opo Yuuda aamwazeyananiye attwiize khusala eekhala wa mwinyi mmote aari wiitthiwaaye Hiira nti wa Atulaamu. ² Ottuukho Yuuda ansikaniyeewo mwanankha mmote aari mwaana wa nkanaani aari wiitthiwaaye Shuuwa, ye khunrala. ³ Khwiimittha khumpattha mwaana khunthaja nzina la Eeri. ⁴ Khwiimittha theenya khumpattha mwaana nkina khunthaja nzina la Onaani. ⁵ Khurutela theenya khumpattha mwaana khunthaja nzina la Shela, ompattikhanaru Yuuda aarettiye ari nti wa Kezupu.

⁶ Ye khumweekesa muukha aari wiitthiwaaye Tamaara khunlooga mwanawee Eeri. ⁷ Ila Nnyizinku khuhintuveli thwapiya za Eeri, khufiyelela omuula.

⁸ Aphano Yuuda khumuuzu Onaani yoori: “Onrale muukha wa marehemu ttwiyo, ompatthele aana yoori ttwiyo eeyane peewu khwa weyo.”

⁹ Ila Onaani aajuwiiye yoori aana aari weettelaaye opattikhana, khaari weet-tela wiiya awe. Ti eto, amana arapalelana muukha wa ttwiye, zina yawe aari wiitthelaka vathi yoori ahiwaapathe aana eeya a ttwiye. ¹⁰ Nnyizinku khuhisala zintuvela vitthu epile aari oreettaazo khufiyelela omuula.

¹¹ Aphano Yuuda khumuuzu Tamaara muukha wa mwanawee yoori: “Orutele wa apapazo ori nankhwele onwejaka mwanaka Shela owula.”

[†] **37:25** Paalasamu yaari pumata aari ottukuntteliwakaaye nthu amana afwa yoori ahivutte.

Ye aalupiye toowo mwaasa woomoovisa mwanawe Shela ofwa. Tamaara khulawa khwiikhala wa papaawe.

¹² Ziviriyeovo siikhu za waatta, khufwa muukha wa Yuuda mwaana wa Shuuwa, nawiisha matthaka khulankha na swaahipu awe Hiira wa nti wa Atulaani, khusala alawa owoona atttu apale ari okasaaye ovuzi wa nyama zaya nti wa Tinna.

¹³ Khuuziwa Tamaara yoori: “Nkhwewo ontta ovira, oneetta Tinna olawa okasisa nyama zawe.” ¹⁴ Khuvula kuwo zawe epile aawaliyeezo z’oonankhwele, khujifinikha nshukwi yoori ahijuwiwe, khulawa khwiikhala vanlako wa sitati ya Enayimu waattamana na tariki ya Tinna. Ye aarettiye toowo mwaasa woojuwa yoori Shela awula, ila khwiiya ahi-naloziwe.

¹⁵ Yuuda n’oomoona khumwaakanyerela omalempe, mwaasa yoori aa-jifinikhaniye nshukwi omaasho wawe.

¹⁶ Ye khunkhwuela araka: “Nkatu! Kinuutakha, kuulalane.” Ye ahijuwaka yoori ti nkhwewe muukha wa mwanawewe.

Tamaara khumuuzela yoori: “Amana kilalana weeyo onikinkha-ni?”

¹⁷ Yuuda khunjiyu yoori: “Kintta wuuperekheza puuzi moote ya nliphanko mwaka.”

Tamaara khuri: “Aayo! Kasiila. Ila okilikhele etthu kinwahaaye waamini yoori onlawa wakiperekheze puuzi yaya eto.”

¹⁸ Ye khumuuzela araka: “Kuulikhele niini?”

Tamaara khunjiyu yoori: “Okilikhele peetthe yawo, mfukho awo na pakhora eto oriina mmakhono mwawo.” Yuuda khumwinkha zooshi epile anvekeliyeezo, khunlalana khwiimittha. ¹⁹ Nawiisha Tamaara khurutela owawe khuvula nshukwi khuvala kuwo zawe epile z’oonankhwele.

²⁰ Yuuda khuthuula puuzi khumwinkha swaahipu awe Hiira yoori alawane athuule vitthu epile anlikheliyeeyo muukha otule, ila ye khuhinsikani. ²¹ Hiira khuwoozela atttu a nti aya opule yoori: “Ori vayi malempe otule anikhalakaaye ntarikhi?”

Yo khunjiyu araka: “Mmuti mphu khaamo hatha malempe wa wiiya wa ntumphu.”

²² Ye khurutela wa swaahipu awe Yuuda, khumuza yoori: “Akinsikanneeniwo, atttu a nti aya opule akuza yoori khaawo hatha malempe wa wiiya wa mmuti ntumphule.”

²³ Yuuda khulupa yoori: “Ti asalane epile kimwinkhiyeozo yoori ehikikwele paathuli, miliyo kaaperekhiye puuzi yaya, ila weeyo khuhinsikani ye aya.”

²⁴ N’oovira nyeezi mittatthu, khuuziwa Yuuda yoori: “Nkhwewo Tamaara araruwa, apha eemitha.”

Ye khuri: “Athuuliwe alawe alukuziwe!”

²⁵ Athuuliweovo alawaka olukuziwa, khumperekheza nhupi nkhwewe araka: “Erukulu eti kiriina ti ya mwennyewe vitthu epi.” Khulupa theenya yoori: “Moone pakhora eti, mfukho opu na peetthe eti nkhamma mwininjuwa mwennyewe.”

²⁶ Yuuda nawoona vitthu epile khulupa yoori: “Ye ti wa shariya zanya miiyo, maana kamwaahitiye oraliwa ti mwanaka Shela.” Na Yuuda khuhiruteli orapalelana.

²⁷ Ofiyeeovo wakathi woopattha ekumi, mwiirukulu mwawe aarimo aana awiri. ²⁸ Apatthaka ekumi otu mmote aya khusarula nkholo awe mmote, mwaatani khuthuula luuзи lookhuttuwa khumfukela khuri: “Otu ti eeyiye thakuzi woosaruwa.” ²⁹ Otule aasaruliyeyo nkholo awe khurutiselamo,

khusaruwa otule ahaasaruliyeeyo, mwaatani khuri: "Huu! Wapattha toovi tarikhi yoosaruwa?" Khunthaja nzina la Pereezi*. ³⁰ Aphano, khusaruwa ttwiye otule aafukeliweeyo luuzi lookhuttuwa nkhone awe, khutthajija nzina la Zeera.

39

Yuusufu ari owawe Potifwaari.

¹ Yuusufu aathuuliwe khulawaniwa Misuri pi annya-esumayila. N'oofiya khuzzanyeziva Potifwaari mmisuri, karumeya nwulu wa Firawuna, namalokozela wa anamweekesela.

² Nnyizinku aari vamote na Yuusufu, khunjaaliwa eekhalaka Misuri vaje wa mbwanaawe. ³ Mbwanaawe otule khoona yoori Nnyizinku ori vamote na Yuusufu, wakhula ethu aari orettaaye Nnyizinku eetta onjaaliwa, ⁴ Yuusufu khwiya woofwayi mmakhono wa Potifwaari khumwinkha ottunkhulu wa weettettisela vaje vawe na mali zawe zooshi. ⁵ Paata yoomwinkha ottunkhulu wa vaje vawe na wa mali zawe zooshi, Nnyizinku khuparikhya vaje aphale mwaasa wa Yuusufu. Parakha ya Nnyizinku yeeshukheliye khwa zooshi epile ariinaazo, waaza vaje mpakha mmashapa mwawe. ⁶ Zooshi ariinaazo ntunkhulu aya khwiya Yuusufu, Potifwaari khaari ojali hatha ethu yoohiyi ethu-yooja etile ari ojakaaye. Yuusufu aari wooshapweya wumpo na wa weeziwa.

⁷ N'oorettikhana vitthu epile, muukha wa Potifwaari khwaaza ontakha Yuusufu. Siikhu moote khumuza yoori: "Weeyo nlawe wakilalane." ⁸ Ye khukatthala, khumuza muukha wa mbwanaawe yoori: "Moone! Mbwanaaka khanjali vitthu za vaje apha; zooshi ariinaazo, ziri mmakhono mwaka. ⁹ Khaavo mmote akizitiyeeyo miiyo vaje apha, khayiivo hatha ethu moote akikhattaziyeeyo ila mweeyo wala, mwaasa yoori mwa muukhaawe. Ethu yootakhala nkhamma eto, kirette mwaasa wa niini? Toowo kintta onkosa Nnyizinku!" ¹⁰ Wakhula siikhu muukha otule eetta onkhanyarela yoori alawe anlalane, ila Yuusufu khuhisala ansibileza na khusala anwerawera.

¹¹ Siikhu moote, ye khuvira nnyupa olawa okhola khaazi zawe, aarettiye ahiwo hatha mwiiththaana mmote. ¹² Muukha wa Potifwaari khukhola orempo awe khumuza yoori: "Haya okilalane!" Yuusufu khunlikhela orempo awe mmakhono mwawe khutthirela vaje.

¹³ Muukha otule ooniyeovo yoori atthira khulikha orempo awe, ¹⁴ khuwaakhuwela akarumeya khuwooza yoori: "Mmoone! Mwiibereewu otu atisiweeyo ti mannaka aaza onitarawu. Aaviriye okathi waka khusala atakha okilalana, ila miiyo khusala kikhuwa kinyakulaka. ¹⁵ Ye nawoona yoori keetta onyakula khukilikhela orempo awe khutthirela vaje."

¹⁶ Ye khupweha orempo opule mpakha mbwanaawe ota. ¹⁷ Wakathi atiyeovo khumuza mattakhuzi apale araka: "Mwiiththaana awo otule wa mwiibereewu onitiiseliyeeyo aphà, aakiteeliye khusala atakha okilalana. ¹⁸ Kikhuwiyeovo ye khukilikhela orempo awe khutthira."

¹⁹ Paata yoosiila mattakhuzi apale aari wuuziwaaye ti muukhaawe, araka: "Mwiiththaana awo vitthu akiretteliyeego pi epo," ye khukasirika venkivene. ²⁰ Khuruma weetteliwa Yuusufu khulawa khutthiiwa nkalapooso, ntumpho mfwalume Firawuna aawaafukeliyeemo attu awe. ²¹ Ila Nnyizinku ari vamote na Yuusufu anthoonyezaka pheta ya

* ^{38:29} Nzina nttho la Pereezi maana aya tarikhi yoosaruwa

waamineya, ntunkhulu wa anamweekesela kalapooso khunkola saana. ²² Khumwinkha ottunkhulu Yuusufu wa anamfukeliwa ooshi, khwiya namalokozela vitthu zooshi za nkalapooso mphule. ²³ Ntunkhulu wa anamweekesela a kalapooso etile khuhisala ajali hatha ethu, zooshi zaari mmakhono wa Yuusufu mwaasa yoori Nnyizinku aari vamote na-ye; na wakhula etile aari orettaaye aari wiiya woojaaliwa.

40

Yuusufu ontaphulela jozi piiri nkalapooso

¹ Paata yoovira vitthu epile, namootela zoonywa za mfwalume na namuupa-phaaawu khunkosa mbwanaaya, mfwalume wa Misuri. ² Firawuna khwiya wa wiiphiiriwa pi annya-khaazi awe apo awiri; ntunkhulu wa wootela zoonywa na ntunkhulu wa wuupa phaaawu. ³ Khuruma olawa ofukeliwa nkalapooso ya ntunkhulu wa anamweekesela, ntumphule aafukeliweemo Yuusufu. ⁴ Ntunkhulu wa anamweekesela khumwinkha Yuusufu atthu apale awiri yoori asala awaatthantta, yo khwiikhala siikhu za waatta nkalapooso.

⁵ Osiku mmote oowiri khulottha, wakhula jozi yaarina maana aya, etile ya namuupa-phaaawu na ya namootela zoonywa.

⁶ Mmeesho mwaya supu Yuusufu khulawa owaathotola, khuwaasikana ari ooshukulikha. ⁷ Aphano ye khuwoozela annya-khaazi a Firawuna apale aafukelaniweeyo araka: "Leelo mwakafilikhela-ni?"

⁸ Yo khunjipu yoori: "Neetta wiiyana jozi khuhivo ntthu wootaphulela maana aya."

Yuusufu khujipu yoori: "Ila Nluku paasi ti ye anttelaaaye otaphulela jozi epo, kuuzeni jozi zaya epo."

⁹ Ntunkhulu wa wootela zoonywa khumuza jozi yawe Yuusufu araka: "Kaalothiye okiteeliye nrayi wa wuuva omaasho waka. ¹⁰ Orina virapi ttatthu za waaleya na khwiima mishumo zaari ottokotthaaye miwamawiawa. ¹¹ Pilawuri ya Firawuna eri mmakhono mwaka. Miyo khuthuula mishumo za wuuva khuvinyela mpilawuri mphule kimwinkha mmakhono mwawe."

¹² Yuusufu khuri: "Maana a jozi yaho eto pi apa: virapi ttatthu enlupa siikhu ttatthu. ¹³ Nkatthi wa siikhu ttatthu Firawuna onta wuulazamo nkalapooso orutele khaazi yaho ya wootela zoonywa za mfwalume na omwinkha pilawuri mmakhono mwawe, nkhama ethiipo waari oret-takaazo raku. ¹⁴ Ila amana zooshi ziweetteltelaka saana ohikisahawu, kinuuahirimiza yoori okoonele huruma omuuze mfwalume monkoni wa miiyo, okaawuni yoori kileemo nkalapooso mphu. ¹⁵ Miyo keetta wiiyiwa nti wa Meebereewu khutiisiwa mmuti mphu khweeseleliwa nkalapooso hatha ethu kihiretteeni."

¹⁶ Asiiliyeevo ntunkhulu wa wuupa phaawu yoori Yuusufu aataphuleliye jozi etile wooshapweyavo, ye khumuza yoori: "Na-miyo kinaaye yaaka, kalottha kipwecheriye phaawu khelenke ttatthu. ¹⁷ Khelenke eti ya vatulu zaarimo wakhula nanna ya phaawu epile zontuvela Firawuna, ila anyanyi khusala ajoropoja ziri veeshwa vaka."

¹⁸ Aphano Yuusufu khunjipu yoori: "Jozи yaho eto maana pi apa, khelenke ttatthu epo enthoonyeza siikhu ttatthu. ¹⁹ Nkatthi wa siikhu ttatthu ethiipo, Firawuna onlawa athomeye eeshwa mmutthi, mwili awo osala ojoropojwa pi anyannyi."

²⁰ Siikhu yattaathu yaari siikhu Firawuuna aari orettaaye mwaakha, ye khujisa njampo na annya-khaazi awe ooshi, khuruma okhuweliwa apale aari nkalapooso namuupa-phaaawu na namootela zoonywa. ²¹ Namootela zoonywa khurutiseliwa khaazi yawe ya wootela na yoomwinkha pilawuri Firawuuna mmakhono mwawe. ²² Ila Firawuuna khunthomeya namuupa-phaaawu nkhamma ethhiipile aalupiyeezo Yuusufu.

²³ Aphano namootela zoonywa otule khuhinfikhiri Yuusufu khunsahawu eperepere.

41

Yuusufu ontaphulela jози ya Firawuuna

¹ Eviriyeevo nyaakha miwiri, Firawuuna khulottha ari nshini wa muutto oniithhiwaaye Niilu. ² Mmuttho ntumpho zivuuwakamo mompe sapa zooneneva na zooshapweya khusala zittepula nyaani. ³ Elottelanaka theenya khusala zivuuwamo mmuttho Niilu mompe sapa zootakhala za wootta, khulawa khwiya vamote na epile zaavuuwiyeyo omwanzo. ⁴ Epile zootakhala za wootta khurafuna epile zooshapweya zooneneva, attaaphale Firawuuna khusisimuwa.

⁵ Khurutela olala khulottha theenya, misaasi sapa za tiriku zooshapweya za wiitaala zaari owulaaye vanchina limote. ⁶ Elottelanaka khoona misaasi sapa za maveya a tiriku a wuuma oolukuziwa ti pheeyo ya n'yaara. ⁷ Misaasi epile sapa za maveya khumiza epile za wiitaala na zooshapweya. Firawuuna khusisimuwa khujuwa yoori eetta olottha.

⁸ N'oocha mmeesho mwaya supu, nafusi yawe khwiya yooshukulikha, khurumisa olawa okhuweliwa anamajintta ooshi na anampiya sako a Misuri. Firawuuna khuwoza jоzi a lotthiyeyo, ila khuhivo hatha ntthu mmote aajuuiyeyo otaphulela waya.

⁹ Aphano namootela zoonywa khumuua Firawuuna yoori: "Leelo kafikhiri koosa zaka. ¹⁰ Siikhu moote mweephiriseweyo pi annya-khaazi eenu mwaarumisiye ofukeliwa miiyo na ntunkhulu wa wuupa phaaawu nkalapooso wa ntunkhulu wa anamweekesela. ¹¹ Osikhu mmote fweeyo awiri khulottha wakhula ntthu jоzi yawe, wakhula jоzi yaarina maana aya. ¹² Ila nkalapooso ntumphule aarimo shapu mmote wa mwibereewu aari mwiitthwaana wa ntunkhulu wa anamweekesela, fweeyo khumweeleza jоzi zetthu epile ye khutaphulela. ¹³ Khurettikhana zooshi nkhamma ethhiipile aanuuziyeezo: miiyo khurutiseliwa khaazi yaka, otu nkina khuheyiwa."

¹⁴ Firawuuna khuruma olawa okhuweliwa Yuusufu, khulaziwamo nkalapooso nasaapiru. Khunyoola ttevu zawe khuwala kuwo kinoko khulawaniwa wa Firawuuna.

¹⁵ Ye khumuua Yuusufu yoori: "Miiyo keetta olottha jоzi moote khuhipuwi hatha ntthu mmote wookitaphulela. Ila khusiila yoori weeyo amana wuuziwa jоzi onwahi otaphulela maana aya."

¹⁶ Ye khunjipu Firawuuna araka: "Miiyo akina owahi, ila Nnyizinku onwahi wuutaphulelani wooshapweyavo."

¹⁷ Aphano Firawuuna khusala amuuza jоzi etile Yuusufu yoori: "Kalothha keemeliye nshini wa Niilu. ¹⁸ Mmuttho mwaya mphule khusala zivuuwamo mompe sapa zooshapweya na zooneneva khusala zittepula nyaani nshini wa Niilu. ¹⁹ Theenya khuvuuwa mompe sapa za wootta zootakhala. Nti wooshi wa Misuri akinooone mompe zootakhala nkhamma epo. ²⁰ Mompe zaya ethhiipile zootakhala na za wootta khumiza mompe epile zooneneva na

zooshapweya,²¹ ila khusala zumpuwa nkhamma zihijeeni ethu nalelo, khwiuya za wootta na zootakhala nkhamma zaariizo. Ethito miiyo khusisimuwa.

²² Khurutela olala khulottha theenya misaasi sapa za tiriku zooshapweya za wiitaala zaari owulaaye vanchina limote.²³ Elottelanaka khoona misaasi sapa za maveya a tiriku a wuuma oolukuziwa ti pheeve ya n'yaara.²⁴ Misaasi epile sapa za maveya khumiza epile za wiitaala na zooshapweya, miiyo khuwooza anamajintta ila khuhiivo hatha mmote aawahiyeeyo ota-phulela."

²⁵ Aphano Yuusufu khumuuzu Firawuuna yoori: "Jozи zenu epo z'oopiri enlupa ethu moote paasi, Nluku eetta wuuthoonyezani eti anttelaaaye oretta.²⁶ Mompe epo sapa zooshapweya zinlupa nyaakha sapa. Misaasi sapa zooshapweya na-yo zinlupa nyaakha sapa. Jozи zaya epo mooteru.²⁷ Mompe epo sapa za wootta na zootakhala zaavuuwiyeeyo ziwelela aphale zaariivo epile zooshapweya enlupa nyaakha sapa. Misaasi epo sapa za maveya zaalukuziweeyo ti pheeve ya n'yaara, khumiza epile zooshapweya enlupa nyaakha sapa za jala.

²⁸ Mattakhuzi apa kiniwuzaanini mfwalume, Nluku eetta wuuthoonyezani etile anttelaaaye oretta.²⁹ Nyaakha sapa tuniya ya Misuri enteela oruwera venkivene.³⁰ Ila theenya zinlawha zate nyaakha sapa za jala, oruwera opo onlawa wasahawiwe. Jala yaya eto enlawa yashintt nti aya opu.³¹ Khunteela ofikhireliwa oruwera opule, mwaasa wa jala enttela wiiya yootepa waatta tuniya eti ya Misuri.³² Eto mwilotthisiweeyo swaafu piiri enlupa yoori Nluku alakela na onretta woohirupazi.

³³ Apho mweeyo mfwalume, mwinthawule ntthu mmote woojuwa na wa akhili eeye ntthunkhulu wa weettettisa tuniya eti ya Misuri.³⁴ Mwirette ethi-ipo, mwiwaattheemo attunkhulu mmuti mphu ásala alokothela phantte ya thaanu za vitthu zinuuruliwaazo tuniya ya Misuri, khwa nyaakha epo sapa zooruweriwa.³⁵ Yo ana yookusanya epile anttelaaazo opattha nyaakha epo zooruwerwa, theenya ekusanyiwe tiriku yooshi epwehiyi yiye mmakhono wa Firawuuna, yiye ethu-yooja ya mmasitati.³⁶ Vitthu-zoojiwa zaya epo zinttela orumeyeliwa nyaakha epo sapa za jala enttelaaye ota tuniya ya Misuri yoori jala eto ehishintte tuniya eti."

Yuusufu oninkhiwa ottunkhulu wa Misuri.

³⁷ Firawuuna na mashawuriyya awe khoona yoori akhili epile za Yuusufu pi zooshapweya.³⁸ Ye khuwooza mashawuriyya awe yoori: "Naari oteela ompattha ntthu nkhamma otu wa weettettisiwa ti rooho ya Nluku?"

³⁹ Firawuuna khumuuzu Yuusufu araka: "Wiiya Nluku ooothoonyeza vitthu epi, khaavo nkinoko aya wa akhili na woojuwa nkhamma weeyo.⁴⁰ Weeyo ti ye ontelaaye wiiya ntthunkhulu wa vaje vaka, atthu apa ariivo ooshi nka ashututelaka mattakhuzi awo, ila nkathhi woofwalume miiyo ki ntthunkhulu zayita weeyo.⁴¹ Mpakha nasaapi eti kawinkha ottunkhulu wa tuniya eti ya Misuri yooshi."⁴² Aphano, Firawuuna khuvula peetthe yawe khunwalisa Yuusufu, khuruma yoori awalisiwe kuwo zooshapweya na nkufu wa thahapu* mmwisiko mwawe.⁴³ Khupakhiriwa mmwikukutta opule waphiiri, khulokoza anamalaleya alupaka yoori: "Mwinkokhorele!" Yuusufu enkhiweeyo ottunkhulu wa Misuri yooshi.

⁴⁴ Khulupa theenya Firawuuna amuuzaka Yuusufu yoori: "Miiyo ki Firawuuna, ila khina mmote antakhaaye oretta ethu tuniya eti ya Misuri ahaazeeni wuusikana weeyo."⁴⁵ Firawuuna khuntthaja Yuusufu nzina

la Zafenathi-Paneeya. Khunlooza muukha aari wiitthiwaaye Asenaathi, mwaana wa Potifweera, nttunkhulu wa tiini ya Ooni. Aphano Yuusufu khuzukuleliси tuniya yaya etile yooshi ya Misuri.

⁴⁶ Ye azaka khaazi ya mfwalume Firawuna aarettiye arina nyaakha talaaithiini na sitha, khunleeza Firawuna khwaaza weettetta miti zooshi za Misuri. ⁴⁷ Nkathhi wa nyaakha sapa epile zooruwera tuniya etile khu-ruweriya tiriku ya waatta. ⁴⁸ Yuusufu khukusanya tiriku yooshi yaaru-eriweeyo khwa nyaakha sapa tuniya ya Misuri khupweha mmasitati. Wakhula mashapa apale aattameliye sitati, tiriku yaari wuuruliwaaye yaari opwehiwa ottuukho. ⁴⁹ Yuusufu khukusanya tiriku ya waatta yahaari waalakeyaaye nkhamma mishaka za mmattima, khulikha waalaka mwaasa wa waatta channu.

⁵⁰ Ehinafiye nyaakha epile za jala, muukha wa Yuusufu Asenaathi, mwaana wa Potifweera, khuwaapattha aana awiri. ⁵¹ Otu wa mwanzo Yuusufu khuntthaja nzina la Manaase, alupaka yoori: “Nluku akisahawisa ohoo wa waka na vaje wa apapazaku.”

⁵² Otu waphiiri aya khunthaja nzina la Efwarayiimu, khulupa yoori: “Nluku akirizikhya nti opu kihooziyeyo.”

⁵³ Aphano nyaakha epile sapa zoroewerija tuniya ya Misuri khwiisha. ⁵⁴ Khufiya nyaakha epile sapa za jala alupiyeyo Yuusufu. Khupuwa jala tuniya yooshi, ila miti za Misuri zaarina ethhu-yoojiwa. ⁵⁵ Wakathi epariziyevo jala Misuri, atthu ooshi khunvekela Firawuna ethhu-yoojiwa. Ila ye khuwoza atthu ooshi a Misuri yoori: “Mwilawe mwakutthanane Yuusufu. Wakhula etile anttelaaye owuuzani mwirette ethiito.”

⁵⁶ Yuusufu nawoona yoori jala yamwazeyela tuniya yooshi khufukulela tiriku etile aapwehiyyeyo, khusala awoozanyeza Amisuri mwaasa yoori jala etile yaashinttiye. ⁵⁷ Atthu a tuniya kiina aari ota Misuri oteela wuzanya tiriku wa Yuusufu, mwaasa yoori jala yaamwazeyeliye olumwenku wooshi.

42

Attwiize Yuusufu antta tuniya ya Misuri.

¹ Yaakhumpa n'oojuwa yoori Misuri ewaakho ethhu-yoojiwa, khuwooza aanaawe araka: “Mwineekesana yoori niini? ² Kasiila oriwa Misuri ewaakho tiriku, apho mwilawe moozanye nite nijilelanelihiifwe jala.”

³ Aphano khulankha attwiize Yuusufu khumi khusala alawa Misuri wuzanya tiriku. ⁴ Yaakhumpa khunkhattaza Bejami ttwiye Yuusufu owaalotta attwiize amoovisaka ompattha ethhu yootakhala. ⁵ Aana a Yaakhumpa khulawa wuzanya tiriku nkhamma ethhiipo aari olawaazo atthu akina, maana tuniya yooshi ya Kanaani yaarina jala.

⁶ Yuusufu nttunkhulu wa Misuri, ti ye aari owoozanyezaaye tiriku atthu ooshi a mmuti. Attwiize n'oofiya khunkokhorela ajihi zaya khufisa vathi.

⁷ Wakathi awooniyevo khuwaajuwa, ila khumpuwa nkhamma ahiwaajujeeni. Khusala awoozela awaatuturuchaka araka: “Mweeyo! Mwin-lanka vayi?”

Yo khunjipu “Ninlanka tuniya ya Kanaani, naateeliye wuzanya ethhu-yoojiwa.”

⁸ Yuusufu khuwaajuwa attwiize ila yo khuhinjuwi. ⁹ Ye khupayini jozi epile awooziyeyo khuri: “Mweeyo mw'aahankawaani! Mwaateeliye ojuwa siiri za mmuti mwethu mphu.”

¹⁰ Yo khunjipu araka: “Wala mbwaneethu! Fweeyo akarumeyeenu naateeliye wuuzanya ethu-yoojiwa. ¹¹ Fooshi papeetthu mmote, n'aatthu awaamineya. Khahi n'aahankawaani.”

¹² Yuusufu khusala akhanyarela owooya yoori: “Wala mweeyo mwateela ojuwa kiphenyo za mmuti mwetthu mphu.”

¹³ Yo khuri: “Fweeyo ninlanka tuniya ya Kanaani, niri aana khumi na awiri paapa mmote. Otu w'eefutti aya nasaapi eti asala onti na paapa, ila otu nkina aya afwa.”

¹⁴ Khurutela owooya araka: “Pi ethiipo kilupiyeego! Mweeyo mw'aahankawaani! ¹⁵ Apho kintakha kiwooneni. Kinlapha khwa ohaayi wa Firawuna, yoori khamwinlaavo apha mwihintiiseeni ttwiyyenu oto w'eefutti. ¹⁶ Mwinrume ntthu mmote amweettele, ila apa akina ansalaaye anttela ofukeliwa. Noone nkhamma mattakhuzi apa mwilupiyeeyo pi ookhweele. Ila mmana ehiyyi toowo kinlapha khwa ohaayi wa Firawuna yoori phi mwinttelaaovo ojuweya wiiya ahankawaani.” ¹⁷ Ye khuwaattha nkalapooso siikhу ttatthu.

¹⁸ Siikhу yattaatthu khuwooya yoori: “Miiyo kinimoova Nluku, apho nkhamma mweeyo mwintakha wuusuru nafusi zenu, mwiri toono: ¹⁹ nkhamma mw'aatthu awaamineya mwinlikhe ttwiyyenu mmote nkalapooso, apa akina athuule tiriku awenkhe ajamaazenu ahifwe jala. ²⁰ Mwikitiisele ttwiyyenu oto w'eefutti kihakikhi nkhamma mattakhuzi enu pi ookhweele, mwirettaru toowo khamwinuuliwa. Yo khukhupalela oreeta epile ooziyeego.”

²¹ Aphano khusala oozana yoori: “Khweele ninaaye paathuli mwaasa wa ttwiyyethu. Maana wakathi aashankiyeevo aanivekeleiyo yoori nimooneliye huruma ila fweeyo khuhitakhi, apha t'iiti na-fweeyo anipatthiyeeyo matteso apa.”

²² Ruubeni khujipu araka: “Miiyo akaalupiye yoori shapu oto mwihin-rettele vitthu zootakhala? Ila mweeyo khuhitakhi okisiileza! Apho nina yoojipu mwaasa w'oofwa wawe.”

²³ Yo khaari ojuwa yoori Yuusufu aari osiila epile aari ottakhulaazo, mwaasa yoori attakhulaka aarivo ntthu aari otaphulelaaye.

²⁴ Yuusufu khuwaasusa vattithiiru khusala alila. Nawiisha khurutela attaaphale khusala attakhula, aphano khunthawula Simiyooni khuruma yoori afukiwe eettaka omoona.

Orutela Kanaani

²⁵ Elottelanaka Yuusufu khuwaaruma anakhaazi awe wiitaaza tiriku visurupa za attwiize na owaarutisela nzurukhu aya sirini atthaaka mvisurupa ntumpho, na owenkhya ethu-yooja ntarikhi. Khurettiwa ethiipo. ²⁶ Khuthuula visurupa epile wakhula ntthu khuttha vapuuve vawe khusala alawa.

²⁷ N'oofiya vahali aalaliyeovo, mmote khufukula esurupa yawe yoori alazemo ethu-yoojiwa enkhe puuru yawe, khusikana nzurukhu awe ori mwiisurupa ntumphule. ²⁸ Khuwooya attwiize yoori: “Moone! Nzurukhu aka karutiseliwa, opu ori mphu!”

Aphano yo khusuthuwa khusala athukumela na woova oozelanaka yoori: “Niini epi Nluku aniretteliyeego?”

²⁹ N'oofiya wapapaaya Yaakhumpa tuniya ya Kanaani, khusala amuuza zooshi za waavireliyeego araka: ³⁰ “Nttunkhulu wa Misuri eetta oniturucha anuuzaka yoori n'aahankawaani. ³¹ Ila fweeyo khujipu yoori:

‘Khahi n'aahankawaani n'aatthu awaamineya. ³² Niri khumi na awiri paapa mmote, mmote afwa, nkina aya w'eefutti asala ontii na paapa tuniya ya Kanaani.’

³³ Aphano ntunkhulu wa nti aya opule khunuuzu yoori: ‘Mwinlikhe ttwiyyenu mmote attaapha, toowo phí kinttelaavo ojuwa yoori mweeyo mw'aatthu awaamineya: mwithuule ethu-yoojiwa mwilawe mwawenke ajamaazenu ahifwe jala. ³⁴ Mwitaaka mwintiise ttwiyyenu otu w'eefutti aya, kaamini yoori mweeyo khahi mw'aahankawaani ila mw'aatthu awaamineya. Ttwiyyenu kintta wuurutiselani, kiwinkheni ejaaza yooretta zanshara zenu mmuti mphu.’”

³⁵ Wakathi afukuliyeovo visurupa zaya, wakhula esurupa khusikanamo mfukho wa nzurukhu, yo na papaaya nawoona nzurukhu opule khusala oova. ³⁶ Aphano papaaya khulupa yoori: “Mweeyo! Mwintakha okiishisela aanaaka. Yuusufu ti otule aashikhiyeyo, Simiyooni khaavo apha na Bejami mwintakha onthuula theenya! Zooshi epo othunku aya ti miyo kinoonaaye.”

³⁷ Ruubeni khumuuzu papaaawe yoori: “Mwikinkhe miiyo khanaashikha kininrutisa, amana kihinrutisi mwiwoole aanaaka apale awiri.”

³⁸ Yaakhumpa khujipu araka: “Akinintakhisa Bejami olawa na-mweyo, Yuusufu afwa, ye ti assaliyeeyo. Amana empattha ethu yootakhala ntarikhi okho mwineettaawo, mwintta okishukhelisa aahera na pwi zaka kirina huzuni yoototheliwa ti mweyo.”

43

Attwiize Yuusufu anrutela Misuri theenya.

¹ Jala etile yeetta otepa yaattaka mmuti. ² N'ooeweeshela tiriku etile aalaziyeeyo Misuri, papaaya khuwooza yoori: “Mwirutele theenya Misuri moomzanye ethu-yoojiwa.”

³ Ila Yuuda khujipu araka: “Kiniwuuzani khweele, ntunkhulu wa Misuri anihirimiza channu yoori nihirutelewo nihinlawaneeni ttwiyyetthu otu w'eefutti. ⁴ Amana mwinlikha ttwiyyetthu olawa na-fweyo, ninlawa noozanye ethu-yooja yenu. ⁵ Ila amana mwihininkhi khaninlawa, maana ntunkhulu oto anuuza yoori amana nihinlawani ttwiyyetthu nihirutelewo.”

⁶ Ezirayeele khuwooza: “Mwamuuzela-ni yoori mwinaaye ttwiyyenu nkina? Mwakitothela pala khuluyeene.”

⁷ Yo khujipu araka: “Mwiinyi oto eetta onuuzelala yoori anijuwe fweeyo na ajamaazethu. Khuvira anuuzelaka theenya yoori: ‘Papeenu ori haayi? Mwinaaye ttwiyyenu nkina theenya?’ Fweeyo naarina yoojipu epile aari onuuzelaaazo. Fweeyo naajuwiye yoori ontela onila onlawana ttwiyyetthu?”

⁸ Aphano Yuuda khumuuzu papaaawe yoori: “Mwinlikhe shapu otu kialwena miiyo nasaapi ethiiti, nihifwe jala fweeyo na-mweyo na aaneeththu. ⁹ Mwikhupali miiyo, kinjahiti omwiinanelia na onthantta. Amana kihinrutisi ari nkumi, kiniiyana paathuli ohaayi aka wooshi mmakhono mwenu mweeyo. ¹⁰ Eriwaka khanaarupaziye nka nilawiye niruteliywero swaafu yaphiiri.”

¹¹ Aphano Ezirayeele, papaaya khuwooza yoori: “Nkhama pi ethiipo khina nanna kiina. Mwithuule vitthu zooshapweya za mmuti mphu, waaza paalasamu, asali, viluko, mafuttha oonukhela, na vitthu kiina nkhama amentowa, mwilawe mwamwinkhe mwiinyi oto. ¹² Mwithuule nzurukhu wa feeta swaafu piiri na opu mwisikaniyeeyo mvisurupa

mwenu mwilawane, khinjuweya eettiye ovonyela. ¹³ Mwinthuule ttwiyenu mwilawe mwakutthanane mwiinyi oto. ¹⁴ Nluku Woowahi Wooshi amwinkhe wiiyana huruma na-mweyo, yoori oorutiseleni ttwiyenu otu nkina na anlikhe Bejami ate. Maana, amana miiyo akaashikha aanaakakinsala ethiipo woohiina mwaana.”

¹⁵ Yo khuthuula vithu epile enkhiweezo na nzurukhu vamote na Bejami khusala alawa Misuri wa Yuusufu. ¹⁶ Yuusufu n'oomoona Bejami ari vamote na attwiize khumuza karumeyaawe nwulu yoori: “Owaathuule atthu apa owaalawane owaka, yashijiwe nyama yiipikhiwe, yo anttela oja na-miyo nthana opu.”

¹⁷ Ye khuretta ethiipile ooziweezo, khuwaathuula atthu apale khuwaalawana owawe Yuusufu. ¹⁸ Yo n'oofiya owawe Yuusufu khusala oova oopuwelaka yoori: “Talili natiiseliwavo mwaasa wa nzurukhu opule naarutiseliweeyo swaafu etile yamwanzo mvisurupa mwetthu. Ye ontakha onihukhunu, aniphuke anirette wiiya amwiithwaana zawe, aninyakanye apuuri ethtu.”

¹⁹ Khumweettela karumeya w'oowawe Yuusufu yoori anttakhulane vanlako. ²⁰ Khulupaza yoori: “Safwatali mbwaneetthu! Swaafu etile naatiyyeeyo apha yanwanzo naateeliye wuuzanya ethtu-yoojiwa. ²¹ Ila n'oofiya vahali naalaliyeevo, naafukuliye visurupa zetthu wakhula mmote wa fweyo khusikanamo omilomo waya nzurukhu opule naateeliyeeyo wuuzanyela ethtu-yoojiwa ori woolikana. Apha, naateeliye orutisa, ²² na theenya natana nzurukhu nkinoko yoori nuuzanyele ethtu-yoojiwa. Khaninjuweeni nlupa aatthiiyemo nzurukhu aya opu mvisurupa mwetthu.”

²³ Aphano karumeya otule khujipu araka: “Mwihoove na wala mwihisuthuwe. Nluku otu weenu mweeyo na otu wa papeenu ti ye atthiiyemo nzurukhu mvisurupa mwenu, ila miiyo kaapokhereliye nzurukhu opule mwaataniyyeeyo.” Karumeya khumfukulela Simiyooni khuntiisa attaphale aariivo attwiize. ²⁴ Nawiisha khuwaathuula khuwaavirisa nnyupa wa Yuusufu, khuwenkha maati khoosa moolu aya na khwinkha ethtu-yoojiwa apuuri aya. ²⁵ Attwiize Yuusufu khwaattalela tthuovo epile aataniyyeeyo khusala anwejela, maana aajuwieye yoori nthana aari oteela oja vamote na-ye.

²⁶ Wakathi Yuusufu afiyyevo owawe, yo khweettela tthuovo epile aatiisiyeezo khumwinkha khukokhoraza omaasho wawe khufiisa ajihi zaya vathi. ²⁷ Ye khuwenkha hapari, nawiisha khuwoozela yoori: “Papeenu otule mwaakuuziyeyo nalelo ori haayi?” Owaakho nkumi?

²⁸ Yo khunjipu yoori: “Karumeyeenu papeethu ori haayi, owaakho nkumi.” Yo khukokhora khwiinama.

²⁹ Ye khulansa maasho awe khumoona ttwiye Bejami mwaana wa mamaawe. Khuwoozela yoori: “Ttwiyyenu otu mwaari onlupaaye w'eefuti ti othuutu?” Ye khumuza Bejami yoori: “Nluku awinkhe rehema mwanaka!”

³⁰ Yuusufu khwiyyana furaha khuluyeeene mwaasa wa ttwiye, khusala atakha olila, nasaapiru khulaavo khweetta okatthi wawe khusala alila.

³¹ Nawiisha, khufuushula khurutela vansana ari woojiithaaza khulupa yoori: “Mwininkhe ethtu-yoojiwa.”

³² Khusaruliwa ethtu-yoojiwa meeza mattatthu, mamote a Yuusufu, makina a attwiize na makina a Amisuri aari ottuukho. Mwaasa yoori yaari haraamu aitali a Misuri oja na Meebereewu. ³³ Attwiize Yuusufu khwiikhala vameeza kharipu na-ye, khuthataanya waaza ntunkhulu mpakha efutti, khusala eekesana mmote na nzaawe ari ooshanka. ³⁴ Yuusufu khuruma

winkhiwa ethu-yoojiwa ethiitile enkhiweeyo vameeza vawe, sahani ya Bejami khuziti swaafu thaanu sahani za attwiize. Yo khuja, khunywa, khufurahi vamote na Yuusufu.

44

Pilawuriya Yuusufu mwiisurupa wa Bejami

¹ Yuusufu khunruma karumeya nwulu wa vaje vawe yoori: "Wiitaaze saaneene ethu-yoojiwa visurupa za atthu apa anwahaaye othuula, ottheemo nzurukhu aya omilomo wa visurupa zaya. ² Nawiisha, othuule pilawuri yaka ya feeta otthe omilomo w'eesurupa y'ootu w'eefutti aya na nzurukhu aya opo atisiyeeyo wuuzanyela tiriku." Karumeya otule khuretta ethhiipo ooziweezo ti Yuusufu.

³ Mmeesho mwanya supuyeene, attwiize Yuusufu khunleeza khuthuula apuuru aya khusala alawa. ⁴ N'oolaazamo nsitati mphule ahinafiyaze peeti-wene, Yuusufu khunruma karumeyaawe yoori: "Olankhe nasaapi apha owaatthirele atthu apale eettiyi aphale, amana owaasikana wa woozele yoori: Oretteliwa vitthu zooshapweya mweeyo mwinripha zootakhala? ⁵ Mweeyela-ni pilawuri ya mbwanaaka? Khahiylo ethiito annywelakaaye na anjuwanaaye vitthu zoorettikhana? Mweeyo mwareetta vitthu zootepa otakhala."

⁶ Ye khuwaatthirela mpakha owaasikana khuwooza ethhiipile ooziweezo ti Yuusufu. ⁷ Yo khujipu araka: "Mwaasa aya niini mbwaneetthu alupaka toowo? Fweeyo akarumeyaawe khaninwahi oretta vitthu zaya epo! ⁸ Onuupuwela yoori fweeyo nawahi orutisa nzurukhu Kanaani naasikaniyeyeo omilomo wa visurupa zetthu? Toowo n'aathu ninwahaaye wiya feeta ama thahapu ya vaje wa mbwanaawo? ⁹ Apha niriivo, karumeya otule ontelaaye onsikanana pilawuri eto afwe. Fweeyo ninttela osala niri amwiiththaana za mbwaneetthu."

¹⁰ Ye khuri: "Kakhupali epo mwilupiyeego, ila othuuto kinttelaaaye on-sikanana ti ye anttelaaye wiya mwiiththaana aka, mweeyo khamwiniiyana hatha koosa."

¹¹ Wakhula ntthu khupakhula esurupa yawe khupweha vathi khufukula nasaapiru. ¹² Karumeya otule khwaaza weekesa mwiisurupa y'ootu nwulu khwiishela esurupa y'ootu w'eefutti aya. Attaaphale khusikana pilawuri etile mwiisurupa ya Bejami. ¹³ N'ooretta toole, khuvrula kuwo zaya, khupakhira opheya visurupa zaya vapuuру khusala arutela ositati ottuukhule.

¹⁴ Yuuda na attwiize n'oofiya owawe Yuusufu khunsikana ye ari ottukho, khukokhora khwiinama attaaphale aariivo Yuusufu. ¹⁵ Yuusufu kihuwoozela yoori: "Mwarettela-ni ethu eti? Mweeyo khamwinijuwa yoori ntthu nkhamma miiyo kinwahi woona vitthu nkhamma epo?"

¹⁶ Yuuda khujipu araka: "Niwuze niini mbwanaaka! Apho nijihakikhi toovi? Nluku avithula twampi zetthu. Aphano n'aamwiiththaana za mbwaneetthu nkhamma otule asikananiweeyo pilawuri."

¹⁷ Yuusufu khulupa yoori: "Miiyo akinwahi oretta etthu aya eto! Othuuto asikananiweeyo pilawuri yaka ti ye anttelaaye wiya mwiiththaana aka, mweeyo mwirutele wapapeenu na heeri."

¹⁸ Yuuda khunsusela Yuusufu khumuuzu yoori: "Safwatali mbwanaaka! Mwinlikhe karumeyeenu awuuzeni ntakhuzi na mwhinkatipukhele, mwaasa yoori mweeyo mwiri nkhamma Firawuuna mwennyeweene.

¹⁹ Mbwanaaka mwaawoozelije akarumeyeenu mwiraka: 'Mwinaaye papeenu na ttwiyyenu?' ²⁰ Fweeyo khujipu yoori: 'Ninaaye paapa

ila ooluvala na ninaaye ttwiyyetthu w'eefutti apattikhaniyeeyo paapa ooluvaliye. Aarina ttwiyye afwa, ye asala otthwe wuumamani wawe, ti woophetiwa na kuvu ti papaawe.'

²¹ Mweeyo mwaawaarumiye akarumeyeenu yoori antiise mwite mwimoone khwa maasho enu. ²² Ila fweeyo khuujipuni mweeyo mbwanaaka: 'Mwaana oto khanwahi olikihiwa ti papaawe. Amana ampwetheya, papantthu ontta ofwa.' ²³ Ila mweeyo khunuza yoori: 'Amana mweeyo mwihiintiisi mwihirutelevo vaje vaka apha.' ²⁴ N'oofiya ont, fweeyo khumuua papeethu mattakhuzi apale mwaanuuziyeeyo mbwaneethu.

²⁵ Nawiisha ye khuniruma yoori mwirutelewo mwilawwe moozanye eththu-yoojiwa. ²⁶ Fweeyo khumuua yoori: 'Khaninwahi orutelawo nihilawaneeni ttwiyyetthu otu wa w'eefutti, amana nihilawani khaninlawa okuthanana mwiinyi oto.'

²⁷ Karumeyeenu papeethu khunuza yoori: 'Mweeyo mwinjuwa yoori muukhaaka akipathela aana awiri, ²⁸ otu mmote akaashikha mpakha leelo eti akinamoone. Kakhupali yoori ooliwa ti nyama ya ntthuftu khunrafuna. ²⁹ Amana mwinlazavo otu n'ompattha eththu yootakhala, mwintta okiishukhelisa aahera na pwi zaka kirina huzuni yoototheliwa ti mweyo.' ³⁰⁻³¹ Aphano amana nirutela ont ninlikha ye, nintta omualaana huzuni papeethu, mwaasa yoori mwanawwe animphetachaaye. Akarumeyeenu anttela ompatthisa papaaya wiishukhela aahera na pwi zawe arina huzuni.

³² Olikha eto, miiyo kamwaahiti paapa yoori kininrutisa, amana kihinruti kookosani ohaayi aka wooshi.

³³ Apho kinuuvekela yoori safwatali, miiyo kintta osala kiri mwiithwaa-neenu mbwanaaka zwaamu ya shapu otu, mwinlikhe ye arutele ont na attwiize. ³⁴ Toowo kinttela orutela toovi wapaapa woohilawani shapu otu? Miiyo akinwahi woona ari mmatteso paapa.'

45

Yuusufu onjijuwisa attwiize

¹ Nawiisha Yuuda ottakhula, Yuusufu khusala oojeela ojilipisela. Khuwooza akarumeyaawe ooshi olaavo, khuhiiivo hatha ntthu ajijuvisaka attwiize. ² Ye khusala alila anyakulaka mpakha khufiyelela osiila Amisuri, hapari epile khufiya wamfwalume Firawuna.

³ Ye khuwooza attwiize yoori: "Miiyo ki Yuusufu! Nkahayani, paapa ori haayi?" Attwiize khuhisala awahi onjipu mwaasa yoori aari ooshanka channu.

⁴ Khuwooza attwiize yoori: "Mwisusele apha kiriivo." Yo khunsusela khuwooza yoori: "Miiyo ki Yuusufu, otule mwaamuuzanyisiyeeyo khutaniwa Misuri. ⁵ Apho mwihishanke wala mwihihowerane mwaasa wookuzanyisa khutaniwa okhuno. Ila Nluku eettiye okilokozisa yoori muusuru nafusi zenu. ⁶ Zavira nyaakha miwiri za jala mmamiti mphule ila zasala theenya nyaakha mithaanu atthu ahintelaaye olima wala wuurula. ⁷ Nluku akiperekha vakatthi venu mweeyo yoori kuusuru ohaayi eenu muulumwenku mphu na apa anttelaaye ovokoliwa.

⁸ Khahiyo mweeyo mwikiperekhiye okhuno, ila Nluku ti ye akiperekhiye, khukiretta wiiya nkhamma paapa wa Firawuna, na ntunkhulu wa vaje vawe na tuniya ya Misuri. ⁹ Mwaakuve mwirutele wapaapa mwamuuze yoori: Mwanenu Yuusufu alupa yoori: Nluku akinkha ottunkhulu wa Misuri

yooshi. Ate okhuno, ahirupaze! ¹⁰ Mwite mwiikhale nti wa Gosheni kharipu na-miyo, mweeyo na atuulwenu, aaneenu, pwittipwithi zenu, mompe zenu, na vitthu zenu zooshi mwiriinaazo. ¹¹ Ottuukho kisala kiwinkhani etile enuuhitajiyani, mweeyo na vaje venu na zooshi mwiriinaazo yoori mwihiihoeve, maana zasala nyaakha epi mithaanu za jala.

¹² Mweeyo mwinkoona na maasho enu, na ttwiyyaku Bejami onikoona, yoori khweele ti miyo kinlupaaye mattakhuzi apa. ¹³ Mwilawe mwamuuze paapa owahi kiriina Misuri na zooshi epile mooniyeezo. Apho mwaakuve mwilawe mwantiise ottuukhuno.”

¹⁴ Yuusufu khumpatikha ttwiye Bejami khusala alila, na-ye Bejami khumpatikha khusala alila. ¹⁵ Nawiisha khuwaapejari attwiize ooshi khusala alila. Attaapho attwiize phi awahiyeevo ottakhula na-ye.

¹⁶ Hapari epile khumfiyela Firawuuna, yoori attwiize Yuusufu ata. Firawuuna n'osoila khwiya wootveliwa vamote na akarumeyaawe. ¹⁷ Aphano Firawuuna khumuza Yuusufu yoori: “Owooze attwiizo: Athuule nyama zaya arutele tuniya ya Kanaani. ¹⁸ Amweettele papeenu na ajamaazenu ooshi ate okhuno. Miyo kintta Owenkha puuro swaafi mmuti mphu, yoori asala aja vitthu zootuva zinruweriwaaye ntumphu.

¹⁹ Athuule mikukutta za Misuri ethiiti aweettele aanaaya, aakhaaya na papeenu. ²⁰ Mwihiyane hatha shaakha na mali zenu zooshi mwiriinaazo, maana vitthu zooshapweya za tuniya yooshi ya Misuri zinttela wiiya zeenu.”

²¹ Aana a Yaakhumpa khuretta ethhiipile. Yuusufu khuwenkha mikukutta nkhamma ethhiipile aalupiyeego Firawuuna, khuwenkha vitthu-zooja ntarikhi alawaka. ²² Wakhula ntthu khumwinkha kuwo pheeya ila Bejami khumwinkha miiya ttatthu za nzurukhu wa feeta na kuwo thaanu pheeya. ²³ Khuperekha apuuru khumi zipakhiriye vitthu zaariiwo Misuri zootuva yoori alawe enkhiwe papaawe, khuperekha theenya apuuru khumi zipakhiriye tiriku na phaawu na vitthu kiina za akhipa yoori asala aja ntarikhi. ²⁴ Nawiisha, khuleezana na attwiize yo khulankha khusala alawa, ye khuwooza yoori: “Mwihihowerane ntarikhi.”

²⁵ Yo khulankha Misuri khusala alawa Kanaani wa papaaya Yaakhumpa. ²⁶ N'oofiya khumuza papaaya yoori: “Yuusufu nalelo ori haayi, ntunkhulu wa Misuri yooshi!” Yaakhumpa n'osoila khuzileya mwaasa woohaamini. ²⁷ Ila nawuuziwa mattakhuzi apale aalupiyeego Yuusufu, na khoona mikukutta epile aaperekhiyeego yoori zilawe zanthuule papaawe, rooho yawe khutamo. ²⁸ Yaakhumpa khulupa yoori: “Mwanaka ori haayi! Kintta olawa kamoone kihinafwe.”

46

Yaakhumpa onthamela Misuri na ajamaaze

¹ Ezirayeele khuthuula vitthu zawe zooshi aariinaazo, khulawa mpakha Beresheba. N'oofiya okhule, khuretta twaha anrettelaka Nluku aari omwaaputwaaye papaawe, Esiyaakha. ² Nluku anteeliye Ezirayeele osikhu nkathhi wa jozi khusala ankhuwela araka: “Yaakhumpa! Yaakhumpa!”

Ye khujipu yoori: “Lapeekha!”

³ Ye khuri: “Miiyo ki Nluku, Nluku wa papaawo. Ohoove olawa tuniya ya Misuri, maana khwa weyo kinttela opuwisa khapila khulyeene. ⁴ Miiyo kinlawaa vamote na-weyo Misuri na kinlawaa koorutisele mmuti ntumphu. Amana ofwa Yuusufu ti ye anttelaaaye ophulula maasho awo.”

⁵ Aphano, Yaakhumpa khulankha nti wa Beresheba na aanaawe na aakhaaya na aanaaya khupakhira mmikukutta epile zaaperekhiweeyo ti

Firawuuna. ⁶ Khuthuula maphanko a nyama, na mali zaya zooshi epile aapatthiyeeyo tuniya ya Kanaani, Yaakhumpa khusala alawa Misuri na ajamaaze ooshi. ⁷ Aanaawe aalume na aanaaya, aanaawe aakha na-yo na aanaaya, ajamaaze ooshi khuwaathuula khusala alawa Misuri.

⁸ Apa mazina a meeziyeele, Yaakhumpa na ajamaaze aalawaniyeeyo Misuri:

Ruuben, mwaana wamwanzo wa Yaakhumpa.

⁹ Aana a Ruuben pi apa:

Enookhi, Phaalu, Hezorooni na Khariimu.

¹⁰ Aana a Simiyooni pi apa:

Yemuweeli, Yamiini, Ohaati, Yakhini, Sohaari na Shawuuli mwaana wa nunu mmote wa Kanaani.

¹¹ Aana a Leevi pi apa:

Geerishoni, Kohaathi na Meraari.

¹² Aana a Yuuda pi apa:

Eeri, Onaani, Sheela, Pereezi na Zeera.

Eeri na Onaani afwa tuniya ya Kanaani.

Aana a Pereezi pi apa:

Hezorooni na Hamuuli.

¹³ Aana a Ezakaari pi apa:

Toola, Phuuva, Yashuubu na Shimrooni.

¹⁴ Aana a Zabulooni pi apa:

Seredi, Elooni, na Yaleeli.

¹⁵ Apa atuulu na aana a Yaakhumpa aawaavokoliyeeyo na Liiya nti wa Paata-Araamu, ohintthiimo mwanawe Tiina. Ooshi aari talaathiini na attatthu.

¹⁶ Aana a Gaadi pi apa:

Sefiyooni, Haaki, Shuuni, Esbooni, Eeri, Aroodi na Areeli.

¹⁷ Aana a Asheeri pi apa:

Imunna, Eshwiiva, Eshwiivi, Beriyya na ttwiye Zeera.

Aana a Beriyya pi apa;

Hepeere na Malikiyeeli.

¹⁸ Apa aana a Yaakhumpa na Ziilipa, karumeya otule Labani aamwinkhiyeeyo mwanawe Liiya. Ooshi aari khumi na sitha.

¹⁹ Aana a Rakeele muukha wa Yaakhumpa aari apa:

Yuusufu, na Bejami.

²⁰ Asenaathi mwaana wa Potifweera, ntunkhulu wa tiini ya Ooni aa-vokoleliwe aana awiri ti Yuusufu tuniya ya Misuri, Manaase na Efwarayi-imu.

²¹ Aana a Bejami pi apa:

Beela, Beekheri, Ashibeeli, Geera, Naamani,

Eehi, Rooshi, Muupimu, Huupimu na Haridi.

²² Apa aana a Rakeele aavokoleliweeyo ti Yaakhumpa, ooshi aari khumi na wane.

²³ Mwaana wa Daani aari Hushimu.

²⁴ Aana a Nafitaali pi apa:

Yaseeli, Kuuni Yeseleri, na Shileemu.

²⁵ Apa aana a Yaakhumpa na Biila, karumeya otule Labani aamwinkhiyeeyo mwanawe Rakeele. Ooshi aari sapa.

²⁶ Atthu ooshi apale aalawaniyeeyo Yaakhumpa Misuri aari ajamaaze, ohwaathiiimo aakha a aanaawe, aari siithiini na sitha athweene.

²⁷ Owaatthaamo aana a Yuusufu aavokoliweeyo tuniya ya Misuri, ojama wooshi wa Yaakhumpa waari wa atthu saapiini.

²⁸ Aphano Yaakhumpa khunlokozisa Yuuda wa Yuusufu, yoori alawe amuuze anthepeeze nti wa Gosheeni. Afifiyeevo nti wa Gosheeni, ²⁹ Yuusufu khuthuula nkukutta awe khusala alawa okutthana na papaawe, Eziray-eeli. N'oomoona khunthhirela khulawa khumpatikha, khuvira wakathi wa waatta eettaka olila.

³⁰ Yaakhumpa khumuuzza Yuusufu yoori: "Aphano kiwooniyeovo yoori ori haayi, kimfwa kihina shaakha."

³¹ Yuusufu khuwooza attwiize na ajaama a papaawe yoori: "Kintta wa Firawuuna kamuuze yoori attwiizaku na ajamaaze paapa apa aari wiikhalaa ye tuniya ya Kanaani, ata mmuti mphu. ³² Kinttela omuuza yoori yo amakhampuzi, ataaka atisa nyama zaya, pwittipwitthi, mompe na vitthu zaya zooshi ariinaazo. ³³ Amana Firawuuna arumisa oteela okhuwelili mweeyo, na awuuzelani yoori 'Mwinkhola khaazi-ni?' ³⁴ Mwinjipu yoori: 'Fweeyo akarumeyaawo khaazi yetthu oshukisa nyama, waaza osimaana eththu mpakha apha, nkhamma ethhiipo aari orettaazo apapazethu.' Toowo, mwintta okhupaleliwa wiikhala nti wa Gosheeni, mwaasa yoori amakham-puzi ooshi pi ootarawiwa pi a Misuri."

47

Yuusufu onimuuzza Firawuuna ofiya wa papaawe tuniya ya Misuri.

¹ Yuusufu khulankha olawa omuuza Firawuuna yoori: "Paapa na attwiizaku ata ari nti wa Gosheeni, atana maphanko a nyama, mompe, pwittip-witthi na vitthu zaya zooshi ariinaazo." ² Khuwaathuula attwiize athaanu olawa owaajuwisa Firawuuna.

³ Aphano Firawuuna khuwoozela attwiize Yuusufu araka: "Mwinkhola khaazi-ni?" Yo khunjipu yoori: "Mbwaneeethu, fweeyo khaazi yetthu oshukisa nyama nkhamma apapazethu apa aviriyeeyo. ⁴ Fweeyo nateela wiikhala mmuti mphu siikh vattithiiru, mwaasa yoori tuniya ya Kanaani yeetta opuwawo jala ya waatta nyama zethu khuhisala ziiyana eththu-yooja. Safwatali wa safwatali, mwinilikhe niikhale nti opu wa Gosheeni."

⁵ Aphano Firawuuna khulupa yoori: "Papaawo na attwiizo ata wiiya vamote na-weyo. ⁶ Tuniya ya Misuri eri mmakhono mwawo. Apho, papaawo na attwiizo owenkhe Gosheeni ti yiyyiye phantte yooshapweya ya mmuti mphu, eekhale ottuukho. Na amana woona yoori vakathi wa ajamaazo awaapho atthu ariina akhili, owenkhe ottunkhulu wa mompe zaka."

⁷ Yuusufu khunthuula papaa Yaakhumpa khulawa onjuwisa Firawuuna, Yaakhumpa khumparikhya. ⁸ Firawuuna khumuuzela Yaakhumpa araka: "Mwina nyaakha mikavi?"

⁹ Yaakhumpa khunjipu araka: "Kinaaye nyaakha miiya na talaathiini, keettaka osaafiri kijeettetlaka. Nyaakha epi kivirisyeeyo vattithiiru na pi zootakhala, mpakha apha akinafiye nyaakha epile eekhaliyeego amarehemu apapazaku." ¹⁰ Aphano Yaakhumpa khumparikhya Firawuuna, nawiisha khuruti.

¹¹ Yuusufu khumwinkha meekhazi papaaawe na attwiize phantte yooshapweya ya tuniya ya Misuri waattamana na nti wa Ramesesi, nkhamma ethhipile Firawuuna aalupiyeezo. ¹² Ye khumwinkha papaaawe na attwiize na ajamaaze ooshi eththu-yooja, yowaafiyela wakhula ntthu na aanaawe.

Nyaakha za jala.

¹³ Khuthowa ethtu-yooja tuniya ya Misuri mpakha Kanaani yooshi. Atthu khusala akureya mwaasa wa jala waatta. ¹⁴ Aphano Yuusufu khukusanya nzurukhu wooshi, opule waari orumeeliwaaye Misuri na wa Kanaani opule waari wuuzanyeliwaaye tiriku, khulawa khupweha owawe Firawuna. ¹⁵ Wakathi wiishiyeovo nzurukhu wa Kanaani na Misuri, khulankha Amisuri khulawa onvekhela Yuusufu araka: "Safwatali, oninkhe ethtu-yooja nihifwe onoonaka mwaasa woohina nzurukhu."

¹⁶ Yuusufu khujipu araka: "Nkhamma mweeyo khamwina nzurukhu, mwikitiisele nyama zenu nipatili na ethtu-yooja." ¹⁷ Amisuri khuthuula pwittipwitthi zaya, mompe, khavaloo, na apuuru aya, khulawa khumwinkha Yuusufu, ye khuwenkha ethtu-yooja aari weettelaaye oja mwaakha wooshi.

¹⁸ Mwaakha aya opule khwiisha, mwaakha nkina khurutelawo wa Yuusufu olawa omuuza yoori: "Mbwaneeethu khaninoona ethu yoovitha, nzurukhu etthu waniishela, nyama zetthu p'iipile niwinkhiyenini. Khanisalaneeni hatha etthu, nasalana mwiili etthu na mashapa etthu paasi. ¹⁹ Ohinilikhe nifwaka na mashapa etthu apwecheyaka weettaka woona. Wuuzanye mashapa etthu na-fweyo aya, oninkhe ethtu-yooja. Toowo niniiya amwiithwaana za Firawuna na mashapa eetthu anttela wiiya awe. Oninkhe peewu yoozala yoori nipatthe wiiyana meekhazi, nihifwe jala na nti etthu ohiyiye yaara."

²⁰ Khwa nanna ethjiito Yuusufu khuuzanya mashapa ooshi a Misuri khwiya a Firawuna. Amisuri ooshi aarina yawuuzanyisa mashapa aya mwaasa wa jala yeetta otepa yaattaka, nti wooshi khwiya wa Firawuna. ²¹ Yuusufu khuwaareetta omwiithwaana atthu ooshi a phantte yooshi ya Misuri. ²² Ila mashapa a attunkhulu a tiini khoozanyiye mwaasa yoori yo aari winkhiwa etthu-yooja ti Firawuna, ti etthu ahoozanyiseliyeeyo mashapa aya.

²³ Aphano Yuusufu khuwoza atthu yoori: "Mwikisiileze! Kawuuzanyani mweeyo na miti zenu zooshi. Waaza leelo mweeyo na mashapa enu anttela wiiya a Firawuna. Peewu eti mwilawe mwazale. ²⁴ Wakhula etile mwinttelaaye oruwera mwisala mwithuula lifunku la thaanu mwimwinkha Firawuna. Mafunku apa mane mwinsalanaaye mwisala mwija mweeyo na aaneenu na atthu apale mwiniikhalaaya. Kinoko khupweha yoori mwirette peewu."

²⁵ Yo khujipu araka: "Weeyo mbwaneeethu wanuusuru, wanirettela vitthu zooshapweya, fweeyo nakhupali na rooho zetthu zooshi wiiya amwiithwaana za Firawuna."

²⁶ Yuusufu khulaleya kano moote eriivo mpakha leelo eti, yoori lifunku la thaanu la vitthu zooshi zinruweriwaazo tthi la Firawuna. Mashapa apale paasi a attunkhulu a tiini khuhinkhiwi wiiya awe.

Otakha wa wiishela wa Yaakhumpa.

²⁷ Meezirayeele khuthamela Misuri nti wa Gosheeni. Ottuukho khpattawo meekhazi khuvokolelana khwaattelana.

²⁸ Yaakhumpa eekhaliye tuniya ya Misuri nyaakha khumi na sapa, nyaakha eekhaliyeozo Yaakhumpa ohaayi awe wooshi zaari miiya na arupaiini na sapa. ²⁹ Ooniyeovo yoori mansha awe asala vattithiiru khunkhuvela mwanawewe Yuusufu khumuza yoori: "Nkhamma onikipheta othuule nkhone awo otthe vathi wa liphaja laka, olaphe nkhamma onteela oretta na pheta ya waamineya etile kuuvekeliyeeyo, yoori ohikizikhe tuniya ethiiti ya Misuri. ³⁰ Amana kifwa okilazemo tuniya eti olawe wakizikhe nti opule azikhiweeo apapazaku, kilawe keeye vamote na-yo."

Yuusufu khujipu araka: "Kinttela oretta ethiipo mwikirumiyeozo."

³¹ Aphano Yaakhumpa khunkhanyerela yoori alaphe, Yuusufu khulapha, Yaakhumpa khwiinamela ovishwa w'oolili.

48

Yaakhumpa onimparikhiya Manaase na Efwarayiimu

¹ Wakathi ziviriyeovo vitthu epile, khuuziwa Yuusufu oriwa: "Papaawo nlwele." Ye khulankha khusala alawa omoona, alawaka khuwaathuula aanaawe awiri, Manaase na Efwarayiimu. ² Khuuziwa Yaakhumpa yoori: "Mwanenu Yuusufu onta ota oteela owoona." Ezirayeele khujilipisela khulankha khwiikhala voolili.

³ Aphano Yaakhumpa khumuza Yuusufu: "Nluku Woowahi Wooshi aakipuweleli nti wa Luuzu tuniya ya Kanaani khukiparikhiya, ⁴ akuuzaka yoori: 'Kinteela owinkha mavokozi na kaattise peewu yawo yoori khwa weyo epuwe khuntti za waatta na kinkhe nti opu peewu yawo khwa mileele.'

⁵ Aanaawo apa awiri avokoliweeyo Misuri miiyo kihinate, Manaase na Efwarayiimu apa aya pi aka aanaaka, nkhamma ethiipo Ruubeni na Simiyooni eeyiyeezo aanaaka. ⁶ Ila apa onttelaaye owaavokola theenya anttela wiyya awo apa pa yo anttelaaye orithi zwaamu ya attwiizaya. ⁷ Kirutaka Paata-Araamu akifwela muukhaaka Rakeele tuniya ya Kanaani, kiri ntarikhi kisaleelaka ofiya nti wa Efwarata. Miiyo khunzikha phantte ya tarikhi ya Efwarata oniitthiwaawo Belemu."

⁸ Ezirayeele n'oovoona aana a Yuusufu khuuzela araka: "Khi apa apaani?"

⁹ Yuusufu khunjipu papaaawe yoori: "Apa aana akinkhiyeeyo Nluku mmuti ntumphu."

Ezirayeele khulupa yoori: "Okitiisele apha kiriivo yoori kiwaaparikhiye."

¹⁰ Maasho awe Ezirayeele khaari woona saana mwaasa wa wuuluvala, Yuusufu khuwaathuula aana apale khumwaattamisela pwapwaaya, ye khuwaapatikha khuwaapejari.

¹¹ Ezirayeele khumuza Yuusufu yoori: "Wala akaari wuupuwela yoori kaari oteela woonanana weeyo theenya, ila Nluku akinoza mpakha aanaawo!"

¹² Elottelanaka Yuusufu khuwaalazavo aana apale vamakutha wa pwapwaaya khwiinama khufiyisa aiji yawe vathi. ¹³ Yuusufu khuwaathuula aanaawe oowiiri, Efwarayiimu nkono-nlume phantte ya nkono-nkha wa Ezirayeele, Manaase khunthuula nkono-nkha phantte ya nkono-nlume wa Ezirayeele khunththa khuwaattamisela pwapwaaya. ¹⁴ Ezirayeele khookola nkono awe weelume veeshwa wa Efwarayiimu, otu ntiithi aya, nkono-nkha khuttha veeshwa wa Manaase otu nwulu.

¹⁵ Aphano khumparikhiya Yuusufu araka:

"Nluku otu anrumeyeliyeeyo apapazaku,
Eburahiima na Esiyaakha,

Nluku otu ankishukaaye

ohaayi aka wooshi mpakha leelo,

¹⁶ Nlayikha ntthi likilaziyeemo nkathhi wa vitthu zootakhala,

liwaaparikhiye asimaana apa.

Khwa yo livuwisiwe nzina laka

na mazina a apapazaku,

Eburahiima na Esiyaakha,

eyane peewu ya waatta vatuniya."

¹⁷ Wakathi Yuusufu amooniyeevo papaawe athuuliye nkhono awe nlume khuttha veeshwa wa Efwarayiimu, ye khuhintuveli. Khulazavo nkhono-nlume wa papaawe veeshwa va Efwarayiimu khuttha veeshwa va Manaase.

¹⁸ Khumuuzu papaawe yoori: "Khahiyo toowo paapa, otu ti ye eeyiye ntunkhulu, apho nkhono-nlume mwinttheele othuuto veeshwa vawe."

¹⁹ Ila papaawe khuhitakhi khuri: "Miiyo kinjuwa mwanaka ethu kinret-taaye. Manaase ontela wiiya khunti khuluyeene na onteela wiiyana peewu ya waatta, ila ttwiye otu nttiithi onteela onziti ye, peewu yawe enttelia wiiya khunti za waatta." ²⁰ Aphano khuwaaparikhya siikhu ethiitile araka:

"Attu a Ezirayeele anteela owaaparikhya azaaya arumeyelaka mazina enu araka:

'Nluku ooretteni nkhama Efwarayiimu na Manaase.' " Paata ya toowo, khunwulisa Efwarayiimu zayita Manaase.

²¹ Elottelanaka, Ezirayeele khumuuzu Yuusufu yoori: "Apha miiyo nasaapi kimfwa, ila Nluku ontela wiiya vamote na-mweyo na ti ye anttelaa ye wuрутiseli nti wa apapazenu. ²² Apho kawinkha nti w'oonyaako wa Shekemu weeyo owaazitiyeeyo attwiizo, etile kiwaanyakanyiyeeyo amoori kuumananaka phanka yaka na mattetthe aka."

49

Yaakhumpa oniwaaparikhya aanaawe

¹ Yaakhumpa khuwaakhuwela aanaawe khuwooga yoori: "Mwite apha kiwuuzeni vitthu zinttelaa yeele orettikhana siikhu epo zintaazo.

² Mwisusele apha mwisiile aana a Yaakhumpa,
mwinsiileze papeenu Ezirayeele.

³ Weeyo Ruubeni, mwaana woomwanzo aka,
kuvu zaka,
nshumo woomwanzo woojikhitiri wooshapu aka,
mwanzo wooshitahiwa channu na wookhomaala.

⁴ Weeyo o wootumpunyeeyo nkhama maati a mpahari,
omwanzo awo wafujeya,
mwaasa woolalana muukha wa papaawo,
waphuja voolili wa papaawo*.

⁵ Na-ye Simiyooni na Leevi, ntthu na ttwiye,
phanka zaya puntukhi zoorettana vitthu zoohusuti.

⁶ Shawuri zaya miiyo akeepu,
na rooho yaka khiri vamote na-yo,
mwaasa wa wiiphiiriwa waya awoola atthu
khushija ttottopwa za mompe za watthu mwayiini.

⁷ Woolaanikha wiiye wiiphiiriwa waya yo, maana pu woowali,
woolaanikha yiiye katapu yaya yo, maana pi zookhomaala.
Kinlawa kawaaphakulevo vakathhi wa khapila ya Yaakhumpa,
kiwaamwazeluka vakathhi wa Ezirayeele.

⁸ Weeyo Yuuda, attwiizo anteela wuuttoppelaa;
onttelia owaashintta maatuwi awo,
aana a papaawo anlawa
awiinamele weeyo.

⁹ Yuuda, mwaana wa siipa,
amana akhola nyama khininsuruwa;

* **49:4** Moone Mwanzo 35v22.

onlattanana siipa nwulweene arapaleeliye,
paani amminyalaaye khunlansa?

¹⁰ Khweele Yuuda khanteela onyakanyiwa ofwalume awe,
wala pakhora y'oofwalume eriye mmwinyoka mwawe,
mpakha ate mwennyewe ofwalume,
otu anttelaaye oshuteliwa pi attu ooshi.

¹¹ Ye onteela ofukelela puuru yawe
vanrayi wa wuuva,
na mwaanaaya anfukelele
veerapi yooshapweya ya nrayi otthuupo.

Kuwu zawe nka afulanaka viinyu
na ajapi yawe nka afulanaka taamu ya wuuva.

¹² Maasho awe anttela wiiya awaara
mwaasa woonywa viinyu ya wuuva,
meeno awe anttela wiiya oolakala
mwaasa w'oonywa leethi.

¹³ Zabuloon onttela wiikhala phantte ya phwaani,
onttela wiiya patari ya makalawa;
mwiiinano awe onlawwa mpakha nti wa Sidooni.

¹⁴ Ezakaari puuru wookhomaala
arapaleeliye vakathi wa mapwattha mawiri.

¹⁵ Wakathi ooniyeovo yoori tuniya etile yaari ya shirehe
na yooshapweya ovumula,
ye khwiinamisa mafuzi awe
khuvikela mapwattha,
khusala akhola khaazi
nkhamma mwiithwaana.

¹⁶ Daani, onteela ophuka washariyavo khapila yawe
nkhamma lihimo limote la Ezirayeele.

¹⁷ Ye onteela wiiya nkhamma nyookha
eniiyaaye nshini wa tarikhi.
Nkhamma evili yoovithaaleta
enlumaaye ekwakuno ya khavaloo,
namweettetisa khavaloo
khukwana enyokonyoko.

¹⁸ Oo Mbwanaaka! Miyo kinweja nusura yawo!

¹⁹ Gaadi onteela wuumananiwa pi annya-viittha
ila ye eettaka owiikarisa.

²⁰ Vitthu-zoojiwa za Azeeri enttela wiiya za nnofu,
ye nka avahaka ethhu-yooja ethiitile ensuhaaye oja afwalume.

²¹ Nafitaali nazoro woojitalphula
aniwaapatthaaye aana ooshapweya.

²² Yuusufu muutthi wa wiima channu
waattameliyeeyo nshini wa maati,
virapi zaya khurapela vatulu wa muuri.

²³ Maatuwi awe anlawa amuumanane amwiikarisaka
na mattetthe aya,

²⁴ ila ntteetthe lawe tthi lookhomaala,
makhono awe pi oozivala
khwa kuvu za Nwali wa Yaakhumpa,
khwa kuvu za Nshuki nwulu, Mwaako wa Ezirayeele,
²⁵ khwa kuvu za Nluku wa papaawo,

Nluku Woowahi Wooshi.
 Ye ooparikhiiye weeyo Yuusufu na parakha za pinkuuni,
 na parakha za mmaati ariiye vathi w'olumwenku,
 na parakha za nyama za waatta na parakha zoovokola.

²⁶ Parakha za papaawo pi za waatta zayita
 parakha epile za nyaako epi za raku,
 na maali za nyaako mittiitthi za mileele.

Parakha zooshi epi ziiye veeshwa wa Yuusufu
 mpakha vaajihi va otule athawuliweeyo
 vakatthi wa attwiize.

²⁷ Bejami miji woosaya,
 supuyeeene ontta okhola nyama na orafuna,
 nuwa looveva na waawanya epile zinsalaazo.”

²⁸ Pi atthaapa mahimo khumi na mawiri a Ezirayeele, na mattakhuzi aawooziyeeyo papaaya awaaparikhiyaka, na amwinkhaka wakhula ntthu parakha yawe etile yaamweeziyeeyo.

Ofwa wa Yaakhumpa

²⁹ Elottelanaka Yaakhumpa khuwooza araka: “Kinttela ofwa kilawe kazikhiwe vamote na ajamaazaku apa afwiyyeeyo. Mwakizikhe vamote na apapazaku nlikurakuza liriye mmashapa wa Eforoni NHiiti, ³⁰ ntintthile liriye Makhipeela kharipu ya Manre tuniya ya Kanaani, ntinttho Ebura-hima oozanyeziyeeyo ti Eforoni NHiiti yoori yiye vilalo yawe. ³¹ Ottukho azikhiweewo Ebura-hima na muukhaawe Suhura, na-ye Esiyaakha na muukhaawe Rapekha na theenya ottukho phi kinzikhiyeewo Liiya.

³² Nshapa laya na likurakuza laya nttho oozanyaniye Ahiiti.”

³³ Nawiisha mattakhuzi apale aari owoogaaye aanaawe, Yaakhumpa khu-rutisela moolu awe voolili khurapalela khwiittha phuumu khufwa.

50

Olileliwa wa Yaakhumpa na ozikhiwa wawe

¹ Yuusufu khumwiinamela papaawe omaasho wawe khumpejari khusala alila. ² Elottelanaka khuwooza anamajisa thiipa awe yoori anvaaze thiipa ya paalasamu papaawe yoori ahivutte; yo khuretta ethiipo. ³ Ottukunttelawa thiipa Ezirayeele weeshiye siikhu arupayiini, nkhamma ethiipo aazowereliedy-eego Amisuri. Yo eeshiye siikhu saapiini ari mmatthaka.

⁴ Nawiisha matthaka apale, Yuusufu khuwooza attunkhulu apale aari wiikhalaaya Firawuuna araka: “Kookholani moolu mwilawé mwamuuze Firawuuna yoori; ⁵ Paapa ahinawfe, aakilaphisiye yoori: ‘N’oofwa kilawé kanzikhe attaapho azikheweewo ajamaaze tuniya ya Kanaani.’ Safwatali mwikilikhe kilawé kanzikhe ottukho nawiisha kintta ota.”

⁶ Firawuuna khunjipu araka: “Wiiya oolaphisiye etta wanzikhe papaawo.”

⁷ Aphano Yuusufu khulankha khusala alawa onzikha papaawe vamote na attunkhulu, akarumeya ooshi a Firawuuna na mamunu-munu ooshi a tuniya ya Misuri. ⁸ Aalawiye vamote na ajamaaze Yuusufu na attwiize, na ajaama ooshi a Yaakhumpa aasaliyeeyo aari asimaana na pwittipwithi na mompe. ⁹ Atthu aalawiye mmwikukutta akina vakhavaloo, atthu aalawiyeyo aari a waatta.

¹⁰ Afiyeevo nti wa Ataati oriyye phantte ya malawa-njuwa ya muuttho Yorotaani, khwiikhala siikhu sapa Yuusufu ari mmatthaka wa papaawe

eettaka olila. ¹¹ Wakathi Akanaani apale aari wiikhalaaye ottuukhule awooniyeevo Amisuri apale eettaka olila nti wa Ataati yo khuri: "Olila opu anlilaaye Amisuri apa nwulweene." Pi apho khutthaja nzina aphale vaya la Apreele-Misurayiila, eniyyaaye malawa-njuwa ya muuttho Yorotaani.

¹² Aana a Yaakhumpa khuretta ethhiipile aawooziyeezo ahinafwe. ¹³ Khunthuula khunlawana tuniya ya Kanaani khulawa khunzikha nlikurakuza la Makhipeela waattamana na Manre, nshapa ntintthile Eburahiima oozanyaniyeyo Eforoni Nhtiyo yoori asala awaazikhawo ajamaaze. ¹⁴ Nawiisha ozikha, Yuusufu khurutela Misuri vamote na attwiize na atthu ooshi apale aalawaniyeyo ozikha.

Yuusufu oniwaakhuza rooho attwiize

¹⁵ N'oofwa papaaya, attwiize Yuusufu khuri: "Talili Yuusufu khana liphuta varoho vawe mwaasa wa vitthu epile nanretteliyeezo zootakhala, na-ye khanteela onirettela ethhiipo?" ¹⁶ Attwiize khumperekheza nhupi Yuusufu yoori: "Papaawo ahinafwe aanirumiye ¹⁷ yoori niwuuze toono: 'Safwatali, owaaswaamihi attwiizo khwa koosa na twampi epile ooretteley-eezo mwaasa woohuukholi saana.' Apho nasaapi eti ninuuvekela yoori, oniswaamihi koosa zetthu, fweeyo niyiye akarumeya a Nluku otu aari omwaaputwaaye papawo." Ye n'osila mattakhuzi apale khusala alila.

¹⁸ Aphano khuta attwiize khwiinama khukokhara anvekelaka nswammaha araka: "Nata n'aamwiithwaana awo."

¹⁹ Yuusufu khuwooza yoori: "Wala mwihikoove. Miyo aki Nluku. ²⁰ Khweele mweeyo mwaakiwazeliye shawuri zootakhala. Ila Nluku khuzukulisa khwiya zooshapweya. Khwa toowo Nluku awoosuru atthu a waatta mpakha leelo eti. ²¹ Apho mwihooive. Miyo kintta wuukholani mweeyo na aaneenu." Khwa ethhiipo Yuusufu khuwaanyamaza attwiize, mattakhuzi apale aawooziyeyo aawaafiiye nroho mwaya.

Ofwa wa Yuusufu

²² Yuusufu aari wiikhala Misuri vamote na ajaama a papawo, ye eekhaliye nyaakha miiya na khumi. ²³ Khuwoona aana a Efwarayiimu peewu yattaathu, theenya khuwaathuula aana a Makhiiri, mwaana wa Manaase, khuwaattha vamoolu vawe.

²⁴ Yuusufu ahinafwe khuwooza attwiize yoori: "Apha miiyo kinttela ofwa, ila Nluku onteela owaawunini oolazenimo mmuti mphu oolawaneni tuniya etile aamwaahitiyeyo alaphaka yoori onteela omwinkha Eburahiima, Esiyaakha na Yaakhumpa." ²⁵ Ye khuwaalaphisa aana a Ezirayeele araka: "Kiniuuuzani khweele, Nluku onteela owaawunini. Amana zirettikhana epo zaya, mwilawaka nti aya opo mwithiuule makhonkolo aka."

²⁶ Yuusufu afwa arina nyaakha miiya na khumi. Khuvaaziwa thiipa ya paalasamu mwiili awe yoori ahivutte, khutthiiwa mwiiluza khuzikhiwa tuniya ya Misuri.

Olaawo

Ohukhumwiwa wa meezi rayi ilu nti wa Misuri

¹ Apa mazina a aana a Yaakhumpa eettiyeeyo Misuri, wakhula ntthu na ajamaaze: ² Ruubeni, Simiyooni, Leevi, Yuuda; ³ Ezakaari, Zebulooni, na Bejami; ⁴ Daani, Nafitaali, Gaati, na Asheeri. ⁵ Aana na atuu luwe Yaakhumpa ooshi aalawaniyeeyo aari sapiyiini; ila Yuusufu aari Misuri ottuukho rakuzeene.

⁶ Ziviriyeevo siikhun zawaatta, Yuusufu khufwa na attwiize apale na peewu ya etile. ⁷ Ila meezi rayi ilu apale aasaliyeeyo khuvokolelana khweekezeleya khwaattelana khwiya okhomaala mpakha khufiyelela omwazeyela mmuti mphule wooshimo. ⁸ Aphano Misuri khuthawala mfwalume nkinoko ahaari ojuwaaye hatha ethtu monkoni wa Yuusufu. ⁹ Aphano ye khuwoozza atthu awe yoori: "Mwiwoone meezi rayi ilu pi awaat telana na ookhomaala zayita fweeyo. ¹⁰ Nlaweni niwaalazele olavilavi yoori ahitepe waattelana, ehiri amana enipuwela viittha yo akusanyeya na maatuwi eetthu anirinkaanyela atthiramo mmuti mphu."

¹¹ Aphano amisuri khuwaarella yo wiiya anamalokozela a khaazi za nkuumu yoori apatthe owaahukhunu na khaazi zoolipa. Khwa ethhiipo meezi rayi ilu khunjekela Firawuna sitati piiri za sakafu zaari wiithi waaye Pito na Rameesi. ¹² Nakhataalikha zaama aari ohukhumwiwaavo, pi aari otepaavo waattelana, tiito amisuri khuwaapaththa woova mwaasa wa meezi rayi ilu; ¹³ aphano amisuri khwaaza owaakholisa khaazi zoolipa. ¹⁴ Khweekezelaa hukhunu muuhaayi mwaya, khwa Owenkha khaazi zoolipa nkhamha omeya ottophe na waattala thizolo, na okhola khaazi zooshi za mmashapa. Zooshi aari okholisiwa khwa oviithwaana wootakhalavo.

¹⁵ Mfwalume wa Misuri khuttakhulana anamavokoza a meepereewu aariwitthiwaaye Siifwara na Puuwa yoori: ¹⁶ "Amana mwiwaawunaka meezi rayi ilu atakhaka ovokola, mwisala mwiwoona aanaaya. Eeyaru aalume, mwisala mwiwoola, ila eeyaru aakha, mwisala mwiwaalikha wiiya haayi." ¹⁷ Ila anamavokoza apale khumoova Nluku khuhiretti etile oozieeyo ti mfwalume wa Misuri, khusala awaalikha aana alume wiiya haayi. ¹⁸ Aphano mfwalume wa Misuri khuwaakhuwela khuwoozza yoori: "Mwaari toovi owaalikha aana aalume wiiya haayi?"

¹⁹ Anamavokoza apale khujipu yoori: "Aakha a meezi rayi ilu afwarikhana na apa a Misuri. Yo pi oojikhitiri, ampattha ekumi ahinafiyevo hatha namavokoza."

²⁰ Nluku khwiya wemaani khwa anamavokoza apale, na meezi rayi ilu khusala avira eekezeleyaka wookhomaalavo. ²¹ Mwaasa wa anamavokoza apale omoova Nluku, ye khuwenkha owahi wa wiiyana ojama waya.

²² Tiito Firawuna khuwaaruma atthu awe ooshi yoori: "Wakhula mwaana wa meepereewu anvokoliwaaye eeyaru wanlume amweeselele mmuttho oniiththiwaaye Niilu, ila eeyaru wankha asala anlikha."

2

Ovokoliwa wa Munsa

¹ Mwinyi mmote wa lihimo la Leevi anraliye muukha wa lihimo limote na ye. ² Khumwiimithisa khunvokolela mwaana. Amooniyeeyo yoori

aari wooshapweya khunvitha khwa nyeezi mittatthu. ³ Nawoona yoori khayaari owaheya ovira anvithaka theenya, khuthuula khelenke ya ttekethe khumattha na piriniisi khunthaamo mwaana otule, khulawa khuntha nttekethe nkhome wa muuttho Niilu. ⁴ Nlupuwe mwaana otule eemeliye toole sirini yoori oone niini yaari weettelaaye onrettikhanelu.

⁵ Mwaana wankha wa Firawuuna khwiishukhela mmuttho olawa woowa, ajaazi awe aarina khusala avira nkhome wa muuttho, ye khoona khelenke etile eri nttekethe khunruma njaazi awe khweettela. ⁶ Afunuliyeevo, khun-sikanamo mwaana eettaka olila. Khumoonela huruma khuri: "Mwaana otu tuwa meezi-rayiilu."

⁷ Aphano, nlupuwe mwaana otule khumwaattama mwaana wa Firawuuna khumuuzela yoori: "Onuupuwela toovi? Ontakha miijo kilawe kankhuwele nunu mmote mwiizipayiilu ate asala amwaamwisa?"

⁸ Mwaana wa Firawuuna khunjipu yoori: "Haya etta." Aphano mwanankha khulawa onkhuwela maama wa mwaana othuutule. ⁹ Aphano, mwaana wa Firawuuna khumuuzu yoori: "Onthuule mwaana otu omwaamwise zwaamu yaka, kintta wuuriipa phakari yawo." Nunu otule khunthuula mwaana khusala amwaamwisa. ¹⁰ Paata ya mwaana otule owula khuntiisela mwaana wa Firawuuna khunretta wiiji mwanawewe. Khunthaja nzina la Munsa, araka: "Maana koolaza mmaati."

Munsa onimuula mmisuri na khutthirela Miitiya

¹¹ Siikhu moote, wakathi Munsa apatthiyeevo omwinyi, khulankha khulawa wa attwiize meepereewu khoona khaaizi yoolipu aari okholisiwaaye na theenya khumoona mmisuri aari ompiyaaye na onvulalisa mwiipireewu. ¹² Khweekesa okhuno na okhuno nawoona yoori khaari otawo hatha ntthu, khumuula mmisuri otule khunttukuttha vanshaka.

¹³ Siikhu yaphiiri khuwaasikana meepereewu awiri oomanaka khumuza otule aariina paathuli yoori: "Onimpiyela-ni nzaawo?" ¹⁴ Ye khumuuzela yoori: "Paani awinkhiyeeyo onamalokozela weetthu ama onamaphuka? Ontakha okuule nkhamu omuuliyeeko mmisuri otule?" Munsa khoova khuri: "Ee, ajuwa ethtu kirettiyeeyo!"

¹⁵ Firawuuna nawuuza viithu epile khujilakelela omuula Munsa; ye khutthira khulawa mpakha nti wa Miitiya khwiikhala nshini wa nlipu.

¹⁶ Namalokozela a tiini wa Miitiya aarina aanaawe sapa aakha, yo khuteela ottekha maati atthe n'yopo mwaya enkhe nyama za papaaya. ¹⁷ Aphano khuta mishuki mikina khusala aweekara, ila attaphale Munsa khulankha khusala awaakisa na khwinkha maati nyama zaya.

¹⁸ Wakathi aruteliyeevo wa papaaya Rewele,* ye khuwoozela yoori: "Leelo mwaruti supuyeene mwaasa wa niini?"

¹⁹ Yo khujipu yoori: "Mmisuri mmote ti anaakisiye mmakhono wa mishuki mikina na othuuto khunittekhela maati khunywisa nyama zeethu."

²⁰ Khuuzeliwa ti papaaya yoori: "Apha yaya ori vayi? Mwanlikhelani? Mwankhuwele ate aje na fweeyo."

²¹ Munsa khukhupalela na khutakha wiikhala mwinyi otule, mwanawewe aari wiitthiwaaye Zipoora khunlooza. ²² Zipoora khunvokola mwaana, Munsa khunthaja nzina la Yeerisoni[†] alupaka yoori: "Kasaafirela nti wa malaponi."

* ^{2:18} Yeeturu † ^{2:22} Yeerisoni khwa luuka ya hebereewu enlattanana na ntakhuzi linraaye omaka.

²³ Ziviriyeovo siikhu zawaatta khufwa mfwalume wa Misuri; atthu a Ezirayiilu khusala asisimira na okhuwa monkoni wa oviithwanaa, nkhuwo aya opule khunfiyela Nluku. ²⁴ Nluku noosiila osisimira waya opule khufikhiri wahati aarettaniyeeyo Eburahiima, Esiyaakha na Yaakhumpa. ²⁵ Nluku khuwoona meezi-rayiilu khumweeleya tafwawuthi aariinaayo.

3

Munsa na muutthi wookholela

¹ Munsa aari oshukisa nyama za nkhwewe Yeeturu, namalokozela a tiini wa Miitiya; siikhu moote khuthuula nyama khusala eettana phantte kiina ya n'yaara khufiya mpakha va mwaako wa Nluku, waari wiitthiwaaye Hereebe. ² Attaapho khumpuwelela nlayikha la Nnyizinku va nlimi la moot-tho waari olankhaaye vakatthi wa muutthi. Munsa khweekesa khoona yoori moottho weetta okholela ila muutthi opule khawaari olukula. ³ Aphano ye khuri: "Viththi zootikinisa kintta attaaphale kilawe koone, moottho onta okholela ila muutthi opule khunlukula mwaasa aya niini?"

⁴ Nnyizinku khumoona yoori ye eetta waattama muutthi opule, olawa woona, Nluku khunkhwuela enakatthi-nakatthi ya muutthi otthuupule araka: "Munsa! Munsa!" Ye khujipu araka: "Lapeekha!"

⁵ Aphano Nnyizinku khumuza yoori: "Ohaattamevo apha! Ovule mmoolu mpho jampali zawo maana puuro yaya eti oriivo ttakatthiifu." ⁶ Khurutela olupa yoori: "Miiyo ki Nluku wa papaawo, Nluku wa Eburahiima, Nluku wa Esiyaakha na Nluku wa Yaakhumpa." Munsa khufinikha wuuso awe maana aari woova omweekesa.

⁷ Nnyizinku khulupa yoori: "Khweele khweele kinoona nanna an-hukhumwiwaazo atthu aka Misuri na kasiila nkhuwo aya mwaasa wa khaazi ankholisawaazo pi analamokozela a Firawuna na kinjuwa yoori antta ohoowa; ⁸ tiito kiishukhiyeeyo oteela oruuusuru mmakhono wa amisuri na kiwaalazakamo mphu kiwaalawanaka nti wooshapweya na nwulweene, ohali liniittikhawo leethi na asali; ottuukho aniikhalaawo akanaani, ahiiti, amoori, aperizi, amwiivi na ayepuzi. ⁹ Maana nkhuwo wa atthu a Ezirayiilu wakifyela miiyo, na kinoona nanna amisuri ani-waahukhumwaazo. ¹⁰ Kinuuruma nasaapi ethiiti Misuri wa Firawuna, wawaalazewo atthu aka meezi-rayiilu." ¹¹ Aphano Munsa khulupa amuuzaka Nluku yoori: "Ki paani miiyo woolawa wa Firawuna olawa owaalazawo meezi-rayiilu?"

¹² Nluku khunjipu yoori: "Miiyo kiniya vamote na-weyo. Eto ti alama yoori keetta wuuruuma: Amana owaalazawo atthu Misuri wate vamwaako attaapha okaaputu."

¹³ Munsa khumuuzela Nluku yoori: "Miiyo amana kilawa vakatthi wa meezi-rayiilu kiwooga kiraka: 'Nluku wa apapazenu akiruma vakatthi-venu,' khi amana akuuzela yoori: 'Nzina lawe paami?' Kiwooze niini?"

¹⁴ Nluku khumuza Munsa araka: "MIIYO TI MIIYO. Owooze ethiipo meezi-rayiilu, yoori: 'MIIYO TI MIIYO ti akirumiyeeyo vakatthi venu."

¹⁵ Nluku khulupa theenya amuuzaka Munsa yoori: "Wawooze meezi-rayiilu yoori: 'Nnyizinku, Nluku wa apapazenu Nluku wa Eburahiima, Nluku wa Esiyaakha na Nluku wa Yaakhumpa, akiruma vakatthi ve.' Nttho ti nzina linsalaaye kuupuwelaniwaka peewu khwa peewu mileele."

¹⁶ "Olawe wawaokusanye attunkhulu a meezi-rayiilu, owooze yoori Nnyizinku, Nluku wa amarehemu apapazenu, Eburahiima, Esiyaakha na Yaakhumpa aakipuweleliye khukuza yoori: 'Khweele khweele, Miiyo

kinoona tafwawuthi zenu na kinjuwa ethu anuurettelaanini a Misuri. ¹⁷ Miiyo kaahiti wuulazanimo nhukhunu za amisuri kiweettaneni nti wa akanaani, wa ahii, wa amoori wa aperizi wa amwiivi na wa ayepuzi nti oniitthaaye leethi na asali.'

¹⁸ "Attunkhulu anteela wuusileza. Olankhe na attunkhulu a atthu aya atthaapo mwilawe wa Firawuuna wamuuze yoori: 'Nnyizinku, Nluku wa meepeereewu eettiye oniteela. Apho onilikhe nilawe neettette mwentto wa siihku ttatthu neette n'yaara namwinkhe twaha Nnyizinku, Nluku ethu.' ¹⁹ Miiyo kinjuwa yoori mfwalume wa Misuri khanteela wuulikhani olawa woohiiyi khwa okhanyareliwa pi nkhone woowahi. ²⁰ Nakatalikha kinteela wookola nkhone aka kiwaavulaze amisuri khwa vitthu zootikinisa zooshi kinttelaaazo oretta vakatthi vawo, paata ya toowo ontaa wuulikhani olawa.

²¹ Na kinteela owenkha amisuri wiiyana niiya na atthu apa na amana mwilaakawo, khamwinlaawo makhono-ru. ²² Aakha ooshi ana ya owaavekela anamwaattamanana aya na apale aawaamakeliyeeyo vitthu za feeta na za tahapu, na kuwo za owaawalisa aaneenu, aalume na aakha. Khwa ethiipo mwintta ovulula maali zooshi za amisuri."

4

Alama za minjuza enkhiweeyo oretta Munsa ti Nluku

¹ Munsa khunjipu Nnyizinku araka: "Wala yo khanteela okhupalela, na khanteela okisiileza, na anlupa yoori: 'Nnyizinku khoopuweleenei!'"

² Nnyizinku khumuuzela Munsa araka: "Eto oriina mmakhono niini?" Ye khuri: "Pakhora."

³ Aphano khumuuzza yoori: "Weeselele vathi!" Ye khweesa khuthatuwa khwiyya nyookha Munsa khatthira. ⁴ Nnyizinku khumuuzza Munsa theenya yoori: "Wookole nkhone awo okhole nkira aya." Khookola nkhone awe khukhola, khurutela wiiya pakhora. ⁵ "Eto ti ya owaakhupalisa yoori oopuweleeliye Nnyizinku, Nluku wa amarehemu apapazaya, Nluku wa Eburaauma, Nluku wa Esiyaakha, Nluku wa Yaakhumpa."

⁶ Nnyizinku khumuuzza theenya yoori: "Otthe nkhone awo vamweyo!" Khutthaavo, alazakavo khwiyyana maaharaja khulakala nkama liwiku.

⁷ Nnyizinku khumuuzza theenya yoori: "Othuule nkhone awo opheya otthe vamweyo." Khutthaavo, noolazavo khurutela wiiya sawasawa na mwiili awe wooshi.

⁸ Nnyizinku nalelo khuvira amuuzaka araka: "Amana yo ahikhupalei ama ahitakhi, alama yamwanzo, yaphiiri anteela okhupalela. ⁹ Ila amana nalelo eeya ahinakhupalele alama epo piiri wala khuhuusiilezi, ottekhe maati vattithiiru a mmutho Niilu, wiithele tuulu, antta othatuwa maati aya apo a tuulu eeye taamu."

¹⁰ Aphano Munsa khumuuzza Nnyizinku yoori: "Oo, Mbwana, thanku raku miiyo akinwahi ottakhula saana; mpakha NASAAPI eti waaziyevo ottakhulana miiyo, amana kittakhulaka kintta okukuma."

¹¹ Nnyizinku khunjipu yoori: "Paani amwinkhiyeeyo milomo pinaatamu? Paani amwinkhiyeeyo ottakhula wala paani awuumpiyeyo apale ohisili? Wala apale awoona ama apale ohooni? Khahiyoo miiyo Nnyizinku? ¹² Apho olawe, Miiyo kinttelaa zooshi vamote na milomo zawo na kinuunozela ethu onttelaaye ottakhula."

¹³ Ye khujipu araka: "Oo Mbwanaaka, kinuuvekela yoori onrume ntthu nkina."

¹⁴ Aphano Nnyizinku khumpattha katapu khwa Munsa, khumuuzza yoori: "Weeyo khuna ttwiyyo Arawu, nleevi? Miiyo kinjuwa yoori ye onwahi

ottakhula saaneene. Nasaapi eti ye onta ota oteela okutthanana weeyo, ye onttela wiiya woofurahi amana oosikana.¹⁵ Weeyo onttela ottakhulana omuuze mattakhuzi anttelaaye olupa; miiyo kintta owaawunini moowiiri yoori mwittakhule na kiwuuzeni ethtu yooretta.¹⁶ Arawu onttela ottakhulana atthu khwa zwaamu yawo, onttela wiiya nlomo awo, weeyo onttela wiiya nkhamma Nluku khwa ye.¹⁷ Othuule pakhora eti mmakhono, ti ethiiti onttelaaye orettana alama za minjuza.”

Munsa onrutela Misuri

¹⁸ Aphano Munsa khurutela wa nkhwewe Yeeturu khumuza yoori: “Safwatali, kilikheni kilawe Misuri kawoone ajamaazaku nkhamma nalelo ari haayi.”

Yeeturu khujipu araka: “Olawe na heeri.”

¹⁹ Nnyizinku aamuziye Munsa ari Miitiya yoori: “Orutele Misuri maana ooshi apale aari otakhaaye owuula afwa.”²⁰ Aphano Munsa khunthuula muukha awe na aanaawe khuwaattha va puuru vawe khusala arutela Misuri. Mmakhono mwawe aathuuliye pakhora ya Nluku.

²¹ Nnyizinku khumuza theenya Munsa yoori: “Miiyo kawinkha owahi wooretta minjuza zawaatta. Amana orutelawo Misuri wiye woojithenka yoori orette omaasho wa mfwalume wa nti aya opule minjuza zaya epo, ila miiyo kinlawaa koomise rooho yawe ahiwaalikhe atthu apo olawa.”²² Omuuze Firawuna oraka: ‘Nnyizinku alupa toono: Ezirayilu mwanaka wamwanzo.’²³ Miiyo kalupa yoori: “Onlikhe mwanaka alawe akaaputu.” Ila weeyo amana okathala kintta omuuza mwanawo wamwanzo.’’

²⁴ Eettaka Misuri vhahili aamakiyeevo ntarikhi Nnyizinku khunteela Munsa yoori amuule.²⁵ Ila Zipoora khuthuula liwe loothokolowa khushija shapala ya soola ya mwanawo khupiyana moolu a Munsa. Khuri: “Weeyo omannaka miiyo khwa taamu.”²⁶ Zipoora khuri: “Omannaka khwa taamu,” athoonyezaka okhiriya opule. Wakathi otthuupule Nnyizinku khunlikha Munsa.

²⁷ Aphano Nnyizinku khumuza Arawu yoori: “Olawe n'yaara wakutthanane Munsa.” Ye khulawa khukutthanana va mwaako wa Nluku, khunchelisa.²⁸ Munsa khunthatelela Arawu zooshi epile Nnyizinku anrumiyeezo omuuza, na khumuza alama zooshi za minjuza arumiweeyo retta.

²⁹ Aphano Munsa na Arawu khulawa khuwaakusanya attunkulu ooshi a meeziyayilu.³⁰ Arawu khuwooza zooshi Nnyizinku amuziyeeyo Munsa. Nawiisha naye Munsa khuretta alama za minjuza vakatthi wa atthu apale,³¹ yo khukhupali. Wakathi ajuwiyeeyo yoori Nnyizinku awoopuweiyeemeeziyayilu na aawoniye nanna aari ohoowaazo yo khwiinama khwaaputu.

5

Firawuna oneekezelu hukhumu

¹ Paata ya toole Munsa na Arawu khulawa ottakhulana Firawuna amuuza yoori: “Nnyizinku, Nluku wa meeziyayilu alupa toono: ‘Owaalikhe atthu aka alawe akirettele njampo n'yaara.’”

² Firawuna khujipu araka: “Nnyizinku paani wonshututela miiyo khuwaalikha olawa meeziyayilu? Akininjuwa Nnyizinku aya na akiniiwaalikha meeziyayilu olaamo mphu.”

³ Munsa na Arawu khukhanyarela araka: “Nluku wa meepereewu ettiye oniteela, safwatali onilikhe nilawe narette safwari ya siikhu ttatthu neet-taka n’yaara, namwinkhe twaha Nnyizinku, Nluku etthu, noohiiyi ethhiipo antta oniteela marati ama ontta onuula na phanka.”

⁴ Aphano mfwalume wa Misuri khumuuzu Munsa na Arawu yoori: “Mwaasa aya niini mweeyo mwiwantipwaka atthu na khaazi zaya? Haya! Mwilawé mwakhole khaazi zoolipa.” ⁵ Theenya Firawuuna khulupa yoori: “Atthu apa pi awaatta ila mwinttä owaalkhisä okhola khaazi zaya.”

⁶ Siikhu ethiitile Firawuuna khuwenkha nrumo anamalokozela awe na masuphayi anakhaazi, araka: ⁷ “Waaza leelo ethiiti mwihirutele owenkha malala awaattalana thizolo nkhamma mwaari orettaazo; asala alawa weekesa eenyewe.” ⁸ Ila mwiaakhanyarele waattala thamani ethiitile aari waattalakaaye, mwihivaavukule hatha etthu; apa aya anamaviliwa, ti eto aaziyeyo okhuwa araka ‘ninttelä omwinkha twaha Nluku etthu.’ ⁹ Mweekezele khaazi yaya yoolipa yoori ashikheyä ahisileze vitthu zoohatiwa.”

¹⁰ Anamalokozela na masuphayi khulawa khuwooza atthu apale yoori: “Firawuuna alupa toono: ‘Nilikhe owinkhani malala. ¹¹ Mwilankhe mwilawé mwawooze yoori alawe akusanye malala nhali anwahaaye opatthamo, na khaazi yenu yoolipa khinteela ovukuwavo hatha etthu.’”

¹² Aphano atthu apale khumwazeyela nti wooshi wa Misuri khukusanya nyaani khwa zwaamu ya malala. ¹³ Anamalokozela a khaazi khuwaattitta awoozaka yoori: “Mwiishise khaazi khwa nanna mooziweeo okhola wakhula siikhu wakathi opule mwaari winkhiwaavo malala.”

¹⁴ Khujalitiwa masuphayi ameezirayiilu apale atthomiweeyo pi anamalokozela a anakhaazi a Firawuuna, na khusala oozeliwa yoori: “Mwaasa aya niini mwihiishisaka khaazi yenu ya waattala thizolo taana wala leelo nkhamma mwaari orettazo raku?”

¹⁵ Aphano masuphayi a meezi-rayiilu khulawa ojiliza wa Firawuuna yoori: “Mwaasa aya niini owaatthanattaka toono akarumeya awo? ¹⁶ Malala khaninkhiwa na ninuuziwa waattala thizolo. Woone, nintta ojalitiwa; ila atthu awo pi ariina paathuli.”

¹⁷ Ila Firawuuna khujipu yoori: “Anamaviliwa! Mweeyo oviliwa! Tiito mwinraaye; ‘Nintakha olawa omwinkha twaha Nnyizinku.’ ¹⁸ Nasaapi ethiiti mwirutele okhaazi. Khamwinteela opokhera malala! Ila mwina yawuupa thizolo thamani ethiito mwaari wuupakaaye!”

¹⁹ Masuphayi apale a meezi-rayiilu khujuwa yoori aari nhukhumu, mwaasa woosiila yoori ahivukule thamani ya thizolo ooziweeyo waattala wakhula siikhu. ²⁰ Paata ya masuphayi apale noolaavo aphale aariivo Firawuuna, khunsikana Munsa na Arawu eettaka owaaweja. ²¹ Yo khulupa yoori: “Nnyizinku ti awooneni na oophukeni; maana mweeyo mwanireetta fweeyo wiija atthu awiiphira omaasho wa Firawuuna na wa akarumeya awe khuwenkha phanka mmakhono mwaya yoori anuule.”

Nnyizinku onlaleyä otaphuliwa wa atthu

²² Aphano Munsa khuzukuluwela wa Nnyizinku khumuuzu yoori: “Oo Mbwana, wawaahukhumwelani atthu apa? Khi wakirumeliyeeni?

²³ Maana thanku kilawiyevo ottakhulana Firawuuna khwa nzina lawo yoori ontta owaahukhumu atthu apa, weeyo khawaarettiye hatha etthu yoori owaataphule!”

6

¹ Nnyizinku khumuza Munsa yoori: "Aphano attaapha ontta woona etthu kinttelaaye onrettela Firawuna, khwa nkhone aka woowahi ontta owaalikha olawa, khwa nkhone aka woowahi ontta owilkara mmuti mwawe."

² Nluku khumuza theenya yoori: "Miiyo ki Nnyizinku. ³ Kampuweleliye Eburahiima, Esiyaakha, na Yaakhumpa nkhamma Nluku wa Owahi Wooshi, ila akiwaalikheeni okijuwana nzina la Nnyizinku. ⁴ Na theenya kaarettaniye wahati aka wa owenkha nti wa Kanaani, nti aari wiikhalaaye ari aletto. ⁵ Nasaapi eti kasiila ojiliza wa meeziyayiilu atthaapo amisuri awaarettiyeyo oviithwaana na kafikhiri wahati aka karettaniyeeyo.

⁶ Nakatalikha owooze meeziyayiilu yoori: Miiyo ki Nnyizinku na kin-teela owaalazamo nkathhi wa oviithwaana arettiweeyo pi amisuri. Ki-waataphule khaazi zoolipa epo enkhiweeza na kiniwoosuru na nkhone wookhomaala na owahi nwulweene na hukhumu. ⁷ Kinuuthuulani mwiiye atthu aka na-miyo kiiye Nluku enu, aphano pi mwinttelaavo ojuwa yoori miiyo ki Nnyizinku, Nluku enu kuulaziyeenini vathi wa khaazi zoolipa mwenkhieeyo pi amisuri. ⁸ Na kinuuthuulani kiweettaneni nti kaalaphiyeyo omwinkha Eburahiima, Esiyaakha na Yaakhumpa; apha kiniwinkhani mweeyo wiye wenu. Miiyo ki Nnyizinku."

⁹ Munsa khuwooza ethiipo meeziyayiilu, ila yo khuhitakhi onsiileza, mwaasa wa othunku na hukhumu aari woonaayo nkathhi wa oviithwaana.

¹⁰ Aphano Nnyizinku khumuza Munsa araka: ¹¹ "Olawe wamuuze Firawuna mfwalume wa Misuri yoori awaalikhe meeziyayiilu aleemu mmuti mwawe."

¹² Munsa khunjipu Nnyizinku araka: "Meeziyayiilu khanikisiila, khi nannan anttelaaeye okisileza Firawuna, khupe miiyo kihijuwaka ottakhula saana?"

¹³ Ila Nnyizinku anrumiye Munsa na Arawu, yoori awooze meeziyayiilu na Firawuna, mfwalume wa Misuri, yoori etta orumiwa owaalazawo meeziyayiilu Misuri.

Ojama wa Munsa na Arawu

¹⁴ Attunkhulu a ojama aari apa:

Aana a Ruubeni, mwaana nwulu wa Yaakhumpa aari apa: Enookhi, Phaalu, Hesherooni, na Khariimu; opu pi waari ojama wa Ruubeni

¹⁵ Aana a Simiyooni aari apa: Yemuweeli, Yamiini, Ohaati, Yakhiiini, Zowaari na Shawaali mwaana wa nunu mmote wa Kanaani; opu pi waari ojama wa Simiyooni.

¹⁶ Apa mazina a aana a Leevi khwa ovokoliwa waya: Yeerisoni, Kowaati, na Meraari. Leevi eekhaliye nyaakha miiya na talaathiini na sapa.

¹⁷ Aana a Yeerisoni khwa ojama aya pi apa, Lipiini na Simeeyi.

¹⁸ Aana a Kowaati pi apa: Anraawu, Izaari, Heporooni na Uzili. Kowaati eekhaliye nyaakha miiya na talaathiini na mittatthu.

¹⁹ Aana a Meraari pi apa; Mali na Muushi. Ntthi laari lihimo la Leevi khwa nanna ya ovokoliwa waya.

²⁰ Anraawu khunrala Yokipeeti nlupu wa papaawe, khunvokolela Arawu na Munsa, Anraawu eekhaliye nyaakha miiya na talaathiini na sapa.

²¹ Aana a Izaari pi apa: Koora, Nefekhe, na Zikiiri.

²² Aana a Uzili pi apa: Mizayeele, Elizaafwa, na Sithiiri.

²³ Arawu analiye Elisheepa mwaana wa Aminataapi, nlupu wa Nashooni; ye khunvokolela Nataapi, Apiiwu, Elizaari na Itamaari.

- ²⁴ Aana a Koora pi apa: Asiiri, Elikana na Apiyasaafi; ntthi laari lihimo la Akoora.
- ²⁵ Elizaari, mwaana wa Arawu, khunrala mwaana mmote wa Putiyeele, khunvokola Fineeya; apa pi attunkhulu a ojama wa Leevi.
- ²⁶ Ti Arawu na Munsa atthaapo Nnyizinku awaarumiyeeyo yoori: “Mwilazewo Misuri lihimo la meeziyayiilu.” ²⁷ Pi atthaapo, Munsa na Arawu, anttakhulaniyeeyo Firawuuna mfwalume wa Misuri na niiya ya owaalazawo meeziyayiilu.

Nluku oninkhuwela Munsa na Arawu

- ²⁸ Siikhu Nnyizinku attakhulaniyeovo Munsa ari nti wa Misuri, ²⁹ Nnyizinku aamuziye yoori: “Miiyo ki Nnyizinku. Omuuze Firawuuna mfwalume wa Misuri zooshi epile kiniwuzaaye.” ³⁰ Munsa khunjipu Nnyizinku araka: “Miiyo akinttakhula saana; Firawuuna ontela okisiila toovi?”

7

Munsa na Arawu enakathi ya firawuuna

¹ Aphano Nnyizinku khumuza Munsa yoori: “Miiyo kooretta wiiya nkhamma Nluku khwa Firawuuna na ttwiyo Arawu wiiya nkhamma napiyu awo. ² Weeyo omuuze zooshi epile kuurumiyeeyo, na ttwiyo Arawu amuuze Firawuuna awaalikhe meeziyayiilu aleemo mmuti mwawe. ³ Ila miiyo kinteela wuumisa rooho ya Firawuuna na kinteela wenkeza alama zaka na vitthu zaka zootikinisa nti wa Misuri. ⁴ Ye khanteela wuusilezani, ila miiyo kinteela wookola nkhone aka khwa Misuri, na khwa khaazi khuluzeene za ophuka, kinteela owaalazawo Misuri atthu a Ezirayiilu. ⁵ Phi amisuri anttelaaavo ojuwa yoori miiyo ki Nnyizinku, amana kookola nkhone aka khwa Misuri kiaalaazava meeziyayiilu vakathhi vaya.”

⁶ Munsa na Arawu khureetta ethiipo Nnyizinku awaarumiyeego. ⁷ Wakathi aattakhulaniyeovo Firawuuna Munsa aarina hirimu ya nyaakha thamaaniini, Arawu aarina hirimu ya nyaakha thamaaniini na mittatthu.

Pakhora ya Arawu

⁸ Nnyizinku khumuza Munsa na Arawu yoori: ⁹ “Amana Firawuuna awuzani yoori: ‘Mwirotte minjuza awahi wuukhupalini,’ omuuze Arawu: ‘Athuule pakhora yaho eeselele enakathi ya Firawuuna,’ pakhora ya eto entta othatuwa yiye nyookha.”

¹⁰ Aphano Munsa na Arawu khulawa mpakha wa Firawuuna, noofiya khureetta ethiipile Nnyizinku aawaarumiyeeyo. Arawu khuthuula pakhora etile khweeselela enakathi ya Firawuuna na mashawuriya awe pakhora etile khuthatuwa khwiya nyookha. ¹¹ Aphano naye Firawuuna khuruma olawa okhuweliwa ajuwi na anamajintta; na yo khureetta ethiipo khwa majintta aya. ¹² Wakhula mmote wa yo khusala eesa pakhora yawe na othatuwa nyookha, ila pakhora ya Arawu khumiza pakhora epile. ¹³ Ila Firawuuna khuumisa rooho yawe khuhitakhi owaasiileza, nkhamma ethiipo Nnyizinku aalupiyeego.

Palayamwanzo: Taamu

¹⁴ Nnyizinku khumuza Munsa yoori: “Rooho ya Firawuuna tiya nthiti khanteela owaalikha atthu apo olawa. ¹⁵ Olawe wakutthanane Firawuuna supuyeene; ye onlawa woowa omuttho. Weemele nshini wa muuttho osala onweja, olawaka othuule pakhora yaho mmakhono etile yaathatuwiyeeyo nyookha. ¹⁶ Omuuze yoori: Nnyizinku, Nluku wa meeziyayiilu, akiruma

owuuza yoori: Owaalikhe atthu aka alawe akaaputu n'yaara, mpakha leelo khuntakha okisiileza. ¹⁷ Nnyizinku alupa toono: Ethiito ti enttelaaaye wuujuwisa yoori miiyo ki Nnyizinku: khwa pakhora eti kiriina mmakhono kintakha kipiye maati a Nniliu athatuwe eeye taamu. ¹⁸ Swi ziriiye mmuttho zinteeela ofwa zooshi, osala onukhamo woohifwayivo. Aphano amisuri ewaapatthe enanaari ya onywa maati a mmuttho mphule.”

¹⁹ Nnyizinku khumuza Munsa theenyia yoori: “Omuuze Arawu athuule pakhora yawo ookolele nkhone maati a Misuri, a mmuttho na mpakha a mmatthatta na a mmazuuku athatuwe eeye taamu, Misuri yooshi yiitaale taamu, mpakha zoopo za thaapwa na za mawe.”

²⁰ Munsa na Arawu khuretta nkhamma ethiipo Nnyizinku awaarumiyeeko. Arawu khushashula pakhora etile, khujapha maati a mmuttho Firawuna ari attaapho na mashawuriya awe, maati apale ooshi khuthatuwa taamu. ²¹ Swi zooshi zaariimo mmuttho mphule khufwa khusala onukhamo woohifwayivo, Misuri khuhisala owahi onyweyawo maati a mmuttho mwaya mphule nti wooshi waarinna taamu.

²² Nayoo anamajintta a Misuri khuretta ethiipo na ojuwa waya woojivitha, ila rooho ya Firawuuna nalelo khusala eri yawuuma khuhitakhi onsiileza Munsa na Arawu nkhamma ethiipo Nnyizinku aalupiyeeko. ²³ Firawuuna khuzukuluwa khusala alawa owawe khuhijali epile zaya. ²⁴ Amisuri ooshi khulawa khuthipa nshini wa muuttho yoori apatthe maati oonywa, maana maati apale a mmuttho khaari onyweya.

²⁵ Zaaviriye siikhu sapa paata ya Nnyizinku othatusha maati apale a mmuttho.

8

Pala yaphiiri: Anaphulu

¹ Nawiisha Nnyizinku khumuza Munsa yoori: “Olawe wa Firawuuna wamuuze yoori Nnyizinku alupa toono: Owaalikhe atthu aka alawe akaaputu. ² Amana weeyo ohitakhi owaalikha olawa, kintta operekha pala ya anaphulu nti awo wooshi. ³ Mmuttho Niilu wooshimo anttela ottheereelanamo anaphulu awaatta, awelele afiye owawo okatthi wawo mpakha voolili vawo na mmanyupa wa mashawuriya awo mpakha wa atthu awo ooshi na mphule enkhattiwaamo na enoochiwaamu phaawu. ⁴ Anaphulu aya apo anttela wuuteela weeyo na mashawuriya awo na atthu awo ooshi.”

⁵ Aphano Nnyizinku khumuza Munsa araka: “Omuuze Arawu yoori: Wookole nkhone awo othuule pakhora wookolele mmuttho, mmilipu na mmatthatta yoori owaawelelise anaphulu Misuri yooshi.”

⁶ Arawu khookolela nkhone yawe maati a Misuri, anaphulu khuwelela khufinikha nti wooshi wa Misuri. ⁷ Aphano anamajintta na ojuwa waya woojivitha khuwaapuwisa anaphulu Misuri yooshi.

⁸ Firawuuna khuruma olawa okhuwelwa Munsa na Arawu khuwooza yoori: “Mwinvekele Nnyizinku akilaze anaphulu apa miiyo na atthu aka, yiyyaru ethiipo kintta owaalikha atthu apa alawe amwinkhe twaha Nnyizinku.”

⁹ Munsa khumuza Firawuuna yoori: “Ruhusa ti yawo ya okuuza lini ontakhaaye yoori kuulompele weeyo na mashawuriya awo, atthu awo ooshi, yoori weeyo na vaje vawo mwilaziwe anaphulu asale mmuttho paasi.”

¹⁰ Firawuuna khujipu araka: “Meesho.” Munsa khuri: “Enttela wiiya ethiipo ojipwiyeeko opatthe ojuwa yoori khaavo anlikananaaye Nnyizinku

Nluku ethu. ¹¹ Anaphulu antta wuulikha weeyo, vaje vavo, mashawuriya awo na atthu awo; anttelaaye osala pi apale ari mmutho paasi.”

¹² Aphano, Munsa na Arawu khulaavo aphale aarivo Firawuuna, Munsa khunvekela Nnyizinku mwaasa wa anaphulu, nkhamma ethhiipo aasilaniyeezo na Firawuuna. ¹³ Nnyizinku khujipwelela oveka wa Munsa; anaphulu apale ooshi aari mmanyupa, vaje na mmashapa khufwa. ¹⁴ Khulokottheliwa khuukeliwa nti opule khusala onukha woohifwayivo. ¹⁵ Ila wakathi Firawuuna ajuwiyeovo yoori avumula, khurutela wuumisa rooho yawe khuhinsilezi theenya Munsa na Arawu, khwa epile alupiyeozo Nnyizinku.

Palayattaatthu: Shaawa

¹⁶ Nnyizinku khumuza Munsa yoori: “Omuuze Arawu: Athuule pakhora yawo ookole nkhone ajaphe lifufu la vathi, lithatuwe liiye shaawa khwa Misuri yooshi.” ¹⁷ Khuretta ethhiipo; Arawu khookola nkhone awe na pakhora etile khujapha lifufu nthile khuthatuwa khwiya shaawa khuweettaalhu atthu mpakhà nyama na nti aya opule wooshi khwiitaala shaawa. ¹⁸ Anamajintta khweezelala ethhiipo na ojuwa waya woovitheyila ila khuhiwahi othatusha; shaawa epile khusala evira eweetaalaka atthu na nyama.

¹⁹ Aphano anamajintta apale khumuza Firawuuna yoori: “Eti yaala ya Nluku,” ila rooho yawe Firawuuna khuumisa khuhitakhi owaasiileza, nkhamma ethhiipo Nnyizinku aalupiyeozo.

Palayanne: Mempe

²⁰ Aphano Nnyizinku khumuza Munsa yoori: “Olankhe supuyeene wakutthanane Firawuuna ye onlawa omuttho, omuuze yoori: Nnyizinku alupa toono: Owaalikhe atttu aka alawe akaaputu. ²¹ Amana weeyo ohiwaalikhi atttu aka olawa, kintta wuuperekheza pala ya mempe zawaatta yoori ziwiiphirise weeyo, mashawuriya awo, atttu awo na mmavaje mwaya. Manyupa a Misuri na vathi anluwatthaavo zinttela wiitaalavo mempe. ²² Ila siikhu yaya etile kinttela otthantta khwa nanna yoofwarikhana nti wa Gosheeni, okhule anikhalaawo atttu aka; khinteela opuwawo hatha pala moote ya mempe, yoori weeyo ojuwe yoori miyo Nnyizinku kiri mmuti ntumphu. ²³ Kinlawa kawaafwarikhaniise atttu aka na atttu awo. Meesho entta opuwa alama ya eto.

²⁴ Nnyizinku khuretta ethhiipo, mempe zawaatta khwiitaala nnyupa wa Firawuuna na mmanyupa wa mashawuriya awe, nti wooshi khwiya wootapanyeya mwaasa wa mempe.

²⁵ Aphano Firawuuna khuruma okhuveliwa Munsa na Arawu khuwooza yoori: “Mwilawe mwamwinkhe twaha Nluku enu, mmuti ntumphu.”

²⁶ Ila Munsa khujipu araka: “Khahi yoolikana fweeyo oretta toowo, maana twaha ninttelaaye omwinkha Nnyizinku Nluku eethu, ti yoohifwayi khwa amisuri, amana nireetta twaha nkhamma eto anoonaaye ohifwayi, amisuri antta onuula na mawe. ²⁷ Nina yooretta safwari ya siikhu ttatthu niri ntarikhi neettaka n'yaara olawa omwinkha twaha Nnyizinku, Nluku ethu, nkhamma ethhiipo anuuziyeozo.”

²⁸ Aphano Firawuuna khulupa yoori: “Kintta wuulikhani mwilawe, mwamwaaputu Nnyizinku, Nluku enu n'yaara, ila mwiheette peetiwene, noofiya mwilkilompele namiyo.”

²⁹ Munsa khujipu yoori: “Nasaapi eti amana kilaavo vakatthi vavo kinttela onvekela Nnyizinku; meesho mempe epo entta owaattuwa weeyo na mashawuriya awo na atttu awo, ila safwatali ohikittekhe theenya ohiwaalikhi atttu apa olawa omwinkha twaha Nnyizinku.”

³⁰ Aphano Munsa khulaavo vakathi wa Firawuna khunvekela Nnyizinku. ³¹ Nnyizinku khujipu lompa ya Munsa, mempe epile khumwaattuwa Firawuna na mashawuriya awe mpakha atthu awe, khuhisali hatha mempe moote. ³² Ila nalelo khusala ari wa wuumisa rooho, khuhitakhi owaalikha atthu apale olawa.

9

Pala ya thaanu: Ofwa wa nyama

¹ Nawiisha Nnyizinku khumuza Munsa araka: “Olawe wa Firawuna wamuuze yoori: Nnyizinku, Nluku wa meepereewu, alupa toono: Owaalikhe atthu aka alawe akaaputu. ² Amana weeyo nalelo ohitakhi owaalikha olawa na khukhanyarela owaakkhattaza, ³ ojuwe yoori nkhone wa Nnyizinku ontta otiisa pala yawoopisa khwa nyama zaho ziriye omashapa, khwa khavalo zaho, khwa apuuru awo, khwa nkamiiya zaho, khwa mompe zaho mpakha pwittipwitti zaho. ⁴ Na Nnyizinku onteela ophakula nyama za amisuri na epi za meeziyayilu, yoori ehifwe hatha nyama moote ya meeziyayilu.”

⁵ Nnyizinku atthoma wakathi araka: “Meesho Nnyizinku ontta oretta mmuti mphu etile aahitiyeeyo.” ⁶ Mmeesho mwaya Nnyizinku khuretta ethiipo: nyama za amisuri zooshi khufwa, ila za meeziyayilu hatha moote khuhifwi. ⁷ Firawuna khunruma ntthu olawa woona, khusikana hatha moote ya meeziyayilu ehifweeni; ye khuumisa rooho khuhitakhi owaalikha olawa atthu apale.

Pala yasiitha: Makhwatta a puupa

⁸ Aphano Nnyizinku khumuza Munsa na Arawu yoori: “Mwisavule fuutha ya vamafiya yawiitaala mmakhono Munsa amwazele otulu, Firawuna ari attaapho. ⁹ Entta othatuwa yiye lifufu khwa nti wooshi wa Misuri, puupa entta owaapuwa atthu mpakha nyama, Misuri yooshi.”

¹⁰ Yo khuthuula fuutha ya vamafiya khulawa wa Firawuna; Munsa khumwazela fuutha etile otulu, puupa khuwaapuwa atthu mpakha nyama.

¹¹ Wala anamajintta khuhisala awahi omwaattama Munsa, mwaasa wa makhwatta, awaapathhiyeeyo vamote na amisuri ooshi. ¹² Ila Nnyizinku khuumisa rooho ya Firawuna, ye khuhinsili Munsa na Arawu nkhamma ethiipo Nnyizinku amuuziyeeyo.

Pala yasaapa: Vuula ya mawe

¹³ Nnyizinku khumuza Munsa yoori: “Olankhe supuyeene olawe wakuthanane Firawuna, omuuze oraka: Nnyizinku, Nluku wa meepereewu, alupa toono: “Owaalikhe atthu aka alawe akaaputu. ¹⁴ Olikha toowo, swaafu eti pala yaka yooshi kinuutiisela omweenyewe, na mashawuriya awo na atthu awo, yoori ojuwe yoori khina eeyiye nkhamma miiyo olumwenku wooshi. ¹⁵ Maana miiyo kinwahi wookola nkhone aka khulwaaza weeyo na atthu awo khwa pala yaari owahaaye wuulazavo voolumwenku. ¹⁶ Ila miiyo kinuulikha weeyo ori haayi yoori kithoonyeze owahi waka, yoori nzina laka lilaleyiwe mmuti wooshimo. ¹⁷ Nalelo ontta ojikhutupulana atthu aka, khuntakha owaalikha alawa? ¹⁸ Ila meesho wakathi otthuupu, kinlawaa kanyise vuula ya mawe ehinanyeke nti opu wa Misuri thanku owaziwe mpakha leelo. ¹⁹ Apho owaarume atthu awo alawe alokotthele nyama zaho ziriye omashapa na vitthu zaho ziriye waaza

atthu mpakha nyama ziriyo. Amana ohilaziwo otana ontì, khunyeliwa vuula ya mawe entta ofwa.”

²⁰ Akarumeya a Firawuna aari woovaaye nttakhuzi la Nnyizinku khwaakuva khulawa khuwaalazawo, aviithwaana aya mpakha nyama zaya khulawa khupwehiwa. ²¹ Ila apale ahaari woovaaye nttakhuzi la Nnyizinku khuwaalikha amwiithwaana aya na nyama zaya omashapa.

²² Aphano Nnyizinku khumuza Munsa yoori: “Olanse makhono awo yoori ewaanyele vuula atthu, nyama, na miithi zooshi za ntthuttu nti wooshi wa Misuri.” ²³ Munsa khulansa pakhora yawe khuthoonyeza otulu, Nnyizinku khuvumisa taari na vuula ya mawe, Nnyizinku khwiishusha ozerima na taari khwa nti opule wa Misuri na vuula ya mawe khusala enya. ²⁴ Vuula ya mawe na taari khuvuma yoopakhanyeza na mawe awoopisa ehinanyeke Misuri yooshi thanku ewaziwe. ²⁵ Misuri yooshi vuula etile khutapanya vitthu zaari mmashapa, waaza atthu, nyama na mathapa mpakha miithi zooshi za ntthuttu. ²⁶ Khusala nti wa Gosheeni paasi, okhule aari wiikhalaawo meezi-rayiilu, okho khayaanyiyewo vuula ya mawe.

²⁷ Aphano Firawuna khuruma olawa okhuweliwa Munsa na Arawu khuwooza yoori: “Swaafu eti kakosa. Nnyizinku ti wa shariya, ila miiyo na atthu aka, na makaafiri. ²⁸ Mwilompe wa Nnyizinku, maana ottithima wa Nluku na mawe ankwaaye a vuula pi awaatta, miiyo kintta wuulikhani mwilawe mwiheekesele eththu kiina theenya.”

²⁹ Munsa khujipu yoori: “Amana miiyo kilaamo nsitati mphu kintta wookolela nkhono aka wa Nnyizinku. Taari enyamale na vuula yaamuse yoori weeyo ojuwe yoori olumwenku pi wa Nnyizinku. ³⁰ Ila weeyo na akarumeya awo, miiyo kinjuwa yoori khamwinimoova Nnyizinku Nluku.”

³¹ Alikutawu na ntthama zaharipweya mwaasa ntthama waarinaphunjie na, alikutawu aaleyiye. ³² Naye tiriku khayaaharipweyiye maana yaari ehinootthe.

³³ Munsa khulaavo aphale aariivo Firawuna na nsitati mphule, khumookolela nkhono Nnyizinku, taari na vuula khwiisha. ³⁴ Firawuna na woona yoori taari na vuula zeesha khurutela okufuru oomisaka rooho yawe na mashawuriya awe. ³⁵ Ari wawuumisa rooho ethiipo, khuhiwaalikhi meezi-rayiilu olawa, nkhama ethiipo Nnyizinku aamuzyeezo Munsa.

10

Palayanaane: Mapalaka

¹ Nnyizinku khumuza Munsa yoori: “Olawe wakutthanane Firawuna, maana miiyo koomisa rooho yawe na rooho za mashawuriya awe, yoori miiyo kithoonyeze alama zaka epo vakathhi vaya yo, ² na yoori mwiaathatele aaneenu na atuulwenu nanna miiyo kiwaahukhumwiyeelo amisuri na minjuza zootkinisa kirettiyeelo vakathhi vaya, khwa ethiipo pi mwinttelaaovo ojuwa yoori miiyo ki Nnyizinku.”

³ Aphano Munsa na Arawu khulawa okutthanana Firawuna, yo khumuza yoori: “Nnyizinku, Nluku wa meepeereewu alupa toono: ‘Mpakha lini weeyo okathalaka ojipushuwisa mmakhono mwaka miiyo? Owaalikhe atthu aka alawe akaaputu. ⁴ Amana okhanyarela ohitakhi owaalikha atthu aka olawa, meesho kintiisa pala ya Mapalaka mmuti mwawo. ⁵ Yo anteela ofinikha vathi ohisala wooneyayo, maana anteela orafuna zooshi epile zaalikhwiyeeyo ti vuula ya mawe mpakha na miithi epile zinphutuwaazo mmashapa; ⁶ anttela wiitaala nnyupa mwawo na mmanyupa wa mashawuriya awo na wa amisuri ooshi. Vitthu amarehemu apapazenu

ahooneeni siikhu epo eekhaliyeelo mphu mpakha leelo.” Elottelanaka Munsa khulankha khulaavo aphale aariivo Firawuuna.

⁷ Aphano mashawuriya a Firawuuna khusala alupa yoori: “Mpakha lini ntthu otu anituturushaka? Owaalikhe atthu apa alawe amwaaputu Nnyizinku Nluku aya. Khiniweeleya yoori Misuri yatapanyeya?”

⁸ Aphano khuthuuliwa Munsa na Arawu opheya khulawaniwa mpakha wa Firawuuna, ye khuwooza yoori: “Ettani mwamwaaputu Nnyizinku, Nluku enu. Oweje, anlawaaye paani?”

⁹ Munsa khujipu yoori: “Ninlawa na mashaapu ethu, na anakhuuluvale ethu, aaneethu, pwittipwithi zeetthu mpakha mompe zeetthu. Maana ninttela onrettela njampo Nnyizinku eetthu.”

¹⁰ Firawuuna khuwooza yoori: “Mweeyo mwinttela onhithajiya Nnyizinku amana kuulikhani olawa na aakha enu na aana enu! Eto enthoonyeza yoori mweeyo mwinwaza shawuri zootakhala. ¹¹ Khahiyo toowo! Mwilawe alume-ru mwamwaaputu Nnyizinku maana eto ti waakivekeliyeeyo.” Munsa na Arawu khwiikariwa aphale aariivo Firawuuna.

¹² Aphano Nnyizinku khumuuzza Munsa yoori: “Wookolele nkhono nti wa Misuri yoori ate nazope vathi apha arafune mathapa ooshi ariimo na zooshi epile zaalikheweeyo ti vuula ya mawe.”

¹³ Munsa khookola pakhora yawe ookolelaka nti wa Misuri, Nnyizinku khutiisa pheevo ya ntulayi khuvuma nthana wooshi mpakha osikhu. Noocha pheevo etile khutana nazope. ¹⁴ Misuri yooshi khwiitaala nazoperu woohilikhi hatha vahali, aari awaatta venkivene. Aari ahinapuwewo nkhama apo na paata ya opo khapuviyewo theenya nkhama apo. ¹⁵ Maana aafinikhiye phantte zinki za Misuri mpakha nti wooshi khwiyya wooriipa. Khurafuna zooshi epile zaalikheweeyo ti vuula ya mawe, mathapa na mishumo za miitthi woohisali hatha ethu piishi waaza mmithi mpakha mmashapa, nti wooshi wa Misuri.

¹⁶ Firawuuna khuruma olawa okhuweliwa Munsa na Arawu woohirupazi, khuwooza yoori: “Kankosa Nnyizinku, Nluku enu na kookosani mweeyo! ¹⁷ Apho kinuuvekelani yoori mwikiswaamihii twampi yaka swaafu eti theenya na mwinvekele Nnyizinku, Nluku enu yoori akilaze pala eti yoofwiwa.”

¹⁸ Munsa paata ya olaavo aphale vaya aariivo Firawuuna khunvekela Nnyizinku. ¹⁹ Aphano Nnyizinku khuvumisa pheevo yawaatta ya phalalazi, ethiito khukhupa mapalaka ooshi khwiithela mpahari yookhuttuwa; khuhisalimo hatha lipalaka mmote nti opule wa Misuri. ²⁰ Ila nalelo Nnyizinku khumisa rooho ya Firawuuna; ye khuhitakhi owaalikha meezi-rayiliu olawa.

Pala yattiisiya: Yiiza

²¹ Aphano Nnyizinku khumuuzza Munsa yoori: “Makhono awo olansele pinkuuni yoori Misuri yooshi yiye yoofinikhiwa ti yiiza yookhomaala.”

²² Munsa khookolela nkhono awe otulu, Misuri yooshi khufinikhiwa ti yiiza yookhomaala khwa siikhu ttatthu. ²³ Khuhisala oonana mmote na nzaawe, khaarivo mmote aaliyeevo vahali aariivo khwa siikhu ttatthu; ila meezi-rayiliu ooshi mmanyupa mwaya yaarimo nuuru.

²⁴ Aphano Firawuuna khunkhuvela Munsa khumuuzza yoori: “Ettani mwamwaaputu Nnyizinku enu. Ila esale pwittipwithi zenu na mompe zenu paasi; ila aakha na aana mwilawane.”

²⁵ Munsa khujipu yoori: “Weeyo ona ya oninkha nyama za orettela twaha na olukuza, yoori nimwinkhe Nnyizinku, Nluku eetthu. ²⁶ Na nyama zeethu nilawaka nintta othuula hatha likhope khalinsala, maana ninttela orumeyela ethhiipo yoori nimwaaputu Nnyizinku Nluku eetthu, khanjuweeni nyama-ni ninttelaaaye omwaaputu-na Nnyizinku mpakha ofiya.”

²⁷ Ila Nnyizinku khumuza rooho ya Firawuna, ye khuhitakhi owaalikha olawa. ²⁸ Firawuna khumuaza Munsa yoori: “Oleovo apha na ohirutelevo theenya! Siikhu onttelaavo okoona theenya onnta ofwa.”

²⁹ Munsa khuri: “Walikanisa! Akinteela woona theenya wuuso awo.”

11

Olaleyiwa wa pala yakhuumi

¹ Nnyizinku khumuza Munsa yoori: “Kinimperekheza pala moote theenya Firawuna na Misuri yooshi. Khwa ethiio ye onlawa awaa-likee olaamo mmuti mphu mpakha onlawa aweekaremo eperepere.

² Aphoo owooze meezi-rayiilu ooshi, waaza alume mpakha aakha, yoori awaavekele anamwaattamanana aya vitthu za feeta na za tahapu.”

³ Nnyizinku khuwaareetta yoori atthu awe apatthe wooneliwa-vahali pi amisuri. Theenya Munsa aari nlume nwulweene nti opule wa Misuri, waaza mmaasho wa mashawuriya a Firawuna mpakha wa atthu ooshi.

⁴ Munsa khuri: “Nnyizinku alupa toono: ‘Osikhu layili kinvira Mmisuri.

⁵ Aana ooshi aalume amwanzo a nti wa Misuri anttela ofwa, waaza mwaana wa mwanzo wa Firawuna, anttelaaye orithi khukulu ya mfwalume, mpakha mwaana wa mwanzo wa njaazi ankholaaye khaazi yoochila na aana a mwanzo a nyama zaya. ⁶ Misuri yooshi onlawa wapuwewo olila nwulweene; waari ohinapuwewo na ohinttelaaaye opuwawo theenya. ⁷ Ila khwa meezi-rayiilu, waaza atthu mpakha nyama, wala mwanapwa khan-lawa owahowula.’ Paata ya toowo, mwinttela ojuu yoori Nnyizinku awavirikanisa amisuri na meezi-rayiilu. ⁸ Aphano mashawuriya awo ooshi apa, anlawa akeekese na akikohorele, akevelakala yoori: ‘Olawe na atthu awo ooshi.’ Attaaphale miyo kinttela olaawo!” Munsa na okatipukha wawe channu khulaavo aphale aariivo Firawuna.

⁹ Aphano Nnyizinku khumuza Munsa yoori: “Firawuna khanteela wuusilani, yoori minjuza zaka zeekezeleye nti wa Misuri.”

¹⁰ Munsa na Arawu khuretta minjuza epile zooshi khwa Firawuna; ila Nnyizinku khukhomaza rooho ya Firawuna, khuhisala atakha owaalikha olaamo mmuti mphule meezi-rayiilu.

12

Njampo la Paashikowa

¹ Nnyizinku khumuza Munsa na Arawu nti wa Misuri yoori: ² “Opu ona ya wiiya mweezi wa mwanzo wa mwaakha khwa mweeyo. ³ Munsa na Arawu ana ya olupa yoori: “Ajaama ooshi a Ezirayiilu, siikhu ya khuumi ya mweezi otthuupu, alume ooshi ana yoovalula nshapi la pwittipwithi leelume ya wakhula liphanko ya wakhula nyuupa. ⁴ Ojama amana wi-yya vattithiiru ohinwahaaye orafuna nyama yooshi, ona yoowaalaleya anamwaattamanana aya apale a kharipu awaameele nyama enwahaaye owaafiyela khwa hisapu ya atthu aya. ⁵ Nyama yaya enttelaaaye othawuliwa ena ya wiiya yeelume ya mwaakha mmote, yoohiirakali hatha vhahli. Ena ya wiiya pwittipwithi ama puuzi. ⁶ Mwipwehe mpakha siikhu khumi

na nne ya mweezi, mpakha wakathi ajaama ooshi a meeziRAYIILU anttelaaaye oshija njuwa leettelaka otupweela. ⁷ Mwittukunttele taamu yaya vatulu na mpavu wa milako za manyupa, apale mweeyo mwirafuniy-eemu nyama. ⁸ Osikhu otthuupo mwina ya orafuna nyama yoomanikhwi va moottho, na mathapa oowaawa* na phaawu yoohiina fwaramento. ⁹ Mwihirafune nyama piishi wala yawiipikhiwa, ila yoomanikhwi va moottho waaza eeshwa, moolu na marupo aya. ¹⁰ Mwihisalise hatha ethu efiya supu; amana esala mwilukuze. ¹¹ Mwiwale, nzako n'yuunu, jampali mmoolu na mwikholele pakhora mmakhono, mwirafune wawaakuvavo; otu paashikowa wa Nnyizinku.

¹² Maana osikhu aya otthuupo kinttela ovira nti wa Misuri na kiwoole aana ooshi arwanzo aafume waaza athtu mpakha a nyama, na kiwaahukhumu a miluku ooshi a Misuri: Nnyizinku ti Miyo! ¹³ Taamu mwivaziyeeyo milako zenu enttela wiiya alama yoori ethoonyeze manyupa mwiniikhalaaye, amana kiwaavulalisaka amisuri, miiyo kinttela woona taamu kisala kuuvikanani wooheemeli yoori mwihiiye wootapanyiwa ti pala yaya eto.

¹⁴ Mwitthapele siikhu ethiito nkhamma njampo la tiini muupuwelele yoori ti miiyo, Nnyizinku, kirettiyeeyo epo. Mweeyo na peewu yenu mwina yooretta njampo la paashikowa khwa mileele. ¹⁵ Nkatthi wa siikhu sapa mwina yooja phaawu yoohiina fwaramento. Siikhu yamwanzo mwilazemo fwaramento mmanyupa mwenu, maana wakhula otule anttelaaaye oja ethu yawiyyana fwaramento, ntthu aya oto ontaa wiikariwa vakatthi wa meeziRAYIILU. ¹⁶ Siikhu yamwanzo na siikhu yasaapa ona yawiyyavo nthukumano ttakatthiifu, ahiiyeye hatha ntthu mmote antakhaaye okhola khaazi siikhu zaya epo, woohiiyi wenttekhezela ethu-yoojiwa ya wakhula siikhu; mwina yooretta ethiito paasi.

¹⁷ Mwirette njampo la phaawu yoohiina fwaramento, maana siikhu yaya ethiito ti kilaziyeeyo nti wa Misuri mahimo a athtu ooshi a meeziRAYIILU. Mwitthapele siikhu yaya eto wiiye nrumo wa mileele, waaza wa apaapa mpakha wa aana aya. ¹⁸ Mwina yoorafuna phaawu yoohiina fwaramento makaaripi siikhu yakhuumi na nne ya mweezi wamwanzo mpakha makaaripi siikhu zeettettaka eshiriini na moote. ¹⁹ Siikhu epi sapa ahiiyeye ntthu mmote anttelaaaye wiiyana fwaramento owawe. Wakhula antakhaaye oja ethu ya wiiyana fwaramento ontaa wiikariwa muujama wa meeziRAYIILU, hatha nkhamma mmalapo ama nnyunti. ²⁰ Mwihiye hatha ethu ya wiiyana fwaramento mmanyupa mwenu wooshimo, ila mwina yooja phaawu yoohiina fwaramento.”

Paashikowa wamwanzo

²¹ Munsa khuruma okhuveliwa attunkhulu a athtu ooshi a meeziRAYIILU khuwooza yoori: “Mwinthawule nshapi la pwittipwithi yoori ajaama ooshi a Ezirayiilu ashije pwittipwithi ya Paashikowa. ²² Mwitthuale zankalala mwinaanise na taamu eriye mpasiya mwittukunttele milako zenu vatulu na mpavu mwaya. Ahiiyeye hatha ntthu mmote antakhaaye osaruwa nnyupa mwawe mpakha ocha. ²³ Maana Nnyizinku aviraka mmuti mphule yoori awoole amisuri; amana oona taamu etile mwittukunttelyeeyo nlako enu phantte na phantte na vatulu vaya, Nnyizinku ontela ovira attaapho khanlawa onlikha namatapanya ovira mmanyupa mwenu yoori awuuleeni.

* ^{12:8} Mathapa oowaawa ajiweeyo siikhu ya Paashikowa waari nthoonyeze wa hukhumu meeziRAYIILU aari woonaaye Misuri.

²⁴ Mwipwehe nrumo opu mweeyo na aana enu ooshi khwa mileele. ²⁵ Amana mwifiya nti opule Nnyizinku awahitiyeenini owinkhani, mwina yooretta njampo ntthi. ²⁶ Aaneenu amana awuuzelani yoori: ‘Njampo laya ntthi maana aya niini?’ ²⁷ Mwiwaajipu yoori: ‘Twaha ya Paashikowa wa Nnyizinku, aviriyeeyo vatulu wa manyupa a meeziirayiilu nti wa Misuri, na khwiinanelaa manyupa eetthu wakathi aari owoolaavo amisuri.’ Attaaphale meeziirayiilu khukokhora khumwaaputu Nnyizinku. ²⁸ Meeziirayiilu khu-laavo, khulawa khuretta nanna ethiifile Nnyizinku amuuziyeyo Munsa na Arawu.

Palaya Khumi: Ofwa wa aana amwanzo oovokoliwa pi amisuri

²⁹ Aphano osikhu layili, Nnyizinku khuwoola aana ooshi amwanzo a misuri, waaza mwaana wamwanzo wa Firawuuna, namarithi ofwalume awe, mpakha mwaana wamwanzo wa napherezu aari nkalamooso na theenya aana amwanzo a nyama. ³⁰ Osikhu otthuupule, Firawuuna na mashawuri-ya awe ooshi na amisuri ooshi khulankha na wapuwiye olila nwulweene, maana khayaarivo nyuupa yahaafwiweemo.

Olaawo

³¹ Osikhu otthuupule Firawuuna khuruma okhuweliwa Munsa na Arawu khwooza yoori: “Mwileemo nasaapi mmuti mwaka, mweeyo na meezi-rayiilu! Mwilawe mwamwaaputu Nnyizinku enu, nkhamma ethiipo mwivekiyeezo. ³² Mwithuule pwittipwithi zenu mompe zenu na puuзи zenu, nkhamma mwaalupiyeezo na mwikipedia khiye theenya.”

³³ Amisuri aari owaakhanyarela atthu apale yoori aleemo mmuti mphule, alupaka yoori: “Amana mwihilimo fooshi fweeyo nintta ofwal!” ³⁴ Aphano atthu apale khuthuula tiriku yookhattiwa yoohiina fwaramento, khuputaputela pasiya yaya vakuwo khuvikela mmafuzi. ³⁵ Meeziirayiilu khushututela nrumo wa Munsa, khuwaavekela amisuri vitthu za feeta za tahapu na kuwo. ³⁶ Nnyizinku khuwaareetta atthu awe wooneiliwa huruma pi amisuri, khwa nanna awenkhiyeevo etile avekiyeyo; khwa ethiipo khuvulula maali zooshi za amisuri.

³⁷ Meeziirayiilu khulankha khusala alawa mwento khuvira Rameesi eet-taka Sukooti. Aari alume alufu miiya sitha, ohiwaalaki aakha na aana.

³⁸ Khuntti khuluzeene zoofwarikhana za amalapo aawaalottiye, na theenya maphanku mawulu-mawulu a nyama, mompe, pwittipwithi na puuзи.

³⁹ Khoocha phaawu zoohiina fwaramento khwa tiriku etile aathuuliyyeeyo Misuri, maana khayaarina fwaramento mwaasa wawiikariwa Misuri, khuhiwahi otherkeza ethtu-yoojiwa.

⁴⁰ Meeziirayiilu eekhaliye Misuri nyaakha miiya nne na talaathiini.

⁴¹ Siikhu ethiito afisiyeeyo nyaakha miiya nne na talaathiini, atthu ooshi a Nnyizinku eettaolaawo Misuri. ⁴² Waari osikhu wa weekesela wa Nnyizinku yoori awaalazewo meeziirayiilu Misuri wooshiwo. Tiito, osikhu nkhamma otthuupu na yo anttela ojeekesela na ojama aya ontaaye mileele.

Kano monkoni wa Paashikowa

⁴³ Nnyizinku khumuza Munsa na Arawu yoori: “Epi kano za Paashikowa: ahiiyevo hatha mmalapo mmote anttelaaye onja. ⁴⁴ Mwiiththaana wawu-uzanyiwa ona yonja Paashikowa, amana eeya wookhiriya. ⁴⁵ Ila apale eettie omaka na apale aateeliye okhola khaazi ahinje.

⁴⁶ Mweeyo mwina yonja nnyupa nttumpho aattaliweemo, mwihiithu-ule hatha phittula moote mwisarulelaka vaje, wala mwihipweche hatha

likhonkolo la nyama mwinttelaaye orafuna. ⁴⁷ Atthu ooshi a Ezirayiilu ana yontthapela Paashikowa.

⁴⁸ Wakhula mmalapo anikhalaaye nttumphu antakhaaye oretta njampo ntthi la Paashikowa wa Nnyizinku, mwina yowaakhiriyyisa alume ooshi a muujama mwaya; apo ana yontthapela nkhamma aana a muujama. Ahiyeyevo ntthu woohikhiriyyi anttelaaye ontthapela. ⁴⁹ Kano ethiito enttela orumeyeliwa pi anyunti na amalapo apale amakiyeemo.”

⁵⁰ Meezirayiilu ooshi khuretta nkhamma ethiipo Nnyizinku amuuziyeezo Munsa na Arawu. ⁵¹ Siikhu ethiitile Nnyizinku khuwaalazawo meeziyayiilu Misuri, khuwaatthenkeza lihimo khwa lihimo.

13

Otwahareшиwa wa aana a mwanzo

¹ Nnyizinku khumuuzza Munsa yoori: ² “Okithawulele aana aalume ooshi a mwanzo. Aana aalume a mwanzo a meeziyayiilu pi aka, khahiyoo aana-ru paasi na nyama zooshi za mwanzo zeelume.”

³ Aphano Munsa khuwooza atthu yoori: “Mwifikhirele siikhu eti mweeyo mwiliyeewo Misuri, nti opule mwarettiweeyo omwiitthwaana, maana Nnyizinku oolazaniwo okhule khwa owahi wa makhono awe. Tiito mwihije hatha etthu yootthiwa fwaramento. ⁴ Siikhu ethiiti ya mweezi wa Habibi mweeyo mwinttolaawa Misuri. ⁵ Amana Nnyizinku oofisani nti wa akanaani, wa ahii, wa amoori, wa amwiivi na wa ayepuzi nti opule alaphaniyeeyo amarehemu apapazethu yoori aari oteela owinkhani, nti liniittikhawo leethi na asali, mweeyo mwina yooretta njampo ntthi mweezi otthuupu. ⁶ Nkatthi wa siikhu sapa mwina yooja phaawu yoohiina fwaramento siikhu yaya eti ya saapa mwitthapele njampo la Nnyizinku. ⁷ Mwije phaawu yoohiina fwaramento nkatthi wa siikhu sapa epo, mwihithuule hatha etthu yawiyyana fwaramento wala mmuti mwenu ehiiyemo.

⁸ Siikhu yaya etile wakhula mmote ona yoomuuza mwawane yoori: “Mwaasa wa epi Nnyizinku oretteliyeenini mwilankhaka Misuri.” ⁹ Epi enttela wiiya nkhamma alama ya mmakhono mwawo na opheleleza wa mmwishwa mwawo yoori oruma wa Nnyizinku wiyye vanlimi vawo, maana Nnyizinku oolaza Misuri khwa nkhone awe woowahi. ¹⁰ Mwishututele nrumo opu khwa siikhu ethomiiweeyo, mwaakha khwa mwaakha.

¹¹ Amana Nnyizinku oofisani nti wa akanaani na khuwinkhani, nkhamma ethiipo alaphaniyeeyo mweeyo na amarehemu apapazenu, ¹² mwintthawulele Nnyizinku aana ooshi amwanzo ovokoliwa aalume. Nyama za mwanzo ovokoliwa zooshi zeelume za maphanko enu pi za Nnyizinku. ¹³ Mwiwoosuru aana a puuru ooshi a mwanzo mwipatilanaka pwittipwitthi, ila amana mwihitakhi owoosuru waya, mwivuje siiko zaya. Mwiwoosuru theenya aana enu ooshi aalume amwanzo.

¹⁴ Meesho amana aaneenu awuuzelani yoori: ‘Maana aya niini?’ Mwwooze yoori: ‘Khwa oowahi wa nkhone awe, Nnyizinku anilazawo Misuri, nti narettiweewo oviitthwaana. ¹⁵ Wakathi Firawuna aari okhijilaaye na okatthalha onilikha olaawo, Nnyizinku khuwoola aana ooshi a mwanzo aalume mpakha aana a mwanzo a nyama. Tiito kinimwinkhaaye twaha Nnyizinku aana aalume a vitthu zooshi na niniwoosuru aaneethu ooshi a mwanzo ovokoliwa.’

¹⁶ Eto enttela wiiya nkhamma alama mmakhono mwenu na nthoonyezo wa vaachihi venu yoori Nnyizinku anilaza Misuri na owahi wa nkhone awe.”

Olawa wa meeziyayiilu

¹⁷ Wakathi Firawuuna awalikhiiyeevo olaawo meezi-rayi-ilu, Nluku khawaaviriisiye tarikhi ya Aflii-shiti, yeettiye wiiyaru tarikhi yoofupheya. Khulupa yoori: "Yo amana awoomanana, talifi anttela owaza orutela Misuri." ¹⁸ Etthiipile, Nluku khuwaazukulelisa atttu apale n'yaara mphule, phantte ya pahari yookhuttuwa. Meezi-rayi-ilu khulaawo Misuri khujitthenka yoori oomane.

¹⁹ Munsa khuthuula makhonkolo a Yuusufu, mwaasa aalaphisaniye na aana a meezi-rayi-ilu wakathi aalupiyeeyo yoori: "Weekhweele Nluku onta awaakiseni mweeyo, amana mwilawaka mwithuulewo makhonkolo aka."

²⁰ Meezi-rayi-ilu khulankha Sukooti khulawa khumaka Eeta, ohali yaaziyeewo yaara. ²¹ Nnyizinku aari vamote na yo, nthana aari owaalokoza nkhamma nripu la liwiku yoori eettette saana ntarikhi; amana wiiya osikhu eetta owaalokoza na nuuru ya nripu la moottho amwasikhelaka tarikhi; etthiipo pi aari owahaaye weettetta nthana na osikhu. ²² Nripu la liwiku ntthile khalaari owaasusa meezi-rayi-ilu nthana, wala nripu la moottho opule osikhu khalaari owaasusa.

14

Lupattha ya amisuri

¹ Nnyizinku khumuuzza Munsa yoori: ² "Owooze meezi-rayi-ilu yoori asapuwe alawe amake kharipu ya Piharoote enakatthi-nakatthi ya Mikotooli na pahari. Mwamake nshini wa pahari omaasho ya Baale-Zefooma. ³ Paata ya toole Firawuuna khusala oopuwela yoori meezi-rayi-ilu antta ojeettettela ahoweleta n'yaara. ⁴ Khwa etthiipo kinlawa koomise rooho ya Firawuuna, ye onlawa awiikarisena, paata ya toowo miyo kinlawa kattithimisiwe vakatthi wa Firawuuna na anajanka awe ooshi. Amisuri anlawa ajuwe yoori miyo ki Nnyizinku." Meezi-rayi-ilu khuretta etthiipo.

⁵ Ila wakathi ooziweeveo mfwalume wa Misuri yoori meezi-rayi-ilu attthira, ye na anakhaazi awe khuzukulisa akhili zaya na khulupa yoori: "Niini nirettiyeeyo? Nawaalikha meezi-rayi-ilu olawa anaashikha amwiithwaana etthu!" ⁶ Aphano mfwalume khuruma weetteliwa nkukutta awe wa viittha na anajanka awe. ⁷ Khuthuula theenya mikukutta miiya sitha epile zookhomaala na mikukutta zooshi za Misuri na anamalokozela ooshi. ⁸ Nnyizinku khukhomaaza rooho ya Firawuuna mfwalume wa Misuri, khusala aweekarisa meezi-rayi-ilu aaliiyewo khwa nanna wooshinttavo. ⁹ Firawuuna khusala aweekarisa na khavaloo zawe zooshi, mikukutta zawe zooshi na anahavaloo awe na anajanka awe, khuwaasikana amakiye nshini wa pahari kharipu ya Piharoote omaasho wa Baale-Zefooma.

Olokha pahari

¹⁰ Firawuuna asaleelaka owaasikana, meezi-rayi-ilu khweekesa nyuma khuwoona amisuri eettaka ota phantte etile aariwo. Khuwaapattha woova channu, khusala ankhuwela Nnyizinku. ¹¹ Na khumuuzela Munsa yoori: "Misuri zeetta othowawo vilalo tiito onilaziyeewo yoori nite nifwele n'yaara mphu? Niini eti weeyo oniretteliyeeyo, yoonilazawo okhu?" ¹² Tiito nawu-uziyeeyo Misuri yoori: "Onilikhe niyiye aviithwaana amisuri! Afwataali wiya amwiithwaana amisuri ehiyeeeni ofwa n'yaara."

¹³ Munsa khuwaajipu atttu apale yoori: "Mwihoove, mwiye wookhomaala na moone nusura Nnyizinku anttelaaye wuutiselani leelo. Maana khamwinttela owoona theenya amisuri apa mwiniwoonaaye leelo. ¹⁴ Nnyizinku ontela wuumana mwaasa wa mweeyo, mwiye woonyamala."

¹⁵ Khulupa theenya Nnyizinku amuuuzaka Munsa yoori: "Mwaasa aya niini mwikikhuelaka miiyo? Owooze meeziyaiilu avire alawaka. ¹⁶ Weeyo olanse pakhora yawo ojaphe maati, antta waawanyeya yoori meeziyaiilu aloke eri tuulu yawuuma. ¹⁷ Miiyo kinttela wuumisa rooho za amisuri, yo anttela wuulottelelani mpahari nttumpho. Miiyo kinttela wiiya woottithimisiwa amana kinshinta mfwalume wa Misuri na anajanka awe ooshi na mikukutta zawe zooshi za nvitha na anakhavaloo awe ooshi. ¹⁸ Amisuri anttela ojuwa yoori miiyo ki Nnyizinku amana kittithimisiwa khwa Firawuna na mikukutta zawe na anakhavaloo awe."

¹⁹ Aphano nlayikha la Nluku ntthile lawaalokoziyeeyo atthu a Eziraiilu khuwaalikha khurutela nyuma waya; theenya nripi la liwiku khuwaalikha khurutela nyuma waya, ²⁰ khwiya vakatthi wa amisuri na meeziyaiilu. Liwiku laari wiiya looripa phantte ya amisuri khusala liwaamwasikhela meeziyaiilu; mwaasa wa ethiito khuhisala liwaattamanisa meeziyaiilu na amisuri osikhu wooshi.

²¹ Munsa khookolela nkhone awe pahari, Nnyizinku khuvumisa pheevo zookhomaala za ntulayi osikhu wooshi mpakha pahari waawanyeya khupuwa mishaka zawauma mwaasa wa waawanyeya wa maati. ²² Meeziyaiilu khulokha vakatthi wa maati khwa mishaka zawauma, khupuwa muuri phantte ya nkhone nlume na nkhone nkha.

²³ Amisuri khusala aweekara na khavaloo zaya zooshi, mikukutta zaya za nvitha na anakhavaloo ooshi a Firawuna khusala awaalotta mpakha vakatthi wa pahari. ²⁴ Osaleelaka ocha nkaththi wa nripi la mootto na la liwiku, Nnyizinku khuwoona anajanka amisuri khuwaakarawela. ²⁵ Khuretta etthu yoophara maroota za mikukutta za amisuri nkhamma ahaari ojuwaaye weettettisa na khusala akhuwa araka: "Nlaweni ni-waathire meeziyaiilu! Nnyizinku ontta wuumanana amisuri khwa zwaamu yaya yo."

Amisuri anfwa mpahari

²⁶ Nnyizinku khumuuzza Munsa yoori: "Wookolele nkhone awo khwa pahari, yoori maati awaakhutele amisuri na mikukutta zaya na anakhavaloo aya." ²⁷ Munsa khookolela nkhone awe pahari osaleelaka ocha, maati khurutela ethhiipile aariizo. Wakathi amisuri aari ariiye atthire, khukutthanana maati a pahari, aphano Nnyizinku khuwaakhetela na pahari. ²⁸ Maana maati aarutiye khukhutela mikukutta na anakhavaloo, na anajanka ooshi a Firawuna eeshukheliyeeyo mpahari; hatha mmote khaarutiye.

²⁹ Ila meeziyaiilu khulokha pahari etile eettaka oluwatthela mishaka, maati aari nkhamma muuri phantte ya nkhone nlume na phantte ya nkhone nkha. ³⁰ Ethhiipile Nnyizinku khuwoosuru meeziyaiilu siikh etile mmakhono wa amisuri, na meeziyaiilu khuwoona amisuri ari oofwa mmattima wa pahari etile. ³¹ Meeziyaiilu khoona owahi nwulweene wa Nnyizinku na khumoova Nnyizinku aya na khunkhupali Nnyizinku na Munsa karumeya awe.

15

Liipo la Munsa

¹ Aphano Munsa na aana a meeziyaiilu khumwiipela liipo ntthi, Nnyizinku yoori:

"Kinimwiipela Nnyizinku,

mwaasa yoori ashintta wooshapweyavo,
khutupweeza mpahari khavaloo

na anakhaval o aya.

² Nnyizinku ti kuvu yaka
na liipo laka,

ye ti nusura yaka!

Ye ti Nluku aka na miiyo kininsifu,
ti Nluku wa papaaka na miiyo kinimwaaputu!

³ Nnyizinku ti naviitha,
nzina lawe ti Nnyizinku.

⁴ Khutupweeza mpahari
mikukutta za nvitha
na anajanka a Firawuuna;
anamalokozela awe apale awaakhupaliyeeyo
khukhuteliwa ti pahari yookhuttuwa.

⁵ Maati apale awiicha khuwaakhutela
khwiya oozama nkhamma mawe.

⁶ Oo Nnyizinku, nkhamma nlume awo
onaaye owahi nwulweene;
Oo Nnyizinku, nkhamma nlume awo
wawaashijela maatuwi.

⁷ Khwa owula wa ofwalume awo
wawaakhitiri maatuwi awo,
katapu yawo khuwaaja nkhamma malala.

⁸ Khwa ovitelela wa phula yawo
maati na mawipi ajikusanya
khujakhuwa nkhamma muuri,
vathi wa pahari
khwiya awuuma nkhamma liwe la manlela.

⁹ Maatuwi khusala alupa yoori:
'Niweekarisse niniwaasikana
niwaanyakanye maali nafusi zeethu zinlawa zatoshiwe pi yo,
nasarule phanka yeethu
na makhono eetthu niniwaatapanya.'

¹⁰ Khuperekha pheevu yawo,
na pahari khuwaafinikha.
Khuzama nkhamma chumpwi
mpahari wawiichamo.

¹¹ Khaziivo miluku zinlikananaaye weeyo
oo Nnyizinku.

Khaavo woottithimisiwa woottakatthifu,
wawoopisa khwa oretha vitthu zootikinisa na oretha minjuza.

¹² Wookoliye nkhamma nlume awo
nti khuwaamiza.

¹³ Khwa pheta yawo
wawaalokoza atthu awo apale owoosuruyeyo;
na kuvu zawo,
khuwaattha puuro yawo yoottakatthifu.

¹⁴ Khapila khusila epile onrettazzo,
khusala zithukumela na woova.
Afilishiti khuwaapattha huzuni.

¹⁵ Attunkhulu a Meedomu

khwiiya ooshanka
 na anamalokozela a amowaabu
 khuwaapattha othukumela;
 akanaani khuwaapattha otteettheya.
16 Osuthuwa na woova khuwaapattha
 khwa owahi wa nkhono awo,
 khuhisala asakhinyeya nkhamma mawe
 mpakha ovira atthu awo,
 Oo Nnyizinku,
 mpakha ovira
 atthu apale owoozanyiyeyo.
17 Oo Nnyizinku, weeyo oniwalawana na wawekhaze
 vamwaako wa eritho yawo
 puuro ttakatthiifu
 nyuupa yawo
 ojekiyeyo na makhono awo.
18 Nnyizinku mfwalume wa mileele."

19 Wakathi khavalo za Firawuna na mikukutta zawe za nvittha na anakhavallo awe eettiyeevo mpahari, Nnyizinku khuwaazamisa a Misuri na maati a pahari etile; ila meeziyaiilu aaviriye mwento aluwatthelaka mishaka zawuuma vakathi wa pahari. **20** Nhupiri Miiriyamu nlupuve Arawu khuthuula ntowu na aakha ooshi khusala anlotta eettaka opiya na wiina.

21 Miiriyamu aari owaajipu eettaka wiipa araka:

"Nimwiipele Nnyizinku,
 mwâasa yoori ashintta wooshapweyavo.
 Khutupweeza mpahari khavalo
 na anakhavallo aya."

22 Aphano Munsa khuwaalokoza meeziyaiilu waaza pahari yookhut-tuwa mpakha n'yaara ya Shuuri. Siikhu ttatthu eettaka weettetta n'yaara ahipatthaka maati. **23** Aphano khufiya Maara, ila khuhiwahi onywa maati ottuukho mwaasa wa owaawa. Ti maana aya wiitheliweyoy nzin la Maara.
24 Tiito meeziyaiilu khusala amwaapa Munsa araka: "Ninttela onywa-ni?"

25 Munsa khunkhuwela Nnyizinku ye khuthoonyeziwa muutthi khuthu-ula khweeselela mmaati khwiiya ootuva. Puuro etile ya Maara Nnyizinku khuwenkha kano na oruma na khuweeza, **26** awoozaka yoori: "Mweeyo amana mwinsileza Nnyizinku, Nluku enu na osileza etile enintuvelaaye na khusiileza mirumo zawe na khushututela kano zawe zooshi, khamwini-iyana hatha orati opule kiwaatiseliyeyo amisuri, maana miiyo ki Nnyizinku anvonisaaye.

27 Aphano khufiya nti wa Elimu, ottuukho zaariiwo milipu khumi na miwiri na mikokonoothi sapiyini; khumaka ottuukho khwaattamela maati.

16

Nluku omperekha Mana

1 Mahimo a atthu a meeziyaiilu khulankha nti wa Elimu khulawa mpakha yaara ya Simum, eriye enakatthi-nakatthi ya Elimu na Sinaayi. Zaari siikhu khumi na thaanu ya mweezi wa phiiri paata ya olaawo Misuri.

2 N'yaara mphule mahimo a atthu a meeziyaiilu khusala amwaapa Munsa

na Arawu. ³ Alupaka yoori: “Afwataali nkhono wa Nnyizinku onuuleeliye Misuri! Maana okhu fweeyo naari wiiya nshini wa vikhala za nyama na naari ojaka ethu-yoojiwa woohiivo hatha shaakha mpakha orupala, ila mweeyo khunitiisa n'yaara mphu yoori mwinuule jala fooshi fweeyo.”

⁴ Aphano Nnyizinku khumuza Munsa yoori: “Miiyo kintta okwisa ethu-yoojiwa ya pinkuuni. Atthu nka asaruwaka na olokothela wakhula siikhu khwa kхиma eniwaafiyelaaye siikhu yaya etile, khwa ethiipo kinttela oweesa yoori kiwoone nkhamma yo anshututela kano yaka. ⁵ Siikhu ya sitha mwina yoolokothela swaafu piiri zayita epile mwinlokothelakaaye siikhu kиia zaya.”

⁶ Aphano Munsa na Arawu khuwooza meeziyayilu ooshi yoori: “Makaaripi mwinttela ojuwa yoori ti Nnyizinku oolaziyerini nti wa Misuri, ⁷ meesho supu mwinttela woona siifwa ya Nnyizinku maana asiila waapa wenu. Fweeyo na paani mwinnaapaaye?” ⁸ Khurutela olupa theenya araka: “Nnyizinku oniwinkhani nyama yoora funa makaaripi na ethu-yoojiwa ya supu yoori mwirupale, maana asiila waapa wenu. Fweeyo na a paani? Mweeyo khamwinnaapa fweeyo, ila Nnyizinku.”

⁹ Munsa khumuza Arawu yoori: “Wuuze mahimo a atthu ooshi a meeziyayilu oraka: Mweette mmakhono wa Nnyizinku, maana asiila waapa wenu”.

¹⁰ Arawu eettaka ottakhulana meeziyayilu, ooshi khusala eekesa phantte ya n'yaara na siifwa ya Nnyizinku khupuwa mmawiku, ¹¹ na Nnyizinku khumuza Munsa yoori: ¹² “Kinsiila waapa wa meeziyayilu, ila owaajipu yoori: ‘Njuwa leettelaka otupweela mweeyo mwinrafuna nyama, na supu mwiniyyana-yoojiwa ya wuutoshani. Toowo mwinttela ojuwa yoori miyio ki Nnyizinku Nluku enu.’”

¹³ Makaaripi khupuwa khwaali khwiitaala aphale aamakiyeevo, supu waario mmatte phantte yaya etile. ¹⁴ Wakathi mmatte opule wuumiyeyevo, vathi aphale khupuwa vitthu nkhamma mavalako zoolattanana cheelu vatulu wa nshaka. ¹⁵ Wakathi meeziyayilu ooniyevee vitthu epile, khwaaza wuuzelana atthaaporu araka: “Niini epiza?” Maana khaari ojuwa ethu yaari orettikhanaaye. Elottelanaka, Munsa khuwooza yoori: “Eti ethu-yoojiwa Nnyizinku awinkhiyeenini yoori mwije. ¹⁶ Nnyizinku khurumisa yoori: ‘Wakhula mmote wa mweeyo ona yookusanyela epile antakhaaye yoori aje, khwa hisapu ya atthu ariina vaje vawe, ttompwiyo piiri wakhula ntthu.’”

¹⁷ Meeziyayilu khuretta ethiipo ooziveezo; akina khukhupa zawaatta, akina vattithiiru. ¹⁸ Wakathi aphimiyeeyo na ttompwiyo, otule aalokotheliyeeyo zawaatta na otule alokotheliyeeyo vattithiiru ooshi khupattha sawa-sawa. Wakhula mmote aapathhiye epile aari ohithajiyaaye oja.

¹⁹ Munsa khuwooza yoori: “Ahiiyeyeo hatha mmote antakhaaye opweha yoori aje meesho.”

²⁰ Ila yo khuhinsiilezi Munsa, akina khulikha vattithiiru mana aya yoori aje mmeesho mwaya; ochiyeevo khwiitaala nyunku na khusala anukha. Munsa khuwaakatipkhela yo venkivene.

²¹ Wakhula siikhu supu, yo eetta olokothaka epile aari otakhaaye oja, maana haari ya njuwa yeetta othulushaka etile yaari osalaaye vathi. ²² Siikhu ya siitha, khulokotha swaafu piiri, theenya ttompwiyo phiiri khwa wakhula ntthu; attunkhulu a atthu khulawa omuuza Munsa. ²³ Khuwaajipu

Munsa araka; "Nnyizinku aruma yoori: 'Meesho enttela wiiya siikhu yoovumula, Saapatu ttakattiifu ya Nnyizinku etile mwintakhaaye wuumisa vamootho muumise na etile mwintakhaaye wiipikha na maati, mwiipikhe, zoolozi zinttelaaye osala mwipwehe mpakha mmeesho mwaya."

²⁴ Khupweha mpakha mmeesho mwaya nkhamma ethiipo Munsa aalupiyeezo; wala khuhivutti na hatha nyunku khuhiiina. ²⁵ Aphano Munsa khulupa yoori: "Mwije leelo maana Saapatu ttakattiifu ya Nnyizinku maana leelo khamwinsikanavo hatha ethu valipuwa. ²⁶ Siikhu sitha mwina yoolokothela ila siikhu ya saapa, Saapatu, khazintela wiiyavo."

²⁷ Siikhu ya saapa aalankhiye attu onlawa olkokotta ila khuhisikani.

²⁸ Aphano Nnyizinku khumuuzu Munsa yoori: "Mpakha lini mwikhiji-laka oshututela mirumo zaka na kano zaka? ²⁹ Moone yoori Nnyizinku awinkhani Saapatu, tiito siikhu ya siitha oniwinkhani ethhu-yoojiwa ya siikhu piiri yoori siikhu ya saapa wakhula ntthu eeye attaaphale aniiyaavo ahiiyevo ntthu antakhaaye weettetta." ³⁰ Aphano attu apale khuvumula siikhu ya saapa.

³¹ Attu a Ezirayiilu khuthaja ethhu-yoojiwa etile nzina la mana. Zaari nkhamma puewu ya phunjje zoolakala zootuva nkhamma mishikoto za asali.

³² Munsa khulupa araka, "Nnyizinku aruma yoori: 'Mwilokotthele mana apa ttompwiyo moote mwipwehe, yoori khapila entaaye yoone ethhu-yoojiwa mwenkhiweeyo ti Nnyizinku wakathi oolaziyeenini Misuri."

³³ Aphano Munsa khumuuzu Arawu yoori: "Othuuve ttompwiyo moote ya mana, otthe mmakhono wa Nnyizinku, yoori epweheliwe khapila eto entaaye."

³⁴ Khwa oshututela etile Nnyizinku aamuuziyeezo Munsa, Arawu khuthuula mana apale khuttha mmakhono wa oshaahiti wa Mbwana.

³⁵ Meezirayiilu khuja mana nyaakha arupaiyini mpakha ofiya nti waari wiikhaleyaaye; khuvira ajaka mpakha ofiya mmwiinano wa Kanaani.

³⁶ Mphimo waari ophimaniwaaye mana waari wiitthiwa ttompwiyo*, phantte ya khuumi ya eefwa.

17

Maaati aniittikha va mwaako

¹ Mahimo a attu a meeziyayiilu khulaamo n'yaara ya Siimutta, khusala eettetta avumulaka alawaka, nkhamma ethiipo aarumiyeeyo Nnyizinku. Khumaka Refidimu ila khaariwo maati oonywa. ² Mwaasa wa ethiito khusala anyakulisana na Munsa araka: "Oninkhe maati oonywa." Ye khuwaajipu yoori: "Mwaasa wa niini mwinyakulisanaka na miyo? Mwinimeewelani Nnyizinku?"

³ Ila attu apale aarinna nnyottha khusala omwaapa Munsa araka: "Waani-lazeliyeniwo Misuri? Ontakha onuula na nnyottha na aana eetthu na nyama zeetthu?"

⁴ Aphano Munsa khunyakula ankhuwelaka Nnyizinku araka: "Kiwaarettele niini attu apa? Ansaleela okivonya na mawe!"

⁵ Nnyizinku khunjipu yoori: "Olokoze, olawe wawaathuule attunkhulu a attu a meeziyayiilu na wiiyane pakhora mmakhono ethiito waapiyaniyeeyo muuttho Niilu, olawe. ⁶ Woone, Miyo kinttela wiiya ottuukho vatulu wa liwe la Horeepe. Weeyo opiye liwe laya, ntinttho lintta olaza maati yoori attu apo anywe." Munsa khuretta ethiipile, attunkhulu a meeziyayiilu

* ^{16:36} Eefwa enlikanana phantte ya khuumi ya malituru 20/40

eettaka omoona. ⁷ Puuro yaya etile khuththaja nzina la Maasa na Mariiba, maana aphale haya meeziyayilu aanyakulisananiye na khumweeza Nnyizinku araka: “Nnyizinku ori vamote na fweeyo ama wala?”

Meeziyayilu anuumanana Amalekiita

⁸ Elottelanaka khuta Amalekiita oteela owoomanana meeziyayilu nti wa Refidimu. ⁹ Aphano Munsa khumuza Yoshuwa yoori: “Owaathawule atthu aalume oomanane Amalekiita. Meesho kinttela wiiya vatulu wa mwaako na pakhora ya Nluku mmakhono mwaka.”

¹⁰ Yoshuwa khulawa wuumanana Amalekiita nkhamma ethhiipile Munsa aalupiyeeyo. Munsa, Arawu na Huri khuwelaza vatulu wa mwaako. ¹¹ Amana Munsa alansa makhono awe meeziyayilu eetta oshintta, amana eeshusha makhono awe Amalekiita ti aari oshinttakaaye. ¹² Amana makhono a Munsa ashokhera, Arawu na Huri eetta othuulaka liwe yoori Munsa eekhalevo. Oowiiri khukholelela makhono a Munsa, mmote nkono nkha nkina nkono nlume yoori makhono a Munsa eeye aweemela mpakha njuba otupweela. ¹³ Yoshuwa khuwaashintta sawasawa anajanka a Amalekiita na phanka.

¹⁴ Aphano Nnyizinku khumuza Munsa yoori: “Waatikhe hapari epi nkithaapu yoori zisala zuupuweleliwa na omuuze Yoshuwa yoori Amalekiita anttela wiiya oosahawiwa khwa mileele vathi wa olumwenku.”

¹⁵ Munsa khunjeka alitaari na khunththaja yoori: “Nnyizinku akinkha oshintta”, ¹⁶ na khuri: “Nkhono mmote vakhukulu ya Nnyizinku; Nnyizinku ori nvittha na Amalekiita khabila khwa khabila.”

18

Othotola wa Yeeturu

¹ Aphano Yeeturu, haakhimu wa Miitiya, nkhwewe Munsa, khusila vitthu zooshi Nluku anretteliyeeyo Munsa vamote na atthu a Ezirayayilu khwa nanna Nnyizinku awaalaziyeewo Misuri.

² Raku, Munsa amperekhiye Zipoora muukha awe owawe nkhwewe Yeeturu, ye khumpwekherela, ³ vamote na aana awe awiri. Mmote aya aari wiitthiwa Yeerisoni,* maana aalupiye yoori “Miiyo kaasafireliye nti wa malaponi”; ⁴ nkina aari wiitthiwa Elizeeri, maana aalupiye yoori: “Nluku wa paapa ti eeyiye awuni yaka na akaawuni khwa phanka ya Firawuna.”

⁵ Aphano Yeeturu nkhwewe Munsa na muukhaawe Munsa na aanaawe awiri khulawa n’yaara omwaako wa Nluku okhule Munsa aamakiyeewo.

⁶ Yeeturu khurumisa nhupi wuuiziwa Munsa yoori: “Miiyo, nkhwewo, kata na muukhaawo na aanaawo awiri.”

⁷ Aphano Munsa khumwaattama nkhwewe khumwiinamela khumpatikha, khusala oozelana hapari mmote na nzaawe eettaka ovira nheema. ⁸ Elottelanaka Munsa khwaaza omuuza nkhwewe vitthu zooshi Nnyizinku anretteliyeeyo Firawuna na amisuri mwaasa wa pheta ya meeziyayilu na tafyawuthi zooshi akholiyeeyo ntarikhi na nanna Nnyizinku awaataphuliyeeyo.

⁹ Yeeturu noosiila mattakhuzi apale ooshapweya Nnyizinku awaretteliyeeyo meeziyayilu, awaataphulaka mmakhono wa amisuri, khwiya woofurahi. ¹⁰ Yeeturu khulupa yoori: “Woottottopeliwa eeye Nnyizinku, ootaphuliyeenini mmakhono wa amisuri na mmakhono wa Firawuna na khuaataphula atthu awe vathi wa nkono wa amisuri. ¹¹ Leelo kajuwa

* ^{18:3} Yeerisoni khwa luuka ya hebereewu linlattanana na nttakhuzi linraaye omaka.

yoori Nnyizinku nwulweene zayita miluku zooshi, maana khwa vitthu epile aari ojikhutupulanaaye atapanya.” ¹² Aphano Yeeturu nkhwewe Munsa, khuretta twaha yoolukuziwa khwa Nluku; khuta Arawu na attunkhulu ooshi a meezipayilu, yoori aje ethu-yoojiwa na nkhwewe Munsa omaasho wa Nluku.

Akhili za Yeeturu

¹³ Mmeesho mwaya Munsa khwiikhala yoori aphuke onyakulisana wa atthu, atthu apale khweemela ya supu mpakha makaripi. ¹⁴ Wakathi nkhwewe ooniyeovo epile aari owaaretelaaye atthu apale, khuri: “Eto onrettaayo niini? Weekhalela-ni atthu ooshi khweemela na khuuzukulela otthowe ya supu mpakha makaripi?”

¹⁵ Aphano Munsa khumuza nkhwewe yoori: “Mwaasa aya atthu apa anikiteela miiyo okuuzelu vitthu za Nluku. ¹⁶ Amana eeyana milattu zaya, antta okiteela yoori kiphuke mmote na nzaawe na kiwoozaka mwentto wa Nluku na kano zawe.”

¹⁷ Nkhwewe Munsa khulupa yoori: “Eto onrettaaye khahiyoo shapweya oretta. ¹⁸ Weeyo na atthu awo mwinttela oshokhera, maana khaazi yaya eto ti yoolipa channu; khunwahi oretta otthowe. ¹⁹ Osiile huula yaka! Miiyo kiniwinka shawuri na Nluku ti eeye vamote na weeyo. Wiye weeyo namalokozela wa atthu omaasho wa Nluku na othuula tafwawuthi zaya zooshi khwa Nluku. ²⁰ Owooze mwentto na kano na owaajuwise tarikhi ya weettettela na khaazi ya okhola. ²¹ Ila weeyo vakathhi wa atthu apo, owaathawule atthu a makhaamu ooretta ethu, oomoova Nluku, atthu a haakhi eniweephiraaye ophattha fwayita ya haraamu. Owenkhe ottunkhulu wa atthu alufu wa atthu miiya wa atthu hamusiini wa atthu khumi. ²² Yo anttela wiya vakathhi wa atthu yoori asala aphuka tafwawuthi zaya. Nka ootiselaka weeyo tafwawuthi epile zoolipa; epile zookhwuya anttela waattalela ottho. Amana oretta toowo enttela wiya yookhwuya khaazi yawo, maana yo anttela wuulikhela otthowe. ²³ Amana weeyo oretta ethiipo, nkhama Nluku anrumaazo, nka owahaka oshintta tafwawuthi zaya epo na atthu apa ooshi eettaka orutela ont tafwawuthi zaya ziri zawaattaleliwa.”

²⁴ Munsa khukhupalela wuuziwa ti nkhwewe na khuretta ethiipile oozi-weeyo ti ye. ²⁵ Khuwaathawula atthu amakhaamu vakathhi wa meezipayilu ooshi khuwaareetta wiya anamalokozela atthu aya apale; ntunkhulu wa atthu alufu, wa atthu miiya, wa atthu hamusiini, na wa atthu khumi. ²⁶ Apa khwiyya nkhama anamaphuka awakhula siikh, atafwawuthi za atthu. Amana wiya mwaasa woolipa aari weettiseliwaka Munsa, amana ziyya zookhwuya aari ophukaka atthaapo.

²⁷ Aphano Munsa khuleezanana nkhwewe Yeeturu khusala arutela owawé.

19

Nluku onttakhulana Munsa vamwaako Sinaayi

¹ Mweezi wa ttaatthu siikhu ethiitile, paata ya aana a meezipayilu olaawo Misuri, khufiya mpakha n'yaara ya mwaako Sinaayi. ² Noolaawo Refidimu, khulawa mpakha n'yaara ya Sinaayi, meezipayilu khulawa khumaka ot-tuukho omaasho wa mwaako Sinaayi.

³ Elottelanaka Munsa khuwela vamwaako yoori akutthanane Nluku. Nnyizinku khunkhuela vamwaako attaphale araka: “Olupe mattakhuzi apa wuuzaka peewu ya Yaakhumpa, atthu ooshi a meezipayilu yoori: ⁴ ‘Mweeyo

moona ethu kiwaaretteliyeeyo amisuri na nanna kiwaathamisiyeeyo nkatti wa mapaphelo a saaka kijitiiselaka miiyo. ⁵ Aphano, amana mwikishututela wawaamineyavo mwisiila huula yaka na khuthokorela wahati aka, mweeyo mwinttela wiya atthu aka, ootafikhana zayita khapila kiina, maana olumwenku wooshi pi waka. ⁶ Mweeyo mwinttela wiya ofwalume aka wa anamalokozela a tiini na khapila ttakatthiifu.' Apo pi mattakhuzi onttelaayo owooza meeziyariilu."

⁷ Munsa khuruti khulawa khuwaakhuwela attunkulu ooshi atthu a meeziyariilu na khuwooga zooshi Nnyizinku anrumiyeyeeyo olupa. ⁸ Atthu ooshi khujipu wa swaafu moote yoori: "Ninretta zooshi Nnyizinku arumiyeeyo." Aphano Munsa khulawa khumuuya Nnyizinku mattakhuzi ajipwiyeeyo atthu apale.

⁹ Nnyizinku khumuuya Munsa yoori: "Woone! Kinttela wuuttakhulana weeyo nkatti wa liwiku looriipa yoori atthu amana akisiila kittakhulanaka weeyo asala ookhupali khwa mileele."

Aphano Munsa khumuuya Nnyizinku mattakhuzi ooziweeyo pi atthu apale. ¹⁰ Nnyizinku khurutela omuuza theenya Munsa araka: "Olawe vakatthi wa atthu apo, wawaattakatthise leelo na meesho. Yo ana ya ofula kuwo zaya, ¹¹ yoori eeye oolikana siikhu ya ttaatthu, maana siikhu ya ttaatthu Nnyizinku onttela wiishukha vamwaako Sinaayi, mooshi mweeyo mwimoone. ¹² Otthe mwiinano nkerekhere wa mwaako na owooze atthu yoori: 'Eeyane phoole ya ohiwelii mwaako na ohisapi. Otule anttelaaye osapa mwaako ona ya wuuliwa; ¹³ ohinsape na nkhone ila onvonye na mawe ama ntetthe, hatha nkhamma ntthu ama nyama, khiniyya haayi.' Ila amana nlope livuma swaafu moote apho pi anttelaavo owela."

¹⁴ Munsa khwiishukhela aphale aariivo atthu apale khuwaattakatthisa na yo khufulaza kuwo zaya. ¹⁵ Khuwooga atthu apale yoori: "Mwiye woolikana ovirisa siikhu ya ttaatthu. Ila ahiiyego antakhaaye okutthanana muukha awe."

¹⁶ Noocha, siikhu ya ttaatthu khupuwa taari na ozerima, liwiku looriipa khufinikha mwaako na khuvumisiwa nlope channu. Atthu ooshi khuwaapattha woova aphale aarivo. ¹⁷ Munsa khuwaalazavo atthu apale aphale vaya yoori akuthanane Nluku, yo khulawa khweemela waattamanana mwaako. ¹⁸ Mwaako Sinaayi wooshi weetaaliye loosi, maana Nnyizinku eeshukheliye attaapho na moottho, na loosi laya leetta owela nkhamma loosi la vanjocho na mwaako wooshi weetta othukumela channu. ¹⁹ Ovuma wa nlope weetta ovira otepaka, elottelanaka Munsa khuttakhula na huula ya Nluku khunjipu.

²⁰ Nnyizinku khwiishukhela vatulu wa mwaako Sinaayi, khunkhuwela Munsa vatulu attaaphale Munsa khuwelela khulawa. ²¹ Nnyizinku khumuuya Munsa yoori: "Wiishukhe wawooze atthu apo yoori ahivikane mwiinano atakhaka omoona Nnyizinku. Amana avikana enkeene antta ofwa. ²² Hatha nkhamma anamalokozela a tiini amana amwaattamelaka Nnyizinku ana yoojittakatthisa. Amana ahijittakatthisi Nnyizinku onnta owaatapanya."

²³ Aphano Munsa khumuuya Nnyizinku yoori: "Atthu khanwahi owela vamwaako Sinaayi maana weeyo waanilikhisye oraka: 'Mwirette mwiinano omaasho wa mwaako mwiphakule.'

²⁴ Nnyizinku khunjipu Munsa amuuuzaka yoori: "Wiishukhe orutele owela theenya, operekhiwaka ti Arawu. Ila anamalokozela a tiini na atthu

ahirukhe mwiinano yoori awelele apha ariivo Nnyizinku, amana aretta toowo Nnyizinku ontta owaatapanya.”

²⁵ Aphano Munsa khwiishukha khulawa owooza atthu apale.

20

Mirumo Khumi

¹ Nluku alupa mattakhuzi ooshi apa araka:

² “Miiyo ki Nnyizinku, Nluku awo, kuulaziyeeyo nti wa Misuri ohali waaret-tiweewo omwiithwaana. ³ Ohiiyane miluku mikina omaasho waka miiyo. ⁴ Ohijaattalele sanamu wala ratarato ya ethtu ya otulu wala ya vathi ama vathi a mmaati. ⁵ Ohikokhorele wala ohaaputu, maana Miiyo ki Nnyizinku, Nluku awo; kintakha wiye waka paasi, kinnoon-aaye twampi za apaapa na kifikhirelaka twampi zaya khwa aana aya mpakha khapila ya ttaatthu ama yanneya ya apale aari okiphiriisaaye, ⁶ ila kintthantha na tthakaraka mpakha khapila alufu epile zinikiphetaaaye na zinshututelaaye mirumo zaka.

⁷ Ohilupe nzina la Nnyizinku Nluku awo mahala, maana Nnyizinku khan-lawa onlikha ahinhukhumweeni otule anlupaaye nzina lawe mahala.

⁸ Wuupuwele Saapatu yoori siikhu ttakatthiifu. ⁹ Ona yookhola khaazi zawo zooshi siikhu sitha, ¹⁰ ila siikhu ya saapa Saapatu ti yomwinkha Nnyizinku Nluku awo, siikhu yaya eti ohikhole hatha khaazi moote, waaza weeyo, mwanawo wa nlume ama wankha, wala mwiith-waana awo wala njaaizi awo, wala nyama zawo wala aletto ariiyenlikokoro mwawo. ¹¹ Maana khwa siikhu sitha, Nnyizinku eetta wumpa pinku na vathi, pahari na vitthu zooshi ziriimo, ila Saapatu khuvumula. Paata ya toowo, Nnyizinku khuparikhya Saapatu ya etile na khuttakatthisa.

¹² Onshitahi papawo na mamaawo, yoori wiikhale siikhu zawaatta vathi apha Nnyizinku, Nluku awo awinkhiyeeyo.

¹³ Ohuule.

¹⁴ Ohiraruwe.

¹⁵ Ohiiye.

¹⁶ Ohinlokoveze nzaawo.

¹⁷ Ohilazele omaashokopho vaje wa nzaawo, wala muukha wa nzaawo, wala amwiithwaana ama ajaaizi awe, wala mompe zawe ama puuru zawe na wala ethtu moote etile yiyyiye yawe.”

Atthu a Ezirayiilu wawaapatthiye woova

¹⁸ Wakathi atthu apale aari osiilaavo taari na ozerima na ovuma wa nlope na khoona mwaako olazaka loosi, ooshi khusala athukumela mpakha osusela petiwene. ¹⁹ Khumuuya Munsa yoori: “Weeyo ottakhulane ye, fweeyo nintta osiila. Ila Nluku amana attakhulana fweeyo nintta ofwa.”

²⁰ Munsa khuwooza atthu apale yoori: “Mwihoove! Nluku aateeliye oweezani, yoori mwisala mwimoova na ooweraweriseni twampi.”

²¹ Ila atthu apale nalelo khwiili peetiwene, Munsa khusala avira aattame-laka liwiku ntthile looriipa aariivo Nluku.

Kano monkoni wa alitaari wa Nnyizinku

²² Nnyizinku khumuuya Munsa yoori: “Owooze meeziyayilu mattakhuzi apa yoori: ‘Mweeyo moona na maasho enu yoori pinkuuni kattakhulana mweeyo. ²³ Mwihaattale miluku za feeta wala miluku za tahapu yoori mwikiphakanyane.

²⁴ Mwikaattalele alitaari wa mattophe mwirettevo twaha ya olukuziwa na zaakha za heeri, pwittipwitthi na mompe zenu wakhula vahali mwinrettaavo nka mwifikhirelaka nzina laka, kintta wuuteelani mweeyo na kuperikhiyeni. ²⁵ Amana mwikijekela alitaari wa mawe mwihiinjekane mawe ooshijaniwa zaana, eeyaru mawe awaattaliwa saana mwintta onkufurwela. ²⁶ Mwihiinwele na shikatta alitaari aka amana mwinjekaka, maana mwintta onfulamela.

Yuunusa

Yuunusa oninthira Nnyizinku

¹ Siikhu moote Nnyizinku anrumiye Yuunusa mwaana wa Amitayi yoori:
² “Olankhe olawe sitati khuulu ya Neniive, walaleye ottuukhu, yoori miiyo kinjuwa zooshi zootakhala zaya anrettaazo.”

³ Ila Yuunusa asiiliyeevo toole, khuwaza otthirela tuniya yoolepelana Neniive, antthiraka Nnyizinku. Khulawa mpakha sitati ya Yoope khusikana pankaya vapatari, yaari weettaaye Taarisi. Khuripha pasaji yawe, khweetta mpankaya yoori athhirele Taarisi, antthiraka Nnyizinku.

⁴ Aphano, alawaka, Nnyizinku khuperekha pheevo ya waatta na pahari khutakhala khusala esaleela opwecheya pankaya. ⁵ Mamalinyero ooshi khwiyya awoova, wakhula mmote wayo khusala akhuwa anvekelaka nluku awe, yoori apatthe wuusurukha, na khusala atupweeza mapwattha aya mpahari, yoori eveyaveye pankaya yaya.

Wakathi aya opo Yuunusa, aarettiye eeshukheliye mpurawu eettaka olala ajisahawiye. ⁶ Nahota khwiishukhela mpurawu mphule aari olalaamo Yuunusa, khumuuzela yoori: “Weeyo! Onlala-ni? Olankhe onvekele nluku awo! Khinjuweya anoonelaka huruma yoori anuusuru nihifwe.”

⁷ Paata ya toole, mamalinyero khusilana yoori: “Nlaweni neekese nasipu, ninjuwe nlupa otu anitotheliye hasara eti.” Yo khweekesa nasipu etile, khusala emoona Yuunusa.

⁸ Khuuzeliwa Yuunusa: “Weeyo o nlupa onitotheliyeeyo hasara eti. Nkanuuze! Weeyo onkhola khazi-ni? Wala onlankha vayi? Nti awo nti-ni? Ama lihimo lawo lihimo-ni?”

⁹ Ye khujipu araka: “Miiyo ki Mwipereewu, kinimwaaputu Nnyizinku, Mwennyewe pinku, otu ompiyе nti na pahari.”

¹⁰ Elottelanaka Yuunusa khuwooza yoori aari ontthira Nnyizinku. Wakathi ajuwaziyeevo etthu yaari onrettikhanelaaaye, yo khwiyya ootepa woova, na khumuuzela Yuunusa: “Apho niini orettiyeeyo!”

¹¹ Pheevo yeetta otepa yaattaka, khufiyelela mamalinyero omuuzela Yuunusa: “Yoori pheevo na pahari eshapweye, fweeyo nuurettelle niini?”

¹² Yuunusa khujipu araka: “Miiyo kajuwa yoori pheevo eti yapuwela mwaasa wa miiyo. Apho, mwikitthempe mwikeeselele mpahari. Mwirer-taru toowo, mwintta woona pahari na pheevo zinyamaliye.”

¹³ Ila mamalinyero apale khuhintupweezazi, khwaaza ofuttha reemu na kuvu zaya zooshi yoori afiye vathi. Khuhisala ewaheya, mwaasa yoori pahari yeetta ovira etepaka otakhala. ¹⁴ Yo khukhuwa ankuwela Nnyizinku araka: “Oo, Nnyizinku, ohinilikhelele nifwaka mwaasa wa pinaatamu otu, na ohinikwisele paathuli ofwa wa mwinyi otu. Zooshi zarettikhana khwa nanna olakeliyeozo.” ¹⁵ Nawiisha khuntthempaza Yuunusa khumweeselela mpahari. Aphano pahari na pheevo, zooshi khunya-mala. ¹⁶ Ooniyeevo toole, mamalinyero ooshi khwiyya awoova channu na khumwaaputu Nnyizinku. Khunrettelaza twaha na theenya ahiti.

¹⁷ Amweeselelaziyeevo mpahari, Nnyizinku khuperekha swi khuluyeeene yoori emmize Yuunusa, ye khwiyya mmatthupo wa swi siikhu ttatthu nthana na osikhu.

2*Olompa wa Yuunusa*

¹ Ari mmatthupo wa swi, ye khwaaza olompa anshukhurwelaka Nnyizinku awe:

² "Nhuzuni mwaka kankhuweliye Nnyizinku,
na aakijipwiye.

Mithili za ahera kaakhuwiye
na waasiiliye huula yaka.

³ Waakitupweeziye mpahari wa wiichamo,
nkatthi wa khilintti,
nziko wa maati khukizukulela,
na mawipi awo khukikhutela.

⁴ Miiyo khulupa yoori keekareliwa peeti-wene
na omaasho wawo weeyo Nnyizinku.

Kinta kirutele woona theenya
nyuupa yaho yoottakatthiifu?

⁵ Maati khukifiya vakhulo,
khilintti khukizukulela
na mirawa khukizokonzela eeshwa yaka.

⁶ Khuzama mpakha vanchina la nyaako,
tuniya ya vathi, puuro enimfukelaaye ntthu khwa siikhu zooshi.
Ila weeyo Mbwanaaka Nnyizinku khuusuru nafusi yaka
nkhapuri mphule.

⁷ Wakathi kaari osaleelaavo ofwa,
koofikhiriye weeyo Nnyizinku,
khuuperekheza lompa yaka,
yoori efiye nnyupa mwawo woottakatthiifu.

⁸ Apale anaputwaaye sanamu zoohiina fwayita,
antarawu tthakaraka ya Nnyizinku.

⁹ Ila miiyo kinteela wuushukhurwela Nnyizinku
na malipo a siifwa na owinkha twaha,
na kinteela oretta eti kaahitiyeeyo,
maana nusura ti yaawo weeyo Nnyizinku."

¹⁰ Aphano, Nnyizinku khuruma swi etile, yoori yanchuwe Yuunusa nshini
wa ntima.

3*Otafusiri wa Yuunusa sitati ya Neniive*

¹ Aphano Nnyizinku khunruma Yuunusa swaafu ya phiiri yoori:
² "Olankhe olawe sitati khuulu ya Neniive, walaleye ottuukhu mattakhuzi
apa kinuurumaaye."

³ Ye khulankha khulawa Neniive, nkhamma ethiiipo Nnyizinku anrumiy-
eezo. Neniive yaari sitati khuluyeeene ntthu aari wiishishaaye siikhu ttatthu
eettaka weettetta mwentto. ⁴ Ila ye n'oofiya sitati etile eettettiye siikhu
moote, alaleyaka yoori: "Nkatthi wa siikhu arupaiini Nnyizinku onteela
opwecha Neniive." ⁵ Aneniive khwiyya wonkhupali Nluku khulaleyan
yoori afuke, waaza attunkhulu mpakha asimaana, ooshi khuwalaza saakhu.

⁶ Hapari epile za Yuunusa zamfiyeliye mfwalume wa Neniive, ye khwiishukha vakhukulu yoohaakhimu, khuvula kuwo zoofwalume khuwala saakhu na khwiikhala vafuutha. ⁷ Aphano khuruma olaleyiwa Neniive yooshi yoori:

“Khwa nzina la mfwalume na mawaziri awe:

Ahiiyeve atha ntthu mmote antakhaaye oja na onywa, wala ojisa na onywisa nyama zawe, mompe zawe ama pwittipwithi zawe. ⁸ Athtu ooshi awale saakhu, na awalise nyama zaya, na akhuwe khwa nzina la Nluku na kuvu zaya zooshi. Attharuwe oretta vitthu zootakhala na ohusuti. ⁹ Khinjuweya Nluku omwiishelaka wiiphiiriwa wawe, anoonele huruma yoori nihifwe.”

¹⁰ Wakathi Nluku ooniyeovo yoori alikhaza oretta vitthu zootakhala, ye khulikha etile aari wuupuwelaaye owaarettela na khuhawaahukhumu.

4

Katapuya Yuunusa na huruma ya Nnyizinku

¹ Erettiyeovo toole, Yuunusa khuhintuveli etile yaya, na khwiiya wookatipukha. ² Ye khusala amuuza Nnyizinku araka: “Oo Nnyizinku aka, khahiyo eti kaalupiiye nalelo kiri ont? Ti ethiito yaakipathisiyeeyo othira keettaka Taarisi. Miyo kaajuwiyi yoori weeyo o Nnyizinku wa tthakaraka na wa huruma, woovilela na woopheta channu, onaahitaaye ohukhumu ila khulevelela mmmana wiyyavo othupwiya. ³ Aphano Mbwanaaka okilaze nafusi yaka, kinhithari ofwa kihiiyeeni wiyya haayi.”

⁴ Ye Nnyizinku khulupa: “Weeyo onaaye shariya yookatipukha?”

⁵ Yuunusa aalawiye khwiikhala mashaarikhi ya sitati ethiitile. Khujeka lipantta lawe, khwiikhala vamwiivuuli, khusala aweja ethu-ni yaari weet-telaaye orettikhana sitati etile. ⁶ Aphano, Nnyizinku khootthisa nrayi khrapela vatulu valipantta aphale aariivo Yuunusa, yoori eeye vamwiivuuli na aawuneye haari. Nrayi opule waamwinkhiye furaha ya waatta Yuunusa. ⁷ Ila mmeesho mwaya supuyeene, Nluku khumperekha mwanyanyama khurafuna nrayi opule, khuuma. ⁸ Etthamu-tthamu ya njuwa, Nluku khuperekha pheevu ya mashaarikhi yoolukuza channu, naye njuwa khusala lipiela veeshwa wawe Yuunusa, khusala asaleela ozileya. Eviriyeovo toole, ye khusala ajitakhela ofwa, na khuri: “Toono afwataali ofwa ehiyeeeni wiyya haayi.”

⁹ Ila Nluku khumuuzela Yuunusa: “Weeyo onaaye shariya yookatipukha mwaasa wa nrayi?” Ye khujipu: “Ayo, kinaaye! Na ki wookatipukha kintakha hatha ofwa.”

¹⁰ Aphano Nnyizinku khumuuzu: “Weeyo onoonela huruma nrayi opo, ohikholeeeni khaazi wala ohiwuliseeni, woottha osikhu mmote na osikhu nkina khufwa. ¹¹ Ila Neniive awaakho atthu anzitaaye eshiriini wa miiya alufu, ahinjuwaaye othawula etthu yooshapweya wala etthu yootakhala, na nyama za waatta. Miyo akaari oteela wiyyana huruma na sitati khuluyeeene etile?”

Matewuzhu

Ntathaari wa mazina a ojama wa Yinsa

¹ Eti warakha ya peewu na mazina aya a amarehemu a phantte ya Yinsa Al-Masiihu, peewu ya Daawuuda na Eburaahiima.
² Eburaahiima khunvokola Esiyaakha; Esiyaakha khunvokola Yaakhumpa; Yaakhumpa khunvokola Yuuda na attwiize;
³ Yuuda khunvokola Pereezi na Zeera, mamaawe aari Tamaara; Pereezi khunvokola Hezorooni, Hezorooni khunvokola Arawu;
⁴ Arawu khunvokola Aminataapi; Aminataapi khunvokola Nashooni; Nashooni khunvokola Salimooni;
⁵ Salimooni khunvokola Bowaazi, mamaawe aari Rahaape; Bowaazi khunvokola Obeedi, mamaawe aari Ruuti; Obeedi khunvokola Yeese;

⁶ na Yeese khunvokola mfwalume Daawuuda.

Daawuuda khunvokola Seleyimaana, mamaawe aari muukha wa Uriiya;
⁷ Seleyimaana khunvokola Ropowaawu; Ropowaawu khunvokola Apiiya; Apiiya khunvokola Aasa;
⁸ Aasa khunvokola Zhuzaafwa; Zhuzaafwa khunvokola Joraawu; Joraawu khunvokola Uziiya;
⁹ Uziiya khunvokola Jotaawu; Jotaawu khunvokola Akaaze; Akaaze khunvokola Ezakiya;
¹⁰ Ezakiya khunvokola Manaase; Manaase khunvokola Amooni; Amooni khunvokola Joziiya;
¹¹ Joziiya khunvokola Jekoniiya na attwiize, wakathi eekareliweeyo Babilooniya.

¹² Paata ya weettaniwa Babilooniya: Jekoniiya khunvokola Sheyalitiyeeli; Sheyalitiyeeli khunvokola Zoroba-beeli; ¹³ Zorobabeeeli khunvokola Apiwuute; Apiwuute khunvokola Eliyakhiimu; Eliyakhiimu khunvokola Azoori;
¹⁴ Azoori khunvokola Satookhi; Satookhi khunvokola Akiini; Akiini khunvokola Eliwuuti;
¹⁵ Eliwuuti khunvokola Eliyazaari; Eliyazaari khunvokola Maata; Maata khunvokola Yaakhumpa;
¹⁶ na Yaakhumpa khunvokola Yuusufu, manna wa Mariyamu,

otule anvokoliyeeyo Yinsa,
othuuto aniiithiwaaye Al-Masiihu.

¹⁷ Khwa ethiipo waaviriye ojama khumi na nne waaza va Eburahiima mpakha Daawuuda, na khumi na nne waaza va Daawuuda mpakha va okholiwa olawaniwa Babilooniya, na khumi na nne waaza Babilooniya mpakha va ovokoliwa wa Yinsa.

Ovokoliwa wa Yinsa Al-Masiihu

¹⁸ Ovokoliwa wa Yinsa Al-Masiihu pi toono. Mariyamu ari wooposiwa ti Yuusufu ahinarapalelane, khwiimitta khwa Rooho Ttakatthiifu. ¹⁹ Ila Yuusufu, mposi awe, khwiya ntthu wa shariya na woohitakhi ontwayifusha, ye khulakela sirini okayiri onrala. ²⁰ Ila, paata ya wuupuwela vithu epile, khumpuwelela nlayikha la Mbwana nkaththi wa olotta, khumuza yoori: “Yuusufu, mwaana wa Daawuuda, ohoove ompokhera Mariyamu wiiya muukhaawo, maana ye eemitta khwa Rooho Ttakatthiifu. ²¹ Ye onteela ompattha mwaana, weeyo ontthaje nzina la Yinsa, maana ye onteela owoosuru atthu awe khwa twampi zaya.”

²² Zooshi epo enteela orettikhana yoori ziretteye zooshi epile Mbwana alupiyeeyo khwa napiyu yoori: ²³ “Mwaari onteela wiimittha ampatthe mwaana, anttelaaye wiitthiwa Emanuweele, enlupaaye yoori ‘Nluku ori vamote na fweeyo’.”

²⁴ Paata ya olankha, Yuusufu khuretta etile nlayikha la Mbwana laamuziyeeyo khumpokhera Mariyamu muukhaawe. ²⁵ Ye khaarapalelaniye mpakha ompattha mwaana. Khunthaja nzina la Yinsa.

2

Othotola wa ajuwi a matthottowa

¹ Paata ya Yinsa ovokoliwa Belemu ya Yudeya yenzi ya mfwalume Herooti, ajuwi alankhiye malawa-juwa khuta Yeruzaleemu. ² Khuuzela yoori: “Mwaana ntteetthe otu avokoliweeyo, mfwalume wa mayaahuuti ori vayi? Fweeyo noona ntthottowa lawe malawa-juwa nateela omwaaputu.”

³ Wakathi mfwalume Herooti asiiliyeovo epo zaya, khwiya woovelavela, na atthu ooshi a Yeruzaleemu. ⁴ Aphano khuwaakusanya mahaakhimu a tiini ooshi na anamanozela a kano, khuwoozela vayi aari weettelaawo ovokoliwaho Al-Masiihu. ⁵ Yo khunjipu yoori: “Belemu ya Yudeya, maana napiyu aatikha toono:

⁶ ‘Weeyo Belemu,
 ya nti wa Yudeya,
weeyo hatha vattithiiru khahi owoohafwiifweya
 khwa sitati khuulu za Yuuda,
maana khwa weeyo onteela opuwa mfwalume
 anttelaaye oweettettisa atthu aka a Eziraiilu.’”

⁷ Herooti khuwaakhuwela ajuwi sirini khuwoozela wakathi laapuwiyeeyo ntthottowa nttho. ⁸ Aphano khuwaaruma Belemu awoozaka yoori: “Mwilawe mweekese ojuwa saaneene monkoni wa mwaana oto, na amana mwinsikana, mwite mwikuuze yoori na miiyo kilawe kamwaaputu.”

⁹ Paata ya onsiila mfwalume yo khusala alawa, ntarikhi khoona ntthottowa ntinithile ooniyeyeeyo malawa-juwa, khulokoza khulawa khweemela

puuro etile aariivo mwaana. ¹⁰ Noorutela woona ntthottowa ntthile, khwi-ya oofurahi venkivene. ¹¹ Khuvira nnyupa mphule khunsikana mwaana na Mariyamu mamaawe, khukokhora khumwaaputu. Nawiisha, khufukula maphutha aya khumwinkha thuvo: Thahapu, ovupa, na mafuttha oonukhela. ¹² Khuuziwa muulottha yoori ahirutele wa Herooti, khurutela owaya khwa tarikhi kiina.

Otthirela Misuri

¹³ Paata ya ajuwi olawa, nlayikha la Mbwana khumpuwelela Yuusufu muulottha khumuuzu yoori: "Olankhe, onthuule mwaana oto na mamaawe, otthirele Misuri. Weekhale ottuukho mpakha miiyo kiwuze, maana Herooti onteesta omweekesa mwaana oto yoori amuule." ¹⁴ Aphano ye khulankha, khunthuula mwaana na mamaawe osikh, khweetta Misuri. ¹⁵ Ottuukho eekhaliyeyo mpakha Herooti ofwa. Khwa ethhiipo khuretteya etile Mbwana alupiyeeyo khwa napiyu yoori: "Kankhuwela mwanaka aari nti wa Misuri." ¹⁶ Herooti ooniyeovo yoori attettekhiwa ti ajuwi, khwiya wookatipukha, khuruma wuuliwa aana ooshi a nyaakha miwiri zeettaka vath, Belemu na miti zawaattamanana nkhamma wakathi otthuupo oozi-weeyo pi ajuwi. ¹⁷ Aphano khurettikhana epile zaalupiweeyo ti napiyu Yeremiiya: ¹⁸ "Khusileya huula nti wa Rama ya olila na ojikhupanyisa nwulweene; aari Rakkele awaalilelaka aana awe akatthalaka ozurwiwa, mwaasa wa ooshi ofwa."

Orutela Ezirayiilu

¹⁹ Paata ya Herooti ofwa, nlayikha la Mbwana khumpuwelela Yuusufu muulottha Misuri, ²⁰ khumuuzu yoori: "Olankhe, onthuule mwaana na mamaawe, olawe Ezirayiilu, maana apale aari otakhaaye omuula afwa." ²¹ Ye khulankha, khunthuula mwaana na mamaawe, khweetta nti wa Ezirayiilu ²² Ila noosiila yoori Arikileewu mwaana wa Herooti ti asalaniyeyo ofwalume wa papaawe, khwiya wa woova weettawo. Nawuuziwa muulottha, khweetta nti wa Kalileya. ²³ Khusala eekhala sitati eniitthiwaaye Nazareeti, yoori erettikhane epile zaalupiweeyo pi manapiyu araka: "Ye onteela wiithiwa Nnazare."

3

Yaahaya Namoosa Ontthenkeza Tarikhi

¹ Siikhu zaya epile khupuwa Yaahaya Namoosa, alaleyaka n'yaara ya Yudeya. ² Ye aari okhuwa araka: "Mwithupwiye, Ofwalume wa pinkuuni ori kharipu." ³ Maana otu ti otule alupiweeyo ti napiyu Ezaaya yoori: "Huula enkuwa n'yaara eraka: 'Mwitthenkeze tarikhi ya Mbwana na mookolele miphiiitelozawee.'"

⁴ Kuwo za Yaahaya zaattalaniwe ovizi wa nkamiiya, na aari ovalaka nzako wa shapala n'yuunu. Etthu yoojiwa yawe aari mapalaka na asali ya ntthuttu. ⁵ Atthu a nti wa Yeruzaleemu na a Yudeya na miti zooshi za nkerekhere ya Yorotaani aari onteela ye. ⁶ Yo aari otukhuru twampi zaya, nawoosiwa ti Yaahaya mmutho Yorotaani.

⁷ Wakathi ye awooniyeeyo mafwarizeewu na masatukhi enkeene ataaka aphale aari woosaavo, khuwooza yoori: "Ojama wa evili! Ti paani awu-uziyeeni otthira katapu entaaye? ⁸ Mwithoonyeze khwa khaazi zenu yoori weekhwhee mwathupwiya twampi zenu! ⁹ Khahiyo olupa yoori: 'Eburahima ti marehemu papeetthu,' ila miiyo kiniwuuzani yoori, khwa liwe ntthi Nluku onwahi owaattala aana a Eburahima. ¹⁰ Nshokha lanoliwa latthiiwa

nshini wa mitathaari za miitthi. Wakhula muutthi ohiniimaaye mishumo zooshapweya ontta oshijiwa weeseleliwe va moottho.

¹¹ “Miiyo kiniwoosani na maati khwa othoonyeza othupwiya wa twampi zenu. Ila paata ya miiyo onta ntthu ariinaaye owahi zayita miiyo, hatha akinsuhi shitaha yawe wala akina makhaamu oothuula jampali zawe. Ye ontella owoosani na Rooho Ttakatthiifu na moottho. ¹² Ye ontana fosholo mmakhono mwawe onteela ophakula tiriku na maveya. Tiriku atthe va sakafu vawee, maveya akhoze va moottho ohinzimaaye.”

Woosiwa wa Yinsa

¹³ Aphano Yinsa khulankha Kalileya khuta o Muuttho Yorotaani oteela woosiwa ti Yaahaya. ¹⁴ Yaahaya khusala atakha okatthala araka: “Miiyo ti kinhithajiji woosiwa ti weeyo, onikiteela toovi miiyo?” ¹⁵ Ila Yinsa khunjipu yoori: “Olikhe ethiipo, yoori erettikhane shariya yooshi.” Yaahaya haya khukhupalela. ¹⁶ Yinsa nawoosiwa, khuvuuwa, nasaapiru pinku khufukuwa, khoona Rooho Ttakatthiifu yiishukhaka nkhamma jiwa khum-morela. ¹⁷ Huula ya olankha pinkuuni khuri: “Otu mwanaka wompheta, na wookituvela channu!”

4

Ozayiniwa wa Yinsa

¹ Aphano Yinsa khuthuuliwa ti Rooho Ttakatthiifu khweettaniwa n'yaara, yoori alawe azayiniwe ti sheethwani. ² Paata ya ofuka siikhu arupayiini nthana na osikhu, khunkhola jala ³ Aphano Sheethwani khumwaattama khumuaza yoori: “Nkhamma weeyo o Mwaana wa Nyizinkhu, orume mawe apo athatuwe eeye phaawu.”

⁴ Ila Yinsa khunjipu araka: “Yaatikhwiwa yoori: ‘Khahiyo phaawu paasi enimwinkhaaye ntthu ohaayi, ila ntthu looshi linlankhaaye nkhangyo wa Nluku.’” ⁵ Elottelanaka, sheethwani khumweettana sitati ttakatthiifu, khunweza phantte yawiishela olepa ya Nyuupa Yoosifwiwamo, ⁶ khumuaza yoori: “Nkhamma o mwaana wa Nluku, ojeeselele vathi aphale. Maana yaatikhwiwa yoori: ‘Ye ontta oruma malayikha awe awiinanele, atthaapo antta wuukholelala na makhono aya yoori ohikwakwanttuwe va liwe.’”

⁷ Yinsa khunjipu yoori: “Theenya yaatikhwiwa yoori: ‘Ohimweeze Mb-wana, Nluku awo.’”

⁸ Sheethwani khunthuula khumweettana va mwaako mmote woolepa venkivene khunthoonyeza ofwalume wooshi wa olumwenku na siifwa yaya. ⁹ Khumuaza yoori: “Amana okikokhorela khukaaputu kintta owinkha zooshi.” ¹⁰ Yinsa khumuaza yoori: “Oleevo, Epiliisi! Maana yaatikhwiwa yoori: ‘Omwaaputu Mbwana, Nluku awo, na onrumeyele othu-uto paasi.’” ¹¹ Aphano sheethwani khumwaattuwa, khuta malayikha oteela onrumeyela.

Yinsa onaaza khaazi yawe Kalileya

¹² Wakathi Yinsa asiiliyeevo yoori Yaahaya afukiwa, khurutela Kalileya. ¹³ Khulaawo Nazareeti khulawa khwiikhala Kafwaranaawu, yaari nshini wa pahari, nti wa Zebulooni na Nafitaali, ¹⁴ yoori erettikhane etile yaalupi-weeyo ti napiyu Ezaaya yoori:

¹⁵ “Nti wa Zebulooni, na nti wa Nafitaali,
tarikhi ya pahari, kaapu ya Yorotaani,
Kalileya ya amalapo!

¹⁶ Atthu aari wiikhalaaye n'yiiza oona nuuru khuluyeene; khwa apale aari wiikhalaaye miti za mwiivuli wa ofwa, amwasikheliwa ti nuuru."

¹⁷ Waaza attaapho Yinsa khwaaza olaleya hapari zawe alupaka yoori: "Mwithupwiye, maana ofwalume wa pinkuuni ori kharipu."

Yinsa oniwaakhuwela anakhiyoni a mwanzo

¹⁸ Eettaka weettetta nshini wa Pahari ya Kalileya Yinsa khuwoona attwi awiri: Simawu, aniththiwaaye Pheeturu, na ttwiiye Antere. Yo aari weeselela matthavi aya mpahari, maana yo aari anamajiyi. ¹⁹ Yinsa khuwoozza yoori: "Mwikilote, miiyo kintta wuurettani o namajiyi a atthu." ²⁰ Nasaapiru yo khulikha matthavi aya khusala anlotta. ²¹ Eettaka olawa ethhiipile khuwoona attwi akina awiri: Tiyaaku, mwaana wa Zepeteewu, na Yaahaya, ttwiiye. Yo aari mmwaatiya na papaaya Zepeteewu, attalelaka matthavi aya, Yinsa khuwaakhuwela. ²² Nasaapiru yo khunlikha papaaya na mwaatiya, khunlotta.

Yinsa ontafusiri Kalileya yooshi na owaavonisa anamarati enkeene

²³ Yinsa eettettiye Kalileya yooshi asomisaka mmasinakooka, atafusiraka hapari zooshapweya za ofwalume na avonisaka marati ooshi vakathhi wa atthu ²⁴ Hapari monkoni wa ye khumwazeyela Siiriya yooshi, atthu khusala awaatiisa ooshi apale aarina marati, aari olwaaziwaaye na ohoochiwa ti masheethwani, anajilejile, anasupiyaani, ye noowaavonisa. ²⁵ Atthu enkeene khusala anlottelela olankha Kalileya, Tekapooli, Yeruzaleemu, Yudeya na a nti wa phantte kiina ya Yorotaani.

5

Tafusiiri ya vamwaako

¹ Awooniyeovo atthu apale waatta, Yinsa khuwela va mwaako na khwikhala. Anakhiyoni awe khususela aphale aariivo, ² Ye khusala awaasomisa, araka:

³ "Ooparikhiiyiwa pi apale eeyiye asikhini nroho,
maana ofwalume wa pinkuuni pi waaya.

⁴ Ooparikhiiyiwa pi apale anlilaaye,
maana anteela ozurwiwa.

⁵ Ooparikhiiyiwa pi apale oojipushuwisa,
maana yo anteela orithi olumwenku.

⁶ Ooparikhiiyiwa pi apale ariina jala na nnyottha la shariya,
maana anteela orupala.

⁷ Ooparikhiiyiwa pi apale ariina tthakaraka,
maana na-yo anteela wooneliwa tthakaraka.

⁸ Ooparikhiiyiwa pi apale ariina rooho yoopakusiwa,
maana yo anteela omoona Nluku.

⁹ Ooparikhiiyiwa pi apale oolevelela,
maana anteela wiithiwa aana a Nluku.

¹⁰ Ooparikhiiyiwa pi apale anlupathiwaaye mwaasa wa haakhi, maana Ofwalume wa pinkuuni pi waaya.

¹¹ Ooparikhiiyiwa ti mweeyo amana mwittukhaniwaka na olupathiwa, na wakhula zootakhala empuaaye khwa mweeyo mwaasa wa miiyo.

¹² Mwifurahi na mwithhape, maana tthuvo yenu pinkuuni khuluyeene,

maana khwa nanna ethiipo awaalupatthiye manapiyu aviriyeeyo khapula ya mweeyo.

Mwiinyu wa voolumwenku na nuuru ya olumwenku

¹³ “Mweeyo mwa mwiinyu wa olumwenku. Ila amana olıkha onyuunya waya, onrutiiseleya toovi? Khuniiyana hatha fwayita, woohiiyi wiithiwa khusala oluwattheliwa pi atthu. ¹⁴ Mweeyo mwa nuuru ya olumwenku. Sitati yoojekiya va mwaako khinyitheya. ¹⁵ Khina ankhozaaye khatteya khuttha nyuku. Enthiiwa vahali wawooneyavo yoori ewaamwasikhele atthu apale aniiyaaye nnyupa ¹⁶ Nakatalikha nuuru yenu mweeyo yaare vakatthi wa atthu, yoori oone khaazi zenu ansifu Papeenu ariye pinkuuni.

Yinsa onrumeyela kano za Munsa

¹⁷ “Mwihuupuwele yoori kateela wiishisa kano za Munsa ama masomi a manapiyu, akaateeliye wiishisa, ila omarisela. ¹⁸ Kiniuuuzani khweele yoori: ‘Erivo ethiipi pinku na vathi khina nanna entakhaaye waashikha nenkawu alama yiisheliye ya kano ama ntottonka, mpakha zooshi erettikhane. ¹⁹ Wooshi otule anttelaaye okhijilela oruma, hatha nkhamma weetta opushuwa, na khuwaanzela akinoko oretta ethiipo, onteela wiithiwa yoori woopepheya muufwalume wa pinkuuni; ila wakhula otule anshututelaaye na khusomisa oruma waya opu, onteela wiithiwa yoori nwulweene muufwalume wa pinkuuni. ²⁰ Maana miiyo kiniuuuzani yoori shariya yenu amana ehiziti ya mafwarizeewu na ya anamanozela a kano, hatha vattithiiru khamwinteela weettamo muufwalume wa pinkuuni.

Wiiphiriwa na osilana

²¹ “Mweeyo mwasiila vitthu ooziweeyo amarehemu apapazenu yoori: ‘Mwihuule; wakhula anuulaaye oneekesela ophukiwa.’ ²² Ila miiyo kiniuuuzani yoori wakhula aninkatipukhelaaye ttwiye oneekesela ophukiwa naye, na wakhula aninttukhanaaye ttwiye ona ya olawaniwa wa afwalume ophukiwa. Na otule animuuzaaye ttwiye yoori: ‘nlolo!’ oninsuhi weetta vamootho wa motthooni. ²³ Nakatalikha, amana weettelaka winkha zaakha va alitaari khufikhiri yoori ttwiyo ona etthu varoho na-weyo, ²⁴ olıkhe zaakha yawo va alitaari attaapho, olawe wasilane na ttwiyo, nawiisha ote operekhe saana zaakha yawo. ²⁵ Amana ntthu atakha wuulawana onyuupa wa anamaphuka, osilanane saana ntthu aya oto ntarikhi mweettaka olawa, maana noohijuwi saana weeyo onttela winkheleliwa wa namaphuka, namaphuka awinkhelele wa namikesela kalapooso na ye aeweeselele nkalapooso. ²⁶ Miiyo kiniuuza khweele yoori khunlaamo ohiripheeni nzurukhu otthuupo onttelaaye wuuziwa.

Oraruwa

²⁷ “Mweeyo mwasiila elupiwaka yoori: ‘Ohiraruwe.’ ²⁸ Ila miiyo kiniuuuzani khweele yoori wakhula animweekesaaye muukha na ontakha varoho vawe, anrarusha. ²⁹ Nkhama liisho lawo la phantte ya nkhone nlume lintta wuukosisa, olazemo weesele oje. Afwataali wuupwetheya phantte yawo moote ya mwiili awo zayita mwiili awo wooshi weeseleliwa motthooni. ³⁰ Nkhama nkhone awo nlume ontta wuukosisa, oshije weesele. Afwataali wuupwetheya phantte yawo moote ya mwiili awo woohiiyi mwiili awo wooshi weeseleliwa motthooni.

Waasha

³¹ “Yaatikhiwa theenya yoori: ‘Otule animwaashaaye muukhawe ona ya omwinkha talakha.’ ³² Ila miiyo kiniuuuzani yoori wooshi otule animwaashaaye muukhawe, ehiriwaka etta oraruwa, oniiyana paathuli ya onruma oraruwa, na otule aninralaaye muukha aya otule wa waashiwa onnta onrarusha.

Olapha

³³ “Mweeyo mwasiila ethu ooziweeyo amarehemu apapazenu yoori: ‘Mwihilaphe woovonyeyavo, ila mweettettise olapha mwirettiyeeyo omaasho wa Mbwana.’ ³⁴ Ila miiyo kiniuuuzani yoori: mwihilaphe hatha vattithiiru wala khwa vitthu za pinkuuni maana khukulu ya Nluku; ³⁵ wala khwa vitthu za vathi maana phi anvumulisaavo moolu awe, wala khwa Yeruzaleemu maana sitati ya Mfwalume nwulu. ³⁶ Wala ohilaphele khwa eeshwa yawo maana weeyo khunwahi olakaza wala oriipisa hatha nyuuli yawo moote. ³⁷ Entosheleza olupa yoori ‘ayo’ amana yiiya ‘ayo’, na ‘wala’ amana yiiya ‘wala’; noozitisa apho enlankha wa Sheethwani.

Ojiriphia

³⁸ “Mweeyo mwasiila etile elupiwe yoori: ‘Liisho khwa liisho na liino khwa liino.’ ³⁹ Ila miiyo kiniuuuzani yoori: mwihikhanyarele ojiriphia khwa atthu apale anuurettelaanini zootakhala. Amana ntthu oopwakula nlaku limote onzukulisele ntthi likina. ⁴⁰ Amana ntthu atakha wuulawana wa anamaphuka na wuuvula kameza yawo, omwinkhe theenya ajapi yawo. ⁴¹ Amana ntthu ookhanyarela othuula lipwattha khwa kiyasi ya phiiama alufu moote, othuule phiiama alufu piiri.

Owaapheta maatuwi

⁴² “Amana ntthu oovekela ethu, omwinkhe; ohinnoze enyokonyoko otule anuuvekelaaye omwiipaasha. ⁴³ Mweeyo mwasiila olupiwa yoori: ‘Omphete namwaattamanani awo, omwiine atuwi awo.’ ⁴⁴ Ila miiyo kiniuuuzani yoori, mwiwaaphete maatuwi enu na mwiwaalompele apale anulupatthanini, ⁴⁵ yoori mweeyo mwiretteye wiiya aana a Papeenu ariye pinkuuni. Maana ye oniwaatthamushela njuwa apale anrettaaye zooshapweya na apale anrettaaye zootakhala. Na oniwenka vuula anashariya na apale ohitakhi shariya. ⁴⁶ Amana mwiwaaphetaka apale anuuphetaanini paasi, tthuvo-ni mwiineekeselaaye wiiyana? Anamariphisa lumpuru nayo khanretta ethhiipo? ⁴⁷ Na amana mwiwaachelisaka maswaahipu paasi, mwinrettani yooziti? Hatha na amalapo anretta ethhiipo. ⁴⁸ Nakataalikha mwiyihe atthu khaamili, nkhamma ethhiipo eyiyeeyo khaamili Papeenu wa pinkuuni.

6

Owaawuni anamathowiwa

¹ “Mwiyyane phoole na oretta khaazi zenu za shariya vahali aniiyavo atthu akina yoori mwisifwiwe pi yo. Amana mwiretta toowo, khamwiniiyana hatha tthuvo ya Papeeni wa pinkuuni.

² “Nakataalikha, amana mwinkha zimola mwihithuule nlope khusala mwilaleya, nkhamma anrettaazo manaafikhi mmasinakooka na mmaliinya, atakhaka yoori asifwiwe pi akina aya. Miiyo kiniuuza khweele yoori yo apokhera tthuvo yaya. ³ Ila amana weeyo winkha zimola, nkholo awo nkha ohijuwe ethu orettiyeewo nkholo nlume awo, ⁴ yoori zimola yawo

yiiye siiri. Toowo, Papaawo otule anoonaaye epile enrettiwaaye sirini, ontaa wuutthuva.

Nanna ya olompa

⁵ “Na amana mwilompaka, mwihiyi nkhamama manaaafikhi. Yo owaatuvela weemela khusala alompa nsinakooka, mmatarikhi, atakhaka yoori ooniwe pi akinoko aya. Miyo kiniwuzani khweele yoori yo apokhera tthuva yaya. ⁶ Ila amana weeyo olompaka, weette okathhi wawo ofuke nlako awo, onvekele Papaawo ahinooneyaaye. Aphano, othuuto ontaa wuutthuva. ⁷ Na amana olompaka, khahiyorutela mattakhuzi mamoteru ooheleyi swaafu zawaatta, nkhamama anrettaazo amalapo. Yo anaakhipwela yoori mwaasa wa waatissa ottakhula Nluku ti aniaasiilaavo. ⁸ Mwihiyi nkhamama atthaapo, maana khabapula mweeyo mwihinaveke Papeenu onretta ajuwe ethu mwinihithajyaaye. ⁹ Nakataalikha, mweeyo amana mwilompaka mwisala mwiri toono:

‘Papeetthu oriye pinkuuni,
 littithimisiwe nzina lawo loottakatthifu,
¹⁰ wiishushe ofwalume awo,
 mattakhelo awo arettikhane
 vathi apha nkhamama ethiipo enrettikhanaazo otulu!
¹¹ Oninkhe wakhula siikhu ethu-yoojiwa ninihithajyaaye.
¹² Oniswaamihi koosa zeethu nkhamama ethiipi na-fweyo nininswaami-haaye wakhula otule annikosaaye,
¹³ na ohinilkhelele nizayiniwaka,
 ila nuusuru khwa ntakhali,
 [maana ofwalume, owahi,
 na siifwa zooshi pi zawo, mileele. Amiina.]’

¹⁴ Maana amana mwiwaaswaamahi anaatamu koosa zaya, Papeenu wa pinkuuni naye ontaa wuuswaamihini, ¹⁵ ila amana mwihiwaamihanaka, Papeenu wa pinkuuni naye khanuuuswaamihini koosa zenu.

Ofuka

¹⁶ “Amana ofuka, ohithoonyeze wuuso wa huzuni nkhamama anrettaazo manaaafikhi, yo antta ozukulisa wuuso aya yoori akina aya apatthe ojuwa yoori afuka. Miyo kiniwuzani khweele yoori nooretta toowo apokhera tthuva yaya. ¹⁷ Ila weeyo amana ofuka, osala woosa wuuso awo, na khushamula nyuuli zawo, ¹⁸ yoori akinoko ahijuwe yoori wafuka, ila Papeenu, anoonaaye vitthu za siiri, ye ontaa ojuwa yoori wafuka na othuuto ontaa wuutthuva.

Maali pinkuuni

¹⁹ “Ohikusanye maali vathi apha, oriivo oshuwa, na kuuthu enwahaaye ohariwu, na ariivo manantarawu oophenya khwiyya. ²⁰ Ila okusanye maali pinkuuni, ottuukho oshuwa na kuuthu ehinwahaawo ohariwu wala nantarawu ahimphenyelaawo khwiyya. ²¹ Maana attaapho eniiyaavo maali zawo, rooho yawo nayo eniiya attaapho.

²² “Maasho khantteya ya mwili. Amana maasho awo eeya ooshwapweya, mwili awo oniyyana nuuru; ²³ ila amana maasho awo eeya oohishapweyi, mwili awo wooshi oniyya n'yiiiza. Nakataalikha, amana nuuru oriinaaye ezukuluwa yiiza, yiiza yaya eto eniiya khuluyene!

24 “Khaavo ntthu anwahaaye owaarumeyela a mbwana awiri, mwaasa yoori ontta omwiiphiirisa mmote, antuvelise otu nkina; ama oniiya wa waamineya khwa otu mmote, antarawu otu nkina. Khinwaheya onrumeyela Nluku na nzurukhu.

Tafwawuthi za ohaayi

25 “Tiito, kiniwuuzanini yoori: Mwihiyi woovelavelela ohaayi enu, khwa ethtu-yoojiwa ama yoonyiwiwa; wala mwili enu monkoni wa ethtu ya owala. Ohaayi enu waziti ethtu-yoojiwa. Na mwili enu waziti kuwo.

26 Mwiwoone anyannyi otulu: Khanzala, khanuurula wala khana sakafu; ila Papeenu wa pinkuuni oniwaajisa. Nakataalikha mweeyo mwinaaye fwayita zayita anyannyi. **27** Paani wa mweeyo anwahaaye weekezelamaansha awe hatha nkhamma eetta oshukulikhela?

28 Khi mwinyelavelelani kuwo? Moone nanna enwulaazo miithi za ntthuttu na maluwa aya: yo khazinkhola khaazi, wala khazinsona. **29** Ila wekhweele miiyo kiniwuuzani yoori, Seleyimaana na oshapweya wawe khawaleeni kuwo zooshapweya nkhamma maluwa apa. **30** Moone, Nluku onwalisa nyaani za ntthuttu Ieelo ziniyaavo meesho khulukuziwa, onuwalisani mweeyo channu athtu oopushuwa amini! **31** Nakataalikha mwihihukulikh, mwiraka: ‘Ninja niini?’ Ama ‘ninnywa niini?’ Ama ‘ninwala niini?’ **32** Maana amalapo pi anshukulikhelaaye vitthu nkhamma epo; ila Papeenu ariye pinkuuni onjuwa yoori enuuhithajiyani epo zaya. **33** Apho, mweekese khapula Ofwalume wa Nluku na shariya yaya, zooshi epo mwintta winkhiwa. **34** Nakataalikha mwihihukulikheli siikhu ya meesho, maana meesho entana tafwawuthi zaya. Wakhula siikhu eniyyana otakhalawaaya.

7

Omphuka Nzaawo

1 “Mwihihukhuke nzeenu yoori mwihiphukiwe. **2** Maana khwa kхиима ethiito omphukanaaye, na-weyo omphukiwa khwa kхиима ethiito; mphimo otthuupo onrumeyelaaye owaaphimelanaka azaawo, na-yo anuuphime-lana otthuupo.

3 “Mwaasa aya niini woonaka etutu eriye mmaasho wa ttwiyo, ila khuhoooni lipikhi liriye mmaasho mwawo? **4** Nanna-ni onimuzaaye ttwiyo yoori: ‘Kintakha kuulaze etutu eriye mmaasho mwawo,’ khupe weeyo orina lipikhi mmaasho mwawo? **5** Naafikhi! Olazemo khapula lipikhi liriye mmaasho mwawo, aphano ontta woona saaneene khuwahi olazamo etutu eriye mmaasho wa ttwiyo.

6 “Mwihiwenkhe vitthu ttakathhiifu anapwa, antta wuuzukuluwelani na oolumeni, wala mwiheeselele kuluwe mawe ootafikhana mwirettaru toowo entta oluwatthela.

Nthiti khwa lompa

7 “Mwiveke, mwintta winkhiwa; mweekese, mwintta opattha; mwipiye nlako, mwintta ofukuleliwa. **8** Maana wakhula anvekaaye oninkhiwa, aneekesaaye ompattha, ampiyaaye nlako ontta ofukuleliwa.

9 “Paapa-ni mmote wa mweeyo, anraaye mwanawе anvekeliye phaawu khumwinkha liwe? **10** Ama anvekeliye swi khumwinkha nyookha?

11 Mweeyo mwa atthu ootakhalo rooho, mwinjuwa Owenkha vitthu zooshapweya aaneenu. Papeenu ariye pinkuuni, atepa Owenkha vitthu

zooshapweya apale aninvekelaaye. ¹² Wakhula etile enuutuvelaanini oret-teliwa, na-mweyo mwiwaarettete ethiipo azeenu, maana kano na man-apiyu anlupa ethiipo.

Milako Zoophunyeya na Milako Zootaphuwa

¹³ “Mwivire nlako woophunyeya, maana nlako nwulweene na tarikhi yoomwazeya eninlokoza ntthu mothooni, enkeene anvira nlako otthuupo. ¹⁴ Tarikhi na nlako oninkhaaye ohaayi wa mileele nttithiiru, na atthu vattitthiiru ti anttelaaye oviravo.

Muutthi na mishumo zaya

¹⁵ “Phoole na manapiyu oojipanka, yo anuuteelani mweeyo awaliye shapala ya pwittipwitthi, ila nkaththi ari miji zooluma. ¹⁶ Khwa mishumo zaya mwinteeela owaajuwa. Khunshumeya wuuva mmiwa, wala mmuyu khinshumiwamo ekhuuwa. ¹⁷ Khwa ethiipo wakhula muutthi wooshapweya oniima mishumo zooshapweya, na muutthi wootakhala oniima mishumo zootakhala. ¹⁸ Khinretteya muutthi wooshapweya wiima mishumo zootakhala, wala muutthi wootakhala wiima mishumo zooshapweya. ¹⁹ Wakhula muutthi ohiniimaaye mishumo zooshapweya ontta oshijwa khweeseliwa va moottho. ²⁰ Khwa ethiipo mwinteeela owaajuwa khwa mishumo zaya!

²¹ “Khahiyo ooshi apale anikiitthaaye yoori: ‘Mbwana, Mbwana,’ anttelaaye weettamo muufwalume wa pinkuuni, ila otule anrettaaye matakhelelo a Paapa ariye pinkuuni. ²² Amana efiya siikhу yaya eto enkeene, anlawaakuze yoori: ‘Mbwana, Mbwana! Fweeyo nahupiri khwa nzina lawo, neekara masheethwani khwa nzina lawo, na khwa nzina lawo naretta minjuza.’ ²³ Aphano miiyo kilupe saaneene yoori: ‘Akuujuweenini. Mwikisuse, anamarettta zootakhala.’

Njuwi na nolo

²⁴ “Wakhula otule ansiilaaye nttakhuzi laka na khushututela onlattansiwa ntthu wa akhili ajekiye nyuupa yawe khuthipa khutha vanchina la mawe; ²⁵ khunya vuula, khwiitaaza nyuuttho khuvuma pheevo khusakhinya nyuupa etile, khuhikwi, maana nchina laya laari va mawe. ²⁶ Wakhula otule ansiilaaye nttakhuzi laka khuhishututeli onlattansiwa ntthu woololo ajekiye nyuupa yawe va nshaka; ²⁷ khunya vuula, khwiitaaza nyuuttho, khuvuma pheevo khupiya nyuupa etile, khupwaluwa, khupwecheya”.

²⁸ Wakathi Yinsa eeshiyeevo ottakhula, khuntti epile khwiya zootikinsiwa khwa masomi awe, ²⁹ maana aari osomisa nkhama ntthu ariinaaye ofwalume, woohiiyi nkhama anamanozela a kano.

8

Ovonisiwa wa namaaharaja

¹ Wakathi eeshukhiyeevo va mwaako, khuntti khuluyeene yeetta onlotta. ² Nasaapiru khuta namaaharaja mmote khumwaattama, khumwaaputu akokhoriye khulupa yoori: “Mbwana, onwahi okitwaharesha!”

³ Yinsa khookola nkhono awe, khunsapa khuri: “Katakha, ti otwahareshey!” Nasaapiru ye khwiya wootwaharesheya khwa maaharaja. ⁴ Aphano Yinsa khumuuzza yoori: “Vitthu epi ohinthatele hatha ntthu. Ila olawe, wajithoonyeze wa namalokozela a tiini na olaze zaakha etile Munsa alupiyeeyo yoori yiye oshaahiti.”

Najanka wa Rooma onthonyeza amini yawe

⁵ Wakathi Yinsa afiyyeego sitati ya Kafwaranaawu, eetta oteeliwa ti ntunkhulu wa anajanka, anvekelaka yoori amwaawuni. ⁶ Khumuuzo yoori: “Mbwana, karumeya aka ori ont, onaaye supiyaani, ontta ohoocheya venvivene.”

⁷ Yinsa khumuuzo yoori: “Miiyo kinlawa kanvoniise.”

⁸ Nttunkhulu wa anajanka otule khunjipu yoori: “Mbwana, miiyo akin-suhi wuupokherela vaje vaka. Ila oluope nttakhuzi limote paasi, karumeya aka ontta ovona. ⁹ Maana na-miyo ki ntthu kiriye vathi wa ofwalume na ki nlokozi wa anajanka. Kinimuuzo mmote yoori: ‘Olawe,’ khulawa; khumuuzo nkina yoori: ‘Ote,’ ye khuta. Kinimuuzo karumeya aka yoori: ‘Orette khata,’ ye khuretta.”

¹⁰ Yinsa noosiila epo zaya, khushanka, khuwooza apale aari onlottaaye yoori: “Kiniuuuzani khweele: Akinsikaneeni Ezirayiilu ntthu ariina amini nkhamma eti. ¹¹ Miiyo kiniuuuzani, atthu enkeene a khipula na malawa-juwa, anttelu wiikhala va meeza na Eburahiima, Esiyakha, Yaakkumpa muufwalume wa pinkuuni. ¹² Ila apale aari weettelaaye orithi ofwalume wa Nluku anttelu weeseleliwa oje, n’yiiza nhali ontelaaye wiyamo olila na oluma meeno.”

¹³ Yinsa khumuuzo nttunkhulu wa anajanka otule yoori: “Olawe owawo, entta orettikhana nkhamma ethiipo okhupaliyezo.” Wakathi otthuupule karumeya awe khwiya woovona.

Owahi wa Yinsa monkoni wa masheethwani na marati

¹⁴ Yinsa khweetta owawe Pheeturu ottuukho khumoona nkhwewe Pheeturu arapaleeliye ari nlwele hooma. ¹⁵ Yinsa khunsapa nkhone awe, hooma etile khumwiisha. Khulankha khusala anrumeyela.

¹⁶ Paata ya otupweela njuwa, khutiiseliwa anamasheethwani awaatta, ye khusala eekara masheethwani khwa nttakhuzi lawe khuwaavonisa alwele ooshi. ¹⁷ Khwa ethiipo khurettikhana epile zaalupiweeyo ti napiyu Ezaaya yoori:

“Ye athuula marati ethhu
na apwechera moolwele ethhu.”

Onlotta Yinsa, ethu yoolipa!

¹⁸ Yinsa nowoona atthu awaatta anzukuleeliye, khuwaaruma anakhiyon i awe olokhela kaapu ya ntthatta. ¹⁹ Aphano namanozela wa kano mmote khumwaattama khumuuzo yoori: “Mwaaliimu, kintta wuulotta wakhula vahali oneettaavo.”

²⁰ Yinsa khunjipu araka: “Ananthala anaaye maphotto aya anyannyi anaaye vijaaro zaya, ila Mwaana wa Pinaatamu khana vahali woovumulisavo eeshwa yawe.”

²¹ Nakhiyoni awe mmote khuri: “Mbwana, waaze okilikha kilawe kanzikhe paapa.”

²² Yinsa khujipu araka: “Okilotte, owaalikhe ananfwa awaaazikhe ananfwa aya eenyewe.”

Yinsa onnyamaza pheevo yawaatta.

²³ Yinsa apakhiriyeego mmwaatiya anakhiyoni awe khunlotta.

²⁴ Nasaapiru, pheevo yawoopisa khusala evuma mpahari, mwaatiya khusala ozamisiwa ti mawipi, Yinsa ettaka olala. ²⁵ Anakhiyoni awe

khunsusela khusala anlansa, ankhuwelaka araka: “Mbwana, onuuusuru nasaleela ofwa!”

²⁶ Ye khuwoozela yoori: “Mwinoovani? Atthu oopushuwa amini!” Ye khulanka khushowera pheevu etile na pahari, zooshi khunyamala. ²⁷ Ooshi khusala ashankiye na khulupa yoori: “Otu aya paani hatha anrumaaye pheevu na pahari khunshututela?”

Yinsa oniwaavonisa atthu awiri aashinttiweeyo ti masheethwani

²⁸ Wakathi afiyeovo phantte kiina, ya Jerazeenu, khunteela anamasheethwani awiri, alankhiyeeyo ovilalo. Yo aari oowali, khina aari oviraaye tarikhi ya etile. ²⁹ Aphano, yo khusala anyakula araka: “Onnitakhelani fweeyo, Mwaana wa Nluku? Wata okhuno oteela onoopopisa, ohinafiye wakathi aya?”

³⁰ Kharipu ya aphale vaya laarivo liphanko la kuluwe. ³¹ Aphano masheethwani apale khunvekela Yinsa yoori: “Nkhama onniikara, oniikarile nliphanko la kuluwe.”

³² Yinsa khulupa yoori: “Apho mwilawei!” Masheethwani apale khulawa khweetta nkuluwe, liphanko looshi khwiishukela va ntthatta khut-tuluwa khufwa. ³³ Atthu apale aari oshukaaye kuluwe epile khutthira khulawa mmuti, khulupa zooshi mpakha epile zaarettikhaniyeeyo khwa anamasheethwani apale awiri. ³⁴ Atthu ooshi a mmuti mphule khusala alawa okutthanana Yinsa, nonsikana, khunvekela amuuzaaka yoori aleemo mmuti mwaya.

9

Yinsa oninvonisa nasupiyaani

¹ Yinsa noopakhira mmwaatiya, khulokha ntthatta khweetta sitati ya owawe. ² Khutiisiwa nasupiyaani attattikheliwe va nrepa. Wakathi ooniyeovo amini ya atthu apale antiisiyeeyo, khumuuzu nasupiyaani otule yoori: “Ominyale, mwanaka! Twampi zavo zaswaamihowi.”

³ Noolupa toowo anamanozela a kano khwaaza waapa araka: “Ntthu otu onnta okufuru!”

⁴ Yinsa noojuba etthu aari wuupuwelaaye yo, khuwoza yoori: “Mwaasa wa niini mweeyo muupuwelaka nroho mwenu vitthu zootakhala? ⁵ Apho yookhwuya ti tiivi? Olupa yoori: ‘Waswaamihowi twampi zavo,’ ama olupa yoori: ‘Olankhe weettette?’ ⁶ Mwijuwe yoori Mwaana wa Pinaatamu onaaye ruhusa ya oswaamihowi twampi vathi apha” khumuuzu nasupiyaani otule yoori: “Olankhe, othuule nrepa lawo olawe owawo.” ⁷ Khulankha khusala alawa owawe. ⁸ Paata ya atthu woona vitthu epile khuwaapattha woova, khunsifu Nluku, awenkhiyeeyo anaatamu ofwalume nkhamma opo.

Okhuweiwa wa Matewuzhu

⁹ Elottelanaka Yinsa khulaawo okhule waya, khumoona mwinyi mmote aniiithiwaaye Matewuzhu eekhaliye ariphisaka lumpuru, khumuuzu yoori: “Okilote!” Ye khulankha khunlotta.

¹⁰ Yinsa eekhaliyeovo va meeza owawe Matewuzhu, anamariphisa lumpuru enkeene na anatwampi aatiye khwiikhala attaapho vamote na anakhiyon awe. ¹¹ Mafwarizeewu nawoona toole khuwoozela anakhiyon awe araka: “Mwaasa wa niini mwaalimu enu ajaka na anamariphisa lumpuru na anatwampi?”

¹² Yinsa noosiila, khulupa yoori: “Akumi khaninhithajiya tothoro, ila alwele. ¹³ Mwilawe mwanozeliwe maana a ntakhuzi linlupaaye yoori: ‘Kin-takha ttakaraka, khahiyi twaha.’ Maana miyo akawaateeliye anashariya, kawaateeliye anatwampi.

Yinsa ontaa wuuzeliwa monkoni wa ofuka

¹⁴ Aphano khuta anakhiyoni a Yaahaya omuuzela yoori: “Fweeyo na mafwarizeewu ninfuka, khi anakhiyoni awo ahisala afuka mwaasa wa niini?”

¹⁵ Yinsa khujipu yoori: “Enretteya toovi ofuka anamalaleyiwa harusi, namaposa ari attaapho? Zinlawa zafiye sikhu anttelaaye othuuliwa mposi, na siikhу zaya ethiipo anlawa afuke.

¹⁶ “Khina antthaaye yaapa ya tarapu pheeya kuwo ya raku, maana entta ofutthela kuwo etile evaruwe. ¹⁷ Wala khinthuliwa viinyu pheeya khuthiiwa ntompwiyo ya shapala ya raku, nooretta toowo entta ophutuwa, viinyu yiittikhe, ttompwiyo yaya eharipweye. Ila viinyu pheeya entthiwa ntompwiyo pheeya, na toowo zoopiiri zintta opweheya.”

Owahi wa Yinsa monkoni wa olwele na ofwa

¹⁸ Ettaka ottakhula ethiipile, khutavo ntunkhulu wa tiini, khunkokhorela na khumuza yoori: “Mwanaka wankha afwa nasaapi ethiiti; nlawe wantheele nkhone ontaa osisimuwa.” ¹⁹ Yinsa khulankha khusala anlotta na anakhiyoni awe.

²⁰ Attaaphale, aarivo muukha mmote aarina nyaakha khumi na miwiri emwiittikhaka taamu, khuta onyoko wa Yinsa khusapa ajapi yawe. ²¹ Maana ye eettiye ojilakelela yoori: “Kisaparu ajapi yawe paasi, kintta ovona.”

²² Azukuluwiyeovo Yinsa khumoona khumuza yoori: “Ofurahi, mwanaka wankha; amini yawo yoovonisa. Wakathi otthuupule muukha otule khwiya woovona”.

²³ Afiiyeevo owawe ntunkhulu wa tiini khuwaasiila atthu eepaka liipo la miifwa na enkeene ari ootapanyeya, ²⁴ Yinsa khuwooza yoori: “Mwisaruwe! Otu khafweeni, ontaa olala.” Ooshi khusala antheya. ²⁵ Paata ya atthu apale osusa, ye khuvira khunkholela nkhone, khunlansa. ²⁶ Hapari epile khumwazeyela nti opule wooshi.

Ovoniisiwa wa ananhooni awiri na mmote woohittakhuli

²⁷ Noolaavo aphale vaya, ananhooni awiri khusala anlotta akhuwaka araka: “Mwaana wa Daawuuda, noonele huruma!”

²⁸ Yinsa noofiya owawe, ananhooni apale khumwaattama, ye khuwooza yoori: “Mweeyo mwinkhupali yoori miyo kinaaye owahi wa oretta epo zaya?” Yo khujipu yoori: “Ayo, Mbwana!” ²⁹ Yinsa khuwaasapa maasho aya araka: “Erettikhane khwa matakhelo amini yenu!” ³⁰ Maasho aya khwiya ovona. Aphano Yinsa khuwooza na kuvu yoori: “Phoole ahiiyeye anttelaaye ojuwa epi.” ³¹ Yo khulawa, khumwaza hapari zawe epile nti opule wooshi.

³² Paata ya olaavo aphale, namasheethwani ahaari ottakhulaaye khutiselili Yinsa. ³³ Noomwiikara sheethwani otule, ye khwaaza ottakhula. Khunti etile khwiya yooshanka na khuri: “Khinarettikhane vitthu nkhamma epi Ezirayiilu.

³⁴ Ila mafwarizeewu aari olupa yoori: “Oniikara masheethwani khwa owahi wa mfwalume wa masheethwani.”

Anakhaazi vattitthiiru

³⁵ Yinsa aari weettetta sitati zooshi na mmwanttiwa. Ye aari osomisa mmasinakooka, na olaleya hapari monkoni wa ofwalume wa Nluku, na ovonisa wakhula nanna ya marati na moolwele mawulweene a atthu. ³⁶ Paata ya woona khuntti zawaatta, khoonela huruma, maana zaari zoovelavela na zawanswiwa, nkhamma pwittipwithi zoohiina nshuki. ³⁷ Aphano khuwooza anakhiyoni awe yoori: “Wuurula nwulweene, ila anakhaazi vattithiiru. ³⁸ Apho, mwinvekele Mweenyewe wuurula awaaperekhe anakhaazi a wuurula.”

10

Yinsa oniwaaruma anakhiyoni awe khumi na awiri

¹ Khuwaakhuwela anakhiyoni awe apale khumi na awiri, khuwenkha owahi wa wiikara masheethwani, na ovonisa moolwele na marati ooshi.

² Apa mazina a anakhiyoni khumi na awiri: Wamwanzo, Simawu, anjuwaniaaye nzina la Pheeturu, na ttwiye Antere; Tiyaaku, mwaana wa Zepeteewu, na Yaahaya ttwiye; ³ Filipe na Paturumeeuw; Tome na Matewuzhu, namariphisa lumpuru; Tiyaaku mwaana wa Alufeyu, na Tadeewu; ⁴ Simawu Zelooti, na Yuuda Eshikariyoote, othuuto anzinkuliyeyo.

⁵ Yinsa khuwaaruma apale khumi na awiri na khuwooza yoori: “Mwiheette wa amalapo, wala mwiheette hatha sitati moote ya a Samariyya. ⁶ Ila khapula mweettele pwittipwithi zawaashikha za Ezirayiliu. ⁷ Wakhula vahali mwineettaavo, mwitafusiri hapari epi mwiraka: ‘Ofwalume wa pinkuuni ori kharipu!’ ⁸ Mwiwaavonisaka anamarati, mwiwaasisimulaka ananfwa, mwiwaat wahareshaka anamaharaja, mwiikare masheethwani. Mweeyo mwapokhera mahala na mwina yawinkha mahala. ⁹ Mwihithuule hatha thahapu, wala feeta, wala khoopiri mmwizako mwenu; ¹⁰ Mwihithuule hatha kuwo kiina, wala jampali, wala pakhora, maana nakhaazi eninsuhi wiiyana ethu yoojiwa yawe.

¹¹ Na wakhula sitati ama mmwanttiwa, mwimweekese ntthu woojishitahi, mwiikhale owawe othuuto mpakha malawelo enu. ¹² Amana mwiviranya, mwicelise. ¹³ Nkhama atthu a nyuupa etile eeya oosuhi, heeri yenu mweeyo yiiye vamote na-yo; amana ahisuhi, heeri yenu ti yyuruteleni. ¹⁴ Amana ntthu ahuupokherelini na khuhitakhi osiila mattakhuzi enu, mwitathe lifufu la mmoolu mwenu mwileemo nnyupa mwaya mphule ama nsitati mwaya mphule. ¹⁵ Miyo kiniwuuzani khweele yoori, siikhu ya ophukiwa enttela wiiyavo tthakaraka khwa Sotooma na Komoora zayita sitati ya eto.

Olupathihi na ohoowa

¹⁶ “Miyo kinuurumani mweeyo nkhamma pwittipwithi vakatthi wa miji; nakatalikha mwikiye alavilavi nkhamma nyookha na oohiina zootakhala nkhamma jiwa. ¹⁷ Mwiyyane phoole, maana atthu anlawa oottheni nnyupa woophukaniwamo na wuujaphani mmasinakooka mwaya. ¹⁸ Mwaasa wa miiyo, mwinlawwa mwalawaniwe vakatthi wa misatoro na afwalume, yoori wiiye oshaahiti anttelaaye orumeyela, yo na amalapo monkoni wa hapari zaka. ¹⁹ Ila amana oofukelani, mwihishanke ethu yoolupa, ama yooretta. Wakathi aya opo, Nluku onttela owinkhani mattakhuzi olupa, ²⁰ maana khahiyi mweeyo mwinttelaaye ottakhula, ila Rooho ya Papeenu ti enttelaaaye ottakhula khwa mweeyo.

²¹ “Ttwi mmote onlawa anleve ttwiye yoori ooliwe, na paapa onleva mwanaawe; aana anlawa awaazukuluwele apapa zaya na awoole. ²² Attu ooshi anttela owiinani mwaasa wa miiyo, ila otule anttelaaye ovilela mpakha mwiisho onta wuusurukha. ²³ Amana mwififya nsitati khulupatthiwa, mwitthirele sitati kiina. Weekhwheelee miiyo kiniwuuzani yoori khawinteele wiisha ozukulela Ezirayiilu yooshi Mwaana wa Pinaatamu ahiteeni.

²⁴ “Nakhiyoni khaninziti mwaaliimu awe, wala karumeya khaninziti mbwana awe. ²⁵ Nakhiyoni ona yoofurahi amana anfiyela mwaaliimu awe, na karumeya amana anfiyela mbwana awe. Moone, amana mweeneyewe nyuupa attukhaniwa khutthajiva Belezibuu, khi ajamaaze khatepeeni!

²⁶ “Nakataalikha mwihiwoove apo aya. Khayiivo yoottiyeleliwa ehintee-laaye othoonyeziwa wala yoovithiwa ehinteealaaye ojuwiwa. ²⁷ Eti kiniwu-zaani n'yiiza mwilupe nthana. Na etile mwisiiliyeeyo sirini mwaamuuze vatulu wa nyuupa. ²⁸ Mwihiimoove otule anuulaaye mwiili, ahina owahi wa wuula nafusi. Khapula mwimoove otule anwahaaye otapanya mwiili na nafusi khweeselela mothooni. ²⁹ Anyannyi awiri anuuzanyiwa nzurukhu mmote, ila khina mmote ankuelaaye vathi Papeenu ahitakheeni. ³⁰ Hatha nyuuli za mmwishwa mwenu zooshi pi za waalakiwa. ³¹ Nakataalikha mwihoove! Mweeyo mwinaaye fwayita zayita anyannyi.

³² “Wakhula otule antukhurwaaye yoori ti waka vakatthi wa atthu, na miiyo kintukhuru khwa ye, vakatthi wa Paapa ariye pinkuuni. ³³ Ila otule anikikatthalaaaye vakatthi wa atthu, na miiyo kinttela onkathala vakatthi wa Paapa ariye pinkuuni.

³⁴ “Mwihaakanyere yoori miiyo katiisa heeri voolumwenku; akitiseeni heeri, katiisa phanka. ³⁵ Miiyo kata yoori oomane mwaana na papaawe, mwaana wankha na mamaawe, namaraliwa na nkhwewe. ³⁶ Maatuvi khaamili a ntthu anlankha vakatthi wa ajamaaze. ³⁷ Otule animphetaaye mamaawe ama papaawe zayita miiyo khansuhi wiiya namalottela aka; otule animphetaayé mwanawe zayita miiyo, khansuhi wiiya namalottela aka. ³⁸ Otule ahinvikelaaye nsalapa awe akilotta, khansuhi wiiya namalottela aka. ³⁹ Otule aneekesaaye ohaayi awe onta omwaashikha, na otule onimwaashikhaaye ohaayi awe mwaasa wa miiyo onta opattha.

Tthuvo

⁴⁰ “Wakhula otule anuupwekherelaanini akipwekherela miiyo, na otule anikipwekherelaaye ampwekherela otule akirumiyeeyo. ⁴¹ Otule animphewkherelaaye napiyu mwaasa wa ye wiiya napiyu, ompwekhera tthuvo ya napiyu; otule animphewkherelaaye nashariya mwaasa wa ye wiiya nashariya, ompwekhera tthuvo ya nashariya. ⁴² Na wakhula otule animwinkhaaye nsimaana hatha nkhamma koopho ya maati oozizima, mwaasa wa ye wiiya nakhiyoni aka, kiniwuza khweele yoori oto aya onlawa apwekhere tthuvo yawe.”

11

Yinsa na Yaahaya namoosa

¹ Paata ya wiisha owaanozela anakhiyoni awe khumi na awiri, Yinsa khusala alawa osomisa na ofafusiri sitati za Kalileya.

² Yaahaya, paata ya osiila ari nkalapooso vitthu aari oreettaazo Al-Masiihu, khuwaaruma anakhiyoni awe olawa omuuzelaa yoori: ³ “Ti weeyo otule aari weettelaaye ota, ama nimweekesele nkina!”

⁴ Yinsa khuwaajipu araka: “Mwiruti mwamuuze Yaahaya epi mwin-silaaye na mwinoonaaye: ⁵ Ananhooni anoona, anamarakala aneettetta, anamaharaja antta otwahareshiwa, ananhisili ansiila, ananfwa an-sisimuwa, na hapari zooshapweya antafusireliwa asikhini. ⁶ Ooparikhiiyiwa pi apale ahinikoonanaaye hatha ethu ya owaakwakwanttula.”

⁷ Aphano noolaavo anakhiyoni apale a Yaahaya, Yinsa khusala oozela khuntti etile monkoni wa Yaahaya yoori: “Mweetteliye woona-ni n'yaara? Teketthe yiiniswaka ti pheevu? ⁸ Ama, mweetteliye omoona ntthu awaliye kuwo zooshapweya? Moone, apale anwaalaaye kuwo zooshapweya ani-khala mmanyupa wa afwalume! ⁹ Nka khuuzeni, mweetteliye woona niini? Napiyu? Wekhweele, miiyo kiniwuzani yoori anziti napiyu. ¹⁰ Otu ti otule yaatikiweeyo monkoni wa ye yoori:
‘Moone, kinlawaa kamperekhe karumeya aka omaasho wawo;
 yoori atthenkeze tarikhi yawo.’

¹¹ Kiniwuzani khweele yoori: Khwa aana ooshi avokoliweeyo ti aakha, khapuweenivo hatha mmote wonziti Yaahaya Namossa. Ila woopushuwa muufwalume wa pinkuuni nwulweene zayita ye. ¹² Waaza siikhu za Yaahaya Namossa mpakha leelo, Ofwalume wa pinkuuni ontta woojopholiwa, apo aya anjopholaaye anthuula. ¹³ Maana Manapiyu ooshi na Kano za Munsa za ahupiri mpakha yenzi ya Yaahaya. ¹⁴ Na amana mwitakha okhupalela, ye ti Aliyaasi otule aari weettelaaye ota. ¹⁵ Otule ariina mashiilo ti asiile!

¹⁶ “Khapila eti kilattanisane niini? Enlattanana asimaana eekhaliye va parasa eettaka osheza na onyakula na ashirikha aya:

¹⁷ ‘Fweeyo noovumiseleni kuruneetha,
 ila mweeyo khuhiiini;
khwiipa liipo la huzuni,
 ila mweeyo khuhilili.’

¹⁸ Khuta Yaahaya woofuka na ahinnywaaye viinyu, mweeyo mwinri: ‘Ye on-aaye masheethwani! ¹⁹ Ata Mwaana wa Pinaatamu anjaaye na annywaaye, mwinri: ‘Otu nsokho na nnywachi, nshirkha wa anamariphisa lumpuru na anatwampi.’ Ila ojuwa onthoonyezeya khwa khaazi onikholeliwaaye.”

Phoole khwa sitati zihinthupwiyaaye

²⁰ Aphano Yinsa khwaaza omaruwela sitati epile aviriyeemo khurettamo minjuza zawe zawaatta, maana atthu aari wiikhalaamo khathupwiyyiye.

²¹ “Phoole weeyo, Korazini! Phoole, weeyo Betezaiita! Maana eriwaka Tiiru na Sitooni zeettiye orettiawo minjuza epi mwiretteliweeyo mweeyo, apale aniikhalaaye ottuukho nka athupwiye raku, khuwala saakhu na khujivaaza fuutha! ²² Ila miiyo kiniwuzani yoori siikhu ya ophukiwa enteela wiiyavo tthakaraka khwa Tiiru na Sitooni zayita mweeyo. ²³ Khi weeyo Kafwaranaawu, onttela oweziwa mpakha pinkuuni? Wala, weeyo onttela weeseleliwa motthooni! Eriwaka minjuza zirettiweeyo vakathhi vawo zeettiye orettiwa Sotooma, zaari weettela opharelela mpakha leelo. ²⁴ Ila miiyo kiniwuuza yoori siikhu ya ophukiwa enteela wiiyavo tthakaraka khwa Sotooma zayita weeyo.”

Ovumula wa apale ooshokhera

²⁵ Wakathi otthupule Yinsa khulupa yoori: “Miiyo kinuusifu Paapa, Mb-wana wa pinkuuni na vathi, maana weeyo wawaavithela vitthu epi ajuwi na asomi, na khuwaathoonyeza apa attiithi. ²⁶ Khweele, Paapa, ti nanna

waatakhiyeezo. ²⁷ Vitthu zooshi kenkhiwa ti Paapa. Khina aninjuwaaye Mwaana woohiiyi Paapa, na khina aninjuwaawe Paapa woohiiyi Mwaana na otule mwaana anintakhelaaye yoori anthoonyeze. ²⁸ Mwikiteele miiyo mooshi mweeyo mwiiyiye ooshokhera na ooolemliwa, miiyo kintta wuuvumulisani. ²⁹ Mwithuule tthentte yaka na mwikeezele, maana miiyo kiwoonyamala na woojipushuwisa nroho, mweeyo mwintta opattha ovumula wa nafusi zenu. ³⁰ Maana tthentte yaka ti yookhweya na mapwattha aka pi ooveya.”

12

¹ Wakathi otthuupule Yinsa khusala avira mmashapa wa tiriku, siikhu ya saapatu. Anakhiyonи awe khuwaakhola jala, yo khwaaza okathula misasi za tiriku arafunaka phunje zaya. ² Mafwarizeewu nawoona epile zaya, khu-muuza Yinsa yoori: “Owoone anakhiyonи awo anretta ethtu ekhattaziweeyo orettiwa saapatu.”

³ Ye khujipu araka: “Mweeyo khamwisomeeni ethtu arettiyeeyo Daawuda wakathi ye na ashirikha awe aakholiweeyo jala? ⁴ Ye eettiyе Nnyupa ya Nluku, khurafuna phaawu na ashirikha awe enkhiweeyo Nluku, ethtu ya-haari otakhisiwaaye orettiwa, ila aariina ruhusa yooretta aari mahaakhimu a tiini paasi. ⁵ Ama mweeyo khamwisomeeni nkano za Munsa yoori saapatu, anamalokozela a tiini aavonyiye kano Nnyupa Woosifwiwamo, siikhu yaya eto, ila khuhina hatha paathuli? ⁶ Miyo kiniwuus yoori apha ata otu azitiyeeyo Nyuupa Yoosifwiwamo. ⁷ Ila eriwaka mweeyo mwaari ojuwa maana a mattakhuzi anraaye: ‘Kintakha huruma akintakha twaha,’ khamwaari onhukhumu ntthu ahina paathuli. ⁸ Maana Mwaana wa Pinaatamu Mbwana wa saapatu.”

⁹ Khulaavo aphale vaya khweetta nsinakooka yaaya atthaapale. ¹⁰ Nttumphule aarimo mwinyi mmote woorakala nkhono. Aphano attu akina aari otakhaaye onlokoveza Yinsa yoori: “Ti ya halaali monkoni wa kano ovonisa saapatu?”

¹¹ Ye khuwaajipu yoori: “Paani wa mweeyo, amana eeyana pwittipwithi yawe ekwela valiphotto saapatu, ahinlawaaaye okhola alazavo? ¹² Ntthu ona fwayita khuluyeene zayita pwittipwithi! Nakhataalikha ewaapho ruhusa yooretta ethtu yooshapweya saapatu.”

¹³ Aphano khumuza mwinyi otule yoori: “Wookole nkhono awo.” Ye khookola, khuvonisiwa, khwiyya sawasawa na opu nkina. ¹⁴ Ila mafwarizeewu apale khusaruwa khusala awaza shawuri za omuula Yinsa.

Karumeya woothawuliwa ti Nluku

¹⁵ Yinsa noojuwa shawuri zaya epile, khulaawo okhule waya. Attu enkeene khusala anlotta, ye khuwaavonisa alwele ooshi aariivo vakatthi wa attu aya apale, ¹⁶ na khuwooza yoori ahilupe hatha ethtu monkoni wa ye. ¹⁷ Eto yaarettikhaniye yoori eretteye etile yaalupiweeyo ti napiyu Ezaaya yoori:

¹⁸ “Otu ari apha karumeya aka, kinthawuliyeeyo,
 mphetamine aka, anfurahisaaye rooho yaka,
kanttheela nafusi yaka,
 ye onteela olaleya ophukiwa wa attu ooshi.

¹⁹ Khanteela okeetisana wala onyakula,
 khina anttelaaaye osila huula yawe mmatarikhi.

20 Khanteela ovuja ttekethe yoomanyeya,
wala khanteela ozimisa mweeke wootthuwela,
mpakha athuule oshintta khwa shariya.

21 Amalapo ooshi anttela wiiyana nroromelo khwa nzina lawe.”

Owahi wa Yinsa khwa wiikara masheethwani

22 Paata ya toowo, khutiiseliwa namasheethwani woohooni na khaari ottakhula, Yinsa khunvonisa, khwaaza woona na ottakhula. **23** Atthu ooshi khwiyya ooshanka channu khusala oozelana yoori: “Khahi mwaana wa Daawuuda otu?”

24 Mafwarizeewu akina noosiila toowo khuri: “Otu oniikara masheethwani paasi khwa owahi wa Belezibuuli, mfwalume wa masheethwani.”

25 Aphano Yinsa noojuwa ethu aari wuupuwelaaye yo, khuwooza yoori: “Wakhula ofwalume wa waawanyeya khusala wuumana otthuuporu oniiya wootapanyeya, na wakhula sitati ama nyuupa yawaawanyeya ethitoru khiniiyavo. **26** Nkhama Epiliisi onimwiikara Epiliisi, eetta ojaawanya ot-thweru. Toowo ofwalume awe onteela wiiyavo toovi? **27** Nkhama miiyo kiniikara masheethwani khwa owahi wa Belezibuuli, khi aaneenu anikara toovi? Tiito aaneenu atthaapo ti anttelaaye wuuphukani mweeyo. **28** Ila nkhama kiniikara masheethwani khwa Rooho ya Nluku, eto enthoonyeza yoori Ofwalume wa Nluku woofiyelani.

29 “Ama nthu onvira toovi nnyupa wa nwali khuthuulamo maali zawe ahaazeeni khapula onfuka? Toowo phi oniwahaavo wiiya vitthu za nnyupa mwawe.

30 “Otule ahi vamote na miiyo ontta okuumanana, na otule ahinkusanyaaye khwa miiyo ontta omwaza. **31** Etthiipo miiyo kiniuuuzani yoori: Twampi na kufuru zooshi za anaatamu zinswamihowi, ila okufurwela Rooho Ttakathiifu khunswamihowi. **32** Wakhula otule anlupaaye ntakhuzi la omuumanana Mwaana wa Pinaatamu onswamihowi, ila otule anttakhulaaye wawuumananavo Rooho Ttakathiifu khanswamihowi, waaza nasaapi eti mpakha okhu ninttaawo.

33 “Muutthi wooshapweya oniima mishumo zooshapweya, muutthi wootakhala oniima mishumo zootakhala, maana wakhula muutthi onjuwiya khwa mishumo zaya. **34** Ojama wa nyookha, enretteya mweeyo ootakhala rooho, ottakhula vitthu zooshapweya? Maana milomo enttakhula etile enjiyaaye varoho. **35** Nthu wooshapweya rooho, mmujuju mwawe ensarulamo vitthu zootakhala. **36** Ila miiyo kiniuuuzani yoori, siikhya ya ophukiwa, atthu anlawa arettiwe hisapu mwaasa wa mattakhuzi ooshi ohiina fwayita aari olupakaaye. **37** Maana khwa mattakhuzi enu mwinteela wonkokha na khwa atthaapo mwinteela ohukhumwiwa.”

Alama ya Yuunusa

38 Aphano mafwarizeewu akina na anamanozela a kano khulupa yoori: “Mwaaliimu, nintakha woona alama ya minjuza yoorettiwa ti weeyo.”

39 Ye khujipu araka: “Khapila yootakhala na yooraruwa enveka alama ya minjuza, ila khinteela winkhiwa hatha moote ya ohiyi alama ya napiyu Yuunusa. **40** Maana nkhama etthiipo Yuunusa ekhaliyeeyo siikhu ttatthu nthana na osikhu mmaththupo wa swi, khwa ethiipo Mwaana wa Pinaatamu ontela wiikhala siikhu ttatthu nkhapuri. **41** Atthu a Neniive anlawa alankhe siikhu ya ophukiwa, ookwiseleni paathuli mweeyo, maana yo athupwiya twampi zaya paata ya osiila tafusiiri ya Yuunusa, na aphano ori apha otule eeyiyeeyo nwulweene zayita Yuunusa. **42** N'hano wa Kusini onlawa alankhe

siikhu ya ophukiwa ookwiseleni paathuli mweeyo, maana ye alankha peeti-wene oteela osiila ojuwa wa Selyimaana, ila nasaapi otu ariiye apha anziti Selyimaana.

⁴³ “Amana sheethwari arlawa ntthu, onvira nhali woohimo maati eekesaka vhali woovumulavo, ila amana ahipathivo. ⁴⁴ Aphano onri: ‘Kinrutela nyuupa ethiitile kilankhiyeeyo.’ Noofiya khusikana nyuupa eheet-tweenimo, ori wooseeliwamo wawaattaleliwamo saana. ⁴⁵ Ontta oruti khulawa khuaatana masheethwani sapa ootepa otakhala, khweettamo khusala eekhala nttumpho, ntthu otule khweetta wootepa khuziti kхиima etile aariyeeyo raku. Na enttela orettikhana ethiipo khwa khapila eti.”

Maama wa Yinsa na attwiize

⁴⁶ Yinsa nalelo eettaka ottakhula na khuntti etile, mamaawe na attwiize aarettiye ari vaje, antakhaka yoori anttakhulane. ⁴⁷ Ntthu mmote khumuza yoori: “Mamaawo na attwiizo ari vaje antakha ottakhulana weeyo.” ⁴⁸ Ye khujipu yoori: “Maama ti paani? Wala attwiizaku ti paani?” ⁴⁹ Khookolela nkhono awe phantte ya anakhiyoni awe khulupa araka: “Maama na attwiizaku pi apa ariiye apha. ⁵⁰ Maana otule anrettaaye matakholo a Paapa ariiye pinkuuni, oto ti ttwiyyaku, nlupwaaka na ti maama.”

13

Nlikaniso wa namazala

¹ Siikhu ethiitile Yinsa khulankha owawe khulawa nshini wa ntthatta. ² Khuzukuleliwa pi atthu awaatta, aphano ye khupakhira mmwaatiya khwiikhala. Atthu apale khweemela vapatari. ³ Ye khusala awasomisa khwa milikaniso, araka: “Namalima aalawiye ozala. ⁴ Amwazaka peewu yawe, phantte kiina khukwela nshini wa tarikhi, anyannyi khuta khuja. ⁵ Kiina khukwela vahali aariivo mawe, vahali laarivo nttophe vattithiiru; nasaapiru khootha, ila wiiya nttophe ntthile khaleechiye. ⁶ Aphano noopuwa njuwa khulukula na khuuma; maana khazaarin mitathaari. ⁷ Peewu kinoko khukwela vanyiwa, khuwula vamote na nyiwa, khurapeliwa pi nyiwa. ⁸ Kiina khukwela vanshaka wooshapweya, khwiima mishumo zooshapweya, miya, mikina siithiini na talaathiini wakhula mmote! ⁹ Otule ariina mashiilo ti asiile.”

¹⁰ Anakhiyoni awe khunsusela khumuuzela yoori: “Mwaasa aya niini atthu apa owaattakhulelaka khwa milikaniso?”

¹¹ Ye khuwaajipu: “Mweeyo mwenkhiwa ojuwa siiri za Ofwalume wa pinkuuni, ila yo wala. ¹² Maana, otule ariina, ontela winkhiwa, oniiyana zawaatta. Ila otule ahina, hatha etile ariinaaye ontta onyakanyiwa. ¹³ Tiito miyo kiniwoozaaye khwa milikaniso:

maana yo ana maasho ila khanoona,
ana mashiilo ila khansiila, na wala khiniweeleya.

¹⁴ Khwa yo wamariseleya ohupiri wa Ezaaya onlupaaye yoori:

‘Hatha nkhamma mwasiila
khiniweeleyani;
hatha nkhamma moona
khamwinjuwa.

¹⁵ Maana rooho za atthu apa pi zookhijili,
attiyela mashiilo aya

na khuphunya maasho aya,
 eriwaka khasaari ethiito,
 aari owahi woona na maasho aya,
 na osiila na mashiilo aya na oweeleya va rooho vaya
 khurutela mmakhono mwaka,
 keetta owaavonisa.'

16 Ila ooparikhiiya maasho enu mweeyo, maana anoona; na mashiilo enu, maana ansiila. **17** Miiyo kiniuwuzani khweele yoori: manapiyu enkeene na anashariya aatakhiiye woona epi mwinoonaazo, ila khuhooni, na osiila epi mwinsiilaazo ila khuhisiili.

18 "Nakataalikha mwisiile na mwijuwe maana a nlikaniso wa namazala:
19 Amana ntthu asiila ntakhuzi la Ofwalume khuhimweeleyi, Ntakhali ti antaaye khulazavo etile yaazaliweeyo nroho mwawe. Eto peewu etile yaakweliyeyo nshini wa tarikhi. **20** Etile yaakweliyeyo vahali aariivo mawe pi apale ansiilaaye ntakhuzi nasaapiru khupokhereela na furaha.
21 Ila mwaasa wa ohiina mitathaari eenyeweru, anlipalipa khwa wakathi vattithiiru. Amana epuwelela miswipa ama lupattha mwaasa wa ntakhuzi la Ofwalume anlikha nasaapiru amini yaya. **22** Etile yaakweliyeyo va nyi-iwa, pi apale ansiilaaye ntakhuzi, ila mwaasa wa tafawuthi za ohaayi, na ottettekha wa maali entta owaakhupa, ahifyelelaka wiima mishumo. **23** Ila etile yaakweliyeyo vahali wooshapweyavó pi apale ansiilaaye ntakhuzi khuweeleya, khwiima mishumo miiya, khwiima siithiini, talaathiini khwa muutthi mmote."

Nlikaniso la ntakhatakha

24 Yinsa khuwooza nlikaniso nkina araka: "Ofwalume wa pinkuuni ori nkhamma ntthu mmote azaliyeyo peewu yooshapweya mmashapa mwawe. **25** Osikhu mmote, atthu ooshi eettaka olala, khuta atuvi vakatthi wa tiriku khulalavo ntakhatakha, khulawa. **26** Wakathi tiriku ewuliyeevo khupuwa misaasi zaya, naye ntakhatakha khupuwa misaasi zaya.

27 "Akarumeya a mweenyewe nshapa khulawa wa mweenyewe khumuuba yoori: 'Mbwana, mweeyo mwaazaliye peewu yooshapweya mmashapa mwenu. Khi aphano ntakhatakha lapuwa vayi?' **28** Ye khujipu yoori: 'Atuvi ti arettiye epo zaya.' Akarumeya apale khumuuzela yoori: 'Mbwana mwintakha fweeyo nalazemo?' **29** Ye khujipu yoori: 'Wala, maana, amana mwikhulakamo ntakhatakha nttho, mwintta okhula vamote na tiriku. **30** Mwilikhe ziwulele vamote mpakha wakathi wa wuurla. Kintta owooza anamuurula yoori: "Mwikusanye khabula ntakhatakha mwifuke mashittha likhoziwe; mwikusanye tiriku mwitthe va sakafu vaka.'"

Nlikaniso wa phunje ya Samuli na Fwaramento

31 Na khuwooza nlikaniso nkina araka: "Ofwalume wa pinkuuni ori nkhamma phunje ya samuli, ntthu anthulaaye khuzala mmashapa mwawe. **32** Eto ttiitthiiru zayita peewu zooshi, amana owula onziti miitthi zooshi za mmashapa, anta anyannyi ojeka viaaro n'virapi mwaya." **33** Khuwooza nlikaniso nkina araka: "Ofwalume wa pinkuuni ori nkhamma fwaramento muukha anthuulaaye khuphakanya na ofu wa tiriku wa waatta, wooshi khujakhuwa. **34** Yinsa aari wuuza khunti etile, khwa nlikaniso. Weekhweele, khina ethtu moote aari owoozaaye woohiiyi khwa nlikaniso. **35** Eto yaari orettkhana yoori eretteye etile yaalupiweeyo ti napiyu yoori: "Kinteela ofunula milomo zaka khwa nlikaniso,
 na olaleyaa vitthu zoovitheya waaza wumpiwa wa olumwenku."

Otaphuleliwa wa nlikaniso wa ntakhatakha

³⁶ Aphano ye khuwaalikha atttu apale khulawa owawe. Anakhiyoni awe khumwaattama khunvekela yoori: "Oneeleze nlikaniso wa ntakhatakha."

³⁷ Ye khujipu yoori: "Otule aazaliyeeyo peewu wooshapweya ti Mwaana wa Pinaatamu." ³⁸ Nshapa olumwenku, peewu yooshapweya aana a Muufwalume. Ntakhatakha aana a sheethwani. ³⁹ Atuwi aazaliyeemo ti sheethwani. Wuurula, mwiisho wa wakathi, akarumeya a wuurula malayikha. ⁴⁰ Nkhama ethiipo ntakhatakha linuuruliwaazo khukhoziwa va moottho, enttela wiiya ethiipo mwiisho wa olumwenku. ⁴¹ Mwaana wa Pinaatamu ontela oruma malayikha awe, alazemo muufwalume mwawe zooshi epile zookwakwanttula, na apale anrettaaye vitthu zootakhala.

⁴² Aweeselele va njocho la moottho, attaapho ontela wiiyavo olila na oluma meeno. ⁴³ Aphano anashariya anttela waara nkhamma njuwa muufwalume wa Papaaya. Ariina mashiilo, ti asiile."

Nlikaniso wa maali zoovithiwa na liwe la fwayita

⁴⁴ Ofwalume wa pinkuuni ori nkhamma njuju loovithiwa mmashapa. Ntthu mmote, khulawa khusikana, na ye khuvitha opheya. Mwaasa woofurahi khulawa khuuzanyisa vitthu zawe zooshi aarinazaazo khuuzanya nshapa ntthile. ⁴⁵ Theenya Ofwalume wa pinkuuni ori nkhamma nakusiyanti anekeesaaye mawe ootafikhana. ⁴⁶ Noosikana liwe la fwayita khuluyeene, khuuzanyisa vitthu zooshi aarinazaazo khuuzanya."

Nlikaniso wa ntthavi

⁴⁷ "Ofwalume wa pinkuuni ori nkhamma ntthavi laweesiwa mpahari khula wakhula jaati ya swi. ⁴⁸ Amana liitaala, anamajija anfutthela vathi. Aphano yo khukusanya swi epile zooshapweya khuttha mmakapaja, ila epile zoohishapweyi khweesela. ⁴⁹ Enttela orettikhana ethiipo mwiisho wa olumwenku. Malayikha anteela owaaphakula ootakhala rooho na anashariya, ⁵⁰ aweeselele va njocho la moottho apale ootakhala rooho, attaapho ontela wiiyavo olila na oluma meeno."

Njuju li pheeya na la raku

⁵¹ Aphano Yinsa khuwoozela yoori: "Zaweeleyani vitthu zooshi kilupiyeeyo?" Yo khujipu yoori: "Aaa!" ⁵² Ye khuwooza yoori: "Tiito wakhula namanozela a kano anozeliweeyo monkoni wa Ofwalume wa pinkuuni onlattanana mweenyewe nyuupa anlazaavo va njuju vawe vitthu pheeya na vitthu zaraku."

Yinsa onkatthaliwa nti wa Nazareeti

⁵³ Paata ya Yinsa wiisha olupa milikaniso epile, khulaawo okhule waya. ⁵⁴ Khufiya sitati yawe, ohali aari wiikhalaawo. Ye khwaaza owaasomisa atttu nsinakooka. Atttu ooshi khwiya ooshankisiwa, khusala oozela yoori: "Ojuwa opu apattha yayi na owahi wa oretta minjuza?" ⁵⁵ Khahi mwaana wa kalapinteero? Nzina la mamaawe khahi Mariyamu? Attwiize khayi Tiyaaku, Yuusufu, Simawu na Yuuda? ⁵⁶ Alupuwe ooshi khaniikhala nttumphu? Khi vitthu epi apattha yayi?" ⁵⁷ Atttu ooshi khuhinkhupali. Ila ye khulupa yoori: "Napiyu ti wooshitahiwa phantte zooshi, ila mmuti mwawe na owawe khanshitahiwa." ⁵⁸ Yinsa khaarettiye minjuza zawaatta mmuti mphule, maana yo khaarina amini.

¹ Wakathi aya opule Herooti* Antiipa, nsatoro wa Kalileya, khusiila olupiwa monkoni wa Yinsa. ² Ye khuwooza akarumeya awe yoori: “Oto ti Yaahaya Namoosa; eetta osisimuwa muufwa! Tiito ariinaaye owahi wa oretta minjuza.”

³ Maana aarettiye Herooti anthhiye Yaahaya nkalapooso, mwaasa wa Herotiiya, muukha wa Filiipe, twiyye, ⁴ mwaasa wa Yaahaya omuuza yoori: “Khahi halaali weeyo onrala ye.” ⁵ Herooti aari otakha omuula, ila khusala awoova atthu, maana yo aari ojuwa yoori Yaahaya napiyu.

⁶ Va njampo la oretta mwaakha Herooti, mwaana wa Herotiiya khwiina vakathhi wa atthu ooshi, khuntuelisa Herooti, ⁷ ye khumwaahiti khwa olapha omwinkha wakhula etile aari weettelaaye onvekela. ⁸ Khwa shawuri za winkhiwi ti mamaawe, mwaana otule khulupa yoori: “Mwikitiiusele mparathu eeshwa ya Yaahaya Namoosa.” ⁹ Mfwalume khwiya wooshukulikha, ila mwaasa wa olapha na mwaasa wa anamalaleyiwa, ye khuruma yoori enkhiwe etile mwaana otule avekiyeyo. ¹⁰ Khuruma olawa oshijiwa eeshwa ya Yaahaya Namoosa nkalapooso. ¹¹ Eeshwa yawe khuthuuliwa mparathu khulawa khwinkhiwa mwaana otule, ye khuthuula khulawa khumwinkha mamaawe ¹² Anakhiyoni a Yaahaya khuta, khuthuula mwiili awe khulawa khuzikha. Nawiisha khulawa onthatelela Yinsa.

Waattisiwa wa phaawu na swi

¹³ Noosiila vitthu zaarettikhaniyeezo, Yinsa khupakhira mmwaatiya khu-laawo okhule waya, khweetta ohali yaariiwo yaara otthwe. Ila atthu noojuwa, khulankha nsitati mphule khusala anlottelela mwentto. ¹⁴ Yinsa noopakhuwa khuwoona atthu awaatta, khuwoonela huruma, khuwaavon-isa alwele aariivo. ¹⁵ Njuwa-looveva, anakhiyoni awe khunsusela kumuza yoori: “Mphu n'yaara na onnta oripa. Owaamwaze atthu apa eette mmamuti mpho oozyane ethtu yoojiwa.” ¹⁶ Yinsa khuwaajipu araka: “Khinithajiya yo olawa. Mweeyo ena mwiwenkhe ethtu yoojiwa.” ¹⁷ Yo khulupa yoori: “Fweeyo ninaaye phaawu thaanu na swi piiri.” ¹⁸ Aphano ye khulupa yoori: “Mwikitiiusele.” ¹⁹ Khuruma yoori atthu apale eekhale va nyaani, khuthuula phaawu epile thaanu na swi epile piiri, khweekesa otulu, khuparikhiya. Khumeya phaawu epile. Khuwenkha anakhiyoni awe, yo khusala awenka atthu. ²⁰ Ooshi khuja khurupala, anakhiyoni khulokoththela khelenke khumi na piiri nyeenyre zoosal. ²¹ Atthu aajiyeyo aari alume alufu thaanu, ohiaatthiimo aakha na asimaana.

Yinsa oneettetta vatulu a maati

²² Nasaapiru Yinsa khuwaaruma anakhiyoni awe yoori apakhire mmwaatiya alokoze eette phantte kiina, ye aasaliye awaaleezaka atthu apale. ²³ Paata ya owaaleeza atthu, khuwela va mwaako olawa olompa. Khuripa ye ari attaaphale otthwe, ²⁴ ila wakathi aya opule mwaatiya waari peetiwene na vathi, weettaka opiiwa ti mawipi venkivene maana pheeyo eetta wiinyula. ²⁵ Lifwajiri, Yinsa khusala eetta attaaphale aariivo anakhiyoni awe eettettaka vatulu a maati. ²⁶ Noomoona eettaka weetteta vatulu a maati yo khwiya oosuthuwa khulupa yoori: “Opu nshi-tapehel!” Yo khusala anyakula na woova. ²⁷ Ila Yinsa khuwooza yoori: “Mwiminyale! Ti miiyo. Mwihoove!”

²⁸ Khujipu Pheeturu yoori: “Nkhama ti weeyo khweele Mbwana, okirume kite attaapho oriivo, keettettaka vatulu a maati.” ²⁹ Yinsa khunjipu, araka:

* ^{14:1} Herooti Antiipa, aari mwaana wa Herooti Nwulu.

“Ote.” Aphano Pheeturu khulaamo mmwaatiya, khusala eettetta vatulu a maati eettaka phante etile aariwo Yinsa. ³⁰ Paata ya woona kхиima pheevo etile yaari ovumaazo, khoova khusala azama vattiithi-vattiithi, ettaka onyakula araka: “Mbwana, okuusuru!” ³¹ Nasaapiru Yinsa khookola nkhone awe khunkholelala. Khumuza yoori: “Ntthu woopushuwa amini, ohaaminaka mwaasa aya niini?” ³² Paata ya owela mmwaatiya, pheevo etile khwiisha. ³³ Apale aari mmwaatiya khumwaaputu alupaka yoori: “Khweele weeyo o Mwaana wa Nluku.”

Yinsa oniwaavonisa atthu nti wa Jenezare

³⁴ Paata ya ololha pahari, khufiya Jenezare. ³⁵ Wakathi atthu a mmuti mphule anjuwiyeovo yoori ti Yinsa, khumwazela hapari mmuti mphule wooshimo, atthu akina khusala awaatana alwele. ³⁶ Anvekelaka yoori nenkawu asape nshaka la ajapi yawe; ooshi asapiyeeyo avoniyi.

15

Yinsa khwa zowera za mayaaahuuti

¹ Aphano khulankha Yeruzaleemu, Mafwarizeewu akina na anamanozela a kano khuta omuuzela Yinsa yoori: ² “Mwaasa aya niini anakhiyon iwo akhijilelaka zowera za attunkhulu a tiini, oja ahinaweeni?” ³ Yinsa kihuwaajipu araka: “Mwaasa aya niini mweeyo mwikhijilelaka kano za Nluku, mwaasa wa zowera zenu? ⁴ Maana Nluku alupa yoori: ‘Onshitahi papaawo na mamaawo’ na ‘antakhaaye onlaani papaawe na mamaawe ona ya ohukhumweliwa ofwa.’ ⁵ Ila mweeyo mwinkhupalela yoori amana ntthu amuuza papaawe ama mamaawe yoori: ‘Wakhula etthu kiniwinkhaanini miiyo zaakha ya omwinkha Nluku; ⁶ ye khankhanyareliwa theenya onshitahi papaawe khwa nanna nkhamma eto.’ Khwa ethiipo, mwaasa wa zowera zenu, mweeyo mwimpeepheyisa ntthakhuzi la Nluku. ⁷ Manaafikhi! Ezaaya ahupiri saaneene monkoni wa mweeyo araka:

⁸ ‘Atthu apa anikaaputu na milomo,
ila rooho zaya ziri peetiwene khwa miiyo.

⁹ Mweeyo mwinikaaputu mahala,
mwisomisaka zowera za anaatamu.’”

Yinsa onttakhula monkoni wa Otwahareshiwa

¹⁰ Yinsa kihuwaakhuwela atthu apale khuwooza yoori: “Mwisiile na eweeleyeni. ¹¹ Khahiyi etile entthiwaaye nkhangyo eninharamushaaye ntthu; ila etile enlankhaaye nkhangyo ti eninharamushaaye.” ¹² Aphano anakhiyon iweeleyeni awe khulawa khumwaattama khumuuzela yoori: “Wajuwa yoori mafwarizeewu noosiila hapari epile eephiriwa?” ¹³ Yinsa kihuwaajipu yoori: “Miiithi zooshi zihizaliweeni ti Paapa wa pinkuuni zinttela okhuliwa na mitathaari zaya. ¹⁴ Mwiwaalikhe, maana yo khanoona na aniweettettisa ananhooni. Amana ntthu woohooni amweettettisa nahooni nzaawe ooshi antta okwela nliphotto.” ¹⁵ Aphano Pheeturu khunvekela Yinsa yoori: “Onu-uze maana a nlikaniso opo.” ¹⁶ Yinsa kihuwaajipu yoori: “Kiri na mweeyo nalelo khiniweeleyani? ¹⁷ Yoori zooshi zintthiwaaye nkhangyo zineetta mwiijohojo na khunyiwa? ¹⁸ Ila vitthu zinlankhaaye nkhangyo zinlankha va rooho na piiitthiipo eninharamushaaye pinaatamu. ¹⁹ Maana nroho ti zinlankhaamo shawuri zootakhala nkhamma epi: wuula, oraruwa, oshawi akhapa, wiya, ololova na ohankawaani. ²⁰ Epo pi eninharamushaaye ntthu. Ila oja ohinaweeni khininharamusha ntthu.”

Muukha wa Kanaani onthonyeza amini yawe

²¹ Paata ya Yinsa olaavo aphale vaya, khusala alawa nti wa Tiiro na Sitooni. ²² Muukha wa Kanaani aari wiikhalaaye nti otthuupule, khuta okutthanana Yinsa eettaka okhuwa yoori: “Mbwana, Mwaana wa Daawuuda, koonele huruma! Mwanaka etta wiiyana masheethwani na ontha ohoowa channu.” ²³ Ila Ye khuhinjipu hatha ntakhuzi, anakhiyonи awe khulupa yoori: “Omuuze alawe, ontha onyakula nyuma wetthu.” ²⁴ Yinsa khujipu yoori: “Miyo kaperekhiwa paasi khwa pwittipwithi epile zawaashikhа za Ezirayiilu.” ²⁵ Muukha otule khuta khukokhora na khuri: “Mbwana, okaawuni!” ²⁶ Aphano Yinsa ajipwaka khuri: “Khahiyо yooshapweya othula phaawu ya aana khuwenkha aana aanapwa.” ²⁷ Muukha otule khujipu yoori: “Khweele Mbwana, ila na aana aanapwa anja tathela zinkwaaye vameeza wa mweenyewe.” ²⁸ Aphano Yinsa khumuuzi yoori: “Oo muukha, amini yawo khuluyeeene! Ti erttikhane etile ontakhaaye.” Na wakathi otthuupule mwanawwe khwiyi woovona.

Yinsa onrutela pahari ya Kalileya na oniwaavonisa alwe.

²⁹ Yinsa khulaawo okhule waya khulawa mpakha nshini wa pahari ya Kalileya. Khuwela va mwaako khwiikhala attaapho. ³⁰ Khusala ata atthu awaatta, awaatanaka anamarakala, ananhooni, anamakhumuwa, ananhittakhuli na akinoko aya, khuwaalikha nshini wa Yinsa, ye khuwaavonisa. ³¹ Atthu khwiya ooshanka wakathi awooniyevo ananhittakhuli eettaka ottakhula, anamarakala ari oovona, anamakhumuwa eettaka weetteta na ananhooni eettaka woona. Yo khunsifu Nluku wa Ezirayiilu.

Yinsa onjisa khuntti kiina

³² Yinsa khuwaakkhuwela anakhiyonи awe na khuwooza yoori: “Kinaaye ththakaraka na atthu apa; zavira siikhu ttatthu ari vamote na miiyo na khana hatha ethtu-yoojiwa. Akintakha owaalikha olawa na jala zaya, maana kinoona yoori antta ozileya ntarikhi.” ³³ Anakhiyonи awe khujipu yoori: “Ninttela opattha vayi phaawu zoofiyela, atthu apa waatta na mphu n’yaara?” ³⁴ Ye khuwoozela yoori: “Mwina phaawu kavi?” Yo khujipu yoori: “Sapa, na mattaatta vattithiiru.” ³⁵ Yinsa khuruma yoori atthu apale eekhale. ³⁶ Khuthuula phaawu epile sapa na swi khushukhurwela khumeya khuwenkha anakhiyonи awe, khusala awaawanyeza atthu. ³⁷ Ooshi khuja khurupala. Anakhiyonи apale khukusanya khelenke sapa za pattaasu zasaliyeeyo. ³⁸ Atthu aajiyeyo aari alufu nne, ohiwaalaki aakha na asimaana. ³⁹ Paata ya oleezanana atthu apale, Yinsa khupakhira mmwaatiya kholhela nti wa Makata.

16

Mafwarizeewu na Masatukhi anveka alama moote ya pinkuuni

¹ Mafwarizeewu na masatukhi khumwaattama Yinsa khusala amweeza anvekelaka alama moote yoolankha pinkuuni. ² Ye khuwaajipu araka: “Amana njuwa liveva, mweeyo mwinraka, ‘Onttela wiiya wakathi wooshapweya, maana pinku ti yookhuttuwa.’ ³ Na leelo supu, ‘Enttela opuwa pheevo, maana pinku ti yookhuttuwa na eetaalawo mawiku.’ Mweeyo mwinjuwa otaphulela nanna ya pinku, ila khamwinjuwa otaphulela alama za wakathi! ⁴ Khapila yootakhala na yooraruwa anveka alama ya minjuza, ila hatha alama khanlawha winkhiwa yoohiiyi alama ya Yuunusa.” Aphano Yinsa khuwaalikha khulaavo aphale vaya.

Fwaramento ya Mafwarizeewu na Masatukhi

⁵ Paata ya olokhela phantte kiina ya pahari, anakhiyoni khusophela yoori asahawu othuula phaawu. ⁶ Yinsa khuwooza yoori: “Mwiye wa woona na mwiiyane phoole na fwaramento za mafwarizeewu na za masatukhi.” ⁷ Anakhiyoni apale khwaaza onyakulisana atthaaporu, araka “mwaasa aya ohithuuli phaawu.” ⁸ Asiiliyeevo onyakulisana opule, Yinsa khuwooza yoori: “Attu oopushuwa amini, mwaasa aya niini mwinyakulisana mweeyena-ru? Mwaasa woohiina phaawu?” ⁹ Nalelo khina weeleyeni? Khamwimfkhirela phaawu epile thaanu miiyo kawaawanyeziyeeyo attu alufu thaanu? Khelenke kavi mweetaaziyeeyo? ¹⁰ Wala khwa phaawu sapa aarafuniyeeyo attu alufu nne, na zaari khelenke kavi mwilokotthe- liyeeyo? ¹¹ Nanna-ni ehiniweeleyaanini yoori akaari owuuzani monkoni wa phaawu? Mwiiyane phoole na fwaramento ya mafwarizeewu na za masatukhi.” ¹² Aphano khuweeleya yoori khaari owoza wiiyana phoole na fwaramento ya phaawu, ila khwa masomi a Mafwarizeewu na masatukhi.

Otukhuru wa Pheeturu

¹³ Yinsa afiyeevo nti wa Sezareeya ya Filiipe, khuwoozela anakhiyoni awe yoori: “Attu aninlupeza niini Mwaana wa Pinaatamu?” ¹⁴ Yo khujipu yoori: “Akina anri o Yaahaya namoosa; akina, anri o Aliyaasi, akina anri o Jeremiiya ama mmote wa manapiyu.” ¹⁵ Khurutela owoozela theenya yoori: “Khi mweeyo mwinri ki paani?” ¹⁶ Simawu Pheeturu khujipu yoori: “Weeyo o Al-Masiihu, Mwaana wa Nluku haayi.” ¹⁷ Yinsa khujipu yoori: “Wooshapweyiwa ti weeyo, Simawu mwaana wa Yoona! Maana vitthu zaya epi khuthoonyeziweeni ti pinaatamu, ila khwa Paapa ariiye pinkuuni. ¹⁸ Miiyo kiniwuza yoori weeyo o Pheeturu, khwa liwe ntintthi kinjekana ojama wa Nluku na milako za motthooni khazinlawa oshintta. ¹⁹ Miiyo kiniwinkha efukulo ya Ofwalume wa Pinkuuni; etile onfukaaye vathi apha na pinkuuni entta ofukiwa, na etile weeyo onfukulaaye vathi apha na pinkuuni entta ofukuliwa.” ²⁰ Aphano khuwooza anakhiyoni awe yoori ahwooze akinoko yoori ye aari Al-Masiihu.

Yinsa onlupa ofwa wawe na osisimuwa wawe

²¹ Waaza wakathi otthuupule, Yinsa khwaaza oweeleza anakhiyoni awe araka: Yaari ohithajiya olawa Yeruzaleemu ahoochaniwe vitthu zawaatta mmakhono wa attunkhulu a tiini, mahaakhimu a tiini na anamanozela a kano, ooliiwe, siikhu ya ttaatthu asisimuwe nkhapuri. ²² Aphano Pheeturu, khunkhuwelela othetekele khusala amuuza yoori: “Wala Mbwanaaka aka! Khinteela wuurettikhanel!” ²³ Yinsa khuzukuluwa khumuua Pheeturu yoori: “Weette nyuma waka Sheethwani! Weeyo ori nkhamma liwe liri- iye ntarikhi mwaka yoori likikwakwattule, maana onuupuwela nkhamma pinaatamu woohiyyi nkhamma anuupuwelaazo Nluku.”

Anakhiyoni a Al-Masiihu anayoothuula nsalapa aya

²⁴ Aphano Yinsa khuwooza anakhiyoni awe yoori: “Nkhamma ntthu ontakha okilotta, ajikatthale mweenyewe, athuule nsalapa awe akilotte. ²⁵ Maana otule antakhaaye wuusuru ohaayi awe ontta ompwetheya, ila otule onimpwetheyaaye ohaayi awe mwaasa wa miiyo ontta wuusuru. ²⁶ Ena fwayita-ni ntthu opattha fwayita olumwenku wooshi na khumwaashikha ohaayi awe? Ama niini pinaatamu antakhaaye opatilana ohaayi awe? ²⁷ Apho Mwaana wa Pinaatamu onlawa ate nnuuru wa Papaawe na malayikha awe, amwinkhe phakari wakhula ntthu khwa etile

arettiyeeyo. ²⁸ Miyo kiniwuuzani khweele yoori, awaapho apha atthu akina ahinttelaaye ofwa ahimooneni khapula Mwaana wa Pinaatamu ataka nkhamma mfwalume.”

17

Ozukulisiwa wa Yinsa

¹ Ziviriyeevo siikhu sitha, Yinsa khunthuula Pheeturu, Tiyaaku na Yaahaya ttwiyi Tiyaaku, khuwaalawana othetekele va mwaako woolepa. ² Attaaphale Yinsa khuzukulisiwa vakatthi haya. Wuuso awe khwaara nkhamma njuwa kuwo zawe khwiiya zoolakala nkhamma nuuru. ³ Wakathi ot-thuupule khupuwelela omaasho waya Munsa na Aliyaasi apiyaka mwaasa na Yinsa. ⁴ Aphano Pheeturu khumuuzu Yinsa yoori: “Mbwana, ti yooshap-weya wiiya attaapha. Amana otakha, kintta ojeka heema ttatthu; moote yawo, moote ya Munsa, kiina ya Aliyaasi.” ⁵ Pheeturu eettaka ottakhula nalelo, khupuwa liwiku lawaara khuwaafinikh, ntumpho khupuwamu huula yaari oraaye: “Otu mwanaka wompheta na wookituvela channu. Mwinsiileze!” ⁶ Asiiliyeevo mattakhuzi apale anakhiyoni awe khukokhora khufisa ajih zaya vathi na khuwaapattha woova. ⁷ Ila Yinsa khuwaattama, khuwaasapa na khuwooza yoori: “Mwilankhe, mwihoove!” ⁸ Afunuliyeovo maasho khuhimooni hatha ntthu, khusala amoona Yinsa paasi.

⁹ Ettaka wiishukha vamwaako aphale, Yinsa khuwooza yoori: “Mwi-himuze hatha ntthu epile mooniyeyo, mpakha Mwaana wa Pinaatamu asisimuwe muufwa.” ¹⁰ Anakhiyoni apale khumuuzela yoori: “Aphano mwaasa aya niini anamanozela a kano anlupaaye yoori enhithajjiya Aliyaasi ota khpula?” ¹¹ Yinsa khujipu yoori: “Wekhwhee Aliyaasi onta arutisele vitthu zooshi. ¹² Ila miyo kiniwuuzani yoori Aliyaasi ata, yo khuhinjuwi, ila khunrettela zooshi epile atakhaziyeeyo. Khwa nanna ethiipo Mwaana wa Pinaatamu onttele ohoochiwa pi attaapro.” ¹³ Aphano anakhiyoni apale khuweeleya yoori Yinsa aari olupa monkoni wa Yaahaya namoosa.

Ovonisiwa wa Nsimanaa aariina Masheethwani

¹⁴ Wakathi afiyeevo aphale yaariivo khuntti etile ya atthu, mwinyi mmote khulawa aphale aariivo Yinsa khunkokhorela, ¹⁵ khumuuzza yoori: “Mb-wana, omoinele huruma mwanaka! Eetta wiiyana jilejile entta onhoocha. Swaafu zinki onkwela vamootho ama mmaati. ¹⁶ Miyo kawaatiseliye anakhiyoni awo, ila khuhiwahi onvonisa.” ¹⁷ Yinsa khuwaajipu yoori: “Oo khapila yootakhala na yoohiina amini! Mpakha lini kinttelaaaye wiiya vamote na mweeyo? Mpakha lini kuuvilelakan? Mwikitisele mwanenu apha!” ¹⁸ Aphano Yinsa khuruma yoori masheethwani ansaruwe, wakathi ot-thuupule mwaana otule khwiiya woovona. ¹⁹ Paata ya toole, anakhiyoni awe khunsusela Yinsa othetekele, khumuuzela yoori: “Mwaasa aya niimi na-haakhitireliyeeyo wiikara?” ²⁰ Ye khuwaajipu yoori: “Maana mweeyo amini mwiriina ttiithiiru. Miyo kiniwuuzani khweele yoori eriwaka mweettiye wiiyana amini nkhamma phunje ya samuli, mweetta owahi wuuza mwaako opu yoori: ‘Oleovo apha weette aphale’ weetta olawa, na khina eththu moote ya haari weettelaaye owaheya khwa mweeyo.” ²¹ Ila vitthu epo zinta nkathhi wa lompa na ofuka paasi.

²² Siikhu moote Yinsa na anakhiyoni awe aakusanyeyiye Kalileya, ye khuwooza yoori: “Mwaana wa Pinaatamu onlawa enkheleliwe mmakhono wa atthu. ²³ Yo anttela omuula, siikhu ya ttaatthu asisimuwe.” Anakhiyoni awe khuwaapattha huzuni.

Yinsa onripha lumpuru

²⁴ Wakathi Yinsa na anakhiyoni awe afiyyeyo Kafwaranaawu, anamariphisa lumpuru khulawa omuuzela Pheeturu yoori: "Mwaaliimu enu khanripha lumpuru la Nnyupa Woosifwiwamo?" ²⁵ Pheeturu khuwaajipu yoori: "Onripha!" Nawiisha Pheeturu khuvira nnyupa, ahinattakhule hatha ethu, Yinsa khuri: "Simawu, onoona toovi? Paani anriphaaye lumpuru na tthuva ya mfvalume wa olumwenku opu? Atthu a mmuti ntumphu ama aletto?" ²⁶ Pheeturu khujipu yoori: "Aniyya aletto," Yinsa khumuuzu yoori: "Eto enthoonyeza yoori aana a mmuti ana yoohiriphi. ²⁷ Ila yoori nihiweep-hirise, olawe mpahari wamweese nanjolo awo. Swi ethiito ya mwanzo ontelaaye olowa, ofunule milomo zaya, ontta osikanamo nzurukhu mmote. Aphano olawe wariphe lumpuru laka na lawo."

18

Nttunkhulu muufwalume wa pinkuuni

¹ Wakathi otthuupule anakhiyoni khuta aphale aariivo Yinsa khumuuzela yoori: "Nwulweene zayita akina aya, ti paani muufwalume wa pinkuuni?" ² Ye khunkhuwela nsimaana khunttha vakatthi vaya, ³ khuwooza yoori: "Miiyo kiniuuuzani khweele yoori, mweeyo noohithupwiyi na khuhijiretti wiya nkhamma nsimaana otu, khamwintela weettamo muufwalume wa pinkuuni. ⁴ Wekhweele anjipushuwisaaye nkhamma nsimaana otu, oto ti nwulweene aya muufwalume wa pinkuuni.

⁵ "Animpwekherelaaye nsimaana nkhamma otu khwa nzina laka, onikip-wekherela miiyo. ⁶ Wakhula otule aninkosisaaye mmote wa asimaana apa akikhupaliyeeyo, afwataali ofukeleliwa liwe loovalaza mmwisiko khutup-weeziwa nkhilintti ya pahari.

⁷ Phoole olumwenku, mwaasa wa vitthu za okosisa. Maana khinivonyela ohirettikhani vitthu zaya epo, ila atakhaliwa ntthu otule anttelaaye wiiyana paathuli. ⁸ Nakataalikha nkhamma nkono awo ama muulu awo onuukosisa, oshije weesele! Maana afwataali weeyo weetta muuhaayi wa mileele ori woorakala ama woovujeya ehiyieeni wiiyana makhono mawiri na moolu mawiri weeyo aya khweeseleliwa va moottho wa mileele. ⁹ Nkhamma liisho lawo limote linuukosisa, olazemo weeselele peetiwene! Maana afwataali weeyo weetta muufwalume wa pinkuuni na liisho limote ehiyieeni weeseleliwa mothooni na maasho mawiri.

Nlikaniso wa Pwittipwithi ya Waashikha

¹⁰ "Phoole, mwhintarawu hatha mmote wa asimaana apa! Miiyo kiniuuuzani khweele yoori malayikha aya anoona wuuso wa Paapa wa pinkuuni wakhula wakathi. ¹¹ Wekhweele Mwaana wa Pinaatamu ateela wuusuru etile yaashikhiyeeyo. ¹² Niini onuupuwelaaye weeyo? Amana ntthu eeyana pwittipwithi zawe miyya khumwaashikhavo moote, khanlikha epile tiisiya wa tiisiini omwaako alawa weekesa etile yaashikhiyeeyo? ¹³ Miiyo kiniuuuzani khweele yoori, amana asikana oniyya woofurahi mwaasa wa pwittipwithi yawe etile, zayita epile tiisiya wa tiisiini zoohaashikhi. ¹⁴ Etthiipo theenya Paapeenu ariye pinkuuni khanintakhela hatha nsimaana mmote waashikha.

Nanna yaweeettetisa koosa ya ttwiyyethu

¹⁵ "Amana ttwiyyo ookosa, olawe wanthroonyeze etile avonyiyeeyo, ila orette epo zaya weeyo na ye paasi. Amana ye asiila shawuri zawo,

wamwaawuni ttwiyo. ¹⁶ Ila amana ahuusiili, onthuule ntthu mmote ama awiri, 'yoori khwa oshaahiti wa atthu awiri ama attatthu yoori nttakhuzi lihakikhey.* ¹⁷ Amana ye akatthala wuusiila, walupe vakatthi wa ojama wa Nluku. Amana ye akatthala osileza theenya ojama wa Nluku, onthantte nkhamma kaafiri ama namariphisa lumpuru. ¹⁸ Kiniuuuzani khweele yoori, zooshi epile mweeyo mwinfukaaye vathi apha, ziniiya zoofukiwa pinkuuni, na zooshi mwinfukulaaye vathi apha ziniiya zoofukuliwa pinkuuni. ¹⁹ kiniuuuzani theenya yoori awiri a mweeyo amana mwikhupalelana vathi apha khwa wakhula ethtu etile mwintakhaaye oveka, eniiyā yooret-tiwa ti Paapa ariiye pinkuuni. ²⁰ Maana vahali ankusanyeyaavo atthu awiri ama attatthu khwa nzina laka, na miiyo kiniiya attaapho."

Swaafu kavi nininswamihaaye ttwiyyeththu

²¹ Aphano Pheeturu khumwaattama Yinsa khumuuzela yoori: "Mbwana, amana ttwiyyaku akikosa kinswamihi swafu kavi? Swaafu sapa?" ²² Yinsa khunjipu araka: "Miiyo kiniuuza yoori, khahiyo swaafu sapa, ila swaafu saapiini orutela swaafu sapa.

²³ "Khwa toowo, Ofwalume wa pinkuuni ori nkhamma mfwalume aari otakhaaye waattalela vitthu zawe na karumeya awe. ²⁴ Wakathi aaziyevevo waattalela, khutiiseliwa mwinyi aari omwiilaaye milikhi za nzurukhu wa feeta. ²⁵ Mwaasa wa ohiina nanna yonripha mbwana awe otule aari omwiilaaye, khuruma yoori; ye na muukhaawe, aanaawe na vitthu zawe zooshi, zuuzanyisiwe ariphe teeni. ²⁶ Karumeya khukokhora omaasho wa mbwana awe khunvekela yoori: 'Okivilele, kintta wuuripha.' ²⁷ Mbwana awe khunhurumiya, khufuja teeni etile na khunlikha olawa. ²⁸ Ila karumeya otule noosaruwa khukutthanana nshirikhaawe wa vakhaazi aari omwiilaaye nzurukhu miiya paasi. Ye khunzola nshirikhaawe mmwisiko khusala anvinya araka: 'Okiriphe!' ²⁹ Aphano nshirikhaawe otule khukokhora khusala anvekela yoori: 'Okivilele, kintta wuuripha.' ³⁰ Ila ye khuhikhupaleli, khurumisa olawa otthiiwa nkalapooso mpakha ariphe teeni yawe. ³¹ Wakathi ooniyevevo akarumeya apale akinoko vitthu epile zaarettikhaniyeeyo, khukatipukha channu na khulawa khumuuzza zooshi mbwana aya. ³² Mbwana khunkhuvela karumeya otule khumuuzza yoori: 'Karumeya woohifwayi, weeyo wakivekela miiyo khuuswaamihi teeni yaho. ³³ Weeyo khawaarina ya omoonela huruma nshirikhaawo nkhamma miiyo kiwooneliyeozo?' ³⁴ Mbwana awe khwiiphiriwa khunttha nkalapooso yoori ahukhumwiwe mpakha ariphe teeni yawe. ³⁵ Paapa wa pinkuuni ontela oretta ethhiipo, amana mweeyo mwihinswaamihi ttwi-iyenu na rooho yenu yooshi."

19

Monkoni wa Waashana

¹ Yinsa eeshiyeevo olupa mattakhuzi apale, khulaawo Kalileya khweetta Yudeya kaapu kiina ya Yorotaani. ² Khuntti khuluyeene khusala enlotta, atthaapale ye khuwaavonisa alwele.

³ Mafwarizeewu akina khuta aphale aariivo Yinsa yoori amweeze khumuuzela yoori: "Halaali nlume omwaasha muukhawé khwa wakhula kiiswa?" ⁴ Yinsa khuwaajipu araka: "Mweeyo khamwisomeeni yoori

* **18:16** veja Deuteronomio 19:15.

omwanzo, Nluku amumpa nlume na muukha, ⁵ na khulupa yoori: ‘Tito, nlume onlikha papaawe na mamaawe khujikusanya na muukhaawee, oowiiri khuretteya wiiya mwiili mmote?’ ⁶ Khwa ethiipo khaniyya awiri ila aniiya mwiili mmote. Aphano, etile Nluku akusañiyieeyo áhiiyeyeo antakhaaye ophakula.’

⁷ Mafwarizeewu apale khumuuzela theenya yoori: “Aphano mwaasaaya niini Munsa enkhaka ruhusa ya nlume omwinkha talakha muukha awe na khumwaasha?”

⁸ Yinsa khuwaajipu yoori: “Munsa aruma yoori mweeyo mwimwaashe muukha enu mwaasa wa wuuma wa rooho zenu. Ila khazaari toowo omwanzweene. ⁹ Miyo kiniwuuzani yoori: wakhula otule animwaashaaye muukha awe, woohiiyi mwaasa wa oraruwa, khunrala muukha nkina ontta oraruwa.”

¹⁰ Anakhiyoni a Yinsa khuri: “Nkhama pi ethiipo muukha na nlume, afwataali ohilooli.” ¹¹ Yinsa khujipu yoori: “Khiriweeni atthu ooshi eetta wiyana matakhele okhupalela mattakhuzi aya apa, ila otule enkhiweeyo paasi. ¹² Alume akinoko afwa nkuwo, maana avokoliwa ethiipo; akinoko arettisiwa pi atthu azaaya; akina eetta ojirettisa mwaasa wa Ofwalume wa pinkuuni. Otule anwahaaye okhupalela vitthu epi, ti akhupalele.”

Yinsa na Asimaana

¹³ Paata ya vitthu epile, atthu akina khusala awaaathuula asimaana non-tanela Yinsa yoori awaattheele makhono na awaalompeli. Ila anakhiyoni awe khusala awaamaruwela. ¹⁴ Aphano Yinsa khuri: “Mwiwaalikhe akiteele miyo asimaana wala mwihiwaakhattaze; maana Ofwalume wa pinkuuni pi wa apale eeyiye nkhama attaapo.” ¹⁵ Paata ya owaattheela makhono khulaavo aphale vaya khulawa.

Shapu woothaajiri

¹⁶ Ntthu nkina khumwaattama Yinsa khumuuzela yoori: “Mwaaliimu, kirette niini yooshapweya yoori kipatthe ohaayi wa mileele?” ¹⁷ Yinsa khujipu yoori: “Mwaasaaya niini weeyo okuzelaka etthu yiyyiye yooshapweya? Owaapho ntthu mmote paasi eeyiyeeyo wooshapweya. Nkhama weeyo ontakha weetta muuhaayi wa mileele, oshututele mirumo.” ¹⁸ Ntthu otule khumuuzela Yinsa yoori: “Piivi?” Yinsa khunjipu araka: “Ohuule, ohiraruwe, ohiyiye, ohilaze oshaahiti woovonyeya, ¹⁹ onshitahi papawo na mamaawo, na omphethe namwaattamanana awo nkhama ethiipo on-jiphetaazo omweenyewe.” ²⁰ Shapu otule khujipu yoori: “Miyo kinshutule-laka mirumo zooshi. Khi niini enikisaleelaaye nalelo?” ²¹ Yinsa khunjipu yoori: “Nkhama weeyo ontakha wiiya khaamili, olawe woozanyise zooshi oriinaaye, nzurukhu aya owenkhe asikhini, orettaru toowo ontta wiiyana njuju pinkuuni. Nawiisha, ote okilotte.” ²² Noosiila mattakhuzi apale shapu otule khwiyya woohuzunikha, maana aarina maali zawaatta.

Ajali ya Maali

²³ Aphano Yinsa khuwooza anakhiyoni awe araka: “Kiniwuuzani khweele yoori, ti yoolipa thaajiri weetta muufwalume wa pinkuuni. ²⁴ Ila ti yookhwuya enkamiiya ovira valiphotto wa sikano zayita thajiri weetta muufwalume wa Nluku.” ²⁵ Anakhiyoni a Yinsa asiiliyeevo mattakhuzi apale, khwiyya ooshanka na khumuuzela yoori: “Khwa nanna nkhama eto paani anttelaa ye wuusurukha?” ²⁶ Yinsa khuweekesa na khuwaajipu yoori: “Khwa pinaatamu khinwaheya, ila wa Nluku vitthu zooshi ziinwaheya.”

²⁷ Aphano Pheeturu khujipu yoori: “Fweeyo nalikha zooshi yoori nuulotte. Ninttela wiiya niini fweeyo?” ²⁸ Yinsa khuwooza araka: “Miiyo kini-wruuzani khweele yoori, amana ofiya wakathi Nluku anttelaaaye waattala zooshi opheeya na Mwaana wa Pinaatamu eekhala va khukulu ya siifwa zawe, mweeyo mwirnikilottaaye mwinttela wiikhalela khukulu khumi na piiri yoori mwiphuke mahimo khumi na mawiri a Ezirayiilu. ²⁹ Ooshi apale alikhiiyeeyo vaje vaya, attwi zaya, alupu aya, apapazaya, aanaaya ama mashapa aya, mwaasa wa miiyo, anlawwa apwekhhera swaafu miiya na orithi ohaayi wa mileele. ³⁰ Khwa ethiipo, apale amwanzo anttelaa wiishela, na apale awiishela anttelaa wiiya amwanzo.

20

Nlikaniso wa anakhaazi a nshapa la wuuva

¹ “Maana Ofwalume wa pinkuuni ori nkhamma mweenyewe nshapa alankhiyeeyo supuyeene olawa oweekesa atthu yoori akhole khaazi mmashapa mwawee. ² Ye khusiilanana yoori awaariphe nzurukhu mmote wa feeta wakhula siikhu, khuwaaruma olawa omashapa wawee.

³ Wakathi opule wa sattaatthu, ye khulankha khusala alawa khuwoona atthu akina ari ohiina khaazi eekhaliye vaparasa. ⁴ Aphano khuwooza yoori: ‘Mwilawe mweeyo theenya mwakhole khaazi mmashapa mwaka la wuuva, miiyo kintta wuuriaphani etile enttelaaaye wiiya ya shariya.’ ⁵ Apale khulawa, khulankha theenya wakathi opule wa atuhuri na wakathi opule wa saakhentta, khuretta nanna nkhamma ethiipiile. ⁶ Ethiipo wakathi wa sakhami na monsi, ye khurutelawo khuwaasikana theenya akina ahaariina khaazi na khuwoozela yoori: ‘Mwaasa aya niini mweeyo mwiyyaka apha mwihikkholaka khaazi siikhu yooshi?’ ⁷ Khunjipu yoori: ‘Maana khina mmote aninkhiyeeyo khaazi’. Aphano khuwooza apale aya yoori: ‘Ettani na mweeyo mwakhole khaazi mmashapa mwaka.’

⁸ Weettelaka oripa, mweenyewe nshapa khumuuzza waziri awe yoori: ‘Owaakhuwele anakhaazi na owaariphe phakari yaya, owaazaka apale awiishela mpakha apale a mwanzo.’ ⁹ Khuta anakhaazi apale aattakhulaniweeyo wakathi wa saakhumi na monsi na wakhula ntthu khupwekhhera nzurukhu mmote wa feeta. ¹⁰ Wakathi atiyeevo apale aattakhulaniweeyo mwanzo, aari weekesela opwekhhera wawaatta, ila wakhula mmote aari opwekhhera nzurukhu moote. ¹¹ Apwekheriyeovo khwaaza omwaapa mweenyewe nshapa, ¹² amuuzaka yoori: ‘Mamwinyi apa wawaattakhulana yoori akhole khaazi ya wakathi mmote, weeyo mbwana onnilikanisana fweeyo nivileliyeeyo olemela wa khaazi na haari ya nthana wooshi.’ ¹³ Ila ye khujipu yoori: ‘Swaahipu, akiniiwimana shariya. Khawaakkupaleliye okhola khaazi ya opwekhhera nzurukhu moote? ¹⁴ Opwekhhera etile yiyyiye yawo olawe. Miiyo kintakha omwinkha otule kaattakhulaniyeeyo wawiishela nkhamma ethiipo kiwinkhiyeeyo. ¹⁵ Akina ruhusa ya orettela etile kintakhaaye nzurukhu aka? Ama weeyo ona nrima mwaasa wa miiyo wiiya nkemaani?’ ¹⁶ Aphano Yinsa khumarisa araka: ‘Apale amwanzo anttelaa wiishela na apale awiishela anttelaa wiiya amwanzo.’

Yinsa onrutela olupa theenya ofwa na osisimuwa wawe

¹⁷ Awelelaka Yeruzaleemu, Yinsa khuwaakhuwela othetekele anakhiyon i awe apale khumi na awiri, khuwooza yoori: ¹⁸ “Mwisiile! Ninwelela Yeruzaleemu, Mwaana wa Pinaatamu onttelaa winkheleliwa mmakhono wa mahaakhimu a tiini na anamanozela a kano, yo anhukhumwele wuuliiwa,

¹⁹ enkheleliwe mmakhono wa amalapo anveyise, anjaphe na akhomeliwe. Ila siiku ya ttaatthu asisimuwe.”

Oveka wa mamaawe Tiyaaku na Yaahaya

²⁰ Aphano maama wa aana a Zepeteeuw khumwaattama Yinsa na khukokhora khusala anvekela. ²¹ Yinsa khumuuzela yoori: “Weeyo ontakhani?” Maama otule khujipu yoori: “Kintakha yoori muufwalume mwawo aanaaka apa awiri mmote eekhale nkono nlume nkina nkono nkha.” ²² Yinsa khunjipu yoori: “Mweeyo khamwinjuwa ethhu mwinvekaaye. Mwinwahi onywela koopho ethiiti kinttelaaye onywela?” Yo khujipu, “ninwahi.” ²³ Aphano Yinsa khuri: “Weekhwelle mweeyo mwinteela onywela koopho yaka, ila wiikhala nkhone nlume aka ama nkhone nkha kahaiyo miyo kinlupaaye. Maana puuro eto ti yawe otule aattaleliweeyo ti Paapa.” ²⁴ Wakathi apale akina khumi asiiliyeovo mattakhuzi apale, khwiyya ookasirikha khwa attwi apale awiri. ²⁵ Aphano Yinsa khuwaakhuwela khulupa yoori: “Mwijuwe yoori anamalokozela a kapila anshintta, na attunkhulu aya anthoonyeza ofwalume khwa yo.” ²⁶ Mweeyo mwihiye toowo, ila otule antakhaaye wiiya wa fwayita awaarumeyele azaawe; ²⁷ na otule antakhaaye wiiya wa mwanzo eeye mwiithwaana enu mweeyo. ²⁸ Nkhama ethiipo, Mwaana wa Pinaatamu khateleeni orumeyeliwa, ila orumeya na winkha ohaayi awe khwa owaakaphula atthu awaatta.”

Ovoniwiwa wa ananhooni awiri a Yeriko

²⁹ Yo alankhaka Yeriko, atthu awaatta khusala awaalotta. ³⁰ Atthu awiri oochooni eekhaliye nshini wa tarikhi, wakathi asiiliyeovo yoori Yinsa onnta ovira, khwaaza onyakula araka: “Mbwana, Mwaana wa Daawuada, noonele huruma!” ³¹ Atthu apale awaatta khusala awaakkhattaza, awaatakhelaka yoori anyamale, ila khusala atepa onyakula araka: “Mbwana, Mwaana wa Daawuada, noonele huruma!” ³² Yinsa khweemela khuwaakhuwela khuwoozela yoori: “Mweeyo mwintakha yoori miyo kuretteleni niini?” ³³ Yo khujipu yoori: “Mbwana, nintakha noone.” ³⁴ Yinsa khuwoonela huruma na khuwaasapa maasho aya, nasaapiru khwaaza woona khusala anlotta.

21

Ovira wa Yinsa Yeruzaleemu

¹ Ari khariyu ya Yeruzaleemu, khufiya Betifwaaje, va mwaako Oluveera, Yinsa khuwaaruma anakhiyoni awe awiri khuwooza yoori: ² “Mwilawe nti opo mwinoonaaye omaasho wenu okho, mwinlawwa mwansikane mwaana wa puuru weekha afukiwe vamote na weelume. Mwinfukule mwikitisele.” ³ Amana apuwa ntthu awuuzelani, mwimuuze yoori Mbwana onnta owaatakha, onnta wuulikhani nasaapiru mwiwaathhuule. ⁴ Vitthu epo zaretikhana yoori emarisale etile alupiyeyo napiyu yoori: ⁵ “Muuze sitati ya Siyooni yoori: ‘Omoone, mfwalume awo onnta wuuteela, woojipushuwisa, aweliye va mwaana wa puuru, nyama yoopakhira.’”

⁶ Anakhiyoni khuretta etile aarumiweeyo ti Yinsa. ⁷ Khuntiisa puuru yekha na mwaana aya ntithiiru, aphano khutthiwavo kuwo zawe, ye khuwelavo. ⁸ Atthu apale awaatta aari onlottaaye khusala attattikha ajapi zaya ntarikhi, akina khusala ashija virapi za miitthi na ottattikha ntarikhi. ⁹ Apale aalokoziyeeyo na apale aari onlottaaye eetta onyakula araka: “Ozaana khwa mwaana wa Daawuada! Wooparikhiiyiwa ti otule antaaye khwa nzina la Mbwana! Ozaana wa pinkuuni.” ¹⁰ Wakathi Yinsa aviriyeovo

Yeruzaleemu, sitati yooshi khutapanyeya, atthu khusala oozeliwa yoori: “Paani otu aya?”¹¹ Yo khusala ajipu yoori: “Otu ti Yinsa, napiyu wa Nazareeti ya Kalileya.”

Otwahareшиwa wa Nyuupa Yoosifwiwamo

¹² Yinsa khuvira Nnyupa Woosifwiwamo, khuwiikaramo ooshi apale aari wuuzanyisaye na apale aari wuuzanyaaye. Khukurumula meeza a anamapatilisa nzurukhu na khateera za apale aari wuuzanyaaye jiwa.’

¹³ Khuwooza araka: “Yaatikhwa yoori; ‘Nyuupa yaka enttela wiithiwa nyuupa yoosifwiwamo, ila mweeyo mwaretta wiiya puuro ya anamwiiya.

Yinsa ontta ovonisa Nnyupa Woosifwiwamo

¹⁴ Ananhooni na anamarakala khumwaattama Yinsa Nnyupa Woosifwiwamo, ye khuwaavonisa. ¹⁵ Mahaakhimu a tiini na anamanozela a kano ooniyeovo vitthu zootikinisa Yinsa aari orettaazo na aasimana aari okhuwaaye araka: “Ozaana mwaana wa Daawuuda!” khushanka khusala oozela yoori: ¹⁶ “Onsiila epi anlupaazo apa?” Yinsa khuwaajipu yoori: “Aaa; mweeyo khamwina some yoori: ‘Khwa nlimi la asimaana na apale anamwaaye antthenkeza siifwa khaamili?’” ¹⁷ Yinsa khuwaalikha, khu-laamo nsitati mphule khulawa Betaaniya ottuukho aalaliyeewo.

Nfikeera woohiina mishumo

¹⁸ Mmeesho mwaya supuyenee, arutelaka ositati, khunkhola jala.

¹⁹ Khoona nfikeera nshini wa tarikhi, khwaattama ila khuhisikanani hatha mishumo, khusikanamo mathaparu paasi, aphano khuri: “Weeyo khunteela wiima theenya mishumo!” Nfikeera opule khuuma nasaapiru.

²⁰ Anakhiyonи awe ooniyeovo epile zaarettikhaniyeeyo, khwiya ooshanka na ootkinisiwa alupaka yoori: “Wooma toovi nasaapiru nfikeera opu?”

²¹ Yinsa khuwaajipu yoori: “Kiniuuuzani khweele yoori, amana mwiiyana amini na woohiina nshikili, mwinttela oretta woohiyi epi zirettikhaniyeeyo khwa nfikeera opu paasi, ila hatha wuuza mwaako opu yoori okhuleye ojeeselele mpahari, zintta orettikhana. ²² Amana mwiiyana amini mwintpwekhhera zooshi mwinttelaaaye oveka khwa lompa.

Ofwalume wa Yinsa ontikinisa

²³ Paata ya Yinsa ofiya Nnyupa woosifwiwamo, eettaka osomisa, ma-haakhimu a tiini na attunkhulu a tiini khumwaattama khumuuzela yoori: “Vitthu epi onrettana ofwalume-ni? Wala ti paani awinkhiyeeyo ofwalume aya opu?” ²⁴ Yinsa khuwaajipu yoori: “Miiyo kintta owuuzelani theenya; amana mwikijipu, kintta owuuzani ofwalume kinrettanaaye vitthu epi.

²⁵ Woosa wa Yaahaya waari wa vayi? Wa pinkuuni ama wa anaatamu?” Yo khusala akheetisana atthaapo-ru araka: “Amana niri waari wa pinkuuni, ye ontu onuuzelaa yoori ‘khi mwaasa aya niini mwiikhupalelaka?’ ²⁶ Ila amana nilupa yoori pi wa anaatamu, niniwoova atthu, maana ankhupalela yoori Yaahayanapiyu.” ²⁷ Yo khunjipu Yinsa yoori: “Khanijuweeni.” Ye khuwooza theenya yoori: “Hatha vattithiiru akiniuuuzani owahi kinret-tanaaye vitthu epi.”

Nlikaniso wa aana awiri

²⁸ Mwinoona toovi? Aarivo mwinyi mmote aariina aana awe awiri. Khumweetela otule wa mwanzo khumuuzaa yoori: ‘Mwanaka, etta wakhole khaazi leelo omashapa.’ ²⁹ Khujipu yoori: ‘Akeepu!’ Ila khuupuwela khu-lawa okhola khaazi etile ooziweeyo. ³⁰ Paapa otule khumwettela mwanawee

otule nkina khumuza nkama ethiipo amuziyeeyo otule nkina. Mwaana otule khujipu yoori: ‘Kintta olawa mbwana aka!’ Ila khuhilawi.³¹ Khwa aana apale awiri ti tuuvi arettiyeeyo matakheло a papaawee?’³² Khujipu yoori: ‘Otule wa mwanzo.’ Yinsa khuwoza yoori: ‘Kiniwuuzani khweele yoori, anamariphisa lumpuru na amalempe antta weetta muufwalume wa Nluku mweeyo mwihineettemu.³³ Maana Yaahaya ata yoori oothonyezeni tarikhi ya shariya, mweeyo khuhinkhupaleli, ila anamariphisa lumpuru na amalempe ankhupalela. Mweeyo moona vitthu epile khuhithupwiyi na wala khuhinkhupaleli.

Nlikaniso wa anamalima ootakhala rooho

³³ “Mwisiile nlikaniso nkina: Aarivo thaajiri mmote wa mmuti ntumphule aalimiyeeyo nshapa lawe la wuuva. Khujekelela looshi, khwaat-tala kulaathayini ya onluwatthelamo wuuva na khujeka korofwa ya namweekesela. Khuwaalikhela anamalima apale akina, khulaamo mmuti mphule, khusala alawa safwari yawe.³⁴ Ofiyeevo wakathi wa wuu-rula, khuwaaperekha akarumeya awe khwa anamalima apale, yoori ap-wekherele mishumo zawe.³⁵ Anamalima khuwaakhola akarumeya a mweenyewe nshapa apale; mmote khunvulalisa, nkina khumuula, wat-taathu khunvonya na mawe.³⁶ Aphano khuwaaperekha akarumeya awe akina awaatta, anamalima apale khuwaatthantta nkama ethiipo awaathanttiyeeko apale akina.³⁷ Omwiisho khumperekha mwanawе alupaka yoori: ‘Mwanaka otu antta onshitahi.’³⁸ Ila anamalima amoniyeeyo mwaana otule, khulupa yoori: ‘Otu namarithi. Mwite, nimuule nthuule eritho yawe.’³⁹ Attaaphale yo khunkhola khumweeselela othetekeli wa nshapa khumuula.⁴⁰ Amana ata mweenyewe nshapa, ontela owaaretela niini anamalima apale?”⁴¹ Yo khujipu yoori: ‘Wekhweele onta owoola anamalima apale ootakhala rooho na awenkhe anamalima akina nshapa laya. Apa nka amwinkhaka phantte ya mishumo wakathi wa wuu-rula.’

⁴² Yinsa khuwoozela yoori: ‘Khamwinasome zawaatikhiwa Ttakathifi yoori: ‘Liwe anamajeka akathaliyeeyo, nttho tthi liyiiyeeyo liwe linkhomaazaaye; eto enta wa Mbwana, na ethu yooshapweya khwa fweeyo.’⁴³ Paata ya toowo kiniwuuzani yoori Ofwalume wa Nluku mwint-tela onyakanyiwa enkhiwe apale animaaye mishumo za Ofwalume.⁴⁴ Otule anttelaaaye okwela liwe laya ntthi onta othapateya, na otule linttelaaaye onkhwela onta othatuwa lifufu.⁴⁵ Mahaakhimu a tiini na mafwarizeewu, asiiliyeeyo milikaniso za Yinsa, khuweeleya yoori aari ottakhula monkoni wa yo.⁴⁶ Khusala eekesa nanna ya onkhola ila khusala awooova atthu, maana aari onjali nkama napiyu.

22

Nlikaniso la Njampo la harusi

¹ Yinsa khurutela owoza milikaniso araka: ² “Ofwalume wa Pinkuuni on-lattanana mfwalume mmote atthekeziyeeyo njampo la harusi ya mwanawе.³ Aphano khuwaaruma akarumeya awe olawa owaakhuwela anamala-leyiwa yoori ate onjampo; ila yo khuhitakhi ota. ⁴ Khuwaaruma theenya akarumeya akina araka: ‘Mwawooze anamalaleyiwa yoori: Njampo lalikana; mompe zaka na aana aya ooneneva kashija na zooshi zalikana. Mwite onjampo la harusi.’⁵ Ila yo khuhijali khusala alawa, mmote omashapa wawe, mmote nzanshara mwawe,⁶ apale asaliyeeyo khuwaakhola akarumeya khuwaahukhumu na khuwoola.⁷ Ila mfwalume

khwiiya wawiiphiriwa, khuwaaruma anajanka awe olawa owaatapanya anamahusuti apale na khulukza sitati yaya etile.⁸ Aphano khuwooza akarumeya awe yoori: ‘Njampo lalikana, ila anamalaleyiwa khaari osuhi.⁹ Mwilawe mmizukulowo za tariki mwawaalaleye ooshi apale mwint-telaaye owaasikana.’¹⁰ Aphano akarumeya apale khulawa mmatarikhi na khuwaakusanya atthu ooshi apale awasikaniyeyo, atthu ooshapweya rooho na atthu ootakhala rooho, nsana waari ojiwaavo njampo khwiiya wawiitaala pi anamalaleyiwa.

¹¹ “Wakathi mfwalume aviriyeovo yoori awoone anamalaleyiwa apale, khumoona mwinyi mmote ahaawaliyeeyo kuwo za njampo.¹² Khumuuzela yoori: ‘Swaahipu, wavira toovi ohiwaleeni kuwo za njampo?’ Mwinyi otule khwiiya woonyamala.¹³ Aphano mfwalume otule khuwaaruma akarumeyaawe yoori: ‘Mwinfuke moolu awe na makhono awe mwimweeselele vaje, n’yiiza; ntumpho oniyamo olila na oluma meeno’.¹⁴ Maana awaatta pi ookhuweliwa, ila vattithiiru pi oothawuliwa”.

Monkoni wa lumpuru

¹⁵ Mafwarizeewu khlaavo aphale vaya, khusala awaza shawuri zon-vithaalela khwa mmattakhuzi awe.¹⁶ Khuwaaruma anakhiyoni aya na atthu akina a khuntti ya Herooti khusala amuuza Yinsa yoori: “Mwaaliimu, fweeyo najuwa yoori weeyo onlupa khweele na onsomisa na khweele tariki ya Nluku, khunjilikha othoweleseliwa ti ntthu, wala khuniwaaphuka atthu khwa nanna ariizo.¹⁷ Nkanuuze, ona shawuri ni? Ti ya shariya onripha lumpuru Seezari ama wala?”¹⁸ Yinsa khujuwa thwapiya zaya zootakhala khuwaajipu yoori: “Manaaifikhi, mwaasa aya niini mwikeezaka?”¹⁹ Mwikithoonyeze nzurukhu onriphiwaaye lumpuru.” Khutiiseliwa nzurukhu mmote wa feeta.²⁰ Ye khuwoozela yoori: “Ratarato eti na nzina ntthi laatikhieeyo apha tthi laani?”²¹ Khujipu yoori: “Seezari”. Aphano khuwooza yoori: “Mwimwinkhe Seezari etile yiyyiye ya Seezari na mwimwinkhe Nluku etile yiyyiye ya Nluku.”²² Asiliyeovo mattakhuzi apale, khwiiya ootokinisiwa na khulikha wuuzela khusala alawa.

Masatukhi na Osisimuwa

²³ Siikhu ethiitile, khunteela masatukhi akina anlupaaye yoori khawiivo osisimuwa, khusala amuuzel a yoori:²⁴ “Mwaaliimu, Munsa alupa yoori: ‘Amana ntthu afwa, muukha awe ahinvokoleenei mwaana, ttwiye ona ya onrala namafweliwa ti mannawe yoori amwinkhe aana ttwiye otule afwiyeeyo.²⁵ Fweeyo naari attwi sapa. Wamwanzo khuloola na khufwa. Muukha awe khanvokoleiye mwaana, khuraliwa ti ttwiye.²⁶ Khurettikhana nkhamma zanrettikhaneliyeeyo otule wa mwanzo na wa ttaatthu mpakha otule wa saapa.²⁷ Omwiisho waya paata ya ooshi ofwa, na muukha khufwa.²⁸ Aphano, wakathi woosisimuwa, khwa alumbe apale sapa ti tuuvi anttelaaaye wiyya mannawe? Maana ooshi anraaliye.”²⁹ Yinsa khuwaajipu yoori: “Mweeyo mwathowelela, maana khamwinjuwa Zawaatikhivi Ttakathiiwu wala owahi wa Nluku.³⁰ Maana wakathi woosisimuwa atthu khanloola wala khanlooziba; anttela wiyya nkhamma malayikha pinkuuni.³¹ Khwa osisimuwa wa ananfwa, mweeyo khamwisomeeni etile Nluku alupiyeeyo yoori:³² “Miyo ki Nluku wa Eburahiima wa Esiyaakha na wa Yaakhumpa?” Ye khahiyo Nluku wa ananfwa, ila wa atthu awoona.”³³ Asiliyeovo mattakhuzi apale, atthu khwiiya ooshanka khwa osomisa wawe.

Oruma nwulu

³⁴ Paata ya mafwarizeewu ojuwa khuwaanyamaza masatukhi, khukusanyeya. ³⁵ Mmote wa yo, namanozela kano khweeza omuuzel yoori: ³⁶ "Mwaaliimu, nrumo nwulu pi puuvi?" ³⁷ Yinsa khunjipu yoori: "Omphete Mbwana Nluku awo khwa rooho yawo yooshi, khwa nafusi yawo yooshi na akhili zawo zooshi. ³⁸ Opu pi wiiyiyeeyo oruma wa mwanzo na wootepa owula. ³⁹ Waphiiri onlattanana otthuupu: omphete nzaawo nkhamma ethhipo onjiphetaazo omweenyewe. ⁴⁰ Kano zooshi za Munsa na masomi ooshi amanapiyu anrumeyela mirumo ethhiipi miwiri."

Al-Masiihu Mbwana wa Daawiuda

⁴¹ Mafwarizeewu apale nalelo ari okusanyeya, Yinsa khuwoozela yoori: ⁴² "Mwinuuupuwelani monkoni wa Al-Masiihu? Mwaana waani?" Yo khujipu yoori: "Mwaana wa Daawiuda." ⁴³ Yinsa khuwoozela theenya yoori: "Aphano, khi toovi Daawiuda khwa Rooho Ttakathhiifu omwiitha yoori Mbwana, alupaka yoori: ⁴⁴ Mbwana amuuza Mbwana aka yoori: "Wiikhale nkhone nlume aka mpakha maatuwi awo kiwaatthe vathi wa moolu awo?" ⁴⁵ Nkhama Daawiuda onimwiitha yoori Mbwana, enrettikhana toovi eeyaka mwanawee?" ⁴⁶ Khuhiiivo mmote awahiyeeyo onjipu, na waaza siikhu ethiitile khina nkina awahiyeeyo omuuzela theenya.

23

Yinsa onkhattaza onaafikhi wa Mafwarizeewu na wa anamanozela a kano

¹ Aphano Yinsa khuwooza atthu apale na anakhiyon awe yoori: ² "Anamanozela a kano na mafwarizeewu eekhalela khukulu ya Munsa. ³ Mwiwaashututele na mwithokorele zooshi epile aniuuzaanini. Ila mwihiweezele vitthu anrettaazo. Maana khanrumeyela epile anlupaazo. ⁴ Yo anfuka maphuta ooilema na ottikha mmafuzi wa atthu, ila yo khantakha hatha oshashula na yaala. ⁵ Zooshi anrettaazo antakha yoori ooniwe pi anaatamu. Yo anjfukela hirizi mmwishwa mwaya, na olepisa mashaka a ajapi zaya. ⁶ Owaatuvela puuro zooshapweya za vanjampo na wiikhala wilokozi nsinakooka, ⁷ owaatuvela ochelisiwa vamwanttiwa na wiithiwa Mwaaliimu. ⁸ Mweeyo khamwinlawa wiithiwa Mwaaliimu, maana Mwaaliimu enu mmote paasi, mweeyo mooshi mwa attwi. ⁹ Ahiiyevo vathi apha mwinttelaaaye omwinkha khalamu ya 'opaapa', maana Papeenu ori mmote paasi, otule ari pinkuuni. ¹⁰ Wala ahiiyevo anttelaaaye omwinkha khalamu ya namanozela maana namanozela ori mmote paasi, Al-Masiihu. ¹¹ Ila otule eyiye nwulu vakathi venu eeye karumeya. ¹² Otule anjiwilisaaye ontta opushuwisiwa; otule anjipushuwisaaye ontta owlisiwa.

¹³ Olaanikha pi weenu mweeyo anamanozela a kano na mafwarizeewu, manaafikhi, maana mwiniwfukela atthu Ofwalume wa pinkuuni, ila na mweeyo khuheettimo na khamwintakha owaalikha weettamo apale antakhaayel! ¹⁴ Olaanikha pi wenu mweeyo anamanozela a kano na mafwarizeewu, manaafikhi, maana mwimpala maali za anamfweliwa pi amannazaya na ojitapwatelana oretta lompà zoolepa; khwa ethhipo mwin-teela ohukhumwiwa saaneene. ¹⁵ Olaanikha pi wenu mweeyo anamanozela a kano na mafwarizeewu, manaafikhi, maana mweeyo mwinlokha pahari na mwineetteta nti wooshi mweekesaka owaathuula atthu mwiwaatthe ntiiini mwenu. Na amana mwimpattha ntthu aya oto onretteya swaafu piiri wiya mwaana wa mothooni zayita mweeyo.

¹⁶ Olaanikha pi wenu mweeyo, anamalokozela oofoon! Maana mwinlupa yoori: ‘Amana ntthu alapha khwa omwimpari, eto khina maana. Ila amana ntthu alapha khwa thahapu ya omwimpari oto ona sharuthi ya oretta etile alaphiyeyo.’ ¹⁷ Aloolo oofoon! Eriina fwayita ti tiivi, thahapu ama mwimpali opule ontakathisaaye thahapu? ¹⁸ Mweeyo mwinlupa theenya yoori: ‘Amana ntthu alapha khwa nzina la alitaari, olapha waya opo khuna maana, ila ntthu amana alapha khwa zaakha etile eriye vatulu vaya, oto ona yoorumeyela olapha wawe.’ ¹⁹ Atthu oofoon, eriina fwayita ti tiivi, zaakha ama alitaari anttakathisaaye zaakha? ²⁰ Nakataalikha otule anlaphaaaye khwa alitaari onlapha khwa alitaari na yooshi etile eriivo. ²¹ Amana ntthu alapha khwa mwimpali, onlapha khwa mwimpali na khwa otule aniikhalaaye ntumpho. ²² Na otule anlaphaaaye khwa pinku onlapha khwa khukulu ya Nluku na khwa otule ekhaleliyeyo.

²³ Olaanikha pi wenu mweeyo anamanozela a kano na mafwarizeewu, manaafikhi, maana mweeyo mwinimwinkha Nluku lifunku la khuumi mpakha vitthu za nwoorotha na mwinimwinkha nyaani zootuva na samuli, ila mwinkhijilela oruma wa fwayita wa kano, wiyyiye: Shariya, huruma na waamineya, nakataalikha mwaarina ya oretta epo zaya woohiweraweri epile kiina. ²⁴ Anamalokozela oofoon! Mwinshuja kuuku, ila khumiza enkamiiya.

²⁵ Olaanikha pi wenu mweeyo, anamanozela a kano na mafwarizeewu, manaafikhi, maana mweeyo mwinoosa pilawuri na parathu oje waya, ila nkaththi mwenu weetaalamo wiyya na omaashokopho. ²⁶ Mafwarizeewu oofoon, moose khapula pilawuri nkaththi mwaya, aphano phantte etile ya oje entta wiyya yooshapweya.

²⁷ Olaanikha pi wenu mweeyo, anamanozela a kano na mafwarizeewu, manaafikhi, maana mweeyo mwiri nkhamma vilalo yoovaaziwa khinampo, oje waya enumpuwaaye nkhamma yooshapweya, ila nkaththi mwaya ee-taaliyemo makhonkolo alupa ofwa na wakhula nanna ya vitthu zoovutta. ²⁸ Oje wenu mwinuupuwa nkhamma anashariya, ila nkaththi mwenu mweet-aala onaafikhi na vitthu zootakhala.

²⁹ Olaanikha pi wenu mweeyo, anamanozela a kano na mafwarizeewu, manaafikhi, maana mwinjeka khapuri zooshapweya za manapiyu, khuretta wiyya vilalo za akemaani. ³⁰ Mwinlupa yoori: ‘Eriwaka neettiye wiyyavo wakathi wa amarehemu apapazethu, khanaari wiyyana phantte khwa yo ya owoola manapiyu?’ ³¹ Etthiipo, mweeyo mwinjilawela oshaahiti yoori mwa aana a apale awooliyeyo manapiyu. ³² Mwilikhe wiitaaza mphimo wa twampi za amarehemu apapazenu. ³³ Nyookha! Ojama wa evili! Mwinttelia owerawera toovi hukhumu ya mothooni? ³⁴ Tiito miyo kooperekhezani manapiyu, ajuwi na anamanozela a kano. Akina mwiwoole, mwiwaakhomele, mwiwaajaphe nsinakooka mwenu na mwi-waalaupatthe sitati khwa sitati. ³⁵ Khwa ethiipo eniwiittikhelani taamu yooshi ya anashariya yiittikheliyeyo vathi, waaza taamu ya nashariya Apeele, mpakha taamu ya Zakariiya mwaana wa Barakiya, mwimuiulyeyeo vakatthi wa omwimpali na alitaari. ³⁶ Miyo kiniwuuzani khweele yoori, zooshi epo ziniwateela atthu aleelo.

Ojiliza monkoni wa Yeruzaleemu

³⁷ Yeruzaleemu, Yeruzaleemu, weeyo oniwuala manapiyu na owaavonya apale aperekhiweeyo! Swaafu kavi miyo kitakhaka owaakusanya aana awo nkhamma mwanakhu aniwakusanyaazo aana awe mmapaphelo,

ila mweeyo khuhitakhi. ³⁸ Moone, yoori nyuupa yenu enttela wiiya yoorthamiwa. ³⁹ Maana miiyo kiniuuuzani yoori, mweeyo khamwintela okoona theenya, mpakha mwilupe yoori: ‘Wooparikhiiwa ti otule anttaaye khwa nzina la Mbwana.’”

24

Opwechiwa wa Nyuupa Woosifwiwamo

¹ Yinsa khusaruwa Nnyupa Woosifwiwamo, khusala alawa, anakhiyonni awe khumwaattama yoori anthoonyeze manyupa apale ooshapweya. ² Yinsa khuwoza yoori: “Mweeyo mwinoona ooshi apa? Weekhwhee miyyo kiniuuuzani yoori khalinsalavo apha liwe vatulu wa liwe lihinttelaaye opwechiwa.”

Alama za mwiisho wa wakathi

³ Wakathi Yinsa eekhaliyevo va mwaako Oluveera, anakhiyonni khulawa khwiithaalana othetekela na khunvekela yoori: “Nkanuuze, zinttela orettikhana lini vitthu zaya epo, wala amana otaaka, alama-ni enttelaaye wiiyavo na alama-ni ya mwiisho wa olumwenku?” ⁴ Ye khuwaajipu yoori: “Phoole, ti ahiiyevo hatha nthu anttelaaye wuuttettekhan!” ⁵ Maana atthu awaatta anlawa ate khwa nzina laka, alupaka yoori: ‘Miyo ki Al-Masiihu’ na owaattttekha atthu awaatta. ⁶ Amana mwisiila hapari za viitha ama nzuuza la viitha, mwihoove. ⁷ Khapila enttela wuumanana khapila kiina, ofwalume na ofwalume nkina, enttela opuwa esikinyaatthi na jala phantte zawaatta. ⁸ Zooshi epo yaazo ya vitthu za olwaaza.

⁹ Aphano yo anteela owinkhelelani yoori mwilupathiwe na muuliwe, mwinlawa mweeniwe ti khapila zooshi mwaasa wa nzina laka. ¹⁰ Wakathi aya opo, atthu awaatta anteela wanswi amini anttela wiiya anamazinkula, na wiinana mmote na nzaawe. ¹¹ Anlawa apuwe manapiyu awaatta oojipanka na awaattttekha atthu awaatta. ¹² Vitthu zootakhala zinttela weekezeleya, na pheta ya atthu awaatta enttela ovukuwa. ¹³ Ila otule anttelaaye ovilela mpakha mwiisho onta wuusurukha. ¹⁴ Enttela olaleyiwa hapari epi za Ofwalume wa Nluku olumwenku wooshi, nkhamma osahaahiti khwa khapila zooshi aphano osala ota mwiisho.

Ohoowa nwuulweene

¹⁵ “Mwinteela woona okufuru wa woopisa wa pala ontelaaye opuwa Puuro Ttakathiifu, etile alupiyeyeo napiyu Daniyeele - osome na eweeleye. ¹⁶ Aphano apale anttelaaye wiiya Yudeya athhirele omwaako. ¹⁷ Otule anttelaaye wiiya vatulu wa nyuupa ahishukhe yoori alazemo etthu nnyupa mwawe, ¹⁸ na otule anttelaaye wiiya omashapa ahirutele onti weettela ajapi yawe. ¹⁹ Siikhu etile ti ya woopisa khwa apale awiimittha na anaamwsaaye. ²⁰ Mwilompe yoori miswipa epo ehirettikhane mwiita ama jumwa-monsi. ²¹ Maana wakathi aya opo onlawa wapuwe ohoowa nwulweene, thanku mwanzo wa olumwenku, na khunteela opuwa nkina nkhamma otthuupo. ²² Eriwaka wakathi aya opo wa ohoowa khawaavukuliwe, khina aari weettelaaye wuusurukha, ila mwaasa wa apale oothawuliwa, siikhu zaya epo enttela wiiya zoovukuliwa. ²³ Aphano amana nthu awiuuzani yoori: ‘Otu ari apha Al-Masiihu!’ ama: ‘Otule ari okhule!’ mwhihinkhupalele. ²⁴ Maana anlawa apuwe a al-Masiihu oojipanka na manapiyu oojipanka anttelaaye oretta alama khulukhulu na vitthu zootkinisa yoori awaaahate hatha apale oothawuliwa. ²⁵ Miyo kawuuzani khapula zihinarettikhane epo zaya. ²⁶ Nakataalikha, amana muuziwa yoori: ‘Ori n’yaara,’ mwihilawee,

ama oriwa: ‘Ori nnyupa,’ mwihikhupali.²⁷ Maana, nkhamma ethiipo taari enlankhaaye malawa-juwa, na ojithoonyeza okhu lintupweelaawo njuwa, ethiipo onttela wiiya ota wa Mwaana wa Pinaatamu.²⁸ Vahali aniiyaavo muufwi, akhwaazi ankusanyeya attaapho.

Ota wa mwaana wa Pinaatamu

²⁹ Paata ya mashakha a siikhu epo, njuwa linn tela ozima na mweezi onttela olilha waara, matthottowa anttela okwa otulu na owahi wa pinkuuni onttela osakhinyeya.³⁰ Aphano epuwe pinkuuni alama za Mwaana wa Pinaatamu; khapila zooshi za vatuniya enttela ojikhupanyisa na enttela omoona Mwaana wa Pinaatamu ataaka mmawiku a pinkuuni khwa owahi na siifwa yawaatta.³¹ Ye onttela operekha malayikha awe na ovuma nwulweene wa malope, yo anttela owaakusanya ananthawuliwa aya ooshi khwa phantte nne zinlankhaawo pheevu, phantte khwa phantte kiina ya pinku.

Nlikaniso wa nfikeera. Ohirimiziwa monkoni wa ojeekesela

³² Mwijinozele osomisa wa nfikeera: Amana virapi zaya zootthelaka mathapa mwinjuwa yoori onsaleela ofiya mwiita.³³ Ethiipo na mweeyo, amana moona vitthu epo zooshi, mwijuwe yoori wakathi wafiya, ensaleela waaza.³⁴ Weekhweele kiniuuuzani yoori, khanteela ovira atthu apa aleelo zihirettikhaneene vitthu zaya epo.³⁵ Pinku na vathi zooshi zinteeela ovira, ila mattakhuzi aka khanviraruu.

Siikhu na wakathi khijuweyeeni

³⁶ Ila monkoni wa siikhu na wakathi khina anjuwaaye, wala malayikha a pinkuuni, wala Mwaana, ila Paapa paasi.³⁷ Nkhama ethiipo zaaret-tikhaniyeeyo wakathi wa Nuuhi, enttela wiiya ethiipo etelo ya Mwaana wa Pinaatamu.³⁸ Nkhama ethiipo siikhu ziviriyeezo za nnyeri, atthu aari oja na aari onywa, aari oralana na aari oloozana, mpakha ofiya siikhu Nuuhi eettiyeemo mmwaaraka.³⁹ Yo kaaajuviyevo hatha eththu mpakha wakathi otiyeevo nnyeri na khuwaathuula ooshi. Enttela wiiya ethiipo ota wa Mwaana wa Pinaatamu.⁴⁰ Aphano awiri anttela wiiya omashapa; mmote athuuliwe, alikhwiwe mmote.⁴¹ Aakha awiri achilaka tiriku; mmote athuuliwe, mmote alikhwiwe.⁴² Mwaasa wa ethiito, mwijeesele, maana khamwinjuwa siikhu anttelaaye ota Mbwana enu.⁴³ Ila eweeleyeni vitthu zaya epo; maana, mweenyewe nyuupa eriwaka eetta ojuwa wakathi anttaavo anamwiyya, eetta ojeekesela na khaari olikhelela opwechiwa nyuupa yawe.⁴⁴ Tiito, mweeyo theenya mwikiye woojikanisa, maana wakathi anttaavo Mwaana wa Pinaatamu pi opule mwihinaakhipwelaaye.

Karumeya wawaamineya na karumeya woohaamineyi

⁴⁵ “Ti tuuvi karumeya wawaamineya na waakhili, otule Mbwana awe amwinkhiyeeyo osala vaje vawe yoori asala awenkha atthu ethhu-yoojiwa wakathi khaamili?⁴⁶ Wooparikhiiyiwa karumeya otule mbwana awe ataaka anttelaaye onsikana arettaka ethiipo.⁴⁷ Weekhweele kiniuuuzani yoori onttela olikhelika weettetisa maali zooshi za mbwana awe.⁴⁸ Ila karumeya otule amana eeya wootakhala rooho, ajilupezaka mweenyewe yoori: ‘Mb-wana aka onta orupaza,’⁴⁹ na khusala awaapiya ashirikhaawe na oja na onywa na ananhapaliwa,⁵⁰ onttela ota mbwana wa karumeya otule khwa siikhu ahaari waakhipwelaaye na wakathi ahinjuwaaye.⁵¹ Ye onta onhukhumu saaneene antthe puuro ya manaafikhi, ottuukho onttelaaye wiyyawo olila na oluma meeno.

25

Nlikaniso wa aamwari khumi

¹ “Siikhu yaya eto, Ofwalume wa pinkuuni ontela wiiya nkama aamwari khumi athuuliye makhompe aya, khulawa okutthanana mposi. ² Athaanu khwa apale khumi aari alolo, athaanu aari akhili. ³ Apale oololo khuthuula makhompe aya, khuhinthuuli patarooya, ⁴ ila apale a akhili olikha othuula makhompe-ru khunthuula theenya patarooya nttopwiyo. ⁵ Mposi khurupaza ofiya, na ooshi khuwaakhola osikizi khulala. ⁶ Ila osikhu layili, khusileya nkhuwo waari oraaye: ‘Mposi afiya! Mwisaruwe mwampwekherele.’ ⁷ Aamwari apale ooshi khulankha khusala atthenkeza makhompe aya. ⁸ Apale oololo khusala awooza apale awiiyana akhili yoori: ‘Mwinimeele patarooya enu vattithiiru, maana makhompe eethu antta osizila.’ ⁹ Yo khujipu yoori: ‘Wala, khanfiyela onrumeyela mweeyo na fweeyo. Mwilawe mwamuuzanye patarooya. ¹⁰ Wakathi alawiyeevo omuuzanya patarooya, mposi khufiya, aamwari apale ajitthekiyeyo khuvira vamote na mposi olawa oja njampo la harusi na nlako khufukiwa. ¹¹ Wakathi vattithiiru, khusala ata aamwari apale oololo khusala akhuwa araka: ‘Mbwana, mbwana, mwinifukulele nlako!’ ¹² Ila ye khuwaajipu yoori: ‘Weekhweele kiniwuuzani yoori akinuujuwan.’ ¹³ Tiito kiniwuuzanini yoori mwijeekeesele, maana mweeyo khamwinjuwa siikhu wala wakathi aya.

Nlikaniso wa nzurukhu

¹⁴ “Theenya Ofwalume wa pinkuuni ontela wiiya nkama mwinyi mmote atakhaka oretta safvari, khuwaakhuwela akarumeya awe khuwaalikhela maali zawe. ¹⁵ Mmote khumwinkha milikhi thaanu za nzurukhu wa feeta, nkina khumwinkha milikhi piiri, nkina theenya khumwinkha milikhi moote, wakhula ntthu amwinkhiye khwa makhaamu awe. Elottelanaka khulankha khusala alawa safvari yawe. ¹⁶ Otule enkhieeeyo milikhi thaanu za nzurukhu wa feeta, khulankha nasaapiru olawa oretta zanshara khupattha milikhi thaanu kiina. ¹⁷ Otule aariina mizurukhu milikhi piiri khupattha milikhi piiri teenya. ¹⁸ Ila otule enkhieeeyo nzurukhu milikhi moote khulankha khulawa khuthipa liphotto vathi khutthaavo khuvitha nzurukhu wa mbwana awe. ¹⁹ Paata ya ovira wakathi mwinkeene, mbwana wa akarumeya apale khuruti khuretta thamani na apale aya. ²⁰ Otule aapwekheriyeeyo nzurukhu milikhi thaanu wa feeta, khutiisa theenya nzurukhu milikhi thaanu wa feeta na khuri: ‘Mbwana, waakinkhiye nzurukhu milikhi thaanu wa feeta, woona kapattha theenya fwayita ya milikhi thaanu.’ ²¹ Mbwana khunjipu yoori: ‘Kemaani, karumeya wooshapweya na wawaamineya! Weeyo waamineya khwa ttiithiiru, apho kintta owinkha yawaatta. Ote ofurahi vamote na mbwana awo. ²² Khuta theenya otule apwekheriyeeyo nzurukhu milikhi piiri wa feeta khuri: ‘Mbwana aka waakinkhiye nzurukhu milikhi piiri wa feeta, kapattha theenya milikhi piiri.’ ²³ Mbwana awe khunjipu yoori: ‘Kemaani, karumeya wooshapweya na wawaamineya, weeyo waamineya khwa ttiithiiru, miiyo kiniwinkha zawaatta. Ote ofurahi na Mbwana awo.’ ²⁴ Mwiisho khuta otule apwekheriyeeyo nzurukhu milikhi moote khuri: ‘Miiyo kaajuwiye yoori mbwana o ntthu woozivala, onuurulaaye na epile ohikheyeeeni na okusanya epile ohizaleeni. ²⁵ Tiito keetta woova, khulawa khuvitha nzurukhu awo milikhi moote wa feeta khuthipela vathi. Woone, apha opu nzurukhu awo.’ ²⁶ Mbwana khunjipu yoori: ‘Karumeya wootakhala na wooviliwa!

Weeyo waajuwiyi yoori kinuurula na epile kihikheyenai na kinkusanya epile kihizaleeni. ²⁷ Aphano weeyo waarina ya olawana nzurukhu aka opanko yoori amana kiruti kinkhiwe nzurukhu aka wa wiiyana fwayita. ²⁸ Mwinnyakanye nzurukhu opo milikhi moote wa feeta, mwimwinkhe otule ariina milikhi khumi. ²⁹ Maana otule ariina, ontela winkhiwa theenya na oniyyana zawaatta. Ila otule ahina, hatha etile ariina ontta onyakanyiwa. ³⁰ Karumeya woohiina fwayita, mwimweeselele othetekele nyiiza nftumpo oriimo olila na oluma meeno.'

Ophukiwa wa khapila

³¹ Amana Mwaana wa Pinaatamu ata nsiifwa mwawe na malayikha ooshi, ontela wiikhala vakhukulu vawe ya nuuru ya pinkuuni. ³² Khapila zooshi zinttela okusanyiwa aphale ariivo, avalule khapila khwa khapila kiina nkhamma nshuki avalulaka pwittipwithi zawe vakatthi wa puuzi. ³³ Atthe pwittipwithi nkhone nlume na puuzi nkhone nkha. ³⁴ Aphano Mfwalume ontela owooza apale anttelaaaye wiiya nkhone nlume yoori: 'Mwite mweeyo ooparikhiyiwa ti Paapa! Mwpipwekhorele Ofwalume nkhamma eritho mwitthenkezelieeyo thanku wumpiwa wa olumwenku. ³⁵ Maana miiyo yaakikholiye jala, mweeyo khukinkha ethtu-yoojiwa; lakikholiye nnyottha, mweeyo khukimeela maati oonywa; kaari nletto mweeyo khukinkha puuro ya omaka. ³⁶ Kathaaleliwe, mweeyo khukinkha kuwo; keetta olwaaziwa, mweeyo khukiinanelia; kaari nkalapooso, mweeyo khukithotola.' ³⁷ Aphano makhaamili anteela onjipu yoori: 'Mbwnana, lini naawoniyeovo na jala khuwinkha ethtu-yoojiwa, ama lookholiye nnyottha khuumeela maati? ³⁸ Wakathi-ni nawooniyeovo ori nletto khuwinkha puuro ya omaka? Ama othaaleliwe, khuwinkha kuwo? ³⁹ Wakathi-ni naawoniyeovo ori nlwele ama nkalapooso khuta khuthotola?' ⁴⁰ Mfwalume khujipu yoori: 'Kiniwuuzani khweele yoori, etile mweeyo mwiwaaretteliyyeyo mmote wa attwizaku apa attiithi, mwakirettela miiyo.'

⁴¹ Aphano ye ontela owooza apale a nkhone nkha awe yoori: 'Ana malaanikha mwikaattuwe! Mweette omootttho wa mileele, waattaleeliweeyo Sheethwani na masheethwani awe. ⁴² Maana miiyo yaakikholiye jala, mweeyo khuhikinkhi hatha ethtu-yoojiwa, laakikholiye nnyottha mweeyo khuhikinkhi hatha ethtu yoonywa. ⁴³ Kaari nletto mweeyo khihikinkhi hatha puuro yoomakov, kathaaleliwe mweeyo khuhikinkhi kuwo, keetta olwaaziwa na ofukeliwa nkalapooso, mweeyo wala okithotola.' ⁴⁴ Yo anjipu yoori: 'Mbwnana, nawoona lini yuukholiye jala wala luukholiye nnyottha ama ori nletto ama ohina kuwo ama olwaaziwaka na ofukeliwe, fweeyo kuhiwaaawuni?' ⁴⁵ Ye ajipu yoori: 'Kiniwuuzani khweele yoori, etile mwihiinretteleeni mmote wa apale attiithi, khamwikirettelleeni na miiyo.' ⁴⁶ Apa aneetta ohukhmu khwa mileele, ila makhaamili anttelaa yiyana ohaayi wa mileele.'

26

Shawuri za otakha wuuliwa Yinsa

¹ Paata ya olupa vitthu epile, Yinsa khuwooza anakhiyonai awe yoori: ² "Nkhamma mwinjuwaazo, ensaleela siikhu piiri ofiya siikhu ya njampo la Paashikowa, na Mwaana wa Pinaatamu ontela winkheleliwa yoori akhomeliwe." ³ Aphano mahaakhimu a tiini na attunkhulu a tiini khukusanyeyo onyuupa wa haakhimu nwulu aari wiithiwaaye Kayifwa;

⁴ khuwaza shawuri yoori ankhole Yinsa sirini na amuule. ⁵ Ila khusala alupa yoori: "Nihirette wakathi wa njampo yoori atthu ahipuwise nzuzu."

Yinsa onvaaziwa mafuttha oonukhela nti wa Betaaniya

⁶ Yinsa eettiye Betaaniya, owawe Simawu otule raku aariinaaye makut-tula. ⁷ Aphano muukha mmote khuta aphale aariivo Yinsa athuuliye suupha ya mafuttha oonukhela awaatta nzurukhu, khwiitthela eeshwa ya Yinsa wakathi ansikaniyeevo eekhaliye vameeza. ⁸ Anakhiyoni ooniyeevo vitthu epile khushanka na khuri: "Mwaasa aya niini oharipwaka mafuttha apa?" ⁹ Mafuttha apa ahoozanyisiwe, nzurukhu aya enkhiwa asikhini!" ¹⁰ Ila Yinsa ajuwiyeovo etthu aari olupaaye, khuri: "Mwinimwantipwelani muukha otu? Ye aretta etthu yooshapweya khwa miyo. ¹¹ Maana asikhini aniiya vamote na mweeyo wakhula siikh, ila miyo wala. ¹² Mafuttha apa eettheliyeeyo mwiili aka, ye aretta khwa ontthenkeza ozikhwiwa waka. ¹³ Kiniuuuzani khweele yoori: Wakhula vahali entafusiriwaavo hapari zooshapweya khwa olumwenku wooshi, epi arettiyeeyo muukha otu, zeettaka olupiwa noofikhiriwa ye."

Yuuda oninzinkula Yinsa

¹⁴ Aphano mmote wa apale khumi na awiri, aariwitthiwaaye Yuuda Eshikariyooete, khulawa okutthanana mahaakhimu a tiini. ¹⁵ Khuwoozela yoori: "Mwinikiripa kavi amana miyo kiwinkhelelani?" Yo khusilana onripha nzurukhu talaathiini wa feeta. ¹⁶ Waaza wakathi otthuupule Yuuda khusala eekesaka nanna ya omwinkhelela Yinsa mmakhono wa maatuwi awe.

Anakhiyoni antthenkeza njampo la paashikowa

¹⁷ Siikh ya mwanzo ya Njampo la Phaawu Yoohiina Fwaramento, anakhiyoni khumwaattama Yinsa khumuuzela yoori: "Ontakha yoori nitthenkeze vayi ethu-yoojiwa ya Paashikowa?" ¹⁸ Yinsa khujipu yoori: "Mwilawe nsitati mwakutthanane mwinyi mmote mwimuuze yoori: 'Mwaaliumu alupa yoori: Wakathi aka onsaleela ofiya. Kinttela onja Paashikowa na anakhiyoni aka vaje vawo.'" ¹⁹ Anakhiyoni khuretta ethiipile ooziweezo ti Yinsa na khuntthekeza Paashikowa.

²⁰ Weettelaka oripa, Yinsa khulawa khwiikhala vameeza na anakhiyoni awe apale khumi na awiri. ²¹ Eettaka oja, khulupa yoori: "Kiniuuuzani khweele, mmote wa mweeyo onlawa akizinkule." ²² Yo khwiiya oohuzunika channu na khwaaza wuuzelana yoori: "Weekhweele khahiyo miyo Mbwana?" ²³ Yinsa khujipu yoori: "Nlupa anttelaaaye okizinkula kinjana sahani moote. ²⁴ Mwaana wa Pinaatamu onlawa afwe, nkhamma ethhipo yaatikhiweeyo monkoni wa ye. Ila wootakhalwa ti otule anttelaaaye onzinkula Mwaana wa Pinaatamu! Afwataali ahivokoliweeni." ²⁵ Aphano Yuuda, namazinkula, khuri: "Talili ti miyo Mwaaliumu? Yinsa khujipwela araka: 'Ayo, ti weeyo."

Njampo la Mbwana

²⁶ Eettaka oja, Yinsa khuthuula phaawu, khuparikhiya, khumeya na khuwenkha anakhiyoni awe araka: "Mwithuule na mwirafune; opu mwiili aka". ²⁷ Elottelanaka khuthuula jiikira, khushukhurwela na khuwenkha araka: "Mwinywe mooshi mweeyo. ²⁸ Eti taamu yaka ya wahati yiitthiweeyo khwa zwaamu ya atthu awaatta yoori eswaamiheliwe twampi. ²⁹ Miyo kiniuuuzani yoori, waaza nasaapi mpakha okho ninttaawo, akin-lawa onywa nshumo wa nrayi wa wuuva mpakha siikh kinttelaaye onywa

theenya nshumo wa nrayi wa wuuva na mweeyo muufwalume wa Paapa.
30 Paata ya yo wiipa liipo limote, khusala alawa omwaako Oluveera.

Yinsa onlupa yoori Pheeturu onteela onkhana

31 Aphano Yinsa khulupa yoori: “Osikhu opu, mooshi mweeyo mwinteela okitthira. Maana yaatikhwa yoori: ‘Kininvulalisa nshuki, pwittipwitthi za liphanko lawe zimwazeye.’ **32** Ila paata ya osisimuwa waka, kinttela olokoza Kalileya.” **33** Pheeturu khujipu yoori: “Hatha nkhamma ooshi eetta wuutthira, miiyo akinteela wuutthira.” **34** Yinsa khumuuzu araka: “Weekhwhee kiniwuuba yoori osikhu otthuupu, likukhuwi lihineekhe, weeyo onlawa wakikhane swaafu ttatthu.” **35** Pheeturu khujipu theenya yoori: “Hatha nkhamma ofwa vamote na weeyo, akinteela wuukhana!” Anakhiyoni ooshi khulupa ethiipo.

Yinsa nwoorotha wa Yetemaani

36 Aphano Yinsa khulawa na anakhiyoni awe puuro eniithiwaaye Yetemaani khuwooza yoori: “Mwiikhale apha, miiyo kinttela olompa aphale.” **37** Khunthuula Pheeturu na aana awiri a Zepeteewu, Yinsa khwaaza ohuzunikha na othunkuwikha. **38** Yinsa khuwooza yoori: “Nafusi yaka ti ya ohuzunikha venkivene, woosaleela ofwa. Apho mwisale apha na nijeesesela fooshi.” **39** Khususa vattithiiru, khukokhora khufisa ajihi yawe vathi, khusala alompa araka: “Paapa, nkhamma enwaheya, okaatuwanize jikira eti ya ohoowa; ila ehirettikhane nkhamma kintakhaazo, ila nkhamma ontakhaazo.” **40** Paata ya toole, khurutela aphale aariivo anakhiyoni awe khuwaasikana eettaka olala. Yinsa khumuuzela Pheeturu yoori: “Mweeyo khamwiwaheeni nenkawu ojeekesela fooshi wakathi mmote paasi?” **41** Mwijeesesela na mwilompe yoori mwihikwele muuzayiniwa. Rooho ti yookhomaala ila mwiili pi woottettheya.” **42** Khurutela olawa olompa theenya khuri: “Paapa, nkhamma khinwaheya okattuwananisa jikira eti khapula kihinyweeni, ti arettikhane matakheulo awo.” **43** Wakathi arutiyeovo theenya khuwaasikana eettaka olala, maana maasho aya eetta owaalemela. **44** Aphano khuwaalikha theenya, khulawa olompa swaafu ya ttaatthu, alupaka mattakhuzi atthaapale. **45** Nawiisha khurutela attaphale aariivo anakhiyoni awe na khuwoozela yoori: “Mweeyo nalelo mwintta olala na wiithuuwa? Wafiya wakathi! Moone yoori Mwaana wa Pinaatamu onttela winkheleliwa mmakhono wa anatwampi. **46** Mwilankhe, nilawe; oto antaaye apho namazinkula!

Okholiwa wa Yinsa

47 Ettaka ottakhula ethiipile, khuta Yuuda, mmote wa apale khumi na awiri, vamote na khuntti khulyeene athuuliye phanka na puutta, zaperekhiweeyo ti mahaakhimu a tiini na attunkhulu a tiini. **48** Namazinkula awenkhkiye alama apale aasiilananiyeeyo araka: “Otule kinttelaaye omnipatikha ti othuuto, mwinkhole.” **49** Wakathi Yuuda aari omwaattamaavo Yinsa khuri: “Salaama, Mwaaliimu!” Na khumpatikha. **50** Yinsa khumuuzu yoori: “Swaahipu, etile oteeliyeeyo oreitta, waakuve oreitte”. Attaaphale khususeliwa, khukholiwa Yinsa khufukiwa. **51** Mmote wa apale aarina Yinsa khookola nkhono khuthuula phanka khushija nshiilo la karumeya wa haakhimu nwulu wa tiini. **52** Aphano Yinsa khuwooza anakhiyoni awe yoori: “Mwipwehe phanka! Maana wooshi otule anlipanaaye phanka, ofwa khwa phanka ethiito.” **53** Mweeyo mwinoona yoori miiyo akinwahi onvekela Paapa khukiperekheza nasaapi khuntti khumi na piiri za malayikha?

⁵⁴ Nkhama ethiipo enlupaaye Zawaatikhwa Ttakatthiifu yoori vitthu zaa-rina ya orettikhana nkhamma ethhiipi?

⁵⁵ Wakathi otthupule Yinsa khuwoozela atthu apale yoori: “Mwateela okikhola na phanka na puitta, nkhamma nlokozi wa anazompere? Si-ikhu zooshi miiyo kaari osomisa Nyuppa Woosifwiwamo, khi mweeyo ohikikholi! ⁵⁶ Ila zooshi epi zarettikhana yoori emarisele zawaatikhwa za manapiyu. Aphano anakhiyoni ooshi khumwanswi na khunthira.

Yinsa vakatthi wa mashawuriya

⁵⁷ Apale ankholiyeeyo Yinsa khunthuula khunlawana wa Kayifwa, haakhimu nwulu wa tiini ottuukho aakusanyeyiyeeyo anamanozela a kano na attunkhulu a tiini. ⁵⁸ Pheeturu eetta owaalotta peetiwene mpakha vaje wa haakhimu nwulu wa tiini, khuvira khwiikhala na anamweekesela yoori oone zooshi nanna zaari weettelaaye wiishela. ⁵⁹ Mahaakhimu a tiini na mashawuriya ooshi aari weekesa oshaahiti woovonyeya khwa Yinsa yoori anhukhumwele ofwa. ⁶⁰ Ila khuhinsikanani, aapuwiye-ru atthu awaatta oolaza oshaahiti woovonyeya. Omwiisho khujithoonyeza atthu awiri, ⁶¹ khulupa yoori: “Mwinyi otu alupa yoori: ‘Miiyo kinwahi opwecha Mwimpari Nluku na khujeka khwa siiku ttatthu.’” ⁶² Aphano haakhimu nwulu wa tiini khulankha khumuuba Yinsa yoori: “Khunjipu epo onlupeziwaaye?” ⁶³ Ila Yinsa nalelo khwiiya woonyamala. Haakhimu nwulu wa tiini khumuuba yoori: “Kinuuvekela yoori weeyo olapet khwa Nluku woohayi, nkhamma weeyo o Al-Masiihu, mwaana wa Nluku, onuuze.” ⁶⁴ Yinsa khujipu yoori: “Weeyo walupa. Ila miiyo kiniwuuzani mooshi mweeyo yoori: enttelia ofiya siikhu mwinttelaaye omoona Mwaana wa Pinaatamu eekhaliye nkhone nluume wa nwahi zooshi, ataaka khwa mawiku a pinkuuni. ⁶⁵ Aphano wakathi haakhimu nwulu wa tiini avaruliyeeyo kuwo zawe na khulupa yoori: “Akufuru! Mwaasa wa niini nihithajjyaka oshaahiti nkina theenya? Mweeyo mwasiila nasaapi okufuru wawe! ⁶⁶ Mwinuupuwela toovi?” Khujipu yoori: “Oninsuhi ofwal!” ⁶⁷ Akina khusala antthemela omaasho na ompiya, akina khusala ampwakula araka: ⁶⁸ “Onlupe, Oo Al-Masiihu, ti paani oopiyeeyo?

Pheeturu oninkatthala Yinsa

⁶⁹ Pheeturu eettiye wiikhala vaje. Njaazi mmote khumwaattama khumuuba yoori: “Na-weyo waari na Yinsa nkalileya.” ⁷⁰ Ila ye khukhana vakatthi wa atthu ooshi araka: “Akinjuwa etthu onttakhulaaye.” ⁷¹ Paata ya toole khuthoonya phantte ya omilako, njaazi nkina khumoona khwooza apale aari attaaphale yoori: “Mwinyi otu aari na Yinsa wa Nazareeti.” ⁷² Ye khukhana theenya khwa olapha araka: “Akininjuwa mwinyi aya otu!” ⁷³ Elottelanaka, apale aari attaaphale khumwaattama Pheeturu khumuuba yoori: “Weekhwaele weeyo o wawe! Ottakhula wawo onthoonyeza.” ⁷⁴ Attaaphale ye khwaaza ojilaani na olapha araka: “Akininjuwa!” Nasaapiru likukhuwi khwiikha. ⁷⁵ Aphano Pheeturu khufikhiri ntakhuzi ooziveeyo ti Yinsa yoori: “Likukhuwi lihineekhe onteela okikhana swaafu ttatthu.” Noolaavo aphale vaya khulila wakatapuuo.

¹ Supuyeeene, attunkhulu a mahaakhimu na anamalokozela a tiini khuji-lakelela onhukhumwela Yinsa ofwa. ² Khunfuka khunthuula khunlawana wa nsatoro Pilaatu.

³ Wakathi Yuuda, otule anzinkuliyeeyo, ooniyeovo yoori Yinsa onttela ohukhumwiwa, khuthupwiya na khulawa owaarutisela attunkhulu a mahaakhimu na anamalokozela a tiini nzurukhu opule talaathiini wa feeta aathuuliyeeyo. ⁴ Khuri: "Kakosa, khwa ozinkula taamu yoohikosi." Yo khujipu yoori: "Fweeyo ennijali niini? Epo ti weeyo onjuwaaye." ⁵ Aphano Yuuda khweeselela nzurukhu omwimpari. Khusaruwa nawiisha khulawa khujiheya. ⁶ Mahaakhimu a tiini khukusanya nzurukhu opule, khuri: "Khahi halaali othuula khettha mmmwifukho wa zaakha, maana hisapu ya taamu." ⁷ Aphano khusilana orumeyela nzurukhu aya opule khwa wuuzanyela nshapa la namuupa yoori lirettiwe vilalo la ozikhiwamo aletto. ⁸ Tiito nshapa laya nttho liniitthiwaaye Nshapa la Taamu mpakha siikhu epi za leelo. ⁹ Aphano khurettikhana epile zaalupiweeyo ti napiyu Jeremiiya yoori: "Athusula nzurukhu talaathiini wa feeta, hisapu yoothiiwa pi atthu a Ezirayiilu, ¹⁰ khuuzanyela nshapa la namuupa, nkhama eththiipo Mbwana aakirumiyeeko."

Yinsa wa Pilaatu

¹¹ Yinsa khutthiwa omaasho wa nsatoro ye khumuuzela yoori: "Weeyo onfwalume wa mayaahuuti?" Yinsa khujipu yoori: "Pi eththiipo olupiyeezo." ¹² Ila eettaka olokoveziwa eththiipile pi attunkhulu a mahaakhimu na anamalokozela a tiini, ye khuhijipu. ¹³ Aphano Pilaatu khumuuzela yoori: "Weeyo khunsila vitthu epo onlokoveziwaaye pi atthu apo?" ¹⁴ Ila Yinsa khuhijipu hatha ntthakhuze, khwa ethiito nsatoro khwiyya wooshanka.

Yinsa onhukhumweliwa ofwa

¹⁵ Amana efiya siikhu ya njampo nsatoro aazowereliye onfukulela ntthu woorthawuliwa pi atthu. ¹⁶ Yo wakathi aya otthuupule aarinna napherezu woojuwanikha aari wiithiwaaye Baraapa. ¹⁷ Pilaatu khuwoozela atthu apale athukumaniyeeyo attaphale yoori: "Ti tuuvi khwa apa awiri mwintakhaaye yoori kinfukulele: Baraapa ama Yinsa aniiithiwaaye Al-Masiihu? ¹⁸ Maana aajuwiyi yoori anlawaniye okhule mwaasa nrima. ¹⁹ Pilaatu eekhaliye onyuupa woophukiwamo, muukha awe khumperekha hapari araka: "Ohijiphakanyane apo, maana leelo muulottha kahoowa venkivene monkoni wa ye." ²⁰ Ila mahaakhimu a tiini na anamalokozela a tiini khuwaakhitiri atthu apale yoori aveke Ofukuliwa Baraapa na ooliwe Yinsa. ²¹ Aphano Nsatoro khuuzela yoori: "Khwa atthu apa awiri mwintaktahelaaaye yoori miiyo kinfukulele ti tuuvi?" Yo khujipu yoori "Baraapa!" ²² Pilaatu khuuzela yoori: "Khi kinrettele niini Yinsa, aniiithiwaaye Al-Masiihu?" Ooshi khujipu yoori: "Akhomeliwe!" ²³ Pilaatu khuuzela yoori: "Niini arettiyeeyo yootakhala?" Ila atthu apale khusala avira atepaka onyakula araka: "Akhomeliwe!" ²⁴ Wakathi Pilaatu asopheliyeeyo yoori khaari opatha hatha swamiima, ila olıkha toowo khusala oona weekezeloya nzuzu, khurumisa ottiseliwa maati, khunawa omaasho wa atthu apale na khulupa yoori: "Akina paathuli khwa taamu ya ntthu otu; eto zwaamu yenu." ²⁵ Atthu ooshi apale khujipu yoori: "Taamu yawe ti eniittikhele fweeyo na aana ethtu!" ²⁶ Aphano Pilaatu khunfukulela Baraapa, khuruma ojaphiwa Yinsa na khumwinkhelela olawa okhomeliwa.

Anajanka aninveyisa Yinsa

²⁷ Elottelanaka, anajanka a nsatoro khunthuula Yinsa khunlawana nyuppa khuulu ya nsatoro khukusanyeya anajanka ooshi khunzukulela.

²⁸ Khunvula kuwo zawe khunwalisa ajapi yookhuttuwa; ²⁹ khuvaasha khaara ya miiwa, khunwalisa mmwishwa mwawe na khuntheela puutta nkono awe nlume, khunkokhorela khusala anveyisa, araka: "Ojuusuru, mfwalume wa mayaahuuti!" ³⁰ Khusala antthemela na khunnyakanya puutta etile, khumpiyana veeshwa. ³¹ Paata ya onveyisa, khunvula ajapi etile khunwalisa ajapi yawe. elottelanaka khusala alawa onkhomela.

Okhomeliwa wa Yinsa

³² Alawaka, khukutthanana nsireene aari wiitthiwaaye Simawu, khukhanyareliwa othuula nsalapa wa Yinsa.

³³ Yo khufiya puuro eniithiwaaye Kolokoota, eriina maana a puuro ya likurakuza la eeshwa, ³⁴ khumwinkha onywa viinyu yoophakanyani wamwe; ila ye wakathi ootiyeevo, khukatthala onywawa. ³⁵ Paata ya onkhomela, khwawanyana kuwo zawe khwa weekesa nasipu.

³⁶ Khwiikhala attaphale khusala amweekesela. ³⁷ Vatulu wa eeswa yawe khutthiawo lipawu laatikhieeyo khwa olokoveziwa wawe yoori: "OTU TI YINSA, MFWALUME WA MAYAAHUUTI."

³⁸ Na aakhomelaniwe anamwiiya awiri, mmote nkono nlume nkina nkono nkha. ³⁹ Apale aari oviraaye eetta onttukhana na wiinisa viishwa zaya, ⁴⁰ araka: "Oo weeyo waari weetelaaye opwecha Nyuppa Yoosifwiwamo na khujeka khwa siikhu ttatthu, ojuusuru! Wiishukhe vansalapa apho nkhamma omwaana wa Nluku!" ⁴¹ Khwa nanna ethiipo mahaakhimu a tiini, anamanozela a kano na attunkhulu a tiini eetta onveyisa, ⁴² araka: "Wawoosuru akina, ila khunwahi ojuusuru! Mfwalume wa Ezirayiil! Eeshukhe nasaapi vansalapa apho, nintta onkhupali. ⁴³ Ye amwaamini Nluku. Nluku ti amuusuru nasaapi ethiiti, nkhamma ona huruma na ye, maana alupa yoori: 'Ki mwaana wa Nluku!'" ⁴⁴ Theenya anamwiiya apale aakhomelaniweeyo khusala anttukhana.

Ofwa wa Yinsa

⁴⁵ Yaapuwiyi yiiza nti wooshi, payina ya saasiitha mpakha sakhentta.

⁴⁶ Paata ya ofiya saakhentta, Yinsa khukhuwa woonyakulavo, araka: "Eloohi, Eloohi, lama sabatani?" Eriina maana a "Nluku aka! Nluku aka! Mwaasa wa niini okanswaka?" ⁴⁷ Akina aarivo noosiila epile, khulupa yoori: "Ye oninkhuwela Aliyaasi." ⁴⁸ Woohirupazi, mmote wa yo khutthirela shiponja, khunaanisa na viinyu yoonyuunya, khuttha pontha wa ttekethe na khumwinkha Yinsa yoori anywe. ⁴⁹ Akina khusala alupa yoori: "Mwinlikhe, nimoone nkhamma Aliyaasi onteela omuuusuru." ⁵⁰ Aphano Yinsa khukhuwa woonyakulavo saaneene khufwa.

⁵¹ Wakathi otthuupule phazira ya omwimpari khwaawanyeya vakatthi, waaza vatulu mpakha vathi. Nti khusakhinyeya na mawe Khupwecheya.

⁵² Khapuri epile khufunuwa na mwiili wa attakatthifu awaatta afwiyeeyo khusisimuwa. ⁵³ Noolaamo nkhapuri mphule, paata ya Yinsa osisimuwa, atthu apale akina asisimuwieeyo khweetta sitati Ttakatthiifu na khooniwa pi atthu awaatta. ⁵⁴ Nttunkhulu wa anajanka na apale aari omweekeselaaye Yinsa, nawoona esikinyaatthi na zooshi zaarettikhaniyeeyo, khwiyya awoova channu khulupa yoori: "Khweele-khweele, ntthu otu aari mwaana wa Nluku!"

⁵⁵ Aakha awaatta aari attaphale khusala oona ari peetiwene. Apale amperekhiyeeyo Yinsa waaza Kalileya yoori anrumeyele. ⁵⁶ Vakathi vaya

aarivo Mariyamu Mataleena, Mariyamu mamaawe Yaakhumpa na Yuusufu na Maama wa aana a Zepeteewu.

Ozikhiwa wa Yinsa

⁵⁷ Njuwa leettelaka oveva, khuta mwinyi mmote wa thajiri wa Arimateeya anitthiwaaye Yuusufu aari namalottela wa Yinsa. ⁵⁸ Khulawa wa Pilaatu, khuveka mwiili wa Yinsa. Pilaatu khuruma winkhiwa. ⁵⁹ Yuusufu khuthula mwiili wa Yinsa khuputaputela va joora, ⁶⁰ khuntha nkhapuri pheeya, aarumiyeeyo othipiwa vamawe. Vanlako wa khapuri yaya khutthaavo liwe liwululene, khulankha khusala alawa. ⁶¹ Mariyamu Mataleena na Mariyamu nkina, eekhaliye attaaphale omaasho wa khapuri.

Namweekesela wa Khapuri

⁶² Mmeesho mwaya, siikhu ya saapatu, mahaakhimu a tiini na amafwarizeewu khulawa wa Pilaatu. ⁶³ Yo khumuza yoori: “Mbwana, ninfikhiri yoori wakathi aariye haayi, namattettekha otule aalupiye yoori siikhu ya ttaatthu onttu osisimuwa. ⁶⁴ Apho orume yoori khapuri etile yeekeseliwe saaneene mpakha siikhu ya ttaatthu, yoori ehirettikhane ota anamalottela awe khupwecha khapuri na awooze atthu yoori: ‘Asisimuwa muufwa,’ linternetka wiiya nzuuza lootepa zayita la mwanzo.” ⁶⁵ Pilaatu khulupa yoori: “Apho mwawaathuule anajanka. Mwilawé mweekesele khapuri khwa nanna mwinoonaaye yoori mwiniwahi.” ⁶⁶ Yo khulawa khusoromezavo liwe ntthile lafukaniweeyo khapuri na khuwaalikha attaaphale anajanka eekeselaka.

28

Osisimuwa wa Yinsa

¹ Paata ya ovira lifwajiri, yeettelaka waaziwa siikhu ya mwanzo ya sumana, Mariyamu Mataleena na Mariyamu nkina khulawa woona ovi-lalo. ² Aphano khupuwa esikinyaatthi khuluyeeene, maana nlayikha la Mbwana leetta wiishukha pinkuuni khuta mpakha vakhapuri khususisa liwe ntthile laafukaniweeyo khwiikhalela. ³ Ozerima wawe waari nkhamma taari na kuwo zawe zaari zoolakala nkhamma maphovu. ⁴ Anamweekesela khusala athukumela mwaasa wa woova khumpuwa nkhamma afwiye. ⁵ Nlayikha ntthile khuwooza aakha apale yoori: “Mwihoove, kajuwa yoori mweeyo mwanimweekesa Yinsa otule aakhomeliweeyo. ⁶ Ye khaamo mphu, asisimuwa, nkhamma ethiipo aalupiyeeko. Mwite moonevo apha aattattikheliweeyo. ⁷ Mwilawé mwawooze anakhiyoni awe yoori Yinsa asisimuwa muufwa na alokoza kalileya. Mwinttela omoona ottuukho. Mattakhuza aya pi atthaapa kiwuuziyeenini.” ⁸ Aakha apale khusaruwa nvilalo mphule na waakuva eettaka woova na arina furaha, na khusala athira olawa owoozza anakhiyoni awe. ⁹ Nasaapiru, Yinsa khuwaapuwelela na khuwooza yoori: “Salaama!” Yo khumwaattama na khupatikha moolu awe khumwaapu. ¹⁰ Aphano Yinsa khuwooza yoori: “Mwihoove, mwilawé mwawooze attwiizaku apale eette Kalileya; anttela okoona ottuukhu.”

Hapari za anamweekesela

¹¹ Aakha apale nalelo ari ntarikhi, anajanka akina aari weekeselaaye vilalo etile khurutela ositati khuwooza mahaakhimu a tiini zooshi zaaret-tikhaniyeeyo. ¹² Wakathi attunkhulu a mahaakhimu aakusanyeyiyeovo na anamalokozela a tiini, khuwaza shawuri. Khuwenkha anajanka nzurukhu wawaatta, ¹³ awoozaka yoori: “Alupe yoori: ‘Aatiye anakhiyoni awe osikhu

khumwiiya fweeyo neettaka olala.’ ¹⁴ Yoori amana zifiya omashiilo wa nsatoro, fweeyo nintta omweeleza na nintta owaakisani khwa wakhula nlattu.” ¹⁵ Etthiipile, anajanka khupwekhera nzurukhu opule na khuretta ethiipo anozeliweeyo. Mattakhuzi aya apo khumwazeyela vakathhi wa mayaahuuti mpakha leelo eti.

Khaazi khuluyeene

¹⁶ Maswihaapa apale khumi na mmote khulawa Kalileya, omwaako okhule Yinsa awooziyewo. ¹⁷ Wakathi amoniyeovo khumwaaputu; akina khumwakanyera. ¹⁸ Aphano Yinsa khuwaattama khuwooza yoori: “Kenkhiwa miiyo ofwalume, pinkuuni na vathi. ¹⁹ Nakataalikha, mwilawé mwawaarette anakhiyoní khwa khapila zooshi, mwiwoosaka khwa nzina la Paapa, la Mwaana, na Rooho Ttakatthiifu, ²⁰ mwiwaasomisaka oshututela zooshi epile kirumiyeeko. Na miiyo kinttela wiiya vamote na mweeyo mpakha mwiisho wa wakathi.

Maaruku

Yaahaya Namoosa ontthenkeza Tarikhi

¹ Omwanzo wa hapari zooshapweya za Yinsa Al-Masiihu, Mwaana wa Nluku. ² Yaatikhwiha khwa ohupiri wa napiyu Ezaaya yoori: “Moone, kinlawa kamperekhe omaasho wawo karumeya aka, yoori atthenkeze tarikhi yawo; ³ huula enkhuwa enyakulaka n’yaara yoori: ‘Mwitthenkeze tarikhi ya Mbwana na mookolele miphiiitelo zawe. ⁴ Aapuwiye Yaahaya namoosa n’yaara, khusala atafusiri monkoni wa woosiwa na othupwiya khwa nswammaha wa twampi. ⁵ Atthu ooshi a nti wa Yudeya na apale a Yeruzaleemu aari ovira ataaka na otukhuru twampi zaya na yo aari wiya a woosiwa khwa ye mmuttho Yorotaani. ⁶ Kuwo aari owalaazo Yaahaya zaari za shapala za enkamiiya. Ye aarina nzako awe wa shapala na aari ojaka mapalaka na asali ya ntthuttu.

Yaahaya onlawela oshaahiti wa Yinsa

⁷ Atafusiraka aari ori: “Paata ya miyo onta otule ariina oowahi zayita miyo, oto akinsuhi ofukula mikhoyi za jampali zawe. ⁸ Miyo kiniwoosani na maati, ila ye onttela owoosani na Rooho Ttakatthiifu.

Woosiwa na ozayiniwa wa Yinsa

⁹ Wakathi otthuupule, khuta Yinsa wa Nazareeti ya Kalileya khoosiwa ti Yaahaya mmuttho wa Yorotaani. ¹⁰ Nasaapiru, eettaka ovuuwa mmaati, khoona pinku efukuwiye na Rooho Ttakatthiifu yeettaka omwiishukhela nkhamma jiwa. ¹¹ Aphano khuta huula pinkuuni elupaka yoori: “Weeyo o mwanaka wa wuuphetu, na wookituvela channu.” ¹² Nasaapiru, Rooho Ttakatthiifu khunthuula khunlawana n’yaara. ¹³ Nttumpho eekhaliyeemo siikhu arupaiyi, eettaka ozayiniwa ti Epiliisi. Ye aari vakanthi wa nyama za ntthuttu, ila malayikha aari ovira anrumeyelaka Yinsa.

Yinsa onrutela Kalileya

¹⁴ Paata ya Yaahaya ofukeliwa, Yinsa khulankha khusala alawa Kalileya, alaleyaka hapari zooshapweya za Nluku, ¹⁵ alupaka yoori: “Wakathi wafiya, na ofwalume wa Nluku ori kharipu; mwithupwiye na mwikhupali hapari zooshapweya.”

Othawuliwa wa Maasiwihaapa

¹⁶ Eettaka olawa allotaka shiini ya ntthatta la Kalileya, khuwoona at-twi awiri Simawu na Antere, eeselelaka matthavi aya mpahari, mwaasa yoori aari anamajiya. ¹⁷ Yinsa khuwooza yoori: “Mwikilotte, kintta wuurettani wiya anamajiya a atthu.” ¹⁸ Aphano nasaapiru khulikha matthavi aya khusala anlotta. ¹⁹ Eettaka olawa ethhiipile, khumoona Yaakhumpa, mwaana wa Zepeteewu na ttwikiye Yaahaya ari mmwaatiya alazelaka matthavi aya. ²⁰ Khuuakhuwela, nasaapiru khunlikha papaaya mmwaatiya vamote na anakhaazi awe khusala anlotta Yinsa.

Yinsa onimwiikara sheethwani

²¹ Paata ya toole, khulawa Kafwaranaawu. Noofiya saapatu khulawa osomisa nsinakooka. ²² Khusala awaatuvela masomi awe, maana aari owaasomisa nkhamma ntthu wawiiyana ofwalume na woohiiyi nkhamma

anamanozela a kano. ²³ Aphano khuta nsinakooka mphule nlume aash-inttiweeyo ti sheethwani. Ye khusala akhuwa araka: ²⁴ “Onnitakhelani fweeyo, Yinsa wa Nazareeti? Wata yoori onitapanye? Kajuwa yoori weeyo o Ttakatthiifu wa Nluku!” ²⁵ Ila Yinsa khunmaruwela araka: “Onyamale, oleemo mmwiili wa mwinyi otu!” ²⁶ Aphano sheethwani khuntatha ntthu otule woohusutivo khusaruwa mmwiili mwawe eettaka onyakula. ²⁷ Atthu ooshi khwiya ooshanka mpakha khufiyelela wuuzelana atthaaporu yoori: “Niini epi zaya? Masomi mapheya antanaaye ofwalume! Mpakha onruma masheethwani yo khunshututela!” ²⁸ Hapari epile monkoni wa ye khumwazeyela nasaapiru nti wooshi wa Kalileya.

Owahi wa Yinsa vakanthi wa masheethwani na marati

²⁹ Wakathi aliiyemo nsinakooka, khulawa na Yaakhumpa na Yaahaya owawe Simawu na Antere. ³⁰ Nkhewewe Simawu eettiye orapalela voollili, yaari onlwaaaza hooma, nasaapiru khuuzziwa Yinsa. ³¹ Aphano ye khumwaattama, khunkhola nkhone khunlansa, nasaapiru hooma khumwiisha, khwaaza owaarumeyela. ³² Weettelaka oripa, paata ya otpupweela njعوا، اتھو کھواٹھالے اولے اوشی نا انامسھیٹھانی کھمیتھیسلا ینسا. ³³ Atthu ooshi a nsitati mphule khukusanyeya vanlako wa nyuupa ethiitile, ³⁴ ye khuwaavonisa awaatta aari ohoochiwaaye pi marati a wakhula nanna. Theenya khwiikara masheethwani awaatta. Ye khaari olkha masheethwani apale ottakhula, maana yo aari onjuwa paani Yinsa.

Yinsa onlompa puuro yawiitthaaleyavo

³⁵ Supuyeene, nalelo ohinache saana, Yinsa khulankha khusaruwa khulawa puuro yawiitthaaleyavo ohali aari olompaawo. ³⁶ Simawu na ashirikhaawe khulawa omweekesa. ³⁷ Nonsikana, khumuuzo yoori: “Atthu ooshi antta oweekesa weeyo!” ³⁸ Yinsa khuwaajipu yoori: “Nlaweni ohali okinoko, miti naattamananiyeeyo, yoori kilawe kalaleye, maana tithiito miiyo kiteeliyeeyo.” ³⁹ Aphano ye khweetteta Kalileya yooshi eettaka ofafusiri nsinakooka na wiikara masheethwani. ⁴⁰ Namaharaja mmote khumwaattama na khunkhorela khunvekela yoori: “Amana otakha onwahi okitwaharesha!” ⁴¹ Yinsa ari wawiitaala huruma, khookola nkhone awe khunsapa na khulupa yoori: “Kintakha. Wiye wootwahareshiwa!” ⁴² Nasaapiru maaharaja apale khwiya omwiisha na ye khwiya wootwahareshiwa. ⁴³ Elottelanaka Yinsa khuwaaleeza na awaaleezaka woomaruwavo, ⁴⁴ aphano Yinsa khumuuzo yoori: “Ohimuuze hatha ntthu, ila olawe, wanvekele haakhimu yoori awoone nkhamma wavona, arette twaha etile Munsa arumiyeeyo yoori wiye oshaahiti. ⁴⁵ Ila mwinyi otule khusala alawa na khwaaza olaleya vitthu epile na omwaza hapari. Mwaasa wa vitthu epile, Yinsa khuhisala awahi theenya weetta nsitati, ila khwiikhala othetekele puuro yawiitthaaleyavo. Khusala ata atthu wakhula phantte oteela okuthanana Yinsa.

2

Ovonisiwa wa namarakala nti wa Kafwaranaawu

¹ Paata ya siikhu vattithiiru, wakathi Yinsa aaruteliyeeyo theenya Kafwaranaawu, atthu khusiila elupiwaka yoori ye aari owawe. ² Aphano atthu awaatta khweetta ottuukhule, khwa nanna ya haariivo puuro hatha vamilako, na khusala awaatafusirela ntthakuzi la Nluku. ³ Khutavo atthu akina antiisiyeeyo ntthu aarina supiyaani, athuuliwe pi alumé wane.

⁴ Khuhisala awahi onfiisa aphale aariivo Yinsa mwaasa wa atthu waatta. Elottelanaka khulawa khutamula phantte ya liphala la nyuupa, khuphenyisavo nrepa opule arapaleliyeovo nasupiyaani. ⁵ Ooniyeovo amini etile aariina, Yinsa khumuuzza nasupiyaani otule yoori: “Mwanaka, twampi zawo zaswaamihowi.” ⁶ Eekhaliye attaaphale anamanozela a kano akina na khwaaza wuupuwela: ⁷ “Mwinyi otu ontakhula toowo mwaasa wa niini? Ontta okufuru! Anwahaaye oswaamihi twampi ti paani, woohiiyi Nluku paasi.” ⁸ Yinsa nasaapiru khumweeleya nroho mwawe yoori zaari ethhiipo epile yo aari wuupuwelaaye na khuwooza yoori: “Mwaasa aya niini mweeyo muupuwelaka vitthu epo nroho mwenu?” ⁹ Etthu yookhweya omuuza nasupiyaani titiivi, omuuza yoori: ‘Twampi zawo zaswaamihowi’ ama ‘Olankhe othuule nrepa lawo weettette?’ ¹⁰ Ila yoori mwijuwe yoori Mwaana wa Pinaatamu onaaye owahi wa oswaamihí twampi” khumuuzza nasupiyaani ¹¹ “Miiyo kiniwuza: Olankhe, othuule nrepa lawo olawe owawo.” ¹² Wakathi otthuupule mwinyi otule khulankha ooniwaka pi atthu ooshi, khuthuula nrepa lawe khusaruwa. Yo khwiya ooshanka na khuntitithimisa Nluku, alupaka yoori: “Khaninoone vitthu nkama epi!”

Okhuweliliwa wa Matewuzhu Leevi

¹³ Yinsa khulawa theenya kharipu ya ntthatta. Atthu awaatta khumwaata tama na khwaaza owaasomisa. ¹⁴ Eettaka ovira ethhiipile, khumoona Matewuzhu mwaana wa Alufeyu eekhaliye ariphisaka lumpuru, kumuuzza yoori: “Okilotte.” Ye khulankha khunlotta.

¹⁵ Wakathi wa ethtu yoojiwa, Yinsa eekhaliye va meeza owawe Leevi. Vamote na anakhiyon i awe, na aarivo anamariphisa lumpuru awaatta na “anatwampi” maana atthu aari onlottaaye aari enkeene. ¹⁶ Anamanozela a kano apale amafwarizeewu amooniyeevo ajaka na “anatwampi” na anamariphisa lumpuru, khuwoozela anakhiyon a Yinsa yoori: “Mwaasa aya niini ye ajaka na anamariphisa lumpuru na anatwampi?” ¹⁷ Asiliyeovo vitthu epile, Yinsa khuwooza yoori: “Akumi khaninhifhajiya tothoro, ila apale anlwaziwaaye. Miiyo akateeliye owaakhuwela anashariya, ila anatwampi.”

Yinsa onuuzeliliwa monkoni wa ofuka

¹⁸ Aphano anakhiyon a Yaahaya na mafwarizeewu eetta ofuka. Atthu akina khunteela Yinsa khusala amuuzelaa yoori: “Mwaasa aya niini anakhiyon a Yaahaya na amafwarizeewu ofuka, khi awo ahifukaka?” ¹⁹ Yinsa khujipu yoori: “Enretteya toovi ofuka anamalaleyiwa harusi, namaposa ari attaapho? Khinwaheya, ari vamote na yo.” ²⁰ Ila onteela ofiya siikhu mposi anteelaaye olaziwavo, siikhu zaya epo, anlawa afuke. ²¹ Khina antthaaye yaapa pheeyaa kuwo yoovutta, maana yaapa etile pheeyaa enttela ofutthela kuwo yoovutta etepe othaala. ²² Khina antthaaye viinyu ttompwiyo ya shapala ya raku, amana arettaa, viinyu entta ophutula ttompwiyo, waaza viinyu mpakha ttompwiyo zintta oharipweya. Ila mwitthe viinyu pheeyaa ttompwiyo ya shapala pheeyaa.

Mbwana wa saapatu

²³ Saapatu moote, Yinsa eetta ovira nshini wa nshapa la tiriku. Eettaka olawa, anakhiyon i awe khwaaza ovulula phunjje zaya. ²⁴ Mafwarizeewu khumuuzela Yinsa yoori: “Oniwoona, mwaasa aya niini yo arettaka ethtu enkhattaziwaaye orettiwa saapatu?” ²⁵ Ye khuwaajipu yoori: “Mweeyo khamwinasome etile arettiyeeyo Daawuuda wakathi ye na ashirikha awe aakholiweeyo ti jala? ²⁶ Wakathi wa haakhimu nwulu wa tiini Apiyataari,

Daawuuda aaviriye Nnyupa wa Nluku khurafuna phaawu enkhiweeyo Nluku na khuwenkha ashirikhaawe, aariina ruhusa ya orafuna paasi aari anamalokozela a tiini.” ²⁷ Aphano khuwoza yoori: “Saapatu yatiisiwa mwaasa wa anaatamu, ama anaatamu mwaasa wa saapatu. ²⁸ Ethhiipo, Mwaana wa Pinaatamu ti Mbwana hatha na Saapatu.”

3

Mwinyi woorakala nkono

¹ Yinsa khurutela theenya nsinakooka, nttumphule aarimo mwinyi waarakaliyeyo nkono awe. ² Atthu akina aari weekesa nanna ya on-lokoveza Yinsa, yoori amoone nkhamma aari weettela ovonisa siikhya ya saapatu. ³ Yinsa khumuuzu mwinyi otule woorakala nkono yoori: “Olankhe ote vakatthi apha.” ⁴ Aphano Yinsa khuuzela yoori: “Niini entakheliwaaye oretiwa saapatu, oretta yooshapweya ama yootakhalaa, wuusuru ama wula?” Ila atthu apale nalelo khwiya oonyamala. ⁵ Yinsa khusala aweekesa ari wookatipukha na khuhituveliwi mwaasa wa wuuma rooho zaya na khumuuzu mwinyi otule yoori: “Wookole nkono awo.” Ye khookola nkono awe na khwiya woovonisiwa. ⁶ Aphano mafwarizeewu apale khulankha na khwaaza owaza shawuri vamote na khuntti ya Herooti eekesaka nanna ya omuula Yinsa.

Yinsa oneekesiwa pi atthu awaatta

⁷ Yinsa na anakhiyonni awe, khulawa mpakha ontthatta la Kalileya na nyumani wawe yaari ota khuntti khuluyeeene ya nti wa Kalileya. ⁸ Wakathi asiiliyeyo vitthu zooshi aari orettaazo, atthu awaatta aari olankhaaye Yudeya, Yeruzaleemu, Itumeeya, akina akaapu wa muuttho Yorotaani na apale a Tiiro na Sitooni khuta okutthanana ye. ⁹ Mwaasa wa khuntti khuluyeeene etile, Yinsa khuwoza anakhiyonni awe yoori antthekezele mwaatiya yoori awerawere ophunyiwa. ¹⁰ Maana ye awaavonisiye atthu awaatta, khwa nanna ya apale aari olwaaziwaaye aari ofiyelelaaye osukhumana yoori apatthe onsapa. ¹¹ Theenya masheethwani, amana amoona eetta onkokhorela omaasho wawe na onyakula araka: “Weeyo o Mwaana wa Nluku.” ¹² Ila ye aari owenkha oruma wookhomaala yoori ahinlupe paani yaya.

Othawuliwa wa maaswihaapa khumi na awiri

¹³ Yinsa khuwela vakulu na khuwaakkhuwela apale aari owaatakhaaye, apo aya khuta aphale aariivo. ¹⁴ Khuwaathawula khumi na awiri na khuwenkha nzina la maaswihaapa yoori eeye vamote na-ye na yoori ye awaarume olaleya, ¹⁵ na eeyane owahi wa wiikara masheethwani. ¹⁶ Apa pi apale khumi na awiri awathawuliyeeyo aari withtiwaaye yoori: Simawu, otule amwinkhiyeeyo nzina la Pheeturu; ¹⁷ Tiyaaku, mwaana wa Zepeteewu, na Yaahaya ttwiyye, atthaapo aatthajiwieeyo nzina la Buneerije, liriina maana a “Aana a Ottithima”; ¹⁸ Antere, Filiipe, Barutulumeewu, Matewuzhu, Tome, Tiyaaku, mwaana wa Alufeyu, Tadeewu, Simawu Zelooti; ¹⁹ na Yuuda Eshikariyoo, otule ankholisyeeyo Yinsa.

Okufuru wa anamanozela a kano

²⁰ Aphano, ye khulawa owawe, khukusanyeya opheya khuntti khuluyeeene, khwa nanna ye na anakhiyonni awe aari woojelaavo oja. ²¹ Wakathi ajamaaze asiiliyeyo vitthu epile, khulankha khusala alawa onthuulawo, maana aari olupa yoori: “Ye eetta ovevereya.” ²² Anamanozela a kano

aalankhiyeyo Yeruzaleemu aari olupa yoori: "Ye ti wooshinttiwa ti Epiliisi! Mfwalume wa masheethwani ti othuuto aniweekaranaaye masheethwani." ²³ Aphano Yinsa khuwaakhuwela khusala awaanozela nkaththi wa milikaniso yoori: "Nanna-ni Epiliisi antakhaaye omwiikara Epiliisi? ²⁴ Amana ofwalume mmote ojaawanya, khunwahi ojishintta otthuuporu. ²⁵ Ama nyuupa amana ejaaawanya, theenya khinwahi wiikhala ethiitoru. ²⁶ Na Sheethwani nkhamma ontta ojuumanana, na amana aawanyeya, khanlawaa owira wiiyavo na wafiya mwiisho wawe. ²⁷ Weekhwhee khina anwahaaye ovira nnyupa wa ntthu wookhomaala na khuthuula maali zawe aheetteeni onfuka khpula. Toowo ti anwahaaye omwiiyela nnyupa mwawe.

²⁸ "Miiyo kiniuuuzani khweele yoori: Twampi zooshi na okufuru wooshi wa anaatamu onlawa waswaamihiiwe, ²⁹ ila otule ankufurwelaaye Rooho Ttakatthiifu, khana nswammaha mileele, maana ona twampi ya mileele." ³⁰ Yinsa aalupiye mattakhuzi apa mwaasa wa yo aari olupa yoori: "Ona sheethwani." ³¹ Elottelanaka, mamaawe na attwiize Yinsa khuta. Khwiiya vaje na khuruma okhuweliwa Yinsa. ³² Aarivo atthu awaatta eekhaliyeyo aphale aariivo, na khuuziwa yoori: "Mamaawo na attwiizo ari vaje apho antta oweekesa." ³³ Yinsa khuuzela yoori: "Maama ti tuuvi, wala ttwiyyaku ti tuuvi?" ³⁴ Aphano khuweekesa apale eekhaliyeyo aphale aariivo na khuwooza yoori: "Apha owaapho maama na attwiizaku! ³⁵ Otule anrettaayee matakhero a Nluku, ti eeyiye ftwiyyaku, nlupwaaka na maama."

4

Nlikaniso wa Namazala

¹ Yinsa khurutela osomisa kharipu ya ntthatta. Khutavo atthu awaatta aphale aariivo, khusala ahithajiya weetta nkatalwa na eekhale ntumpho. Kalawa yaari mpahari, atthu ooshi khwiikhala nshini wa pahari. ² Ye aari owaasomisa vitthu zawaatta nkaththi wa nlikaniso, asomisaka khuri: ³ "Mwisiile! Namalima khulawa ozala. ⁴ Wakathi aari ozalaavo peewu, phantte kiina khukwela nshini wa tarikhi anyannyi khuta khuja. ⁵ Kiina khukwela vahali aariivo mawe, vahali laariivo nttophe vattitthiiru; nasaapiru khoottha, maana nttophe ntthile khaleechiye. ⁶ Aphano noopuwa njuwa khulukuza; maana khazaarina mitathaari, khuuma. ⁷ Peewu kinoko khukwela vanyiwa, khuwula vamote na nyiwa, khurapeliwa pi nyiwa, khwa nanna zahawahiyeyo wiima mishumo. ⁸ Kiina khukwela vanshaka wooshapweya, khoottha, khuwula na khwiima mishumo zooshwapweya, talaathiini, siithiini na mpakha miiya wakhula mmote. ⁹ Yinsa khwiishela alupaka yoori: "Otule ariina mashiilo, ti asiile!"

Otaphuleliwa wa nlikaniso

¹⁰ Wakathi ye aari otthwe, anakhiyoni apale khumi na awiri na akinoko aari kharipu ya attaaphale khumuuzela monkoni wa nlikaniso. ¹¹ Ye khuwooza yoori: "Mweeyo mwenkhiwa ojuwa kano za ofwalume wa Nluku, ila apale ari oje, zooshi anuuuzaniwa nlikaniso, ¹² yoori 'hatha nkhamma oona ahijuwe, hatha nkhamma asiila ehiweeleye yoori ahizukulise rooho zaya aswaamihowi!' " ¹³ Aphano Yinsa khuwoozela yoori: "Mweeyo khuniweeleyani nlikaniso opu, nanna-ni onteela oweeneleyani epi mikina? ¹⁴ Namazala onzala ntakhuizi. ¹⁵ Atthu akina ari nkhamma peewu eriiye nshini wa tarikhi, nhali lizaliweemo ntakhuizi. Paata ya osila, Epiliisi onta, khulazavo ntakhuizi ntthile nroho mwawe. ¹⁶ Akina, ari nkhamma peewu ezaliweeyo vahali wawiyavo mawe, ansilaaye ntakhuizi nasaapiru

khupwekherela na furaha. ¹⁷ Ila paata ya wakathi vattithiiru, atthu aya apo anlawa akathale hapari maana kharetteeni wiiya nchina laya, amana ziwaapattha tafwawuthi ama lupattha mwaasa wa mattakhuzi apale antta wanswi. ¹⁸ Theenya akina arlattanana na peewu ezaliweeyo vakathi wa mwiiwa. Apo ansiila hapari, ¹⁹ ila, amana ziwaapuwelelaka tafwawuthi za olumwenku opu, tuvela za maali na otakha nkina, vitthu zaya epo enshawa ntakhuzi na epo zaya khaziniimisa mishumo. ²⁰ Awaapho theenya atthu akina, anlikananaaye peewu ezaliweeyo nti wooshapweya. Apo aya ansiila ntakhuzi khukhupalela na khuttheerisa talaathiini, siithiini na mpakha miya khwa etile aazaliyeeyo.”

Nlikaniso wa likhompe

²¹ Ye khuwooza yoori: “Paani ankhozaaye khardttea yawe khuttha n’yuuko ama nlivuku? Olikha toowo khampweha vahali wawooneyayo? ²² Maana khayiivo hatha ethu moote ya siiri, ehinttelaaye wiiya payana na khayiivo moote yovvithiwa ehinttelaaye ovitthuliwa. ²³ Nkhama ntthu onaaye mashiilo oosila, asiile!” ²⁴ Aphano, khuwooza yoori: “Phoole na epile mwinsilaaye. Na mphimo otthuupo mwinttelaaye owaaphimele azeenu, mwinttela ophimeliwo otthuupo, na theenya mwinkeene mwinkalwa mweekezeliwe. ²⁵ Otule ariina, onlawa ekezelili; ila otule ahina hatha etile vattithiiru ariinaaye ontta onyakanyiwa.”

Nlikaniso wa Peewu

²⁶ Ye khurutela olupa yoori: “Ofwalume wa Nluku ori nkhamma ntthu anzalaaye peewu yawe vathi. ²⁷ Hatha nkhamma eetta olankha, ama hatha nkhamma eetta olala, yo zinoottha na zinwula, ye woohijuwi nanna erettikhaniyeeyo. ²⁸ Otthuupo oniima mishumo zaya: yamwanzo nyaani, elottelanaka ntathi, mwiisho, phunje zawiitaala va ntathi. ²⁹ Amana peewu ekhomaala, ntthu onttela othuula eesu, maana wafiya wakathi wa wuu-rula.”

Nlikaniso wa phunje ya samuli

³⁰ Yinsa khurutela olupa theenya yoori: “Ofwalume wa Nluku onlat-tanana niini? Nlikaniso-ni ninttelaaye orumeyela yoori nithoonyeze? ³¹ Ori nkhamma phunje ya samuli, etile yiyyiye phunje yootepa opushuwa vathi apha. ³² Ila, paata ya ozala, zintta owula channu, zayita mathapa ooshi.” ³³ Khwa milikaniso zooshi zoolattana, Yinsa aari owooza monkoni wa ntakhuzi, nanna aari owahaaye oweenleya. ³⁴ Khaari owooza hatha ethu ahirumeyeleeni nlikaniso, ila amana eeya na anakhiyoni awe paasi, eetta owoozaka zooshi.

Yinsa onnyamaza pheevu

³⁵ Siikhu etile, weettelaka oripa, Yinsa khuwooza anakhiyoni awe yoori: “Nlaweni kaapu kiina.” ³⁶ Paata ya osusa khuntti etile, yo khupakhira nkalawa mphule aariimo Yinsa. Na kalawa kiina zeetta owaaperekha. ³⁷ Khwaaza ovuma pheevu yookhomaala, na mawipi khusala apiya kalawa yaya khwa nanna aari wiitaalaamo maati. ³⁸ Yinsa aarettiye eettaka olala sheezi aphiteeziye nsaawu. Aphano anakhiyoni awe khunlansa na khumuza yoori: “Mwaaliimu, khinuujali fweeyo nifwaka?” ³⁹ Yinsa khulankha khunyamaza pheevu na khuza pahari yoori: “Otthe nreke! Onyamale!” Pheevu khunyamala na zooshi khwiyya zawiitthaala. ⁴⁰ Aphano khuwoozela anakhiyoni awe yoori: “Mwaasa aya niini moovaka toowo?”

Nalelo khamwina amini?” ⁴¹ Anakhiyoni apale ari awoova channu, khusala oozana yoori: “Ti paani otu aya, anshututeliwaaye ti pheeve na pahari?”

5

Ovonisiwa wa namasheethwani

¹ Yo khulokha pahari, khufiya Jerazeenu. ² Wakathi Yinsa apakhuwiyeovo nkalawa, mwinyi mmote aariina sheethwani khusaruwa nvilalo khuta attaaphale. ³ Mwinyi aya oto aari wiikhala nvilalo, khina mmote aari owahaaye onkhola, hatha ari ntthentte. ⁴ Maana swaafu zawaatta aari wiiya ntthentte moolu awe na makhono awe, ila ye eetta opwechaka tthentte yaya na ovuja zuuma zaari otthiwaaye mmoolu mwawe. Khaarivo ntthu wookhomaala aari owahaaye onshintta. ⁵ Osikhu na nthana ye aari weettettaka nvilalo na nnyaako na ojishja na mawe. ⁶ Wakathi amooniyeevo Yinsa ari peetiwene, khuthira khulawa khukokhora omaasho wawe. ⁷ Khukhuwa na huula yawe yooshi araka: “Onikitakhelani miyo, Yinsa mwaana wa Nluku Nwulu? Kinuuvekela khwa Nluku yoori ohikoopopise!” ⁸ Maana Yinsa aamuuziye yoori: “Oleemo mmwiili wa mwinyi otu, sheethwani.” ⁹ Aphano Yinsa khumuuzela yoori: “Nzina lawo enriwa paani?” Khujipu yoori: “Nzina laka enriwa khuntti, maana niri awaatta.” ¹⁰ Khusala anvekela wonkhanyarelavo yoori ahiwarume olaamo mmuti mwaya mphule. ¹¹ Liphanko liwululene la kuluwe laari os-hukisiwaaye kharipu ya mwaako. ¹² Masheethwani apale khusala anvekela Yinsa yoori: “Onirume yoori neette nkuluwe mphule.” ¹³ Yinsa khwinkha ruhusa masheethwani apale, khusaruwa khweetta nkuluwe. Liphanko laarina thamani ya alufu piiri za kuluwe, khwaaza otthira zilankhaka omwaako ziishukhelaka mpahari, zooshi khuzama khufwa. ¹⁴ Apale aari oshukaaye kuluwe zaya epile, khutthira khulawa olupa vitthu epile zaaret-tikhaniyeeyo waaza nsitati mpakha mmashapa, atthu khulankha olawa woona epile zaarettikhaniyeeyo. ¹⁵ Wakathi amwaattamiyeeyo Yinsa, khu-moona mwinyi otule aamwitaliyeeyo masheethwani awaatta, eekhaliye awaliye saana na atthiyemu akhili zawe, atthu apale khwiya awooova. ¹⁶ Apale aari attaaphale, khuwooza atthu zooshi epile zanrettikhaneliy-eyeo mwinyi otule aariina masheethwani, na theenya khulupa monkoni wa kuluwe. ¹⁷ Aphano atthu apale khusala anvekela Yinsa yoori aleemo mmuti mwaya mphule. ¹⁸ Wakathi Yinsa aari owelaaye nkalawa, mwinyi otule aariina masheethwani khunvekela Yinsa yoori anlikhe alawe na ye. ¹⁹ Yinsa khuhinkhupalei, ila khumuuzza yoori: “Olawe owawo wawuuze ajamaazo zooshi epile Mbwana ooreteliyeeyo na tthakaraka awooneliy-eyeo.” ²⁰ Aphano, mwinyi otule khulawa na khwaaza olupa nti wa Tekapolishi etile Yinsa anretteliyeeyo. Atthu ooshi khwiya ooshanka.

Owahi wa Yinsa monkoni wa marati na ofwa

²¹ Yinsa khupakhira theenya nkalawa alokhelaka kaapu kiina, khuntti khuluyeene khuta khwiitaala aphale aariivo Yinsa nshini wa nttima. ²² Aphano khuta attaaphale namalokozela mmote wa nsinakooka aari wi-itthiwaaye Yaayiru, amooniyeevo Yinsa, khukokhora nshini wa moolu awe. ²³ Khunvekela wookhanyarelavo yoori: “Mwanaka wankha onsaleela ofwa! Safwatali ote, wanttheele makhono yoori eeye woovona na eeye haayi. ²⁴ Yinsa khusala alawa vamote na-ye, khuntti khuluyeene khusala enlotta na omphunya.

²⁵ Attaaphale, aarivo muukha aariina nyaakha khumi na miwiri eet-taka ohoowa mwaasa wa omwiittikha taamu. ²⁶ Ye ahoowiye channu khwa oweekesa anamavonisa na khuharipu nzurukhu awe wooshi aariina, olilha ovona khusala eetta wootepa. ²⁷ Asiliyeovo ovuwa wa Yinsa, khuta nyuma wawe vahali wawaattiwavo na khusapa ajapi yawe. ²⁸ Maana aari wuupuwela yoori: “Miiyo kisaparu paasi ajapi yawe, kintta ovona.” ²⁹ Nasaapiru yeetta olilha wiittikha taamu etile na muukha otule khoona yoori mmwiili mwawe aari wootaphuliwa ohoowa opule. ³⁰ Wakathi ot-thuupule, Yinsa khoona yoori wansaruwa owahi, khuzukuluwa khweekesa khuntti etile khuuzela yoori: “Paani asapiyeyo ajapi yaka?” ³¹ Anakhiyonu awe khujipu yoori: “Woonaka khuntti khuluyeene eti ekusanyeyiyeyo, khusala wuuzela yoori: ‘Paani akisapiyeyo?’” ³² Ila Yinsa nalelo khusala eekesaka vakatthi wa khuntti etile yoori amoone otule aarettiyeeyo ethu yaya etile. ³³ Aphano muukha otule, ajuwiyeovo ethu yaarettikhaniyeeyo, khumwaattama khukokhora nshini wa moolu awe eettaka othukumela mwaasa wa woova, khulupa haakhi yooshi. ³⁴ Yinsa khumuuzu yoori: “Mwanaka, amini yawo yoovonisa. Olawe na heeri, na wiiye wootaphuliwa ohoowa wawo.”

³⁵ Nalelo Yinsa eettaka ottakhula, khutavo atthu a owawe Yaayiru, namalokozela wa nsinakooka khumuuzu yoori: “Mwanawo afwa. Khini-hithajiya onwuti theenya Mwaaliimu!” ³⁶ Yinsa khumuuzu namalokozela wa nsinakooka mphule yoori: “Ohoove; okhupali paasi.” ³⁷ Na khuhinlikhi hatha ntthu onlotta, woohiiyi Pheeturu, Tiyaaku na Yaahaya ttwiye Tiyaaku. ³⁸ Wakathi afiyyeovo owawe namalokozela wa nsinakooka, Yinsa khoona tafwawuthi na atthu eettaka olila na ojiliza na huula ya onyakula. ³⁹ Yinsa khuvira nnyupa na khuuzela yoori: “Tafwawuthi yaya eti ti-ya niini na mwinjilizelani? Mwaana khafweeni, ontta olala.” ⁴⁰ Ila ooshi khwaaza ontheya Yinsa. Ye khurumisa yoori aleemo ooshi, khunthuula papaaawe na mamaawe mwaana na anakhiyonu awe apale aariina na khulawa aphale aariivo mwaana. ⁴¹ Khunkhola nkhono awe khuri: “Talitha cumi!” liriina maana a “Mwanankha, miiyo kinuuruma yoori olankhe!” ⁴² Nasaapiru mwanankha otule, aariina hirimu ya nyaakha khumi na miwiri, khulankha na khwaaza weettetta. Ooshi aariivo khwiya ooshanka. ⁴³ Ila Yinsa khwooza woosileyavo yoori: Ahiiyevo hatha ntthu anttelaaaye ojuwa, na khuruma winkhiwa ethu-yoojiwa.

6

Napiyu mmote wootarawiwa

¹ Yinsa khulaawo okhule waya, khweetta sitati ya owawe, anakhiyonu ave khusala amperekha. ² Noofiya saapatu, khwaaza osomisa nsinakooka, awaatta aari onsiilaaye khwiya ooshanka, alupaka yoori: “Zininlankha vayi vitthu zaya epi?” “Ojuwani opu enkhiweeyo? Na onretta toovi minjuza?” ³ Khahiyu kalapinteero otu, mwaana wa Mariyamu, ttwiye Tiyaaku, Yusufu, Yuuda na Simawu! Alupuwe khari ntsumphu!” Khwiya awiiphiriwa ti Yinsa. ⁴ Yinsa khwooza yoori: “Mmuti mwawe, vakatthi wa ajamaaze na vaje vawe pi attaapho napiyu ahinshitahiwaavo.” ⁵ Ye khawahiyu oretta minjuza Nazareeti, woohiiyi owaavonisa alwele akina khwa owaattheela makhono. ⁶ Khwiya wooshanka mwaasa wa othowawo amini okhule waya. Yinsa khuvira asomisaka miti zaattameliyeeyo ottuukhule.

Yinsa oniwaaruma anakhiyonu awe khumi na awiri

⁷ Khuwaakkhuwela anakhiyoni awe apale khumi na awiri, khuwaaruma awiri khwa awiri na khuwenkha owahi wa wiikara masheethwani. ⁸ Khuwaaruma yoori: "Mwihiithuule hatha ethtu, yohiiyi pakhora, khamwaarina ya othuula ethtu-yoojiwa wala kaapiyaka wa safwari na nzurukhu. ⁹ Mwiwale jampali, ila mwihiithuule nkhumu wa phiiri. ¹⁰ Amana mwifiya nyuupa moote, mwikiye attaapho mpakha siikhu mwinttelaaye olaavo. ¹¹ Na miti mikinoko amana zihuupwekhereleni na khuhuusilini, mwitathe lifufu la mmoolu mwenu mwilaakamo, nkhamma oshaahiti vakatthi vaya." ¹² Yo khulawa na khulaleya atthu yoori athupwiye. ¹³ Yo aari wiikara masheethwani awaatta na owaavaaza mafuttha mmwishwa mwaya na owaavonisa alwele awaatta.

Ofwa wa Yaahaya Namoosa

¹⁴ Mfwalume Herooti khusila elupiwaka hapari epile, maana nzina la Yinsa laajuwipi saaneene. Atthu akina khwaaza olupa yoori: "Yaahaya Namoosa eetta osisimuwa muufwa! Tiito zinrettikhanaaye minjuza zootikinisa khwa ye." ¹⁵ Akina aari olupa yoori: "Ye ti Aliyaasi." Akinoko khusala olupa araka: "Ye napiyu, nkhamma manapiyu apale a raku." ¹⁶ Ila Herooti wakathi asiiliyeyo vitthu epile, khuri: "Yaahaya, mwinyi kinshijiyeeyo, asisimuwa muufwa!" ¹⁷ Maana Herooti aarumiye yoori akholiwe Yaahaya, afukeliwe nkalapooso, mwaasa wa Herootiyya, muukha wa Filiipe ttwiye, othuuto anraliyeyo. ¹⁸ Mwaasa wa Yaahaya aari omuuza Herooti yoori: "Khahi halaali weeyo onrala muukha wa ttwiyo." ¹⁹ Herootiyya aarina katapu khwa Yaahaya, khusala atakha omuula, ila khuhisala awahi oretta, ²⁰ mwaasa Herooti aari omoova Yaahaya na aari omwiinanelaa, maana aari ojuwa yoori ye mwinyi wa shariya na ttakathifiu. Amana ansiilaka, eetta oshanka; khwa ethhipo waari ontuvela onsiila. ²¹ Omwiisho Herootiyya khupattha kiphenyo siikhu ya oretta mwaakha Herooti. Khuretta njampo Herooti na anamalokozela awe awulu, attunkhulu a anajanka na ooshi apale eeyiye afwalume a nti wa Kalileya. ²² Wakathi mwaana wa Herootiyya aviriyeyo khwiina, khuntuvela Herooti na apale awaakharipushiyeyo. Mfwalume khumuuzu mwanankha otule yoori: "Okivekele wakhula etile ontakhaaye kintta owinkha". ²³ Khumwaahiti khwa olapha yoori: "Wakhula onikivekelaaaye, kintta owinkha, mpakha phantte ya ofwalume aka." ²⁴ Mwaana otule khusaruwa khumuuzu mamaawe yoori: "Kiveke niini?" Mamaawe khunjipu yoori: "Oveke eeshwa ya Yaahaya Namoosa." ²⁵ Nasaapiru mwanankha otule khwaakuva khulawa wa mfwalume khuveka yoori: "Kintakha mwikinkhe nasaapi eeshwa ya Yaahaya Namoosa mparathu." ²⁶ Mfwalume khwiiya woohuzunikha channu, ila mwaasa wa olapha opule aalaphiyeyo na wa apale awaakharipushiyeyo, khuhiwahi okatthala etile avekeliweeyo ti mwanankha otule. ²⁷ Nasaapiru khunruma najanka khumuuzu ontisela eeshwa ya Yaahaya Namoosa. Ye khulawa okalapooso, khushija eeshwa ya Yaahaya Namoosa. ²⁸ Khuttha mparathu khumwinkha mwanankha otule na ye khumwinkha mamaawe. ²⁹ Noosiila hapari epile anakhiyoni a Yaahaya namoosa, khuta khuthuula mwiili awe khulawa khuzikha.

Yinsa oniwaajisa alume alufu thaanu

³⁰ Maaswihaapa khurutela aphale aariivo Yinsa khumuuzu zooshi arettiyeezo na asomisiyeyo. ³¹ Aarivo atthu awaatta aari otaaye na olaavo, paata ya Yinsa na anakhiyoni awe woona yoori khaarina kiphenyo ya oja. Ye khuwooza yoori: "Mwite nilawe puuro yawiithaleya navumule

vattitthiiru.” ³² Aphano yo khulawa nkalawa mpakha puuro yawiithaliye. ³³ Atthu awaatta khuwoona alawaka paata ya owaajjuwa. Atthu a miti zooshi za ottuukhule, khutthira khufiyawo yo ahinafiye. ³⁴ Eeshukhaka nkalawa Yinsa, khoona khuntti khuluyeene ya atthu, khuwoonela huruma, maana aari nkhamma pwittipwithi zoohiina makhampuzi. Aphano khwaaza owaasomisa vitthu zawaatta. ³⁵ Weettelaka oripa, anakhiyoni awe khunsusela khumuza yoori: “Puuro eti ti yawithaaleya, na waripa. ³⁶ Owaamwaze atthu apa yoori alawe mmashapa na miti epile naattamiyeeyo yoori oozanzze eththu yoojiwa aje.” ³⁷ Ila ye khuwaajipu yoori: “Mwiwenkhe mweeyo ena eththu yoojiwa.” Yo khumuza yoori: “Atthu apa yoori aje, ninhithajiya miiya piiri za nzurukhu wa feeta!” ³⁸ Yinsa khuuzela yoori: “Mwina phaawu kavi? Mwilawe moone.” Anakhiyoni apale khulawa khoona khujipu yoori: “Ninaaye phaawu thaanu na swi piiri.” ³⁹ Aphano, Yinsa khuwaaruma yoori ooshi eekhale, khuntti khwa khuntti va nyaani piishi ⁴⁰ Khuretta ethiipo khwaawanyeya khwa khuntti ya miiya na khuntti ya hamusiini. ⁴¹ Athuuliyeovo phaawu epile thaanu na swi piiri khweekesa pinkuuni khuparikhiya. Nawiisha khumeya phaawu epile khuwenkha anakhiyoni awe yoori awaawanyeze atthu apale. Theenya khuwaawanyeza swi epile piiri ooshi aya. ⁴² Ooshi khuja khurupala, ⁴³ na anakhiyoni khulokotthela khwiitaala khelenke khumi na piiri za nyeneye za phaawu na za swi. ⁴⁴ Atthu aajijeeyo aari alufu thaanu alumbe ene.

Yinsa oneettetta vatulu wa maati

⁴⁵ Elottelanaka, Yinsa khuwaaruma anakhiyoni awe yoori awele nkalawa alokoze Betezayiita phantte ya kaapu ya ntthatta, wakathi ye asaliyeeyo aleezananaka atthu. ⁴⁶ Paata ya oleezanana, khuwela vakulu yoori alompe. ⁴⁷ Weettelaka oripa, kalawa yaari vakatthi wa pahari na Yinsa aari otthwe vathi. ⁴⁸ Ye khuwoona anakhiyoni awe afutthaka kaafi woovelavelavo, maana eetta wiinyula pheevo. Lifwajiri, Yinsa khulawa aphale aariivo eettettaka vatulu wa pahari, khusala asaleela owaavikana. ⁴⁹ Wakathi amoonyeovo eettettaka vatulu wa pahari, khusala amoona nkhamma nshiptapehe, aphano khusala anyakula. ⁵⁰ Maana ooshi amoonyeeyo aari oosuthuwa. Ila Yinsa nasaapiru khuwooda yoori: “Mwiminyale! Ti miyo! Mwihoove!” ⁵¹ Aphano Yinsa khuwela nkalawa khwiiya vamote na anakhiyoni awe, na pheevo khunyamala, na yo khwiiya ooshanka, ⁵² maana khazaaweleyiye minjuza za phaawu. Rooho zaya zaari zookhomaala.

Yinsa oniwaavonisa alwele a Jenezare

⁵³ Paata ya olokha pahari, khufiya Jenezare, ottuukho khufukelela kalawa yaya. ⁵⁴ Wakathi apakhuwiyeovo atthu khunjuwa Yinsa. ⁵⁵ Yo aari ovira azukulelaka nti wooshi opule, na owaathuula alwele aya va nrepa awaalawanaka ohali aari osilaawo yoori Yinsa ori ottuukho. ⁵⁶ Wakhula vahali aari weettaawo, mmamuti, nsitati ama mmashapa, aari othuuliwaka alwele na olawaniwa mparasa. Noovekeliwa yoori nenkawu awahi osapa nshaka la ajapi yawe; maana ooshi apale aari osapaaye aari wiiya oovona.

Yinsa vakatthi wa zowera za Eyahuuti

¹ Mafwarizeewu na akina anamanozela a kano alankhiye Yeruzaleemu khukusanyeya na Yinsa. ² Khusala awoona anakhiyoni awe akina eettaka oja na makhono aharaamu, enlupaaye yoori khanaweeni. ³ Mafwarizeewu

na mayaahuuti ooshi khanja ahinaweeni wotwahareshiwavo, alottelaka zowera za attunkhulu a tiini.⁴ Amana aruti oparasa, khannja ahaazeeni woosa makhono aya khapula. Anthokorela masomi makina a waatta, nkhamma woosa pilawuri, mirinki, zoopo za malaatha na moolili.⁵ Aphano mafwarizewu na anamanozela a kano khumuuzela Yinsa yoori: "Mwaasa aya niini anakhiyoni awo ahilottelaka zowera za attunkhulu a tiini, khusala aja ahinaweeni?"⁶ Ye khuwaajipu yoori: "Manaafikhi! Ezaaya ahupiri saaneene monkoni weenu mweeyo nkhamma ethiipo yaatikhieeyo yoori: 'Atthu apa anikishitahi na malimi, ila rooho zaya ziri peetiwene na miiyo.⁷ Anikaaputu mahala na ansomisa mwentto wa oruma wa eenaatamu.⁸ Mweeyo mwintarawu mirumo za Nluku na khusala mwilottela zowera za enaatamu.⁹ Yinsa khwiishelana awoozaka yoori: "Mweeyo mwineekesa yoori mwitthe othetekele mirumo za Nluku mwaasa wa oshututela masomi enu!¹⁰ Maana Munsa alupa yoori: 'Onshitahi papaa wo na mamaawo,' na 'antakhaaye onlaani papaa we na mamaawe ona ya ohukhumweliwa ofwa.'¹¹ Ila mweeyo mwinkhupalela yoori amana ntthu amuuza pa-paawe ama mamaawe yoori: 'Wakhula eththu kiniwinkaanini miyo zakha ya omwinkha Nluku,'¹² khwa nanna eto mwiwerawere ojikhangarela omwaawuni papeenu na mameenu.¹³ Toowo mweeyo khamwinttha fwayita nttakhuzi la Nluku, khwa opatilana zowera zinlankhaaye wa paapa khwa aana aya. Na mwinretta vitthu zawaatta nkhamma ethiipo.

¹⁴ Yinsa khuwaakharipusha theenya atthu apale khuwooza yoori: "Mwikisiileze mooshi na eweeleyeni epi saana yoori:¹⁵ khina eththu moote ya oje wa pinaatamu enraaye nonvira khunttha oharaamu, ila epile zinin-lankhaaye nroho mwawe ti eninharamushaaye.¹⁶ Nkhama ntthu onaaye mashiilo oosiila ti asiile!¹⁷ Paata ya owaalikha atthu apale olawa owaya, anakhiyoni khunvekela yoori awooze maana a nlikaniso aya opule.¹⁸ Yinsa khuwoozela yoori: 'Kiri na mweeyo khwiiseleyani? Yoori khina eththu moote eninviraaye pinaatamu eninharamushaaye?¹⁹ Maana khineetta nroho mwawe, ila mwijohojoh mwawe, nawiisha khwiithiwamo.' Khwa ethiipo mattakhuzi apale, Yinsa khutukhuru ottha wiiya halaali vitthu zoojiwa zooshi.²⁰ Khurutela olupa yoori: "Etile eninsaruwaaye pinaatamu ti eninharamushaaye.²¹ Maana nroho ti, enlakhaamo zauwupuweliwa zootakhala, oshawi akhapa, wiiya, wuula,²² oraruwa, okhwiririwa, vitthu zootakhala, ohata, oralana woohiiyi wa halaali, nrima, waapa, ojoona na ololo.²³ Zootakhala zooshi zinlankha nroho wa ntthu na piitthiipo zininharamushaaye pinaatamu."

Waamini wa muukha mmote weeleotto

²⁴ Yinsa khulaawo okhule waya khulawa phantte ya Tiiro na Sitooni, khweetta nyuupa yaya eto na khaatakiye ojuwiwa ti ntthu, ila khuhiwahi ojittha sirini.²⁵ Ila nasaapiru muukha mmote, aarinna mwanawewe wa nnatti ariina sheethwani, asiiliyeevo monkoni wa ye, khuta khukokhura nshini wa moolu a Yinsa.²⁶ Muukha otule aari nkereeka ya siiro-fineesiya aavokoli-weewo, khusala anvekela Yinsa yoori amwikare sheethwani otule aari mmwiili wa mwanawewe.²⁷ Ila Yinsa khumuuzza yoori: "Owaalikhe khapula aana aje arupale. Khahi yoolotteya othuula phaawu ya aana khuwenkha anapwa."²⁸ Muukha otule khujipu yoori: "Khweele, Mbwana aka, ila hatha anapwa, annja tathela vathi wa meeza eniwaakwaayo asimaana.²⁹ Aphano ye khumuuzza yoori: "Mwaasa wa nanna ojipwiyeego, weeyo,

etta; sheethwani ansaruwa mwanawo.” ³⁰ Muukha otule khurutela owawe na khunsikana mwanawe arapaleeliye voolili, sheethwani otule anlikhiye.

Yinsa oninvonisa ntthu woohittakhuli na woohisiili

³¹ Elottelanaka, Yinsa khulankha mmuti mphule wa Tiiro na khulokha Sitooni mpakha ntthatta la Kalileya nti wa Tekapoliishi. ³² Aphano khutiiseliwa mwinyi mmote woohisiili na wookukuma, khunvekela yoori anttheele makhono ye. ³³ Yinsa khunlazavo vakatthi wa atthu apale awaatta na khunttha zaala omashiilo wawe. Elottelanaka khutthema na khusapa nlimi la mwinyi aya otule. ³⁴ Aphano khweekesa otulu, khwiitha phuumu na khumuuzu mwinyi otule yoori: “Efata” enlupaaye yoori: “Ofunule.” ³⁵ Wakathi otthuupule mashiilo a mwinyi otule khufunuwa na nlimi lawe khuveya, ye khwaaza ottakhula woohiina tafwawuthi. ³⁶ Yinsa khuwooga yoori ahimuuze hatha ntthu. Ila olilha toowo, khwa nanna aari owaakhat-tazaavo, yo aari otepa olaleya. ³⁷ Atthu ooshi aari osilaaye aari wiya ootkinisiwa channu na khusala alupa yoori: “Ye onretta vitthu zooshi saana, mpakha oniwaattakhulisa apale ohittakhuli na owaasilisa ananhisiili.”

8

Yinsa oniwaajisa alume alufu nne

¹ Ziviriyeovo siikhu vattithiiru, atthu akina awaatta khukusanyeyya vamote na Yinsa. Mwaasa wa atthu apale khaarina ethu yoojiwa, khuwaakuwela anakhiyoni awe khuwooga yoori: ² “Kiniwoonela huruma atthu apa, maana ana siikhu ttathu ari vamote na miiyo na khana hatha ethu yoojiwa. ³ Amana miiyo kiwooza olawa owaya najala zaya, yo antta okwa ntarikhi maana akina alankha peetiwene. ⁴ Anakhiyoni awe khu-jipu yoori: “Vayi khwa puuro eti niriyo ya wiithaleya ntthu anwahaaye opattha phaawu zoofiyela oja atthu apa?” ⁵ Yinsa khuuzela yoori: “Mweeyo mwina phaawu kavi?” Yo khujipu yoori: “Sapa.” ⁶ Ye khuwaaruma atthu apale yoori eekhale vathi. Elottelanaka khuthuula phaawu epile sapa, khunshukhurwela Nluku, khumeya khuwenkha anakhiyoni awe yoori awawanyelete atthu apale. Yo khuretta ethhiipile, ⁷ Aarina theenya swi kiina ttiitthittiitthi, khuthuula, khuparikhya na khuwooga anakhiyoni awe yoori awawanyelete atthu apale. ⁸ Atthu apale khuja mpakha orupala. Na khukusanya nyeenye zaasaliyeyo khwiitaala khelenke sapa. ⁹ Aarivo thamani ya atthu alufu nne, khuleezanana. ¹⁰ Nasaapiru khweetta mmwaatiya na anakhiyoni awe khusala alawa nti wa Talimanuuta.

Mafwarizeewu anveka alama moote

¹¹ Mafwarizeewu khuta na khwaaza omuuzela Yinsa yoori amoone, na khunvekela alama ya pinkuuni. ¹² Ye khusisimira nkaththi-nkatthi na khuri: “Mwaasa aya niini’ khapila eti evekaka alama moote ya minjuza? Miyo kinhakikhi yoori hatha alama moote khanlawa winkhiwa.” ¹³ Aphano khuwaalikha apale aya, khurutela nkalawa khusala alawa phantte kiina.

Othowelelisana wa mafwarizeewu

¹⁴ Anakhiyoni apale eettiye osahawu othuula phaawu, aarina phaawu moote paasiinkalawa. ¹⁵ Yinsa khuwooga yoori: “Mwijeekesele na mwiiyane phoole na fwaramento za mafwarizeewu na ya Herooti.” ¹⁶ Yo khusala akheetisana araka: “Mwaasa aya woohiina phaawu.” ¹⁷ Yinsa ajuwiyeovo

yoori antta okheetisana, khuwoozela yoori: "Mwaasa aya niini mwinkhetisanaka monkoni wa ohiina phaawu? Nalelo khiniweeleyani wala khamwinskiila? Rooho zenu mweetta wuumisa?" ¹⁸ Mweeyo mwinaaye maasho ila Khamwinoona, mwinaaye mashiilo ila khamwinskiila, hatha khamwinfikhiri? ¹⁹ Wakathi opule kaameyiyeeyo phaawu khuwenkha atthu apale alufu thaanu, khelenke kavi za nyeenye zasaliyeeyo?" Anakhiyoni apale khujipu yoori: "Khumi na piiri." ²⁰ Khi wakathi opule kaameyiyeeyo phaawu sapa yoori kiwenkhe atthu apale alufu nne, zaasaliye khelenke kavi za nyeenye mwaakhupeliyeeyo? Anakhiyoni khujipu yoori sapa. ²¹ Ye khuwooza yoori: "Mweeyo nalelo khiniweeleyani?"

Ovonisiwa wa ntthu woohooni nti wa Betezayiita.

²² Aphano yo khufiya Betezayiita, atthu akina ottuukhule khuntanelaya Yinsa ntthu woohooni, khusala anvekela yoori ansape. ²³ Ye khunhuula ntthu otule khunlawana othetekeli wa mmuti mphule, khulawa khutthemela mmaasho na khunttheela makhono. Yinsa khumuuzela yoori: "Weeyo onwahi woona ethtu?" ²⁴ Ntthu otule khweekesa otulu khuri: "Kiniwoona atthu anumpuwa nkhamma miitthi enttaaye weettetta." ²⁵ Theenyia, Yinsa khunttheela makhono ntthu otule na khufinikha maasho awe. Aphano maasho awe khufunuwa na khurutela woona zooshi saaneene. ²⁶ Yinsa khunruma olawa owawe amuuuzaka yoori: "Ohivire mmuti."

Otukhuru wa Pheeturu

²⁷ Yinsa na anakhiyoni awe khulawa nti waattamananiyeeyo Sezareeya ya Filiipe. Ntarikihi eettaka olawa, khusala awoozela yoori: "Atthu anri miiyo ki paani?" ²⁸ Yo khunjipu yoori: "Akina anri weeyo o Yaahaya Namooosa, akina anri o Aliyaasi, akinoko aya anri weeyo ommote wa manapiyu." ²⁹ Yinsa khuwoozela yoori: "Khi mweeyo? Mwinri miiyo ki paani?" Pheeturu khujipu yoori: "Weeyo o Al-Masiihu!" ³⁰ Yinsa khuwaaruma yoori ahimuuze hatha ntthu monkoni wawe ye.

Yinsa onlupa ofwa na osisimuwa wawe

³¹ Aphano ye khusala owaasomisa araka: Mwaana wa Pinaatamu aarina ya ohoochiwa pi vitthu zawaatta na okaththiliwa pi mahaakhimu a tiini na attunkhulu a tiini, anamanozela a kano na ooliwe, ila siikhya taaatthu asisimuwe. ³² Ye khulupa woosileyavo monkoni aya opo. Aphano Pheeturu khunkhuwela othetekeli khusala anshowera. ³³ Yinsa khurutela aphale aariivo anakhiyoni awe khusala aweekesa na khunshowera Pheeturu yoori: "Osale nyuma waka, Sheethwani! Weeyo khunuupuwela vitthu za Nluku, ila vitthu za eenaatamu. ³⁴ Aphano khuwaakhuwela atthu na anakhiyoni awe khuwooza yoori: "Nkhama ntthu ontakha okilotta, ajikaththale mweenyewe, athuule nsalapa awe akilotte." ³⁵ Maana otule antakhaaye wuusuru ohaayi awe ontaa omwaashikha, ila otule onimwaashikhaaye ohaayi awe, mwaasa wa miiyo na mwaasa wa hapari zooshapweya ontaa wuusurukha. ³⁶ Ena fwayita-ni ntthu oshintta olumwenku wooshi, mwiisho waya khumwaashikha nafusi yawe? ³⁷ Ama niini ntthu anwahaaye opatili na nafusi yawe? ³⁸ Amana ntthu apatthiwa haaya khwa miiyo na mattakhuzi aka khwa khaspila epi zoovonya na za twampi, Mwaana wa Pinaatamu onteela opatthiwa haaya khwa otu aya wakathi anttelaaye ota nsifwa wa Papaawe na malayikha ttakaththiifu."

9

¹ Khusala alupa theenya yoori: "Kiniuuuzani khweele yoori: Khwa apa ariiye apha, akina khanfwa ahooneeni ofwalume wa Nluku otakha na owahi."

Yinsa, Munsa na Aliyaasi

² Ziviriyeovo siikhu sitha, Yinsa khunthuula Pheeturu, Tiyaaku na Yaahaya paasi, khuwaalawana vamwaako woolepa woohiivo hatha nthu nkina. Attaaphale Yinsa khwiya woozukulisiwa ettaka omoona. ³ Kuwo zawe khwiya zoottakattha nkhamma etthu yawaara ameenaatho ahinwahaaye ofula khuttakatthisa nkhamma toowo. ⁴ Khuwaapuwelela Aliyaasi na Munsa, khusala attakhulana Yinsa. ⁵ Aphano Pheeturu khumuza Yinsa yoori: "Mwaaliimu ti yooshapweya wiikhala attaapha. Nintta ojeka heema ttatthu, moote yawo, moote ya Munsa na kiina ya Aliyaasi." ⁶ Pheeturu khaari ojuwa etthu yoolupa, maana yo aari wa woova. ⁷ Elottelanaka khupuwa liwiku khuwaakhutela, na khusiileya huula yaari oraaye: "Otu Mwanaka wompheta waka; mwinsiileze". ⁸ Nasaapiru, wakathi eekesiyeeyo nkerekhere, khuhimooni hatha nthu nkina theenya woohiiyi Yinsa. ⁹ Ettaka wiishukha vamwaako aphale, Yinsa khuwooza yoori ahimuuze hatha nthu etile oniyeyo, mpakha Mwaana wa Pinaatamu asisimuwe muufwa. ¹⁰ Mwaasa opule khuthkorela atthaaporu paasi, khusalan okeetisana maana a "osisimuwa muufwa". ¹¹ Khumuuzela yoori: "Mwaasa wa niini, anamanozela a kano alupaka wiiya yoohithajiya Aliyaasi ota khapula?" ¹² Yinsa khuwaajipu yoori: "Khweele Aliyaasi ona ya ota khapula, amana ata onrutsela opheeya vitthu zooshi. Khi mwaasa aya niini yaatikhiwaka yoori Mwaana wa Pinaatamu ona ya ohoowa channu, okatthaliwa na otarawiwa? ¹³ Ila, miiyo kiniuuuzani yoori Aliyaasi ata, yo khunrettela zooshi aatakhiyeeyo nkhamma zaatikhieezo monkoni wa ye".

Ovonisiwa wa shapu aariina sheethwani

¹⁴ Wakathi afiyeevo aphale aariivo anakhiyoni apale akina, khoona khuntti khuluyeene ewaazukuleliye apale na anamanozela a kano eettaka okheetisana na anakhiyoni. ¹⁵ Atthu apale paata ya omoona Yinsa, khwiya ooshanka khutthirela khunchelisa. ¹⁶ Yinsa khuwoozela yoori: "Mwinkhetisana niini?" ¹⁷ Mwinyi mmote aari vakatthi wa khuntti etile khujipu yoori: "Mwaaliimu, miiyo kootisela mwanaka ariina sheethwani aninkhattazayee ottakhula. ¹⁸ Wakhula vahali aninsikanava, onta onkwisela vathi. Khusala alaza maphovu na owina meeno, na wookowa. Kawaavekela anakhiyoni awo yoori amwiikare sheethwani aya oto, ila yo khuhinkhitiri. ¹⁹ Aphano Yinsa khujipu yoori: "Oo, atthu oohaamini, mpakha lini kiiyaka vamote na mweeyo? Mpakha lini kuuvilelakani? Mwikitisele shapu oto." ²⁰ Aphano yo khunttiisa. Wakathi sheethwani amooniyeevo Yinsa, nasaapiru khuntothela mwaana otule ozoromowa woohusutivo khukwela vathi, khwaaza ojuupurusha alazaka maphovu. ²¹ Yinsa khumuuzela paapa wa mwaana otule yoori: "Zamwaaza lini epi?" Papaawe mwaana khujipu yoori: "Thanku avokoliwe. ²² Swaafu zawaatta, sheethwani oto, onta onkwisela vamootho na mmaati yoori amuule. Ila nkhamma onwahi oretta etthu, noonele huruma onaawuni." ²³ "Onwahi?" Alupaka Yinsa. "Zooshi zinwaheya khwa otule ankhpalaaye." ²⁴ Nasaapiru paapa wa mwaana otule khunyakula araka: "Kinkhupali; okaawuni muuhikhupali mwaka!" ²⁵ Wakathi Yinsa ooniyeevo yoori khuntti khuluyeene yeettaka okusanyeya,

khunsukisa sheethwani araka: "Sheethwani woohittakhuli na ohisiili, miyo kinuuruma yoori onlikhe na ohinrutele theenya." ²⁶ Sheethwani khunyakula, khunsakhinya woohusutivo khusaruwa, shapu khwiya nkhamma ntthu woofwa, khufiyelela atthu akina olupa yoori: "Afwa." ²⁷ Ila Yinsa khunkhola nkhamo awe khunlansa, na khwiya wa weemela. ²⁸ Paata ya Yinsa orutela owawe, anakhiyoni awe khumuuzela othetekele yoori: "Mwaasa aya niini nahaakhitireliyeoyo omwiikara?" ²⁹ Ye khuwaajipu yoori: "Eto oniikareya khwa lompa na ofuka paasi."

Yinsa onlupa theenya ofwa wawe na osisimuwa wawe

³⁰ Yo khulaawo okhule aariiwo na khulokhela Kalileya. Yinsa khaatakhiye atthu ojuuva ohali aariiwo, ³¹ maana eetta owaasomisa anakhiyoni awe na awoozaka yoori: "Mwaana wa Pinaatamu onsaleela winkheleliwa mmakhono wa anaatamu. Yo anlawa amuule, ila siikhu ya ttaatthu onlawa asisimuwe." ³² Ila yo khayaaweleyiye ethtu aari otakhaaye olupa na eetta woova omuuzela.

Nwulu muufwalume wa pinkuuni

³³ Khufiya Kafwarananaawu. Ari owawe, ye khuwoozela anakhiyoni awe yoori: "Ntarikhi mwaari okheetisana niini?" ³⁴ Ila yo khuhilupi hatha ethtu, maana aari onyakulisansa yoori anjuwe paani eeyiyeyo nwulweene channu vakathi vaya. ³⁵ Eekhalieevo, Yinsa khuuakhuwela apale khumi na awiri khuwooza yoori: "Nkhamma ntthu ontakha wiiya wa mwanzo, ona ya wiiya wawiishela na eeye karumeya wa ooshi." ³⁶ Khunthuula mwaana mmote khuntha vakathhi vaya, khunkholela nkhamo awe na khuwooza yoori: ³⁷ "Wakhula otule animpwekherelaaye nsimaana nkhamma otu, khwa nzina laka, onikipwekherela miiyo, na otule anikipwekherelaaye khanikip-wekherela miiyo, ila onimpwekherela otule akiperekhiyeeyo.

Otule ahiniiphiriwaaye ti fweeyo ori khwa fweeyo

³⁸ Yaahaya khunkhuwela Yinsa khumuuzo yoori: "Mwaalimu, namoona mwinyi mmote eekaraka masheethwani khwa nzina lawo, fweeyo khunlikhisa mwaasa woohiiyi wa khuntti yeetthu." ³⁹ Yinsa khumuuzo yoori: "Mwihinkhattaze, maana khina anrettaaye minjuza khwa nzina laka, elottelanaka khukittakhula wootakhalavo. ⁴⁰ Maana otule ahiniiphiriwaaye ti fweeyo, ori khwa fweeyo. ⁴¹ Nakatalikha, kiniwuuzani khweele yoori: Otule aniwinkhaanini maati oonywa, koopho moote khwa nzina laka, mwaasa wa mweeyo wiiya atthu a Al-Masiihu, weekhwhee khinteeela omwaashikha phakari yawe.

Okwiselana ntwampi

⁴² "Amana ntthu ankwsa mmote wa apa attiitthi akikhupaliyeeyo miiyo, afwataali weeseleliwa mpahari afukeliwe liwe liwululene mmwisiko. ⁴³ Na nkhamo awo amana wuukosisa, oshije. Afwataali weetta muuhaayi ori woorakala, ehiyeeni wiiyana makhono awo mawiri khweetta motthooni, ohali oriwo moottho ohinzimaaye. ⁴⁴ [Ottuukho nyunku yaya ehinfwaaye wala moottho aya ohinzimaaye.] ⁴⁵ Na muulu awo amana wuuthowelelisa, oshije. Afwataali weetta muuhaayi ori woorakala, ehiyeeni wiiyana moolu mawiri khweetta motthooni, ⁴⁶ [ottuukho nyunku yaya ehinfwaaye na moottho aya ohinzimaaye.] ⁴⁷ Na amana liisho lawo limote luuthowelelisa, olazemo. Afwataali weetta muufwalume wa Nluku na liisho limote paasi ehiyeeni wiiyana oomawiri ila khweeseleliwa motthooni, ⁴⁸ ottuukho nyunku yaya ehinfwaaye na moottho aya ohinzimaaye. ⁴⁹ Maana wakhula

mmote onlawa alukaniwe moottho. ⁵⁰ Mwiinyu pi wooshapweya; ila mwiinyu aya amana olıkha onyuunya, wala khunrutiseleya! Mwikiye mwiinyu mweeyo ena, na mwiikhale na heeri mmote na nzeenu.”

10

Monkoni wa waashana

¹ Aphano Yinsa khulaavo aphale vaya khusala alawa nti wa Yudeya na phantte kiina ya Yorotaani. Theenya khuntti moote khuta aphale aariivo. Nkhama ethiipo aazowereliyeezo khusala awasomisa. ² Mafwarizeewu akina khunsusela yoori amweeze amuuzelaka yoori: “Halaali nlume omwaasha muukha awe?” ³ Ye khuwaajipu yoori: “Munsa aruma niini?” ⁴ Yo khulupa yoori: “Munsa aninkha ruhusa ya waatikha talakha khumwilikara.” ⁵ Yinsa awaajipwaka khuri: Mwaasa wa wuuma rooho, tiito ye oolikheliyeeni oruma opo aatikhieeyo. ⁶ Ila Nluku omwanzo amumpa nlume na muukha. ⁷ Mwaasa wa ethiito, nlume oninlikha papaawe na mamaawe khujikusanya na muukhaawee, ⁸ na oowiiri anretteya wiiya mwiili mmote paasi. Toowo, yo khaniiya awiri, ila oniyya mwiili mmote. ⁹ Nakatalikha, etile Nluku akusanyiyeyo, ahiiyevo anvalulaaye.” ¹⁰ Wakathi Yinsa ari owawe, anakhiyon i awe khumuuzela theenya monkoni wa mattakhuzi atthaapale. ¹¹ Ye khuwaajipu yoori: “Wakhula otule animwaashaaye muukhaawee na khunrala muukha nkina, onta oraruwa. ¹² Muukha naye amana antthira mannawe khuraliwa ti nlume nkina, onta oraruwa”.

Yinsa na asimaana

¹³ Atthu akina aari owaatana asimaana yoori asapiwe ti Yinsa, ila anakhiyon i awe eetta owaashoweraka. ¹⁴ Yinsa paata ya woona vitthu epile, khuhintuveli na khuwooza yoori: “Mwiwaalikhe asimaana akiteele miyo, mwihiwaakhattaze; maana ofwalume wa Nluku pi waya. ¹⁵ Kiniuuuzani khweele yoori: Otule ahimpwekherelaaye ofwalume wa Nluku nkhamna nsimaana, khanteela weettamo. ¹⁶ Elottelanaka, khuwaathuula asimaana, khuwaattheela makhono na khuwaaparikhya.

Shapu thajiri

¹⁷ Wakathi Yinsa aari weettelaaye osaruwa, mwinyi mmote khutthira amweettelaka khulawa khunkokkhorela na khumuuzela yoori: “Mwaaliimu woosaana, kiretteniini yoori kipatthe ohaayi wa mileele?” ¹⁸ Yinsa khunjiyu yoori: “Mwaasa aya niini okiitthaka woosaana? Khaavo woosaana, woohiiyi mmote paasi Nluku. ¹⁹ Weeyo onjuwa oruma onraaye: ‘Ohuule, ohraruu, ohiyye, Ohilupe oshaahiti woovonyeya, ohinhate ntthu na onshitali papaawo na mamaawo.’” ²⁰ Mwinyi otule khulupa yoori: “Mwaaliimu, zooshi epo kinshututela thanku oshaapu aka.” ²¹ Yinsa khumweekesa na khumpheta. Khumuuzza yoori: “Enusualeela etthu moote. Olawe woozanyise vitthu zawo zooshi, nzurukhu aya owenkhe asikhini na weeyo onta wiiyana njuju pinkuuni; nawiisha ote okilotte.” ²² Paata ya mattakhuzi apale, shapu otule khwiyya woottettheya khulaavo ari woohuzunikha, maana aarina maali zawaatta.

²³ Yinsa khumweekesa nkerekhere khuwooza anakhiyon i awe yoori: “Nanna enlipaazo thaajiri weetta muufwalume wa Nluku.” ²⁴ Anakhiyon i awe khwiyya ooshanka khwa mattakhuzi apale. Ila Yinsa khurutela olupa theenya yoori: “Aanaaka, nanna enlipaazo weetta muufwalume wa Nluku! ²⁵ Eniyya yookhwuya Enkamiyya ovira valiphotto la sikano, zayita thajiri weetta muufwalume wa Nluku.” ²⁶ Anakhiyon i awe khwiyya ooshanka,

khusala oozelana mmote na nzaawe yoori: "Nkhama pi toowo, paani anttelaaye wuuusurukha?" ²⁷ Yinsa khuweekesa khuwooza yoori: "Khwa pinaatamu khinwaheya, ila Nluku wala; khwa Nluku vitthu zooshi zinwaheya." ²⁸ Aphano Pheeturu khwaaza omuuza yoori: "Fweeyo nalikha zooshi yoori nuulotote." ²⁹ Yinsa khujipu araka: "Kiniwuuzani khwheeleye yoori: khaavo anlikhaaye vaje vawe, ttwiye, nlupuwe, mamaawe, papaaewe, aana awe ama mashapa awe, mwaasa wa miyo na hapari zooshapweya, ³⁰ ahipwekheraaye venkivene ohaayi otthuupu, swaafu miya theenya ya manyupa, attwi, alupu, maama, paapa, aana ama mashapa na olupatthiwa. Mwiisho waya ohaayi wa mileele. ³¹ Awaatta eeyiye amwanzo, anttela wiishela; na awiishela anttela wiiya amwanzo."

Yinsa onrutela olupa ofwa wawe na osisimuwa wawe

³² Yo eetta owelela Yeruzaleemu, Yinsa khuwaalokoza. Anakhiyoni khwiya onshanka, na apale aari onlottaaye khwiya awoova. Theenya Yinsa khuwaakhwela apale khumi na awiri na khuwooza vitthu zaari weettelaaye onrettikhanelo araka: ³³ "Moone, fweeyo ninwelela Yeruzaleemu, mwaana wa pinaatamu onlawa enkheleliwe mahaakhimu a tiini na anamanozela a kano. Yo anttela onhukhumwela ofwa na omwinkhelela mmakhono wa amalapo, ³⁴ anttela onveyisa, ontthemela, onjapha na amuule. Paata siikhu ya ttathu asisimuwe."

Oveka wa Tiyaaku na Yaahaya

³⁵ Aphano Tiyaaku na Yaahaya, aana a Zepeteewu, khumwaattama Yinsa khumuuba yoori: "Mwaaliimu, nintakha yoori oninkhe ethu ninttelaaye wuuvekela." ³⁶ Yinsa khuwoozela yoori: "Mwintakha yoori kuuretteleni niini?" ³⁷ Khujipu yoori: "Oninkhe ruhusa yoori khwa nsifwa mwawo, fweeyo neekhale mmote nkono nlume mmote nkono nkha." ³⁸ Ila Yinsa khuwooza yoori: "Khamwinjuwa ethu mwinvekqaye. Mwinwahi mweeyo onywela koopho etile kinyweliyeeyo ama opwekherela woosiwa opu khoosiweeyo miyo?" ³⁹ Yo Khujipu yoori: "Ninwahi." Yinsa khuwooza yoori: "Mweeyo mwinlawwa mwanywele koopho kinyweliyeeyo na mwinlawwa moosiwe nkhamma khoosiweeyo miyo; ⁴⁰ ila phantte eto ya wiikhala nkono nlume aka ama nkono nkha khahi miyo kininkhaaye. Maana puuro yaya eto ti ya apale oothokoreliwa." ⁴¹ Noosila vitthu epile, apale khumi khwiya ookasirikha khwa Yaahaya na Tiyaaku. ⁴² Ila Yinsa khuwaakhwela khwiya vamote naye, khuwooza yoori: "Mweeyo mwinjuwa yoori apale aninkhiwaaye ofwalume wa olokozela khabila anshintta na owahi ariinaaye. ⁴³ Ila vakatthi venu mweeyo ehiye toowo. Otule antakhaaye wiiya ntthunkulu vakatthi venu mweeyo ona ya wiiya othuuto anrumeyaaye; ⁴⁴ otule antakhaaye wiiya wa mwanzo vakatthi venu eeye namarumeya enu mooshi mweeyo. ⁴⁵ Maana Mwaana wa pinaatamu khateleeni orumeyeliwa, ila orumeya na winkha ohaayi awe khwa owaakaphula atttu awaatta.

Ovonisiwa wa ntthu woohooni wa Yeriko

⁴⁶ Khweetta Yeriko. Wakathi Yinsa na anakhiyoni awe vamote na khuntti khuluyeeene yaari olankhaaye Yeriko Baritimewu woohooni mwaana wa Timeewu nazimola eettiye wiikhala kharipu ya tarikhi. ⁴⁷ Noosila yoori Yinsa wa Nazareeti ontta ovira, khwaaza okhuwa araka: "Yinsa, mwaana wa Daawuuda, koonele huruma!" ⁴⁸ Atthu awaatta khusala anshowera yoori eeye woonyamala, ila ye khusala akhanyarela araka: "Mwaana wa Daawuuda, koonele huruma!" ⁴⁹ Yinsa khweemela khuri:

“Mwinkhuwele.” Khukhuweliwa otule woohooni khumuuzo yoori: “Ofurahi, olankhe, Ye ontaa wuukhuwela!”⁵⁰ Khweesela ajapi yawe toole, khwiirukha khwemela khulawa aphale aariivo Yinsa.⁵¹ Yinsa khumuuzela yoori: “Ontakha yoori miiyo kuurettelle niini?” Mwinyi otule woohooni khujipu yoori: “Mwaaliimu, miiyo kintakha woona!”⁵² Yinsa khumuuzo yoori: “Ólawe! Amini yawo yawuusuru.” Nasaapiru khwaaza woona na khusala anlotta Yinsa ntarikhi mphule.

11

Yinsa onvira na oshintta Yeruzaleemu

¹ Wakathi aattameliyeovo Yeruzaleemu, khufiya Betifwaaje na Betaaniya, kharipu ya mwaako wa oluveera, Yinsa khuwaaruma anakhiyoni awe awiri,² khuwooza yoori: “Mwilawe mmuti mpho mwaattameliyeemo, mwifiyaka mwininsikana mwaana wa puuru afukiwe ahinaweliweke ti hatha ntthu. Mwinfukule mwintiise.³ Amana apuwa ntthu awuuzelani yoori: ‘Mwaasa niini mwirettaka vitthu epo?’ Mwinjipu yoori: ‘Mb-wana ontaa onhithajiyi na oninrutisa nasaapi.’”⁴ Yo khulawa khunsikana mwaana wa puuru afukeleliwe, vanlako nwulu wa ntarikhi ya vaje, an-fukulaka.⁵ Atthu aari attaaphale khuwoozela araka: “Eto mwinrettaaye niini ya onfukula mwaana wa puuru oto?”⁶ Anakhiyoni apale khujipu ethhiipile Yinsa awooziyeyo, na ye khuwaalikha olawana.⁷ Khuntisela mwaana wa puuru otule Yinsa, khutthaavo kuwo zawe na khusala.⁸ Atthu awaatta khusala attattikhia kuwo zaya ntarikhi na akina khusala atthaamo virapi aashijiyeeyo ntthuttu.⁹ Apale aalokoziyeeyo na apale aari onlottaaye khusala anyakula araka: “Hosaana!” Wooparikhiiyiwa ti otule antaaye khwa nzina la Mbwana!”¹⁰ Wooparikhiiyiwa saana ofwalume ontaaye wa papeetthu Daawuuda!” Hosaana pinkuuni!”¹¹ Yinsa khufiya Yeruzaleemu na khulawa mpakha nnyupa woosifwiwamo. Khoona zooshi na wiiya waariipiye, khulawa Betaaniya na anakhiyoni awe apale khumi na awiri.

Yinsa ontwaharesha nyuupa yoosifwiwamo

¹² Mmeesho mwaya, wakathi aari olankhaaye Betaaniya, Yinsa khunkhola jala.¹³ Ari peetiwene, khoona muutthi wa mfikeera wooripelela mathapa, khulawa woona nkhamu aari osikanamo nshumo. Wakathi aattameliyeeyo, khuhisikanimo hatha ethtu, woohiiyi mathapa, maana khawaari wakathi wa wiima fiiku.¹⁴ Aphano kхuuza mfikeera opule yoori: “Khina anttelaaaye oja theenya mishumo khwa weeyo.” Anakhiyoni awe khusiila alupaka mattakhuzi apale.¹⁵ Yinsa khufiya Yeruzaleemu, khuvira nnyupa woosifwiwamo na khwaaza oweekara apale aari wuuzanyisaaye na apale aari wuuzanyaaye. Khupwalula khukulu za anamapatilisa nzurukhu na za apale aari wuuzanyisaaye jiwa.¹⁶ Khaari ontakhela ntthu oviranamo ethu yauuzanyisa nnyupa woosifwiwamo.¹⁷ Khusala asomisa araka: “Khayaatkhiiweeni yoori: ‘Nyuupa yaka enttela wiiya nyuupa yoolompiwamo khwa atthu ooshi ila mweeyo mwarettisa wiiya likurakuza la manantarawu.’”¹⁸ Mahaakhimu a tiini na anamanozela a kano khusiila mattakhuzi apale na khwaaza weekesa nanna ya omuula, maana eetta omoova, mwaasa wa khuntti khuluyeeene yaari oshankisiwa pi masomi awe.¹⁹ Weettelaka oripa, yo khulaamo nsitati mphule.

Mfikeera wa wuuma

²⁰ Mmeesho mwaya supuyeene, khoona mfikeera opule ori wawuuma mpakha na mitathaari zaya. ²¹ Pheeturu khuupuwela na khumuza Yinsa yoori: "Mwaaliimu! Woone mfikeera opule waalaaniyeyo wooma." ²² Yinsa khunjipu yoori: "Wiiyane amini khwa Nluku. ²³ Miyo kini-wuuzani khweele yoori, wakhula otule anttelaaye wuuza mwaako opu yoori: 'Okhuleyevo apha waajee selele mpahari,' na khushiina hatha nshikili nroho mwawo, ila khukhupalela yoori enrettikhana etile olupiyeeyo, entta orettyea. ²⁴ Apho, miyo kiniwuza yoori, zooshi weeyo onvekaazo khwa lompa, khukhupalela yoori apwekherela, onteela opattha. ²⁵ Na amana olompaka, khwiiyana nzaawo okosiyeeyo, onswaamihi, yoori naye Paapa wa pinkuuni oswaamihi twampi zavo. ²⁶ Ila mweeyo amana mwi-hiswaamihi, na mweeyo Paapa wa pinkuuni khanswaamihi twampi zenu.

Ofwalume wa Yinsa na woosa wa Yaahaya

²⁷ Khufiya theenya Yeruzaleemu, wakathi Yinsa aari oviraaye nnyupa woosifwiwamo, khususeliwa ti mahaakhimu a tiini, anamanozela a kano na attukhulu a tiini, ²⁸ khusala amuuzelaa yoori: "Vitthu epi, onrettana ofwalume waani? Paani awinkhiyeeyo ofwalume wa orettana?" ²⁹ Yinsa khujipu yoori: "Miyo kintakha kiwuuzele, amana okijipu, kintta owuza ofwalume kinrettanaaye vitthu epi. ³⁰ Nkakuuze, woosa wa Yaahaya waari wa pinkuuni ama waari wa anaatamu?" ³¹ Yo khusala anyakulisana araka: "Amana niri 'ti-ya pinkuuni,' onta onuuzelaa yoori: 'Aphano mwaasaaya niini mwiinhkhupalelaka?' ³² Ila nihijilipisane olupa yoori waari wa atthu!" Maana yo aari owoova atthu, weekhwhee atthu aari ookhupali yoori Yaahaya aari napiyu. ³³ Aphano khunjipu Yinsa araka: "Khanijuweeni." Yinsa zwaamu yawe khujipu yoori: "Hatha vattithiiru, miyo akiniwuuzani owahi kinrettanaaye vitthu epi."

12

Nlikaniso wa anamalima

¹ Aphano Yinsa khwaaza ottakhula na milikaniso yoori: "Mwinyi mmote khuzala miithi za wuuvu, khujekelela khwiya nkathhi, khuthipa kulaathayini yoori asala atthaamo wuuva na khujeka korofwa. Paata ya toole khurentteriwa anamalima ye khusaafiri. ² Wakathi wa wuurrula, khunruma karumeya awe khwa anamalima yoori enkhiwe phantte ya mishumo za wuuvu. ³ Ila yo khunkhola khumpi ya na khumwiikara woohimwinkhi ethu. ⁴ Aphano khumperekha karumeya awe nkina yo khunvonya khunwozola veeshwa, na khunttukhana. ⁵ Khumperekha theenya nkina khumuula. Khuwaaperekha theenya awaatta akina; khupiwa na akina khuulliwa. ⁶ Aari osala mmote yoori amperekhe, mwanawewe wompheta wawe. Mwiisho waya khumperekha na khuri: 'Otu mwanaka antta onshitahi.' ⁷ Ila anamalima apale khuuzana yoori: 'Otu ti namarithi. Nlaweni nimuule, nirithi fweeyo.' ⁸ Aphano khunkhola mwaana otule, khumuula khumweeselela oje wa nshapa. ⁹ Yinsa khuuzela yoori: "Mweenyewe nshapa ontela owaaret-tela niini? Ye onta ota awoole anamalima apale nshapa laya awenkhe anamalima akina. ¹⁰ Khamwinasome ethu enlupaaye zawaatikhwa ttakathifi? 'Liwe anamajeka akathaliyeeyo, nttho laya larettyea wiiya liwe linkhomaazaaye!' ¹¹ Eto enlankha wa Mbwana na ti yootikinisa khwa fweeyo." ¹² Aphano khwaaza weekesa nanna ya onkhola, maana eettiye ojuwa yoori nlikaniso opule aalupiyeeyo waari owaalupa yo. Ila eetta owoova atthu, attaphale khunlikha khusala alawa safwari yaya.

Oriphiwa lumpuru

¹³ Paata ya toole, khurumiwa mafwarizeewu akina na attunkhulu akina a khuntti ya Herooti olawa ottakhulana Yinsa eekesaka yoori an-sikanane ntakhuzi loovonyeya. ¹⁴ Wakathi afiyeevo aphale aariivo Yinsa khulupa yoori: "Mwaaliimu, ninjuwa yoori o weekhwhee na khunjilikhya oshawurisiwa ti nthu. Maana khuniwaaphuka athtu khwa nanna ariizo, ila onsonisa wawaamineyavo tarikhi ya Nluku. Nkanuuze: Halaali onripha lumpuru Seezari ama wala? ¹⁵ Ila Yinsa khumweeleya onaafikhya waya khu-woozela yoori: "Mwaasa aya niini mweeyo mwikoototaka? Mwikitisele nzurukhu yoori moone." ¹⁶ Yo khutana nzurukhu opule, ye khuwoozela yoori: "Ratarato eti na waatikha opu pi waani?" Khujipuza yoori: "Seezari." ¹⁷ Aphano Yinsa khuri: "Mwimwinkhe Seezari etile yiyyiye ya Seezari, na ya Nluku etile yiyyiye ya Nluku." Khwiiya onshankela.

Osisimuwa khweele

¹⁸ Masatukhi akina, apale anlupaaye yoori khawiivo osisimuwa, khuta aphale aariivo Yinsa khulupa yoori: ¹⁹ "Mwaaliimu, Munsa anilikhela zawaatikhiwa yoori, amana afwa ttwi na khunlikha muukhaawee ahin-vokoleenei aana, aloooziwe ttwiye yoori epuwe peewu khwa zwaamu ya ttwiye. ²⁰ Moone, aarivo attwi sapa, otu wa mwanzo khuloola na khufwa ahiwaalikheeni hatha aana. ²¹ Waphiiri khulooziwa muukha otule aafweliweeyo ti mannawee na ye khufwa, woohinlikhi mwaana; na wattaathu khwiiya ethiipo. ²² Ethiipile oosaapa khuhijaalikhi hatha aana. Mwiisho waya muukha otule na ye khufwa. ²³ Wakathi woosisimuwa, khwa ooshi apa sapa anttelaaaye wiiya muukhawe tuuvi? Maana ooshi anrala!" ²⁴ Yinsa khuaajipu yoori: "Mweeyo mwattettekhiwa, maana khamwinjuwa zawaatikhiwa ttakatthiifu wala owahi wa Nluku! ²⁵ Pi toono, wakathi woosisimuwa muufwa, khamwinlawa ooloola, wala olooziwa, ila mwinttela wiiya nkhamma malayikha a pinkuuni. ²⁶ Mweeyo khamwina some nkithaapu ya Munsa ethtu yaatikhiweeyo monkoni wa osisimuwa? Wakathi aari ottakhulaaye va muutthi opule waari okholelaaye, yaatikhiwa yoori Nluku aamuuziye Munsa yoori: "Miiyo ki Nluku wa Eburahiima, wa Esiyaakha na wa Yaakhumpa." ²⁷ Moone, Nluku khahiyoo wa ananfwa, ila Nluku wa attu haayi. Mwattettekheyaa venkivene.

Oruma nwulu

²⁸ Namanozela wa kano mmote noowasiila akheetisanaka khunsusela, ajuwiyeovo yoori ajipu saana, khumuuzela yoori: "Khi oruma wamwanzo khwa zooshi pi puuvi?" ²⁹ Yinsa khujipu yoori: "Oruma wamwanzo khwa zooshi pi opu: Osileeze, Ezirayiilu, Mbwana Nluku eetthu ti eeyiye Mbwana othwe paasi. ³⁰ Omphete paasi Mbwana Nluku awo khwa rooho yawo yooshi na nafusi yawo yooshi na akhili zawo zooshi na kuvu zawo zooshi. ³¹ Waphiiri pi opu: 'Omphete nzaawo nkhamma ethiipo onjiphetaazo omweeniyewe. "Khawiivo nrumo nkina nwulu nkhamma opu.' ³² Namanozela wa kano otule khuri: "Kemaani, Mwaaliimu, walupa na haakhi yoori ye mmote paasi, na khaavo nkina woohiyyi ye, ³³ na omphete na rooho yawo yooshi na akhili zawo na kuvu zawo zooshi na omphete nzaawo nkhamma ethiipo onjiphetaazo ti yooziti zaakha yoolukuziwa na twaha. ³⁴ Yinsa amooniyeevo yoori ajipu waakhilivo, khumuuzza yoori: "Weeyo khuri peetiwene na ofwalume wa Nluku." Elottelanaka, khuhiiwo hatha mmote aari omuuzelaaye.

³⁵ Yinsa eettaka osomisa nnyupa ya Nluku, khuwoozela yoori: "Anlupa toovi anamanozela kano yoori Al-Masiihu mwaana wa Daawuuda? ³⁶ Daawuuda aya alupa khwa Rooho Ttakatthiifu yoori: 'Mbwana amuuza Mbwana aka yoori wiikhale nkhone nlume aka, mpakha miiyo kiwaathe maatuwi awo vathi wa moolu awo.' ³⁷ Daawuuda aya onimwiitha yoori 'Mbwana'. Toovi anttelaaaye wiiya mwaanawee?" Khuntti khuluyeeene yaari osileza wootveliwave. ³⁸ Yinsa eettaka owaasomisa, aari owooza yoori: "Phoole na anamanozela kano. Yo oniwaatuvela weettetta awaliye ajapi zoolepa na opwekherela mwacheliwa vaparasa, ³⁹ owaatuvela wiikhala wiilokozi nsinakooka na puuro zooshitahiwa mmajampo, ⁴⁰ atthaapo antapanya mmanyupa ananfweliwa pi amannazaya na ojihakikhi khwa oretta lompa zoolepa; apa aya anttelaa ohoowa khwa ophukiwa woolwaazavol."

⁴¹ Yinsa eekhaliye waattamela puuro etile eninkhiwaavo zaakha, aari woona nanna khuntti etile yaari otthaamo nzurukhu n'yoopo ya zaakha. Mathaajiri awaatta aari otthaamo wawaatta. ⁴² Khumoona muukha namafweliwa ti mannawe mmote wa masikhini, atthaakamo ttoosu piiri. ⁴³ Yinsa khuwaakhuwela anakhiyoni awe khusala awooza yoori: "Kiniwuzani khweele yoori namafweliwa otu ti mannawe atthaamo n'yoopo wa zaakha zayita akina aya. ⁴⁴ Maana ooshi enkha tathela, ila otu na osikhini awe enkha wooshi aari ororomelaaye.

13

Yinsa onlupa opwechiwa wa Nyuupa Yoosifwiwamo

¹ Wakathi Yinsa aari osaruwaavo nnyupa yoosifwiwamo, nakhiyoni awe mmote khumuuzza yoori: "Mwaaliimu nkoono! Maweni mawulweene toono na manyupa ooshapweyisana toono!" ² Yinsa khunjipu yoori: "Woona manyupa mawulumawulu apa? Khalinlawwa liwe wiiya vatulu wa liwe nzaaya lihinttelaaye opwechiwa."

Alama ya mwiisho wa wakathi

³ Yinsa aarettiye eekhaliye vamwaako Oluveera omaasho wa nyuupa yoosifwiwamo, Pheeturu, Yaakhumpa, Yaahaya na Antere khumuuzela othetekele yoori: ⁴ "Onuuze, wakathi-ni enttelaaaye orettikhana vitthu zaya epo, na enttela wiiyayo alama-ni yoothoonyeza yoori zooshi zasaleela orettikhana?" ⁵ Yinsa khuwooza yoori: "Phoole yoori mwihihatiwe ti hatha ntthu. ⁶ Maana awaatta anta khwa nzina laka alupaka yoori: 'Mi-yyo ki Al-Masiihu!' na aniwahata athtu awaatta. ⁷ Amana mwisiila viitha ama hapari za viitha, mwihoove maana epo ena zoorettikhana, ila nalelo kinttela wiiya mwiisho. ⁸ Khapila moote enlawa yoomanane khapila kiina, na ofwalume onlawa woomanane ofwalume nkina. Zinlawwa zeeyeve visikinyaatthi khwa phantte zoofwarikhana na jala. Epo zaya yaazo ya vitthu za olwaaza. ⁹ Mweeyo mwihiyane phoole, maana mwinlawwa mwenkheleliwe wa anamaphuka na mwinlawwa mwajaphiwe mmasinakooka, na mwilawaniwe wa misatoro na wa afwalume, mwaasa wa miiyo, yoori mwihiyee mashaahiti. ¹⁰ Ila enihithajiya olaleyiwa hapari zooshapweya khapula khwa khapila zooshi. ¹¹ Amana mwithuuliwa olawa ofukiwa na ophukiwa, mwihihukulikhe ethhu yoolupa, ila ethiito mwinttelaaye winkhiwa wakathi aya otthuupo mwilupe ethiito, maana khahiyo mweeyo mwinttakhulaaye, ila Rooho Ttakatthiifu. ¹² Twi mmote onlawa anleve ttwiye yoori ooliwe, na paapa onleva mwanawee. Aana anlawa

awaazukuluwele apapa zaya awoole. ¹³ Atthu ooshi anttela owiinani mwaasa wa miiyo. Ila otule anttelaaye ovilela mpakha mwiisho, ontaa wuusurukha.

Ohoowa nwulweene

¹⁴ Amana moona okufuru wa woopisa wa pala nhali woohifwayi wiiyamo (ansomaaye ti emweeleye), aphano apale anttelaaye wiiya Yudeya atthirele omwaako. ¹⁵ Otule anttelaaye wiiya vatulu wa nyuupa ahiishukhevo yoori alawe owawe, wala ahivire othuula ethu ya nnyupa mwawee. ¹⁶ Otule aniiyaaye ntthuttu ahirutele onti yoori athuule juupa yawe. ¹⁷ Ootakhaliwa aakha apale anttelaaye osikanowi ari awiimiththa ama eettaka waamwisa! ¹⁸ Mwinvekele Nluku yoori vitthu zaya epo ehirettikhane mwiita. ¹⁹ Maana, siikhu zaya epo onttele wiiyavo ohoowa ohineeyekivo thanku Nluku ompe olumwenku, na khunteela opuwa nkina nkhamma opo. ²⁰ Eriwaka Nluku khaafupheyisiye siikhu zaya epo, khaavo aari weettelaaye wiiya haayi, ila mwaasa wa apale awathawuliyeeyo, afupheyisa siikhu zaya epo. ²¹ Aphano, amana ntthu awuuuzani yoori: 'Al-Masiihu otu ariiye apha!' ama 'Moone, otule ari okhule!' mwiikhupali. ²² Maana anlawa apuwe Al-Masiihu oojipanka na manapiyu oojipanka anttelaaye othoonyeza alama na vitthu zootikinisa yoori kusapi awahi owaattettekha ananthawuliwa. ²³ Mweeyo mwiiyane phoole! Miyo kiniuuuzani zooshi epo zihinarettikhane.

Ota wa mwaana wa pinaatamu

²⁴ Ila siikhu zaya epo, paata ya pala eto ya ohoowa, njuwa linttela oriipa na mweezi onttele olkhwa waara. ²⁵ Matthottowa akhwe pinkuuni na kuvi ziriye pinkuuni zinttela osakhinyeya. ²⁶ Aphano, mwinttela omoona Mwaana wa Pinaatamu mmawiku na owahi nwulweene na siifwa. ²⁷ Ye onttele oruma malayikha awe khwa phantte nne zooshi za nkerekhere wa olumwenku mpakha nkerekhere ya pinkuuni yoori awaakusanye ananthawuliwa awe.

Nsomo wa nfikeera

²⁸ "Mwijinozele nlikaniso wa nfikeera. Amana virapi zaya zinyoowela na mathapa khwaaza ophutuwela enthoonyeza yoori mwiita ontaa waat-tamela. ²⁹ Ethiipo theenya mweeyo, amana moona vitthu epo zeettaka orettikhane, mwijuwe yoori ye ori kharipu ya va milako. ³⁰ Miyo kiniuuuzani khweele yoori khapila eti kinvira vitthu epi zihirettikhaneeni. ³¹ Pinku na vathi zooshi zintela ovira, ila mattakhuzi aka khanviraru. ³² Ila monkoni wa siikhu ama wakathi khina anjuwaaye; wala malayikha pinkuuni wala Mwaana, woohiiyi Paapa. ³³ Phoole, mwiysi woojeekesela, maana khamwinjuwa ofiya wa wakathi aya opo. ³⁴ Eri nkhamma ntthu anlikhaaye nyuupa yawe khuretta safwari ya peetiwene; ila ahinalawee, khuwaalikhela ofwalume, akarumeya awe wakhula mmote sharuthi yawe, khunruma namweekesela yoori asale aweekeselaka. ³⁵ Tiito, mwijeekeesela, maana mweeyo khamwinjuwa wakathi mweenyewe nyuupa anttelaaye oruti; enttela wiiya njuwa looveva, osikhu layili, lifwajiri ama supu. ³⁶ Amana ye ata woohileezi, ti ahiwaasikane eettaka olala. ³⁷ Epile kiniuuzaanini, kiniuuuzani mooshi: 'Mwijeekeesela! "

¹ Zaari osaleela siikhu piiri paasi yoori efiye siikhu ya Paashikowa na siikhu ya Njampo la Phaawu Zoohiina Fwaramento. Mahaakhimu a tiini na anamanozela a kano aari weekesa nanna ya onkhola Yinsa sirini yoori amuule. ² Yo aari olupa yoori: "Khanininkhola vanjampo yoori nihipuwise nzuuzu vakatthi wa attu."

Yinsa onvaaziwa mafuttha Betaaniya

³ Yinsa ari Betaaniya, eekhaliye vameeza owawe mwinyi mmote anithiwaye Simawu namaharaja, khutawo muukha aataniyeyo suupha ya mafuttha oonukhela awaatta nzurukhu. Khupwecha suupha etile khumwi-itthela Yinsa veeswa vawe. ⁴ Apale aari attaaphale khwiiya ookatipukha khusala oozana atthaaporu yoori: "Aharipwela-ni mafuttha apale. ⁵ Maana aari owahi wuuzanyisa miiya ttatthu za nzurukhu wa paratha, aari weet-telaaye winkhiwa asikhini." Yo khunshowera muukha otule. ⁶ Ila Yinsa khuwaalikhisa araka: "Mwinlikhe muukha otu khwa heeri, Mwanvelaveliselani? Ye akirettela miiyo ethtu yooshapweya. ⁷ Maana asikhini mwina mweeyo mileele, na mwinwahi owaawuni mwitakharu. Ila miiyo akinteela wiiya vamote na mweeyo mileele. ⁸ Ye aretta etile awahiyeeyo. Avaaza mafuttha oonukhela mwiili aka raku zeene, atthenkezaka ozikhiwa waka. ⁹ Kiniwuuzani khweele yoori: wakhula vahali lintafusiriwaavo ntakhuzi la Nluku khwa olumwenku wooshi, epi arettiyeeyo muukha otu, zeettaka olupiwa noofikhiriwa ye."

Yuuda oninzinkula Yinsa

¹⁰ Aphano Yuuda Eshikariyoote, mmote wa apale khumi na awiri, khulawa wa mahaakhimu a tiini khwa shawuri za onzinkula Yinsa. ¹¹ Yo wakathi ansiliyeovo khwiiya oofurahi na khumwaahiti Yuuda omwinkha nzurukhu. Khwa wakathi aya opo Yuuda aari weekesa kiphenyo saana yoori anzinkule.

Yinsa onja njampo la paashikowa

¹² Siikhu ya mwanzo ya Njampo la Phaawu Yoohiina Fwaramento, wakathi waazowerieeyo orettiwa twaha pwittipwithi yoojeliwa paashikowa, anakhiyon i Yinsa khumuuzela yoori: "Ontakha yoori neette varyi nootthenkesele ethtu yoojiya ya paashikowa?" ¹³ Yinsa khuwaaruma anakhiyon i awe awiri khuwooza yoori: "Mwilawe mpakha ositati, ottuukho mwinlawwa mwansikane mwinyi athuuliye yuuku ya maati. Mwinlotte othuuto, ¹⁴ mwimiuze mweenyewe nyuupa ethiito anttelaaye oviramo yoori 'Mwaaliimu ontta wuuzela: Orivayi nsana aka wa omaka-vo, kinttelaaye onja-vo paashikowa na anakhiyon i aka?'" ¹⁵ Aphano ye ontta wuunozani mweeyo khwa nyuupa ya vatulu nsana nwulweene na zooshi mwinihithajiyaa. Mwitthenkeze attaapho njampo letthu." ¹⁶ Anakhiyon i apale awiri khulawa mpakha ositati, khusikana zooshi nkhamma ethhiipile Yinsa aalupiyeego na khuntthekeza paashikowa. ¹⁷ Wakathi oripiyeovo, Yinsa khuta na anakhiyon i awe apale khumi na awiri. ¹⁸ Ari vameeza eettaka oja Yinsa khuri: "Weekhweele kiniwuuzani yoori mmote wa mweeyo anjaaye na miiyo onkizinkula." ¹⁹ Ooshi khwiiya oohuzunikha na khwaaza wuuzela wakhula mmote khwa zwaamu yaye yoori: "Talili khahiyi miiyo?" ²⁰ Yinsa khujipu yoori: "Mmote wa khumi na awiri anjanaaye miiyo parathu moote. ²¹ Mwaana wa Pinaatamu onlawa afwe, nkhamma ethhiipo yaatikhieeyo monkoni wa ye. Ila wootakhalika ti otule anttelaaye onzinkula Mwaana wa Pinaatamu! Afwataali ahivokoliweeni!"

Njampo la mwiili na taamu ya Mbwana

²² Eettaka oja, Yinsa khuthuula phaawu, khuparikhya, khumeya, khuwenkha anakhiyoni awe na khuwooza yoori: "Mwithuule; opu mwili aka." ²³ Elottelanaka, khuthuula jikira, khushukhurwela, khuwenkha anakhiyoni awe na ooshi khunywa. ²⁴ Khuwooza yoori: "Eti ti taamu yaka ya wahati yiithiweeyo khwa zwaamu ya atthu ooshi. ²⁵ Miiyo kiniuuuzani khweele yoori akintela onywa theenya nshumo wa nrayi wa wuuba, mpakha siikhu kinttelaaye onywa theenya na mweeyo muufwalume wa Nluku." ²⁶ Paata ya yo wiipa liipo, khulankha khusala alawa omwaako Oluveera.

Yinsa oninchimulela Pheeturu

²⁷ Aphano Yinsa khuwooza yoori: "Mooshi mweeyo mwinlawa mwakan-swi. Maana yaatikhiva yoori: 'Kininvulalisa nshuki aya, na pwittipwithi zaya zinttela omwazeya.' ²⁸ Ila paata ya osisimuwa waka, kinttela olokoza Kalileya." ²⁹ Aphano Pheeturu khutukhuru araka: "Hatha nkhamma ooshi eetta wuutthira, miiyo akinuutthira. ³⁰ Yinsa khunjipu yoori: "Weekhweele kiniuuza yoori leelo osikhu othuupu, likukhuwi lihineekhe swaafu piiri, onteela okikhana swaafu ttatthu." ³¹ Ila Pheeturu khusala akhanyarela channu araka: "Hatha nkhamma kintakha wuuliwa vamote na weeyo, akin-teela wuukhana." Ooshi khulupa eththiipo.

Yinsa nwoorotha wa Yetemaani

³² Aphano khulankha khulawa puuro eniithiwaaye Yetemaani, khuwooza anakhiyoni awe yoori: "Mwiikkhale apha, miiyo kinttela olompa." ³³ Khunthuula Pheeturu, Tiyaaku na Yaahaya khwaaza oshukulikha, othunkuwikha na ohuzunikha. ³⁴ Yinsa khuwooza yoori: "Nafusi yaka ti ya ohuzunikha venkivene woosaleela ofwa; mwisale apha na mwijeesesel." ³⁵ Yinsa khuwaasusa vattithiiru khukokhora na khusala alompa yoori nkhamma enwaheya aattuwananisiwe wakathi opu wa ohoowa. ³⁶ Aari olupa toono: Oo Paapa zooshi khwa weeyo zinwaheya. Okaattuwananise miyo jikira eti ya ohoowa. Ila ehirettikhane khwa matakhelo aka, ila khwa matakhelo awo. ³⁷ Apho khurutela aphale aariivo anakhiyoni awe, khuwaasikana eettaka olala. Khumuuzha Pheeturu yoori: "Simawu, onta olala? Khuwaheeni ojeekesela nenkawu wakathi mmote? ³⁸ Mwijeekesele na mwilompe, yoori mwihikwele muuzayiniwa; rooho ti yookhomaala, ila mwiili pi woottettheya." ³⁹ Yinsa khuwaasusa opheya khusala alompa, arutelaka mattakhuzi mamoteru. ⁴⁰ Wakathi arutiyeeveo khuwaasikana eettaka olala theenya, mwaasa maasho aya eetta owaalemela; khaari ojuwa ethtu yoojipu. ⁴¹ Khuta swaafu ya ttaatthu khuwooza yoori: "Nalelo mwintta olala na ovumula? Zafiyela! Wafiya wakathi wa Mwaana wa Pinaatamu winkheleliwa mmakhono wa anatwampi. ⁴² Mwilankhe, ni-lawe! Mwimoone namazinkula ori kharipu.

Ofukeliwa wa Yinsa

⁴³ Yinsa nalelo eettaka ottakhula, khusala ata Yuuda mmote wa anakhiyoni apale khumi na awiri. Aari ota na atthu awaatta athuuliye phanka na kolomontto, aarumiweeyo ti mahaakhimu a tiini, anamanozela a kano na attunkhulu a tiini. ⁴⁴ Namazinkula aawooziye alama araka: "Otule kinttelaaye ompatikha, ti othuuto; mwinkhole mwinthuule saana." ⁴⁵ Wakathi afiyeveo, ye khumwaattama khumuuzha yoori: "Mwaaliimu!" na khumpatikha. ⁴⁶ Atthu apale khunkhola Yinsa na khunkholelela. ⁴⁷ Aphano mmote wa anakhiyoni awe aariina kharipu, khufuttha phanka khunvavela

khushija nshiilo la karumeya wa haakhimu nwulu wa tiini. ⁴⁸ Yinsa khuwooza yoori: "Mwakiteela na phanka na mikokonto yoori mwikik-hole nkhamma nantarawu? ⁴⁹ Siikhu zooshi kaari vamote na mweeyo kisomisaka Nnyupa Woosifwiwamo, khuhikikholi; ila zooshi epi zaariye yoori emarisele zawaatikhiwa ti manapiyu. ⁵⁰ Anakhiyoni awe ooshi khumwan-swi na khutthira. ⁵¹ Ila shapu mmote, aajifinikhiyeeyo nkhummi woolakala paasi aari onlottaaye Yinsa. Yo khunkhola, ⁵² ila khuvula nkumi opule, khutthira waazu.

Yinsa vakatthi wa Mashawuriya

⁵³ Khunthuula Yinsa khunlawana wa haakhimu nwulu wa tiini na khuthukumana mahaakhimu a tiini ooshi, attunkhulu a tiini na ana-manozela a kano. ⁵⁴ Pheeturu khusala awaalotta ari peetiwene mpakha nlilikoko wa haakhimu nwulu wa tiini, na khulawa khwiikhala na ana-marumeyela, ootthaka moottho. ⁵⁵ Mahaakhimu a tiini na Mashawuriya ooshi aari weekesa onsikanana Yinsa paathuli moote yoori anhukhumwele ofwa, ila khuhinsikanani hatha moote. ⁵⁶ Maana awaatta aari olawela oshaahiti woovonyeya khwa Yinsa, ila tukhuru zaya khazaari sawasawa. ⁵⁷ Aphano khulankha attu akina na onlupeza vitthu zoovonyeya. ⁵⁸ "Fweeyo nansiila alupaka yoori: 'Kimpwecha Nyuupa eti Yoosifwiwamo yoojekiwa pi makhono a anaatamu, na siikhu ttatthu kijeke kiina, yoohijekiwi pi makhono eenaatamu.'" ⁵⁹ Ila hatha nkhamma piitthiipo, mattakhuzi aya khaari wiiya sawasawa. ⁶⁰ Khulankha haakhimu nwulu wa tiini khumuuzela Yinsa yoori: "Khunjipu mattakhuzi apa onlokoveziwaaye?" ⁶¹ Ila Yinsa khwiiya woonyamala, khuhijipu hatha ethu. Haakhimu nwulu wa tiini khurutela omuuuzela theenya yoori: "Weeyo o Al-Masiihu, mwaana wa Nluku Wooparakhiyiwa?" ⁶² Yinsa khujipu yoori: "Miiyo ki othuuto, na mwinlawwa mwamoone Mwaana wa Pinaatamu eekhaliye nkhone nlume wa Nluku wa owahi zooshi, na ataaka mmawiku a pinkuuni." ⁶³ Aphano haakhimu nwulu wa tiini khuvavarula kuwo zawe na khuri: "Khi ninrettanna oshaahiti nkina! ⁶⁴ Mweeyo mwasiila okufuru wawe. Mwinuupuwela niini?" Attu ooshi anri onsuhi wuuliwa. ⁶⁵ Aphano akina khwaaza ontthemela khunfinikha omaasho wawe khusala ampwakula na amuuzelaa yoori: "Ti paani oopiyeeyo? Onlupe!" Anamweekesela khunkhola na khumpwakula.

Pheeturu oninkhana Yinsa

⁶⁶ Pheeturu aarettiye ari vathi nlilikoko wa nyuupa etile wakathi atiyeeyo njaazi wa haakhimu nwulu wa tiini. ⁶⁷ Amooniyeovo Pheeturu eettaka woottha moottho khuri: "Weeyo waari na Yinsa wa Nazareti." ⁶⁸ Ila Pheeturu khukhana araka: "Akininjuwa, na wala akinsiila ethu onlupaaye." Khusaruwela nlako wa nlilikoko. ⁶⁹ Wakathi njaazi otule amoonyeovo theenya, khuwooza apale aariina attaaphale yoori: "Otu mmote wa atthaapo." ⁷⁰ Ila khukhana theenya. Oviriyeevo wakathi vattithiiru, apale aariina attaaphale theenya khumuuzha Pheeturu yoori: "Weekhewe, weeyo o mmoteru na atthaapo, maana onkalileya. ⁷¹ Ye khwaaza onlaani na olapha yoori: "Akininjuwa pinaatamu aya oto oninlupaaye." ⁷² Nasaapiru likukhuwi khwiikhala swaafu ya phiiri. Pheeturu khuupuwela mattakhuzi Yinsa amuuziyeeyo yoori: "Likukhuwi lihineekhe swaafu piiri, onikikhana swaafu ttatthu." Khulaavo aphale vaya khusala alila.

15

Yinsa ari wa Pilaatu

¹ Supuyeeene, khukusanyeya Mahaakhimu a tiini, attunkhulu a tiini, anamanozela a kano na Mashawuriya ooshi, khunfuka Yinsa khunthuula khumwinkha Pilaatu. ² Pilaatu khumuuzela yoori: “Weeyo o mfwalume wa mayaahuuti?” Ye khujipu yoori: “Weeyo ti onlupaaye.” ³ Mahaakhimu a tiini khunlokoveza vitthu zawaatta Yinsa. ⁴ Pilaatu khurutela omuuzela theenya yoori: “Weeyo khunjipu? Nkoona vitthu kavi anuulokovezaaye.” ⁵ Ila Yinsa khuhijipu hatha ethtu Pilaatu khwiyya wooshanka.

Yinsa ahukhumweliwa ofwa

⁶ Yaari zowera yaya, wakathi wa Njampo la Paashikowa, Pilaatu onfukulela napherezu mmote, otule aari ovekiwaaye ti atthu. ⁷ Mwinyi mmote anithhiwaaye Baraba aafukeliwe vamote na anamak hijili mwaasa wa omuula ntthu wakathi wa nzuzu. ⁸ Khuntti ya atthu etile khuta na khunvekela Pilaatu yoori arette etile awaazoweziyeeyo owaarettela. ⁹ Aphano Pilaatu khuwoozela yoori “Mweeyo mwintakha yoori kinfukulele mfwalume wa mayaahuuti?” ¹⁰ Maana ye aari ojuwa saaneene, yoori mahaakhimu a tiini anleviye Yinsa mwaasa wa nrima. ¹¹ Ila mahaakhimu a tiini awaakhan-yareliye atthu apale yoori anvekele Pilaatu aaze onfukulela Baraba khwa otakha waya. ¹² Pilaatu khuwoozela theenya yoori: “Kinrettele niini mwinyi otu mweeyo mwinimwiitthaaye mfwalume wa mayaahuuti?” ¹³ Yo khunyakula araka: “Akhomeliwe!” ¹⁴ Ila Pilaatu khuwoozela yoori: “Niini arettiyeeyo yootakhala?” Ila yo khusala atepa onyakula araka: “Akhomeliwe!” ¹⁵ Pilaatu eekesaka otuvelisa khuntti etile ya atthu, khunfukulela Baraba na khurma ojaphiwa Yinsa na olawa okhomeliwa.

Anajanka aninveyisa Yinsa

¹⁶ Anajanka khunthuula Yinsa, khunlawana nlkokoro wa nyuupa khuulu ya nsatoro khukusanya khuntti khuluyeeene ya anajanka. ¹⁷ Khunwalisa juupa yookhuttuwa, khuvaasha khaara ya miiwa khunwalisa mmwishwa. ¹⁸ Khusala anchelisa araka: “Wiiye haayi, mfwalume wa mayaahuuti!” ¹⁹ Khusala ampiya veeshwa vawe na nthala na ontthemela, akokhoraka na omwaaputu.

Okhomeliwa wa Yinsa

²⁰ Paata ya ontukhana, anajanka apale khunvula kuwo yookhuttuwa khunwalisa kuwo za wiiya zawe. Aphano khunsarulela vaje yoori alawe ankhomele. ²¹ Khukutthanana mwinyi mmote wa Sireene aari wiithiwaaye Simawu, papaawe Alishantere na Ruufu, aari olankhaaye omashapa. Khunkhanyarela othuula nsalapa wa Yinsa. ²² Yo khunthuula Yinsa khunlawana puuro eniithhiwaaye Kolokoota, eriina maana a puuro ya likurakuza la eeshwa. ²³ Khusala atakha omwinkha viinyu yoophakanyaniwa mafuttha oonukhela, ila ye khuhinywi. ²⁴ Aphano khunkhomela na khwaawanyana kuwo zawe khwa weekesa nasipu yoori ajuwe wakhula ntthu phantte ari weettelaaye osalana. ²⁵ Aakhomelaniwe wakathi wa saa-ttaatthu, supu. ²⁶ Pi ethiipo yaatikhieeyo khwa olokoveziwa wawe yoori: MFWALUME WA MAYAAHUUTI. ²⁷ Vamote na ye aakhomeliwe manantarawu awiri, mmote nkhono nlume, nkina nkhono nkha, ²⁸ [na khurettikhana epile za-waatikhiwa zaalupiyeeyo yoori: “Ye aathanttiwe nkhama namatapany.”]

²⁹ Apale aari oviraaye attaaphale, eetta ontukhana na osakhinya viishwa zaya araka: "Haya, weeyo ompwechaaye Nyuupa Yoosifwiwamo, khwa siikhu ttatthu khujeka. ³⁰ Wiishukhe vansalapa apho na ojuusuru omweenyewe!" ³¹ Khwa nanna ethiipile, mahaakkimu a tiini na ana-manozela a kano khusala alupa atthaaporu anveyisa yoori: "Awoosuru akina, ila khanwahi ojuusuru mweenyewe. ³² Wiishukhe vansalapa apho O Al-Masiihu, mfwalume wa Ezirayiilu, wiishukhe yoori niwoone na nuukhupali." Apale aakhomeliweeyo, na yo eetta ontukhana theenyia.

Ofwa wa Yinsa

³³ Yaapuwiyi yiiza olumwenku wooshi, waaza atuhuri mpakha alaasiri. ³⁴ Payina ya alaasiri, Yinsa khukhuwa na huula ya onyakula, araka: "Elooyi, Elooyi, Lama sabatani?" Eto ena maana ya "Nluku aka, Nluku aka, mwaasa aya niini okanswaka? ³⁵ Wakathi attu apale aari attaaphale asiiliyeovo mattakhuzi apale, khulupa yoori: "Mwisiile, oninkhuwela Aliyaasi!" ³⁶ Mmote aari attaaphale khutthira khulawa khunaanisa shiponja na vinaakiri, khupweha va muuthi na khumwinkha Yinsa yoori anywe na khuri: "Mwinlikhe, nimoone nkhamma Aliyaasi onta anlazevo aphale vaya. ³⁷ Ila Yinsa khunyakula channu khwiitha phuumu. ³⁸ Phazira ya Nnyupa Woosifwiwamo khuvaruwa khwaawanyeya phantte piiri, waaza vatulu mpakha vathi. ³⁹ Wakathi namalokozela wa anajanka aariye omaasho wa Yinsa, ooniyeovo nanna afwiyeeyo, khuri: "Wekhwheele mwinyi otu aari Mwaana wa Nluku!"

⁴⁰ Aakha akina aari oretta eettaka woona vitthu epile zaari orettikhanaaye ari peetiwene. Khwa atthaapo aarivo Mariyamu Mataleena, Mariyamu mamaawe Tiyaaku, nsimaana wa Yuusufu, na Salome. ⁴¹ Aakha aya apo amperekhiye Yinsa na omwaawuni wakathi ariyo Kalileya. Owaalikha apo aya, aarivo aakha akina awaatta aalawaniyeeyo Yeruzaleemu.

Ozikhiwa wa Yinsa

⁴² Njuwa leettelaka otupweela, mwaasa wa wiiya siikhu ya otthenkeza Saapatu, ⁴³ Yuusufu wa Arimateeya, mwinyi wa fwayita na aari oretta phantte ya Mashawuriya, oto naye aari oweja ota wa ofwalume wa Nluku, khulawa woominyalavo wa Pilaatu na khuveka mwiili wa Yinsa. ⁴⁴ Pilaatu khwiiya wooshanka noosiila yoori Yinsa afwa. Khunkhuwela namalokozela wa anajanka khumuuzela nkhamma Yinsa afwa. ⁴⁵ Wakathi ooziweeve ti namalokozela wa anajanka, khumwinkha mwiili wa Yinsa Yuusufu. ⁴⁶ Aphano Yuusufu khuzzanya kuwo yoolakala yoopeephuya, khwiishusha mwiili wa Yinsa vansalapa aphale, khumputaputela va kuwo etile yoolakala na khunttha nkhapuri yaathipiweeyo va mwaako. Nawiisha, khutthaavo liwe vanlako vaya. ⁴⁷ Mariyamu Mataleena na Mariyamu mamaawe Yuusufu, aarettiye eettaka woona na khoona mwiili wa Yinsa vahali waatthiweeve.

16

Osisimuwa wa Yinsa

¹ Paata ya ovirisa Saapatu, Mariyamu Mataleena, Salome na Mariyamu mamaawe Tiyaaku, khuzzanya mafutha oonukhela yoori eetthele mwiili wa Yinsa. ² Siikhu ya mwanzo ya sumana supuyeene, njuwa leettelaka opuwa, aakha apale khulawa okhapuri. ³ Ntarikhi khusala oozelana yoori: "Paani anttelaaaye onilazelavo liwe lifukaniweeyo nlako wa kha-puri?" ⁴ Maana liwe laya laari liwululene. Ila noofiya okhule, khoona liri

loolaziwavo. ⁵ Aviriyeevo nkhapuri mphule, khumoona shaapu awaliye kuwo zoolakala eekhaliye nkhono nlume, na khwiya awooova. ⁶ Khuwooza yoori: “Mwihoove, mweeyo mwiminweekesa Yinsa wa Nazareeti, aakhomeliyeeyo. Ye asisimuwa! Khaamo mphu, moone puuro aattattikheliyevo. ⁷ Mwilawe na mwawooze anakhiyoni awe na Pheeturu yoori: ‘Ye alokoza eettaka Kalileya.’ Ottuukho mweeyo mwinlawa mwamoone, nkhama ethiipo awuuziyeenini.” ⁸ Eettaka othukumela na osuthuwa, aakha apale khulaawo na khutthiramu nkhapuri mphule. Na khuhimuuzi hatha ntthu, maana aari awooova.

Yinsa onimpuwelela Mariyamu Mataleena

⁹ Wakathi Yinsa asisimuwiyeovo lifwjirila siikhu ya mwanzo ya sumana, khumpuwelela omwanzo ene Mariyamu Mataleena, otule eekariweeyo mmwiili mwawe masheethwani sapa. ¹⁰ Ye khulawa owooza ashirikha awe Yinsa, maana yo aari oohuzunikhna na olila. ¹¹ Wakathi asiliyeovo yoori Yinsa ori haayi na ampuweleliye Mariyamu Mataleena yo khuhikhupali.

Yinsa oniwaapuwelela anakhiyoni awiri

¹² Paata ya vitthu epile, Yinsa khujithoonyeza khwa wuuso nkina vakatthi wa anakhiyoni awe awiri alottaka tarikhi ya omashapa. ¹³ Yo khuruti khuta khuwooza mattakhuzi apale azaaya; ila theenya apale khuhikhupali. ¹⁴ Omwiisho waya Yinsa khuwaapuwelela apale khumi na mmote, wakathi aariyo vameeza, na khuwaashowera mwaasa woohikhupali na wuuma rooho zaya, maana khawaasileziye apale aamoniyeeyo wakathi asisimuwiyeovo. ¹⁵ Khuwooza yoori: “Mwilawe olumwenku wooshi mwawalaleyele atthu ooshi hapari zooshapweya. ¹⁶ Otule ankhupalelaaye na khoosiwa ontta wuusurukha, ila otule ahinkhupalelaaye oniiyana paathuli. ¹⁷ Alama epi enttelaa owaalokoza apale anikikhupalaaye miiyo: khwa nzina laka aniikara masheethwani, anlawa attakhule luuka pheeya, ¹⁸ ankhola nyookha na onywa amali ya wuula, ila khuhiiwaaretti hatha ethtu na owaattheela atthu makhono khuvona.”

Yinsa oneetta pinkuuni

¹⁹ Paata ya owooza mattakhuzi apale, Mbwana Yinsa khuweziwa pinkuuni khwiikhala nkhono nlume wa Nluku. ²⁰ Aphano anakhiyoni apale khulankha khulawa olaleya phantte zooshi, Mbwana aari owaawuni ahakikhaka mattakhuzi aya na alama zaari owaalottaaye.

Luuuka

Yaazo

¹ Weeyo Tiyoofilu woohishimiwa, atthu a waatta aajilipisiye waatikha hatiithi ya vitthu ziviriyeeyo vakatthi yetthu. ² Apale aari mashaahiti ooniyeeyo omwanzweene zirettikhana, khwiya anamalaleya a hapari zooshapweya za ntakhuzi la Nnyizinku, atthaapo pi anifiseliyeeyo fweeyo. ³ Na miiyo zaamu yaka khusala kitholathola woohilazeli varanka epile zirettikhaniyeeko zaazaka, khulakela owaatikhela zooshi woolotteyavo, ⁴ yoori wiyane nroromelo khwa mattakhuzi apa a haakhi osiiliyeeyo.

Onlaleyiwa ovokoliwa wa Yaahaya Namoosa

⁵ Wakathi Herooti ari nsatoro wa Yudeya, aarivo haakhimu wa tiini mmote wa khuntti ya Abiyya aari wiithiwaaye Zakariiya. Muukhaawe aari wiitthi Elizabeeti aari woojama wa mahaakhimu a tiini. ⁶ Oowiiri aya aari atthu ookhweele nkattti wa mwentto wa Nnyizinku na ooshututela wa waamineyavo kano na oruma wooshi wa Mbwana. ⁷ Elizabeeti khaarina mwaana mwaasa woohiina mavokozi na oowiiri aya aari awuuluvala.

⁸ Siikhu moote Zakariiya aari okhola khaazi yoohaakhimu wa tiini Nnyupa wa Nnyizinku Yeruzaleemu, mwaasa yoori yaari zwaamu ya khuntti yawe okhola khaazi yaya etile. ⁹ Nkhama ethiipo aazowereliyeeyo attunkhulu a tiini, ye aathawuliwe nkattti wa nasipu yoori asala akhoza ovupa puuro ttakathhiifu ya Mbwana. ¹⁰ N'oofiya wakathi wookhoza ovupa, atthu ooshi apale aari vaje aari ovira alompaka.

¹¹ Aphano nlayikha la Mbwana khunteela Zakariiya nkhono-nlume vaalitaari onkhoziwaavo ovupa. ¹² Wakathi ye ooniyeovo nlayikha ntthile, khwiya wooshanka na wa woova channu. ¹³ Nlayikha khumuuzo yoori: "Ohoove Zakariiya! Nnyizinku asiila lompa yawo; muukhaawo Elizabeeti onteela ompattha mwaana. Weeyo onteela ontthaja nzina la Yaahaya. ¹⁴ Ye onttelel wiiya furaha yootveliwa wawo, atthu a waatta anteela ofurahela ovokoliwa wawo, ¹⁵ maana ye onteela wiiya ntthunkhulu mmakhono wa Mbwana Nnyizinku. Khanteela onywa viinyu wala onywa vitthu zoohapala. Onttela wiiya wa wiitaazaniwa Rooho Ttakathhiifu ari mwiirukulu wa mamaawee. ¹⁶ Onteela owaatana atthu awaatta a Ezirayele wa Mbwana Nnyizinku aya. ¹⁷ Onteela operekhiwa ti Mbwana na onttelel wiiya wookhomaala na woowahi nkhama napiyu Aliyaasi, yoori azukulise rooho za apaapa eeyane osiilana na aanaaya, na yoori awaaazukuluse anamakijili eettettise haakhi, toowo phi anttelava ozukulisa rooho zaya yoori am-pokherele Mbwana ataaka."

¹⁸ Aphano Zakariiya khuuzela nlayikha ntthile yoori: "Kinteela ohakikhi toovi etthu yaya eto? Miyo kooluvala na muukhaaka ooluvala."

¹⁹ Khujipu nlayikha liraka: "Miyo ki Jipiriilu, kiniiya vamote na Nnyizinku, akiruma yoori kite kiwuuze hapari epi zooshapweya. ²⁰ Wiyya khukhupaleeni mattakhuzi apa kiwuzyeego, onttelel wiiya woohittakhuli mpakha siikhu zinttelaaaye orettikhana vitthu epi. Zintelel orettikhana wakathi aya otthuupo."

²¹ Nalelo atthu aari onwejaaye Zakariiya khushanka mwaasa woorupaza Nnyupa wa Nnyizinku. ²² N'oosaruwa, khuhisala awahi ottakhulana atthu

apale. Yo khujuwa yoori wanteeliye wahayi* Nnyupa wa Nnyizinku. Khwi-
iya woohittakhuli khusala attakhula na makhono.

²³ Wakathi eeshisiyeevo siikhu zookhola khaazi z'oottunkhulu wa Nnyupa
wa Nnyizinku, khurutela owawe. ²⁴ Paata ya toole, muukhaawe Eliz-
abeeti khwiimittha, khuhisala asaruwa nnyupa mpakha nyeezi mithaanu.
²⁵ Khuri: "Aphano Mbwana ajipu lompa yaka, eeshisa haaya etile kaariina
na atthu."

Onlaleyiwa ovokoliwa wa Yinsa

²⁶ Mweezi wasiitha wa erukulu ya Elizabeeti, Nnyizinku khuruma
nlayikha Jipiriilu olawa sitati ya Kalileya nti wa Nazareeti ²⁷ yoori lilawe
wa mwaari mmote woohijansiliwi aari wiitthiwaaye Mariyamu, aaposi-
weeyo ti shapu mmote aari wiitthiwaaye Yuusufu woojama wa mfwalume
Daawuuda. ²⁸ Nlayikha nthile n'onsikana khumuuba yoori: "Heeri yiiye
vamote na-weyo Mariyamu! O wooziti oshapweyiwa, Mbwana ori vamote
na-weyo."

²⁹ Ye khwiya woozinkireya mwaasa wa mattakhuzi apale, khuvira
aphelelezaka maana a hapari zaya epile. ³⁰ Nlayikha khurutela omuuza
liraka:

"Ohoove Mariyamu,

 wapattha rehemha omaasho wa Nnyizinku.

³¹ Onteela wiimitta ompatthe mwaana wanlume
 ontthaje nzina la Yinsa.

³² Ye onteela wiiya ntunkhulu,

 nka eetthiwaka Mwaana wa Nnyizinku Nwulu wa Pinkuuni.

Mbwana Nnyizinku onteela omwinkha
 ofwalume wa papaawe Daawuuda.

³³ Na onteela wiiya mfwalume wa Ezirayeele khwa mileele,
 ofwalume awe khunteela wiisha."

³⁴ Aphano Mariyamu khuuzela nlayikha yoori: "Zinttela orettikhana toovi
na miiyo akininjuwa nlume?"

³⁵ Nlayikha khujipu liraka: "Rooho Ttakathhiifu ontta owiishukhela,
owahi wa Nnyizinku Nwulu wa Pinkuuni onttela wuufinikha na mwiivuuli
awe. Ti eto Mwaana onttelaaye ompattha, onteela wiitthiwa Ttakathhiifu,
Mwaana wa Nnyizinku. ³⁶ Omoone jamaayo Elizabeeti, otule yaari ori-
wakaaye khanvokola, ila apha na wuuluvala wawe nasaapi eti eemitta opu
mweezi wasiitha. ³⁷ Maana, mmakhono wa Nnyizinku khaiivo ethu moote
ehinwaheyaaye."

³⁸ Mariyamu khuri: "Kiri raati miiyo karumeya wa Mbwana; mattakhuzi
apa onlupaaye phi arettikhane khwa miiyo." Nlayikha nthile khulaavo
khulawa.

Mariyamu oninthotola Elizabeeti

³⁹ Ziviriyeovo siikhu, Mariyamu khujilokothela khusala alawa na
waakuva sitati moote yaari nti wa nnyaako za Yudeya. ⁴⁰ N'oofiya
khuvira nnyupa owawe Zakariiya khunchelisa Elizabeeti. ⁴¹ Ye n'oosiila
mwacheliwa etile ya Mariyamu, mwaana aari mwiirukulu mwawe
khujisakhinya. Elizabeeti khwiya wa wiitaazaniwa Rooho Ttakathhiifu.
⁴² Khukhuwa na kuvu araka:

* ^{1:22} Maana a wahayi othoonyeziwa wa manapiyu nkathi wa mattakhuzi, ti Nnyizinku.

“Wooparikhiyiwa ti weyo Mariyamu
vakatthi wa aakha,
na wooparikhiyiwa mwaana oto
ariiye mwiirukulu mwawo!

⁴³ Miiyo ki paani wooteela wooniwa ti maama wa Mbwanaaka? ⁴⁴ N'ooсиila mwacheliwa yawo, mwaana ariiye mwiirukulu mwaka eetta ojisakhinya wafurahavo. ⁴⁵ Wooparikhiyiwa ti weyo okhupaliyeeyo yoori anteela oret-tikhana mattakhuzi apa wuuziweeyo a phantte ya Mbwana.”

Oshukhuru wa Mariyamu

⁴⁶ Aphano Mariyamu khuri:

“Nafusi yaka enlaleya owula
wa Mbwana,

⁴⁷ Rooho yaka ti yomfurahela
Nnyizinku namusurusu aka,

⁴⁸ mwaasa yoori Yeakuupuwela
miiyo karumeyaawe woohiitaali mmaasho.

Waaza attaapha, peewu za athtu ooshi
zinttelaa okiitha yoori muukha wooparikhiyiwa,

⁴⁹ mwaasa yoori Nnyizinku Woowahi
arettu vitthu khuluzeene muuhaayi mwaka;
nzina lawe ttakatthiifu.

⁵⁰ Ye oniwaahurumiya atthu a peewu zooshi apale animoovaaye.

⁵¹ Aretta vitthu khuluzeene na makhono awe,
kuhuwaamwaza apale oojikhupali khwa shawuri za nroho mwaya.

⁵² Aawaalaza afwalume ohaakhimu aya
kuhuwaalansa atthu apale oojipushuwisa.

⁵³ Aweetaaza vitthu apale ariina jala, na
kuweekara mathaaajiri makhonoru.

⁵⁴ Amwaawuni karumeyaawe Ezirayeele,
oopuwelaka huruma aarinaaye

⁵⁵ na Eburahiima na peewu yawe khwa mileele,
nkhamma ethiipo aawooziyeego amarehemu apapazeththu.”

⁵⁶ Mariyamu eekhaliye nyeezi mittatthu wa Elizabeeti nawiisha khurutela
owawe

Ovokoliwa wa Yaahaya Namoosa

⁵⁷ Khufiya wakathi wa Elizabeeti opattha ekumi, khunvokola mwaana wanlume. ⁵⁸ Anamwaattamanani awe na ajamaaze khusiila elupiwaka hruma khuluyeene Mbwana amooneliyeeyo Elizabeeti, khulawa khufurahi vamote na-ye.

⁵⁹ Efiiyeevo siikhu yanaane, mwaana otule khulawa khukhiriysiwa khusala atakha otthajiwa nzina la papaaawe Zakariiya. ⁶⁰ Ila mamaawee khujipu araka: “Ii wala! Nzina lawe linnitela wiiya Yaahaya.”

⁶¹ Yo khulupa yoori: “Weeyo khuna jamaayo ariina nzina laya nttho!”

⁶² Aphano khwinkhiwa alama papaaawe yoori lijuwiwe nzina aari otakhaaye ontthaja mwaana otule. ⁶³ Zakariiya khuveka lipawu ntitthiiru, khwaatikhavo yoori: “Nzina lawe ti Yaahaya.” Atthu ooshi khushanka. ⁶⁴ Nasaapiru Zakariiya milomo zawe khufunuwa na nlimi lawe khushashuwa, khwaaza ottakhula ansifwaka Nnyizinku.

65 Anamwaattamanani awe ooshi khwiya awoova, hapari epile khumwazeyela nti wooshi wa nnyaako wa Yudeya. ⁶⁶ Atthu ooshi aasiiliyeeyo khusala oopuwela oozelanaka yoori: "Mwaana aya otu ontella wiya paani?" Nkhono wa Mbwana ori vamote na-ye.

Liipo la Zakariya

67 Zakariiya paapa wa mwaana otule, khumwiitaala Rooho Ttakatthiifu khwaaza olaleya mattakhuzi a Nnyizinku araka:

68 "Asifwiwe Mbwana Nnyizinku,
 Nluku wa Ezirayele,
ateeliyeeyo owaawuni
 na owaataphula atthu awe.

69 Nnyizinku aninkha
 nusura yookhomaala
khwa ojama wa karumeyaawe mfwalume Daawuuda,
70 nkhamma aalupiyeeko rakuzeene
 khwa manapiyu awe oottakatthiifu.

71 Ye aanaahitiye onuusuru
 nkathhi wa maatuwi eththu,
anitaphulaka mmakhono wa apale
 aniiphiriwaaye ti fweyo,

72 awaathoonyezaka huruma amarehemu apapazeththu,
 na oopuwelaka wahati woottakatthiifu aarettiyeeyo na-yo.

73 Na olapha aalaphisiyeeyo
 na marehemu papeethu Eburahiima,

74 alaphaka yoori aari oteela
 onopola mmakhono wa maatuwi eththu,
yoori ninrumeyele Ye woohoovi,

75 woottakatthiupo na washariyavo omaasho wawe
 siikhu zooshi zoohaayi eththu.

76 Weeyo mwanaka onteela wiithiwa oriwa napiyu wa Nnyizinku Nwulu
 wa Pinkuuni,
onttela wiya namalokozisiwa wa Mbwana

yoori omwaattalele tarikhi zawe,

77 owaalaleyelaka atthu awe
 nusura entaaye khwa nswammaha
wa twampi zaya,

78 maana Nnyizinku etthu ti wa huruma.

 Ontela othoonyeza nuuru yawe vakathi vetthu,

79 ewaamwasikhele apale
 ari n'yiiza na vamwiivuuli woofwa,
 yoori eneettettise ntarikhi ya heeri."

80 Mwaana otule khuvira awulaka na rooho yawe khusala ekhomaala,
khwiikhala makuluttu mpakha siikhu apuweleliyeeyo vakathi wa atthu a
Ezirayele.

Ovokoliwa wa Yinsa

1 Wakathi aya opo Seezari Akuushitu mfwalume nwulu, aarumiye yoori
atthu ooshi apale a nkathhi woofwalume wa Rooma aarina yoolawa

waatikhiwa nwarakha ya afwalume. ² Waatikhiwa opo wamwanzo waaret-tikhaniye Kureeniyo ari mfwalume wa Siiriya. ³ Wakhula ntthu khusala alawa nti aavokoliweewo olawa waatikhiwa.

⁴ Yuusufu na-ye khulankha Kalileya sitati ya Nazareeti, khusala alawa Yudeya sitati ya Belemu ottuukho aavokoliweewo wa mfwalume Daawuada. Ye eetteliye waatikhiwa maana aari woojama wa Daawuada.

⁵ Aalawiye na mposaawe Mariyamu ari wa wiimitta.

⁶ Siikhu zaya epo ari Belemu ottuukhule, Mariyamu khumfiyela siikhu zoopattha ekumi. ⁷ Khumpattha mwaana w'oomwanzo awe wanlume, khumputaputela vakuwo, khuntattikhela nkashothi zaari ojaamo nyama, mwaasa yoori khaarina puuro yoomaka.

Malayikha na Amakhampuzi

⁸ Nti otthuupule aariwo amakhampuzi aari wiikhalaaye ntthuttu ashuk-isaka pwittipwitthi zaya na weekesela osikhu wooshi. ⁹ Nlayikha la Mbwana khwiishukhela attaphale aariivo amakhampuzi apale. Nuuru ya Mbwana khuwaamwasikhela, khwiyya awoova channu. ¹⁰ Ila nlayikha ntthile khwooza yoori: "Mwihoove! Miyo kateela owuuzani hapari zooshapweya za furaha khuluyeene, enttelaaaye wiiya ya atthu ooshi. ¹¹ Leelo ethiiti, sitati ya Daawuada mwavokoleliwa Namuusuru eeyiye Al-Masiihu, Mb-wana. ¹² Alama yenu ti eto: mwininsikana mwaana aputaputeliwe vakuwo, attattikheliwe nkashothi enjakaamo nyama."

¹³ Nasaapiru khupuwa malayikha a waatta, khuphakanyeya na ntthile lamwanzo, khusala ansifu Nnyizinku araka:

¹⁴ "Asifwiwe Nnyizinku otulu,
na vathi apha heeri yiye
vamote na atthu ooshi awaatakheliyeeyo osaana."

¹⁵ Wakathi malayikha apale aruteliyeovo pinkuuni, amakhampuzi khu-uzana yoori: "Nlaweni Bélemu noone ethù eretikhaniyeewo, etile Mb-wana anuuziyeeyo."

¹⁶ Yo khuhirupazi, khulawa khunsikana Mariyamu na Yuusufu na mwaana otule attattikheliwe nkashothi zinjakaamo nyama. ¹⁷ N'oomoona mwaana otule, yo khusala alupa epile ooziweezo ti nlayikha monkoni wa Ye. ¹⁸ Ooshi apale aasiiliyeeyo hapari aari olupaaye amakhampuzi apale, khwiyya ooshanka. ¹⁹ Ila Mariyamu aatthiiye varoho vawe vitthu epile aari osiilaazo, khusala apheleleza maana aya. ²⁰ Paata ya toole, amakhampuzi apale khurutela ntthuttu antithimisaka Nnyizinku na ansifwaka khwa zooshi aasiiliyeezo na ooniiyeezo, ethiipiile nlayikha laawooziyeezo.

Okhiriya wa Yinsa

²¹ N'oofiya siikhu naane, mwaana otule khukhiriyisiwa, khutthajiwa nzina la Yinsa, ntthinthile aalupiyeeyo nlayikha ahineemithiwe.

Othoonyeziwa wa Yinsa Nnyupa wa Nnyizinku

²² N'oovira siikhu zoot wahareshiwa Mariyamu na Yuusufu, nkhama ethipo zaari olupaazo kano za napiyu Munsa, khunthuula mwaana otule khun-lawana Yeruzaleemu yoori enkheleliwe mmakhono wa Mbwana ²³ maana yaatikhiwa nkano wa Mbwana yoori: "Mwaana wamwanzo wanlume ona yoophakuliwa khwinkhiwa Mbwana." ²⁴ Yuusufu na Mariyamu khwinkha twaha nkhama ethiipo zinrumaazo kano za Mbwana: "makhoko mawiri ama jiwa piiri."

²⁵ Wakathi aya opo Yeruzaleemu aariwo mwinyi mmote aari wiitthiwaaye Simiyooni, aari wa shariya na woomoova Nnyizinku. Ye aari owejela wuusurwiwa wa atthu a Ezirayeele. Rooho Ttakatthiifu yaari vamote na-ye ²⁶ na khunthoonyeza yoori khaari ofwa ahimooneeni Al-Masiihu wa Mbwana. ²⁷ Simiyooni khweetta Nnyupa wa Nnyizinku alokoziwe ti Rooho Ttakatthiifu, wakathi apapaze antaniyeevo Yinsa yoori aretteliwe etile yaalupiweeyo nkano, ²⁸ Simiyooni khunthuula mwaana otule mmakhono mwawe khunshukhurwela Nnyizinku araka:

²⁹ “Mbwanaaka, aphano kimfwa na heeri
maana yarettikhana etile waahitiyeyo.

³⁰ Konna nusura yawo

³¹ owaattaleleliyeyo atthu ooshi.

³² Ye nuuru yoomwaasikhela khapila zooshi za amalapo*
na siifwa ya atthu awe a Ezirayeele.”

³³ Papaawe na mamaawe khwiya ooshanka mwaasa wa mattakhuzi apale aari onlupezaaye Simiyooni mwaana otule. ³⁴ Simiyooni kхуwaaparikhya, khumuuzu Mariyamu maama wa mwaana yoori: “Mwaana otu Nnyizinku anthawula yoori atthu awaatta a Ezirayeele ajikwise ama awoosuru. Ye alama ya Nnyizinku ila atthu a waatta anlawa ankathale. ³⁵ Mwaasa wa ethiito, wuupuwela wa nroho wa atthu a waatta onteela osarعوا; weeyi Mariyamu enteela wuupattha huzuni khuluyeene nkhamma phanka yoonoliwa yoori eshije nafusi yawo.”

³⁶ Attaaphale aarivo sharifwa mmote aari wiitthiwaaye Aana. Aari mwaana wa Fwanuweele wa lihimo la Asheeri, aari wa wuuluvala. Eekhalaaniye mannawe nyaakha sapa, ³⁷ paata yomfwela mannawe, khuhiraliwi mpakha opattha nyaakha thamaaniini na mine. Khaari olaamo Nnyupa wa Nnyizinku nthana na osikhu, khaazi yawe yaari omwaaputu Nnyizinku ofuka na olompa. ³⁸ Wakathi otthuupo khwaaza onshukhurwela Nnyizinku attakhulaka monkoni wa mwaana otule, awoozaka atthu ooshi apale aari owejelaaye woohkowa wa Yeruzaleemu.

³⁹ Yuusufu na Mariyamu nawiisha oreitta zooshi epile zaari orumaazo kano ya Mbwana, khurutela Kalileya sitati ya Nazareeti owaya. ⁴⁰ Mwaana khusala awula saaneene na khwiya njuwi nwulweene, rehema ya Nnyizinku yaari vamote na-ye.

Yinsa Nnyupa wa Nnyizinku

⁴¹ Wakhula mwaakha Mariyamu na Yuusufu aari weettaka Yeruzaleemu onjampo la Paashikowa. ⁴² Wakathi Yinsa apatthiyeevo nyaakha khumi na miwiri, Mariyamu na Yuusufu khulankha khusala alawa onjampo la Paashikowa nkhamma ethhiipile aazowereliyeezo, alawaka anthuuliye Yinsa. ⁴³ N'oofiya khuretta njampo ntthile khwiisha, khusala arutela owaya. Yinsa khusala Yeruzaleemu, mamaawe na papaawe woohijuwi. ⁴⁴ Yo aari woona yoori ori khuntti etile yaari orutelaaye ont, khuvira siikhu ntero eettaka weettetta, aphano khwaaza omweekesa awozelaka ajamaaze na ashirikhaawe. ⁴⁵ Khuhisala ampattha, khurutela Yeruzaleemu olawa omweekesa. ⁴⁶ Eviriyeovo siikhu ttatthu, khunsikana ari Nnyupa wa Nnyizinku eekhaliye na anamasomisa awulu a tiini eettaka onsiila na omuuuzela. ⁴⁷ Ooshi apale aari onsiilaaye khunshankela mwaasa woojuwa wawe na

* ^{2:32} Amalapo maana aya atthu ooshi apale oohiiyi mayaahuuti.

nanna aari owaajipwaazo. ⁴⁸ Aphano apapaze n'oomoona khushanka, mamaawe khumuuzela araka: "Mwanaka! Niini epi oniretteliyeozo? Miyo na papaawo naari wa wantipweya naaza raku oweekesa."

⁴⁹ Ye khujipu yoori: "Mwaari okekesela-ni? Khamwaari ojuwa yoori miyo kaarina ya wiiya Nnyupa wa Paapa?" ⁵⁰ Yo khuhiveeleyi ethu aari oluaaye.

⁵¹ Yinsa khurutela nti wa Nazareeti na papaawe na mamaawe khusala awaashututela. Mamaawe aari oretta athokorelaka vitthu epile zooshi nroho mwawe. ⁵² Yinsa khusala avira awulaka nkathhi wa ojuwa, hirimu na nrehemaya Nnyizinku na atthu.

3

Otafusiri wa Yaahaya Namoosa

¹ Mwaakha wakhuumi na thaanu Seezari Tibeeriyu ari mfwalume nwulu wa Rooma, Pontiyu Pilaatu ari liwaali wa Yudeya. Herooti ari nsatoro wa Kalileya na twiye Filiipe na-ye ari wa Itureeya na Tarakhoniiti, Lusaaniya ari nsatoro wa Abileeni. ² Anaasi na Khayiifwa aari mahaakhimu awulu a tiini. Mwaakha aya pi otthuupo enkhiveeyo mattakhuzi a Nnyizinku Yaahaya mwaana wa Zakariya makuluttu. ³ Ye khuzukulela miti zooshi zattameliyeoyo muuttho Yorotaani, awoozaka atthu yoori athupwiye twampi zaya aswaamihewe ti Nnyizinku na oosiwe. ⁴ Nkhama ethiipo zaatikhiweezo nkithaapu ya napiyu Ezayiyya:

"Owaapho ntthu ankuwaaye n'yaara araka:

'Mwaattalele tarikhi ya Mbwana,
na mwishapweyise mphiitelo zaya.'

⁵ Makunte ooshi asireliwe,
nyaako na kulu zooshi zipwejiwe,
tarikhi zoonyokowa zookoleliwe,
epile zoothipeya zishotheliwe.

⁶ Atthu ooshi anteela woona
nusura ya Nnyizinku.'

⁷ Yaahaya khusala awooza atthu apale aari otaaye woosiwa araka: "Khapila za nyookha! Paani awuuzyienini otthira hukhumu ya Nnyizinku entaaye? ⁸ Mwirette vitthu enthoonyezaaye yoori khweele mwathupwiya, khahiyoojilupeza yoori 'Eburahiima ti papeetthu'. Miyo kinuwuzani yoori khwa liwe ntthi Nnyizinku onwahi owaattala aana a Eburahiima. ⁹ Nshokha latthiiwa nshini wa mitathaari za miitthi, wakhula muutthi ohiniimaaye mishumo zooshapweya ontta oshijiwa weeseleliwe vamootho."

¹⁰ Atthu khusala amuuzela araka: "Apho nirette niini?"

¹¹ Ye khuwaajipu yoori: "Otule ariina hempe piiri, moote amwinkhe otule ahina. Otule ariina ethu-yoojiwa awaameele apale ahina."

¹² Khulankha anamariphisa lumpuru yoori alawe oosiwe khumuuzela Yaahaya yoori: "Mwanliimu, khi fweeyo nirette niini?"

¹³ Ye khuwaajipu araka: "Mwihirophise mwizitisa hisapu mwirumiweeyo."

¹⁴ Anajanka na-yo khumuuzela yoori: "Khi fweeyo niri toovi?" Khuwaajipu yoori: "Mwihiwaanyakanye atthu mwiroromelaka kuvu zenu, wala mwihiwaaalokoveze vitthu zoohiiyi ethiipo, mwishukhurwele ethiito mwimpattaaye."

¹⁵ Nroromelo wa athtu khusala ovira weekezeleyaka oonaka yoori Yaahaya ti Al-Masihiu. ¹⁶ Ye khuwooza ooshi apale aariivo yoori: "Weekhweele miyo kiniwoosanani maati, ila onta nkina ariina owahi wookiziti miyo, wala akinsuhi ofukula mikhoyi za jampala zawe. Ye onteela owoosani na Rooho Ttakathiifu na moottho. ¹⁷ Onaaye fosholo mmakhono mwawewe anttelaaaye ophakulana tiriku na maveya. Athuule tiriku atthe vantthalavae, maveya aya eeselele vamootho ohinzimaaye."

¹⁸ Khwa mattakhuzi makina a waatta, Yaahaya aari owaahirimiza na owaatafusirela athtu hapari zooshapweya. ¹⁹ Na khunshowera nsatoro Herooti mwaasa wonrala Herodiya muukha wa twiye na oretta vitthu zootakhala za waatta. ²⁰ Elottelanaka Herooti khweekezelaa zooshi epile, khuruma ofukeliwa Yaahaya nkalapooso.

Woosiwa wa Yinsa

²¹ Wakathi Yaahaya aari owoosaavo athtu ooshi apale, Yinsa na-ye khuta attaaphale oteela woosiwa. Ye alompaka pinku khufukuwa, ²² Roocho Ttakathiifu khumwiishukhela nkhamma jiwa. Khusiileya huula yoolankha pinkuuni eraka: "Weeyo o mwanaka kinuuphetachaaye na wookituvela channu."

Ntathaari w'oojama wa Yinsa

²³ Yinsa wakathi aaziyeovo olaleya hapari zooshapweya, aarettiye arina nyaakha talaathiini. Ye aari mwaana wa Yuusufu nkhamma ethhiipo athtu aari waakanyaeraazo,

Yuusufu aari mwaana wa Heeli,
²⁴ Heeli aari mwaana wa Mataati,
 Mataati aari mwaana wa Leevi,
 Leevi aari mwaana wa Melikhi,
 Melikhi aari mwaana wa Yanaayi,
 Yanaayi aari mwaana wa Yuusufu.

²⁵ Yuusufu aari mwaana wa Matathiiya,
 Matathiiya aari mwaana wa Amooshi,
 Amooshi aari mwaana wa Nahuumu,
 Nahuumu aari mwaana wa Heshiili,
 Heshiili aari mwaana wa Nakhaayi,

²⁶ Nakhaayi aari mwaana wa Maathi,
 Maathi aari mwaana wa Matathiiya,
 Matathiiya aari mwaana wa Shemeeni,
 Shemeeni aari mwaana wa Yosheekhi,
 Yosheekhi aari mwaana wa Yuuda,

²⁷ Yuuda aari mwaana wa Yohanaani,
 Yohanaani aari mwaana wa Reesa,
 Reesa aari mwaana wa Zorobabeeli,
 Zorobabeeli aari mwaana wa Sheyalitiyeeli,
 Sheyalitiyeeli aari mwaana wa Neeri,

²⁸ Neeri aari mwaana wa Meelikhi,
 Meelikhi aari mwaana wa Aadi,
 Aadi aari mwaana wa Kosaamu,
 Kosaamu aari mwaana wa Elimadaamu,
 Elimadaamu aari mwaana wa Eeri,

²⁹ Eeri aari mwaana wa Yoshuwa,
 Yoshuwa aari mwaana wa Eliyezeeri,

- Eliyezeeri aari mwaana wa Yoriimu,
 Yoriimu aari mwaana wa Mathaati,
 Mathaati aari mwaana wa Leevi,
 30 Leevi aari mwaana wa Simiyooni,
 Simiyooni aari mwaana wa Yuuda,
 Yuuda aari mwaana wa Yuusufu,
 Yuusufu aari mwaana wa Yonaamu,
 Yonaamu aari mwaana wa Eliyakhiimu,
 31 Eliyakhiimu aari mwaana wa Meleeya,
 Meleeya aari mwaana wa Meena,
 Meena aari mwaana wa Matatha,
 Matatha aari mwaana wa Nathaani,
 Nathaani aari mwaana wa Daawuada,
 32 Daawuada aari mwaana wa Yeese,
 Yeese aari mwaana wa Obeedi,
 Obeedi aari mwaana wa Bowaazi,
 Bowaazi aari mwaana wa Salimooni,
 Salimooni aari mwaana wa Nashooni,
 33 Nashooni aari mwaana wa Aminadabu,
 Aminadabu aari mwaana wa Adimiini,
 Adimiini aari mwaana wa Ariini,
 Ariini aari mwaana wa Hesherooni,
 Hesherooni aari mwaana wa Pereezi,
 Pereezi aari mwaana wa Yuuda,
 34 Yuuda aari mwaana wa Yaakhumpa,
 Yaakhumpa aari mwaana wa Esiyaakha,
 Esiyaakha aari mwaana wa Eburahiima,
 Eburahiima aari mwaana wa Teera,
 Teera aari mwaana wa Nahoori.
 35 Nahoori aari mwaana wa Serukhi,
 Serukhi aari mwaana wa Reewu,
 Reewu aari mwaana wa Peleekhi,
 Peleekhi aari mwaana wa Ebeeri,
 Ebeeri aari mwaana wa Saala,
 36 Saala aari mwaana wa Kayinaamu,
 Kayinaamu aari mwaana wa Arifwakisaati,
 Arifwakisaati aari mwaana wa Sheemu,
 Sheemu aari mwaana wa Nuuhi,
 Nuuhi aari mwaana wa Lameekhi,
 37 Lameekhi aari mwaana wa Methusaleemu,
 Methusaleemu aari mwaana wa Henookhi,
 Henookhi aari mwaana wa Yareeti,
 Yareeti aari mwaana wa Mahalaleeli,
 Mahalaleeli aari mwaana wa Kayinaamu.
 38 Kayinaamu aari mwaana wa Enooshi,
 Enooshi aari mwaana wa Seethi,
 Seethi aari mwaana wa Adamu,
 Adamu wa Nnyizinku.

4

Ozayiniwa wa Yinsa ti Sheethwani

¹ Yinsa aarutiye omuttho Yorotaani ari wa wiitaala Rooho Ttakathiifu, aalokoziwe ti Rooho Ttakathiifu ethiito mpakha makuluttu. ² Nttumpho

khuzayiniwa ti Sheethwani siikhu arupayiini. Siikhu zaya epile khaari oja ettu, nawiisha khunkhola jala.

³ Sheethwani khumuuzu yoori: “Nkhama o mwaana wa Nnyizinku orume liwe ntto lithatuwe liiye phaawu.”

⁴ Ila Yinsa khunjipu araka: “Yaatikiwa nkithaapu yoori: ‘Khahiyoo phaawu paasi enimwinkhaaye ohaayi pinaatamu’.”

⁵ Sheethwani khunweza vatulu, nasaapiru khunnoza ofwalume wooshi w'oolumwenku. ⁶ Khumuuzu yoori: “Kintta owinkha ofwalume na siifwa z'oolumwenku opu wooshi, mwaasa yoori zooshi kenkhiwa miiyo, na miyoo kinimwinkha otule kinintakhelaaye. ⁷ Amana okokhorela miiyo na khukaaputu, zooshi zintta wiiya zaawo.”

⁸ Yinsa khunjipu yoori: “Nttakhuzi la Nnyizinku lalupa yoori: ‘Omwaapu Mbwanaawo Nnyizinku na onrumeyele othuuto paasi.’”

⁹ Aphano Sheethwani khunlawana Yeruzaleemu khunweza vatulu woolepavo wa Nyuupa ya Nnyizinku khumuuzu yoori: “Nkhama o mwaana wa Nnyizinku ojeeselele vathi aphale, ¹⁰ maana yaatikiwa nkithaapu yoori:

‘Ye onta oruma malayikha awe awiinanele.

¹¹ Atthaapo antta wuukholelala na makhono aya yoori ohikwakwanttuwe valiwe.’”

¹² Yinsa khunjipu yoori: “Nttakhuzi la Nnyizinku lalupa yoori: ‘Ohimweeze Mbwana Nnyizinku awo.’”

¹³ Sheethwani nawiisha onzayini wooshi, khumwaattuwa khusala awejela wakathi wonkhwelyela.

Yinsa onaaza khaazi yawe nti wa Kalileya

¹⁴ Aphano Yinsa khurutela Kalileya, owahi wa Rooho Ttakatthiifu ori vamote na-ye. Hapari zaari olupaaye monkoni wa ye khumwazeyela miti zooshi za nkerekhere. ¹⁵ Aari osomisa mmanyupa woosifwiwamo Nnyizinku, atthu ooshi khusala anttottopela.

¹⁶ Khulawa mpakha sitati ya Nazareti ohali aleliweewo. Siikhu ya saapatu khweetta nnyupa woosifwiwamo Nnyizinku nkhamma ethiipo aa-zowereliyeeko. Khulankha yoori asome. ¹⁷ Khwinkhiwa kithaapu ya napiyu Ezaaya. Khufunula khusala athola khusikana vahali yaatikiweeve yoori:

¹⁸ “Rooho ya Mbwana
eri vamote na-miyo,
akithawaza yoori kiwaatafusirele
hapari zooshapweya asikhini
na olaleya otaphuliwa wa anamahuzunikha,
owoonisa apale oochooni,
owaavumulisa apale oohukhumwiwa,
¹⁹ na olaleya yoori wafiya
mwaakha wa rehema ya Mbwana.”

²⁰ Yinsa khufinikha kithaapu etile khumwinkha karumeya wa nnyupa woosifwiwamo Nnyizinku, Ye khwiikhala. Atthu ooshi apale aariimo khusala amweekesa. ²¹ Ye khuwooza yoori: “Leelo zarettikhana epile zaatikiweeyo, ethiipo mwinttaahey wiisharu osiila.”

²² Atthu ooshi khusala anttottopela, na khwiya ootikinisiwa mwaasa wa mattakhuzi a rehema aari olankhaaye nkhanyo mwawe, khusala oozelana yoori: "Khahi mwaana wa Yuusufu otu?"

²³ Yinsa khuwooza yoori: "Khweele khweele mweeyo mwinalawa mwakuuze kittaphi mmote enraaye toono: 'Tothoro ojivonise omweenyewe! Orette mmuti mwawo mphu minjuza nisiiliyeeyo epile orettiyeego Kafwaranawu.'"

²⁴ Khulupa theenya yoori: "Wookhwhee kiniuuuzani yoori khaavo napiyu mmote ankhupaliwaaye mmuti mwawe. ²⁵ Na weekhwele wakathi wa napiyu Aliyaasi, Ezirayeele aariwo aakha oofweliwa pi amanna zaya wakathi yaafukiweevo pinku nyaakha mittatthu na nyeezi sitha, yaapuwiye jala miti zooshi. ²⁶ Ila Nnyizinku khuhinrumi Aliyaasi Ezirayeele, okhule aari wiikhalaawo apale aya, khunruma Sarefathi tuniya ya Sitooti aariwo muukha mmote woofweliwa ti mannawe. ²⁷ Siikhu za napiyu Elizeewu, Ezirayeele aariwo anamakuttula a waatta, khuhiiivo hatha mmote aavonisiweeyo ila Naamani wa nti wa Siiriya ti ye aavonisiweeyo otthwe."

²⁸ Atthu ooshi aari nnyupa woosifwiwamo Nnyizinku, n'oo siila mat-takhuzi apale aari olupaaye Yinsa yo khwiiphiiriwa. ²⁹ Khwiikariwamo nsitati mphule khulawaniwa vamwaako yaajekiweevo sitati yaya etile, yoori ansukhumele vathi. ³⁰ Ila Yinsa khuvira vakatthi vaya khusala alawa.

Yinsa onimwiikara sheethwani

³¹ Paata ya toole Yinsa khwiishukhela sitati ya Kafwaranawu, nti wa Kalileya, khusala awaanozela siikhu ya saapatu. ³² Yo aari ooshankisiwa na onozela wawe, mwaasa yoori nttakhuzi lawe laarina ofwalume.

³³ Nnyupa woosifwiwamo Nnyizinku aarimo nthu mmote aariina sheethwani. Aphano sheethwani khunyakula na kuvu zawe zooshi araka: ³⁴ "Eeee! Onnitakhela-ni weeyo Yinsa wa Nazareeti? Wateela onankameza? Miyo kinuujuwa weeyo yoori o Ttakatthiifu wa Nnyizinku!"

³⁵ Yinsa ansukisiye sheethwani araka: "Nyamala, mwaattuwe nthu oto!" Attaaphale sheethwani khunkwisesla vathi nthu otule atthu eettaka omoona, khuhinvulalisi khumwaattuwa.

³⁶ Atthu ooshi aari ooshankisiwa, khusala oozana atthaaporu: "Nttakhuzi-ni ntthi? Khwa ofwalume na owahi wawe otu onruma masheethwani khusaruwa!" ³⁷ Aphano siifwa ya Yinsa yaamwazeyeliye miti zooshi za nkerekhere.

Yinsa ona owahi vatulu wa masheethwani na marati

³⁸ Yinsa khusaruwamo nnyupa woosifwiwamo Nnyizinku khweetta owawe Simawu. Nkhwewe Simawu aari nlwele hooma, yo khunvekelaza Yinsa yoori anvonise. ³⁹ Ye khwiinama khwiikara hooma etile khunlikha, nasaapiru nunu otule khulankha khusala awaarumeyela.

⁴⁰ Njuwa litupweelaka* atthu ooshi apale aariina marati khusala atiseliwa Yinsa, Ye n'oowaattheela makhono n'oowaavonisa. ⁴¹ Theenya aarivo atthu a waatta aari owaasaruwaaye masheethwani anyakulaka araka: "Weeyo o mwaana wa Nnyizinku!" Yinsa khusala amaruwa alkhisaka masheethwani apale ottakhula, maana yo aari ojuwa yoori ye ti Al-Masihu.

Yinsa onlaleya hapari zooshapweya

* **4:40** Otupweela wa njuwa siikhu ya saapatu mayaahuuti aariwoona yoori siikhu ttakatthiifu yavira.

⁴² N'oocha Yinsa khulankha khusala alawa mmakuluttu. Atthu a waatta khusala amweekesa, n'onsikana khuhisala atakha onlikha olawa. ⁴³ Ye khuwooza yoori: "Enhithajiya theenya miiyo olawa sitati kiina olaleya hapari zoofwolume wa Nnyizinku, kaperekheliwa ethhiipo." ⁴⁴ Ye aari otafusiri mmmanyupa woosifwiwamo Nnyizinku a Yudeya.

5

Yinsa oniwaakkhuwela anakhiyoni awe a mwanzo.

¹ Siikhu moote, Yinsa aari nshini wa ntthatta la Kalileya, khuzukuleliwa pi atthu a waatta yoori asiile ntakhuzi la Nnyizinku. ² Ye khoona nyaatiya miwiri ziri vapatari wa ntthatta ntintthile, zaalikhieevo pi anamajiya aari woosaaye matthavi aya. ³ Yinsa khupakhira mmwaatiya mmote waari wa Simawu khunvekela yoori asusisele mpahari, khwiikkala khusala awaanozela atthu.

⁴ Nawiisha onozela khumuuzu Simawu yoori: "Othuule mwaatiya awo mwilawe vahali wa wiichavo mwajysi."

⁵ Simawu ajipwaka khuri: "Mbwana, naijiya osikhu na osikhu khuhipaththi etthu, wiiya walupa yoori neese, nintta weesa."

⁶ Yo khulawa khweesa matthavi aya khuula swi za waatta mpakha khusala avaruwa matthavi aya. ⁷ Khuwaakkhuwela ashirikhaaya aari mwaatiya nkina yoori ate arinkaanye, khwiitaaza nyaatiya zaya zoomiwiri mpakha osaleela ozama.

⁸ Simawu Peeturu nawoona eththu etile yaarettikhaniyeeyo, khunkokhorela Yinsa amuuzaaka yoori: "Mbwana, okisuse maana miiyo ki natwampi." ⁹ Simawu na ashirikhaawee khuzinkuwa mwaasa wa swi epile za waatta apatthiyeezo. ¹⁰ Yaakhumpa na Yaahaya, aana a Zebedayo, ashirikha a Simawu aari ojiyanaaye khwiya ootikinisiwa.

Aphano Yinsa khumuuzu Simawu yoori: "Ohoove, waaza nasaapi eti onttela wiiya namajiya wa atthu." ¹¹ Khuwelelisa nyaatiya zaya nkulu, khulikha vitthu zaya zooshi khusala anlotta Yinsa.

Yinsa oninvonisa namakuttula

¹² Yinsa ari sitati moote, khuvira mwinyi mmote aariina makuttula. N'oomoona Yinsa khukokhora khusijiti khumuuzu araka: "Kinuuvekela yoori nkhamma watakha Mbwanaaka, kivonise."

¹³ Ye khookola nkhone awe khunsapa khumuuzu yoori: "Katakha vona!" Wakathi otthuupule khweele khuvona.

¹⁴ Yinsa khumuuzu yoori: "Vithu epi ohimuuze hatha ntthu, ila olawe wajithoonyeze wa haakhimu wa tiini, othuuto oorettele twaha yoovonisiwa wawo nkhamma ethhiipile alupiyeezo napiyu Munsa, yoori wiiye oshaahiti vakatthi wa atthu aya apale."

¹⁵ Aphano hapari zawe zaari ovira zimwazeyaka. Atthu a waatta khusala ata oteela osiila hapari, na oteela ovonisiwa marati aya. ¹⁶ Yinsa aari olaakavo n'oolawa makuluttu olompa.

Ovonisiwa wa mwinyi woorakala

¹⁷ Siikhu moote Yinsa eetta onozela, apho vaya aari onozelaavo aarivo mafwarizeewu na anamanozela a kano aalankhiyeeyo miti mikina za Kalileya na Yudeya mpakha Yeruzaleemu. Owahi wa Mbwana waari vamote na-ye woowaavonisa alwele. ¹⁸ Aphano atthu akina khuntana mwinyi aariina supiyaani anttattikheliye vanrepa, yo aari otakha omphenyisa ampwehe omaasho wa Yinsa. ¹⁹ Ila nawoona yoori khayiivo kiphenyiso

mwaasa wa atthu waatta, khuwela vatulu wa nyuupa khutamula liphala khumwiishushela vakatthi wa atthu omaasho wa Yinsa.

²⁰ Ye nawoona amini aariina atthu apale, khumuza nasupiyaani otule yoori: "Swaahipu twampi zawo zaswaamiihiwa."

²¹ Aphano mafwarizeewu na anamanozela a kano khusala attettha araka: "Otu aya paani ankufurwaaye? Ti paani anwahaaye oswaamiihi twampi woohiiyi Nnyizinku?"

²² Yinsa khujuwa ethu aari ofikhiraaye, khuwoozela yoori: "Mwashukulikhela-ni nroho mwenu? ²³ Yookhweya ti tiivi omuuza yoori twampi zawo za swaamiihiha ama yoori olankhe weettette? ²⁴ Apho mwijewe yoori Mwaana wa Pinaatamu onaaye owahi wooswaamiihi twampi vathi apha." Khumuza nasupiyaani otule yoori: "Olankhe othuule nrepa lawo olawe owawo." ²⁵ Nasaapiru ntthu otule khulankha vakatthi wa atthu khuthuula nrepa lawe ntthile aattattikheliweeve khusala alawa owawe ansifwaka Nnyizinku. ²⁶ Atthu ooshi aariivo khwiya ooshanka na woova channu, khusala ansifu Nnyizinku araka: "Leelo noona vitthu zootikinisa."

*Okhuweliwa wa Leevi**

²⁷ Paata yawiisha vitthu epile, Yinsa khulankha khusala alawa, khunsikana mwinyi mmote aari oriphisaaye lumpuru aari wiithiwaaye Leevi eekhaliye vahali aari oriphisaavo malumpuru awe, khumuza yoori: "Ok-ilote." ²⁸ Ye khulikha khaazi zawe zooshi khusala anlotta.

²⁹ Leevi khuretta njampo liwululene owawe vamote na Yinsa, aarivo theenya anamariphisa lumpuru akinoko aya na atthu akina eekhaliye vamote na-ye. ³⁰ Mafwarizeewu na anamanozela a kano khusala a waattakhula anakhiyoni a Yinsa araka: "Mwaasa aya niini mweeyo mwijanaka na mwinywanaka anamariphisa malumpuru na anatwampi?"

³¹ Yinsa khuwaajipu araka: "Akumi khanlawaniwa wa tothoro ila alwele, ³² miiyo akaawaateeliye anashariya kaawaateeliye anatwampi yoori alikhe oretta twampi."

Monkoni woofuka

³³ Atthu akina khumuza Yinsa yoori: "Anakhiyoni a Yaahaya Namoosa na anakhiyoni a mafwarizeewu amfuka na anlompa, ila awo weeyo khamfuka, antta oja na onywa."

³⁴ Yinsa khuwaajipu yoori: "Enrettikhana toovi owooza anamalaleyiwa harusi ofuka namaposa arivo? ³⁵ Ila onteela ofiya wakathi mposi anttelaaaye olaziwavo vakatthi vaya, wakathi aya opo, anteela ofuka."

³⁶ Elottelanaka Yinsa khulupa nlikaniso mmote araka: "Khaavo anshijaaye patakha ya kuwo pheeya yoori arette yaapa ya kuwo yoovutta, n'ooreetta toowo etile pheeya entta oharipwuya, mwaasa wa patakha etile ya kuwo pheeya ethiweeve oheezani na etile yoovutta. ³⁷ Khaavo anthuulaaye viinyu pheeya ottha ntompwiyo ya shapala ya raku. N'ooreetta toowo entta ophutuwa, viinyu ya yiittikhe ttompwiyo zaya ziharipwuya. ³⁸ Viinyu pheeya entthiwa ntompwiyo pheeya. ³⁹ Khaavo anraaye anywiye viinyu ya raku khutakha onywa viinyu pheeya, maana ontta olupa yoori: 'Poora etile ya raku.'

* ^{5:26} Nzina ntthi la Leevi khwa luuka ya Ekerekulirri Matewuzhu.

6***Yinsa ti mwennyewe saapatu***

¹ Saapatu moote, Yinsa eetta ovira nshini wa nshapa la tiriku. Anakhiyon niwe khusala avurula asusuraka na makhono arafunaka phunjye zaya.
² Mafwarizeewu khusala awoozela yoori: "Mwaasa aya niini mwirettaka vithu ziyyiye mwiikho orettiwa saapatu?"

³ Ye khuwaajipu araka: "Khamwinasome ethu aarettiyeeyo Daawuuda wakathi yankholiyeovo jala na ashirikha awe?" ⁴ Ye avaviriye Nnyupwa Nnyizinku khuthuula phaawu zoohalaalishiwa khurafuna kiina khuwenkha ashirikhaawe, ila alupa aarina ruhusa yoorafuna aari mahaakhimu a tiini paasi." ⁵ Yinsa khulupa araka: "Mwaana wa pinaatamu ti Mbwana mwennyewe saapatu."

Mwinyi woarakala nkhone

⁶ Saapatu kiina, Yinsa khuvira nnyupwa woosifwiwamo Nnyizinku khusala awaanozela, aarimo mwinyi mmote waarakaliyeeyo nkhone nlume.

⁷ Anamanozela a kano na mafwarizeewu eetta omweekesela yoori amoone Yinsa nkhamma aari onvonisa siikhya saapatu, yoori ankwisele paathuli.

⁸ Ila ye aari ojuwa ethu aari wuupuwelaaye atthu apale. Khumuuzwa mwinyi otule woarakala nkhone nlume yoori: "Olankhe ote vakatthi apha." Mwinyi khulankha khweemela.

⁹ Aphano Yinsa khuwoozela yoori: "Ensuhaaye orettiwa saapatu ti tiivi? Yooshapweya ama yootakhala, wuusuru ama wuula?"

¹⁰ Khuweekesa atthu ooshi apale aariivo khumuuzwa mwinyi otule yoori: "Wookole nkhone awo." Ye khookola, khuvona. ¹¹ Anamanozela a kano na mafwarizeewu khwiiphiiriwa khusala awaza ethu yonrettela Yinsa.

Othawuliwa wa anakhiyon kumi na awiri

¹² Siikhya zaya epile Yinsa khulankha khusala alawa omwaako olompa, khwiisha osikhu wooshi eettaka olompa. ¹³ N'oocha khuwaakhuwela anakhiyon awe khuwaathawula khumi na awiri, atthaapo theenya khuwenkha nzina la owaaswihaapa. ¹⁴ Simawu antthajiye nzina la Pheeturu, Antere ttwiye Simawu, Yaakhumpa, Yaahaya, Filiipe, Paturumeeuw. ¹⁵ Mateewuzhu, Tome, Yaakhumpa mwaana wa Alufayo na Simawu aniitthiwaaye Zelooti, ¹⁶ Yuuda mwaana wa Yaakhumpa, na Yuuda Iskariyooti otule aari weettelaaye onkholisa Yinsa.

Onozela na ovonisa wa Yinsa

¹⁷ Yinsa khwiishukha vamwaako na maaswihaapa awe khweemela nshini wa mwaakho vahali aariivo anakhiyon awe na khuntti ya atthu a Yudeya yooshi na a Yeruzaleemu, mpakha apale a miti za waattamela pahari, Tiiro na Sitooni. ¹⁸ Apale aateeliyeeyo osila na ovonisiwa moolwele aya, mpakha na apale aari wantipwiwaaye ti masheethwani aari ovonisiwa.

¹⁹ Atthu ooshi aari otakha onsapa Yinsa mwaasa yoori waari onsarعوا owahli khusala owaavonisa ooshi.

²⁰ Aphano Yinsa khulansa maasho khuweekesa anakhiyon awe khuwooza yoori:

"Ananshapweyiwa ti mweyo mwiiyiye asikhini,
 maana Ofwalume wa Nnyizinku pu weenu.

²¹ Ananshapweyiwa ti mweyo enuukholaanini jala aphano,
 maana mwinlawa mwarupale.
 Ananshapweyiwa ti mweyo mwinlilaaye aphano,

maana mwinteeela otheya.

²² Ananshapweyiwa ti mweyo,
mmana atthu eephiiriwaka ti mweyo, awiikarani, oottukhanani
na khuwoonani ohifwayi mwaasa wonlotta Mwaana wa Pinaatamu.

²³ Wakathi aya otthuupo, mwiiye woofurahi na mwitthape, maana tthuvo
yenu eniiya khuluyeene pinkuuni. Maana wa nanna ethiipi, apapa zaya
na-yo aawaaretteliye manapiyu.

²⁴ Ila olaanikha pu weenu mweeyo mwaamathaajiri,
maana mwapokhera tthuvo yenu vathi attaapha.

²⁵ Olaanikha pu weenu mweeyo ziwiitaaleliyeenini vitthu-zoojiwa,
maana mwinteeela okholiwa ti jala.

Olaanikha pu weenu mweeyo mwiriina furaha eleelo eti,
maana mwinteeela ojikhupanyera na olila.

²⁶ Olaanikha pu weenu mweeyo
mmana mwittottopeliwaka pi atthu ooshi,
maana apapa zaya aawaaretteliye ethiipi manapiyu oojipanka.

²⁷ Nakataalikha mweeyo mwinkisiilaaye, kiniwuuzani yoori
mwiwaaphete maatuwi enu, mwiwaarettele saana apale aniiphiiriwaaye
ti mweyo. ²⁸ Mwiwaaparikhie apale anuulaanaanini na mwiwaalompele
apale anuurettelaanini zootakhala. ²⁹ Nkhama ntthu oopwakula nlaku
limote, na ntthi likina ontheteezele. Nkhama ntthu oovula juupa
yawo, ohinkhattaze othuula hempe yawo. ³⁰ Omwinkhe wakhula otule
anuuvekelaaye, nkhamma ntthu athuula etile yiyyiye yaawo, ohinkhanyarele
wuurutisela. ³¹ Epile mweeyo zinuutvelaanini oretteliwa pi azeenu,
na-mweyo mwiwaarettele azeenu ethiipo.

³² Amana mwiwaaphetaka apale anuuphetaanini paasi, fwayita-ni mwi-
neekeselaaye mmakhono wa Nnyizinku? Hatha anatwampi atthaapo
aniwaapheta apale na-yo aniwaaphetaayo. ³³ Amana mwiwaarettelaka
saana apale na-yo anuurettelaanini saana paasi, fwayita-ni mwinteealaaye
wiyyana? Hatha anatwampi atthaapo na-yo anretta ethiipo. ³⁴ Amana
mwiweepaashaka paasi apale mwinkhupalaaye uuрутiseleni, fwayita-ni
mwinteealaaye wiyyana? Hatha anatwampi atthaapo aniiptaashana aro-
romelaka orutiselan. ³⁵ Mwiwaaphete maatuwi enu, mwiwaarettele
zooshapweya, mwiweepaashe mwiheekeselaka uuрутiseleni. Toowo
tthuvo yenu enttela wiyya khuluyeene na mwinttela wiyya aana a Nnyizinku
Wooziti, maana Nnyizinku oniwaashapweyela rooho hatha na apale ahinin-
shukhurwaaye na alupa ootakhala rooho. ³⁶ Mwiye woohurumiya nkhamma
ethiipi Papeenu wa pinkuuni na-ye eeyiye wa huruma.

³⁷ Mwihimphuke ntthu nzeenu na Nnyizinku khanuuphukani, mwihin-
hukhumi ntthu nzeenu na Nnyizinku khanuuhukhumuni. Mwinswaamihi
ntthu nzeenu na Nnyizinku onitta wuuswaamihini. ³⁸ Mwiwenkhe azeenu
na Nnyizinku onitta owinkhani: na mphimo khwaamili, wookhitteleliwa
na wa wiitaala mpakha wiittikha. Maana mphimo otthuupo mwimphi-
manayee na-mweyo mwinteeela ophimeliwa otthuupo.

³⁹ Yinsa khulupa nlikaniso mmote araka: "Atthu oofoonni khanlokozana,
antta okwiselana nliphotto. ⁴⁰ Nakhiyon khaninziit mwanliimu awe, ila
wakhula otule ansomiseyaaye saana oniiya nkhamma mwanliimu awe.

41 Onri je woona etutu eriiye mmaasho wa nzaawo ohoonaka muutthi opule oriye mmaasho mwawo? **42** Enrettikhana toovi weeyo omuuuzaka nzaawo yoori: ‘Ttwiyyaku, nkankaani kuulaze etutu eto eriiye mmaasho mwawo,’ na khupe’ weeyo ohiwahaka woona muutthi opule oriye mmaasho mwawo? Naafikhi! Olazemo khapula muutthi oriye mmaasho mwawo, toovo ontaa woona saana, na phi onlazaamo etutu eriiye mmaasho wa nzaawo.”

Muutthi na mishumo zaya

43 “Khawiivo muutthi wooshapweya oniimaaye mishumo zootakhala, wala muutthi wootakhala oniimaaye mishumo zooshapweya. **44** Maana wakhula muutthi onjuweya mwaasa wa mishumo zaya; nnyiwa khinshumiwamo mishumo za muuyu, mmuththalala khanshumiwamo wuuba. **45** Ntthu wookemaani, nroho mwawe onsarulamo vitthu zooshapweya, na ntthu wootakhala rooho, nroho mwawe onsarulamo vitthu zootakhala, maana milomo zawe zinttakhula ethiipile ziitaaliyeeyo nroho mwawe.

46 Mwinkihuwelela-ni yoori ‘Mbiana, Mbiana’, mwihirettaka epile kiniwuzaanini? **47** Miyo kinuuthoonyezani ntthu anlikananaaye otule an-siilaaye mattakhuzi aka na khushututela. **48** Onlikanana ntthu ajekaka nyuupa yawe khuthipa khwiichisa saaneene khutha vanchina la mawe woozivalavo. Khuta nnyeri khupiya nyuupa etile ila khuhisakhinyeyi mwaasa woozivalisiwa. **49** Ila otule ansiilaaye mattakhuzi aka khuhishututeli onlikanana ntthu ajekiye nyuupa yawe vanshaka woohizivalivo. Khuta nnyeri khupiya nyuupa etile nasaapiru khukwa, khupwecheya khuhisali hatha ethu.”

7

Amini ya namalokozela wa anajanka

1 Eeshiyeevo mattakhuzi apale aari owoozaaye atthu, khweetta sitate ya Kafaranawu. **2** Ottuukho aariwo namalokozela mmote wa anajanka w'eerooma, aariina karumeyaawe wompheta aari olwaaziwaaye khusala asaleela ofwa. **3** Wakathi namalokozela wa anajanka otule asiiliyeevo monkoni wa Yinsa, khuwaaperekha attunkhulu akina amayaahuuti yoori anvekele Yinsa ate anvonise. **4** Yo n'onsikana khunvekela wookhanyarelavo araka: “Mwinyi oto onsuhi waawuniwa, **5** mwaasa yoori oniiya owaapheta atthu ethu na anijkele nyuupa yoosifiwamo Nnyizinku.”

6 Aphano Yinsa khulankha khusala alawa vamote na-yo, asaleelaka ofiya, namalokozela otule khuwaaruma ashirikha awe olawa omuuza yoori: “Mb-wana, ohijantipu khinsuhi weeyo ovira nnyupa mwaka. **7** Ti eto miyo kinoona yoori akinsuhi okutthanana weeyo, ila olupe ntthakhuzi limote paasi karumeyaaka ontta ovona. **8** Miyo kinaaye afwalume akizitiyeeyo, ila na miyo theenya kinaaye anajanka ankishututelaaye. Kinimuza najanka mmote yoori: ‘Olawe’, khulawa; nkina yoori: ‘Aruti’, khuruti. Kinimuza karumeyaaka yoori: ‘Retta eti’, ye khuretta.”

9 Yinsa asiiliyeevo mattakhuzi apale khwiya wooshanka, khuzukuluwa khuwooza atthu apale aari omperekhaaye yoori: “Hatha Ezirayeele ottuukho akooneeniwo amini nkhama eti.” **10** Ashirikha apale aarumiweeyo khurutela owawe namalokozela otule, khunsikana karumeya otule avoniye.

Yinsa oninsisimula mwaana wa nunu mmote woofweliwa ti mannawee

¹¹ Mmeesho mwaya Yinsa khulankha khusala alawa sitati ya Nayiini, anakhiyoni awe na khuntti ya atthu a waatta khusala enlotta. ¹² Asaleelaka ofiya vanlako wa sitati etile, khusala asaruwa atthu aari weettelaaye ozikha. Otule aari weettelaaye ozikhiwa aari mwaana wa nunu mmote woofweliwa ti mannawee, ye aarina mwaana mmote othuuto paasi; atthu a waatta aari olawa vamote na-ye. ¹³ Wakathi Mbwana Yinsa amooniyeevo nunu otule, khumoonela huruma khunkhuwela khumuuzu yoori: “Ohilile!”

¹⁴ Aphano khuwaasusela khusapa janaayiza, apale aathuuiliyeeyo khweemela. Yinsa khulupa araka: “Shapu! Kinuuruma yoori olankhe!” ¹⁵ Shapu otule khulankha khwiikhala khusala attakhula; Yinsa khumwinkha mamaawe.

¹⁶ Atthu ooshi khwiyya awoova khusala ansifu Nnyizinku araka: “Napiyu nwulweene aniteela, ninoona yoori Nnyizinku aateeliye owuusuru atthu awe.” ¹⁷ Hapari epile za Yinsa khumwazeyela Yudeya yooshi mpakha miti epile zaattamananiyeeyo.

Yaahaya oniwaaruma anakhiyoni awe wa Yinsa

¹⁸ Yaahaya khuuziwa pi anakhiyoni awe vitthu epile zooshi. Ye khuwaakhuwela awiri, ¹⁹ khuwaaruma yoori alawe amuuzele Mbwana yoori: “Weeyo ti otu naari onwejaaye ama ninweje nkina?”

²⁰ Yo khulawa mpakha ottuukhule aariwo Yinsa khumuza yoori: “Neetta orumiwa ti Yaahaya yoori nite niwuuzele nkhamma otule naari onwejaaye ti weyo, ama nivire ninwejaka nkina?” ²¹ Wakathi otthuupule Yinsa khuwaavonisa alwele a waatta, anamarakala, apale aariina masheethwani, khuwaafunula maasho apale oochooni. ²² Aphano Yinsa khuwaajipu yoori: “Mwilare mwamuuze Yaahaya ethiipo mooniyeeko na mwisiliyeelo; apale oochooni antta wooma, apale oorakala antta weettetta, anamakuttula antta otwahareshiwa, apale oohisiili ansiila, anamfwa asisimuliwa, na hapari zooshapweya antta olaleyeliwa asikhini. ²³ Wooshapweyiwa ti otule ahiniphiirikaaye ti miiyo.”

²⁴ Anakhiyoni a Yaahaya n'oolaavo, Yinsa khusala owoozaka atthu monkoni wa Yaahaya yoori: “Makuluttu mweettelieye wooma niini? Tteetthe yiinisikwaka ti pheevu? ²⁵ Ama moona niini? Mwinyi mmote awaliye kuwo zooshapweya? Apale anwalaaye kuwo zootafikhana aniiya nraaha na aniikhala nkorofwa y'oofwalume. ²⁶ Khi moona niini? Napiyu? Pi ethiipo kiniwuuzani yoori, Yaahaya awaaaziti manapiyu akinoko aya.

²⁷ Otu ti otule laari onlupaaye Nttakhuzi la Nnyizinku yoori:

‘Kinlawa kamperekhe karumeyaaka omaasho wawo
yoori aattalele tarikhi yawo.’

²⁸ Miyo kiniwuuzani yoori vakatthi wa apale avokoliweeyo pi aakha, khina mmote anzitiyeeyo Yaahaya; ila otule eeyiye ntithiiru muufwalume wa Nnyizinku, nwulweene zayita ye.’

²⁹ Atthu ooshi mpakha anamariphisa lumpuru khusiila mattakhuzi a Yinsa. Yo khukhupalela shariya ya Nnyizinku, maana aari awoosiwa ti Yaahaya. ³⁰ Ila mafwarizeewu na anamanozela a kano khukhijilela matakhelo a Nnyizinku khuhooisiwi ti Yaahaya.

³¹ “Anaatamu apa a leelo eti kiwaalattisane niini? ³² Alattanana khuntti ya asimaana eekhaliye vaparasa akhuwelanaka araka. ‘Fweeyo n'oovumiselani phivi za vaharusi mweeyo khuhiiini; khwiipa liipo la huzuni mweeyo khuhilili.’ ³³ Khuta Yaahaya Namoosa woofuka na ahinnywaaye

viinyu, mweeyo mwinri: ‘Ye onaaye masheethwani.’³⁴ Ata Mwaana wa Pinaatamu onja na onnywa, mweeyo mwinri: ‘Mmoone nsokho otu! Nanhapalihi, nshirikha wa anamariphisa lumpuru na anatwampi.’³⁵ Apale anlottaaye ojuwa wa Nnyizinku, anthoonyeza yoori pi wookhweli.”

Natwampi aavaaziyeeyo mafuttha moolu a Yinsa

³⁶ Mfwarizeewu mmote anvekeliye Yinsa yoori alawe aje owawe. N'oofiya Yinsa khwiikhala yoori aje.³⁷ Omuuta otthuupule muukha mmote wa natwampi wa sitati ethiitile, khujuwa yoori Yinsa ontta oja wa mfwarizeewu, khuthuula suupha yawe ya mafuttha oonukhela.³⁸ Khulawa khweemela onyoko wa Yinsa nshini wa moolu awe khusala alila. Mishozi zawe khusala zittonkela moolu a Yinsa. Khusala akukuttha na nyuuli zawe na opejari moolu a Yinsa avaazaza mafuttha oonukhela.

³⁹ Aphano mfwarizeewu otule nawoona vitthu epile khusala alupa nroho mwawewe araka: “Otu eriwaka aari napiyu eetta ojuwa yoori mwanankha otu aninsapaaye natwampi.”

⁴⁰ Yinsa khumuuzu Simawu yoori: “Kintakha owuuza ethu.”

Simawu khujipu yoori: “Kuuzeni mwanliimu.”

⁴¹ Yinsa khumuuzu yoori: “Atthu awiri eetta wiiliwa nzurukhu ti mwinyi mmote aari wiipaashisakaaye, otu mmote aari wiiliwa miyya thaanu, otu nkina aari williwa hamusiini.⁴² Ila oowiri khuhiiivo mmote aawahiyeyo onripha, ye khuwaaswaamihii oowiiri. Atthu apa awiri amphetachiyeyo ti tuuvi?”

⁴³ Simawu khujipu araka: “Kinoona yoori ti otule aswaamihiveeyo wa waattavo.”

Yinsa khumuuzu yoori: “Walikanisa.”

⁴⁴ Ye khumuuzu Simawu anthoonyezaka muukha otule araka: “Onimoona mwanankha otu? Miyo kata vaje vawo apha khuhikinkhi hatha maati yoori koose moolu aka, ila ye oosa moolu aka na mishozi zawe khukukuttha na nyuuli zawe.⁴⁵ Khukipokhereleeni na peeju, ila ye khalikheleenei opejari moolu aka.⁴⁶ Khukivaazeenai mafuttha oonukhela mmwishwa mwaka, ila otu avaaza mafuttha moolu aka.⁴⁷ Pi aphi kiniwuzaaye yoori twampi zawe epile za waatta ariinaazo za swaamihiva; mwaasa woophetachawa wawe. Ila otule aswaamihiveeyo vattithiiru opheta wawe vattithiiru.”

⁴⁸ Yinsa khumuuzu mwanankha otule yoori: “Twampi zaho za swaamihiva.”

⁴⁹ Apale eekhaliyeeyo khusala oozelana yoori: “Otu paani anwahaaye owaaswaamihii twampi atthu.”

⁵⁰ Ila Yinsa khumuuzu muukha otule yoori: “Waamini wawo wa wuusuru: olawe na heeri.”

8

Aakha aari onrumeyelaaye Yinsa

¹ Paata ya toole, Yinsa khusala eettetta sitati khwa sitati na nti khwa nti alaleyaka hapari zooshapweya zoofwalume wa Nnyizinku. Anakhiyon i awe apale khumi na awiri aari vamote na-ye,² na aakha akinoko aya apale aavonisiweeyo masheethwani na marati: Mariyamu aari wiitthiwaaye Mataleena, otule ansaruwiyeeyo masheethwani sapa,³ na Zhuwaana muukha wa Kuuza, nsatoro wa Herooti, Suzaana na aakha akinoko aari onthanttaaye Yinsa na vitthu zaya vamote na anakhiyon i awe.

Nlikaniso wa namazala

⁴ Phantte za waatta za miti aari otawo atthu enkeene oteela okutthanana Yinsa. Aphano ye khulupa nlikaniso mmote araka: ⁵ "Aarivo namazala mmote aalawiye ozala peewu zawe. Amwazaka, kinoko khukwela nshini wa tarikhi, khuluwatthiwa na khujiba pi anyannyi. ⁶ Peewu kinoko khukwela vahali aariivo mawe, khoottha ila khuuma mwaasa woohiivo maati. ⁷ Peewu kinoko khukwela vanyiwa, khuwula vamote na nyiwa, khurapeliwa pi nyiwa khufwa. ⁸ Ila peewu kinoko khukwela vanshaka wooshapweya, khuwula khwiima mishumo miiya wakhula peewu."

Alupiyeevo toole, ye khukhuwelela araka: "Ariina mashiilo ti asiile!"

⁹ Anakhiyoni awe khumuuzela maana a nlikaniso aya opule. ¹⁰ Yinsa khuwaajipu yoori: "Mweeyo mwenkhiwa ojuwa zootikinisa zoofwalume wa Nnyizinku, ila akinoko anuuzaniwa nlikaniso yoori oonaka ahisalaajuwa, asiilaka ehisala eweeleya."

Yinsa oneeleza maana a nlikaniso wa namazala

¹¹ Maana a nlikaniso opu pi toono: peewu eti enthoonyeza ntakhuzi la Nnyizinku. ¹² Peewu zaakweliyi ntarikhi, zinlikanisaniwa atthu apale ansiilaaye ntakhuzi la Nnyizinku ila sheethwani khulazavo varoho vaya ntakhuzi ntthile yoori ahaamini apattha wuusurukha. ¹³ Peewu epi zaakweliyi vamawe, zinlikanisaniwa atthu apale ansiilaaye ntakhuzi la Nnyizinku khupokherela na furaha. Ila mwaasa woohiina mitathaari, wakathi vattithiiru nawootootiwa ti sheethwani anlikha waamini waya. ¹⁴ Peewu epi zaakweliyi vanyiwa, zinlikanisaniwa atthu apale ansiilaaye ntakhuzi la Nnyizinku, ila mwaasa wooshukulikhela opattha tuvela na haali za meekhazi, yo waamini waya vattiithi-vattiithi onzima, ahifyele-laka wiima mishumo. ¹⁵ Peewu epi zaakweliyi vanshaka wooshapweya, zinlikanisaniwa atthu apale ansiilaaye ntakhuzi la Nnyizinku khuthokorela roho mwaya khushututela na khwiiana niiya, apo aniiama mishumo zooshapweya.

Nlikaniso wa khantteya

¹⁶ Khaavo ankhoaaya khantteya khufinikha na enyipo wala khupweha nliviku. Entthiiwa vahali onooneyaavo yoori esala ewaamwasikhela apale anviraaye nnyupa. ¹⁷ Khayiivo envithiwaaye ehinttelaaye osaruwela oje, zooshi epile za siiri enttela wiiya payana. ¹⁸ Apho mwiyane ophoole wa nanna yoosilla, otule ariina ontta weekezelawa, ila otule ahina hatha na etile anuupuwelelaaye wiilyana ontta onyakanyiwa.

Mamaawe na attwiize Yinsa

¹⁹ Mamaawe na attwiize Yinsa khulankha yoori amoone, ila khuhisala ewaheya mwaasa yoori aarivo atthu a waatta. ²⁰ Khuuziwa Yinsa yoori: "Vaje apho atavo mamaawo na attwiizo."

²¹ Ye khuwaajipu araka: "Maama na attwiizaku pi apale ansiilaaye Ntakhuzi la Nnyizinku khushututela."

Yinsa onnyamaza pheevo

²² Siikhu moote, Yinsa khuwooza anakhiyoni awe yoori: "Olawa neette phantte ya kaapu kinoko." Khupakhira nkalawa khusala alawa. ²³ Aphano eettaka olawa Yinsa khusala alala, khupuwa pheevo ya waatta kalawa khusala esaleela ozama. ²⁴ Anakhiyoni apale khooya khusala anlansa Yinsa araka: "Mwanliimu, Mwanliimu nasaleela ozama!"

Yinsa khulankha khunyamaza pheevo na mawipi, khupuwa nreke.

²⁵ Nawiisha khuwoozela anakhiyoni awe yoori: "Waamini wenu ori vayi?"

Yo khwiya awoova na ooshanka khusala oozelana, araka: "Otu aya paani anrumaaye pheeve na mawipi khunshututela?"

Ovoniisiwa wa nlume mmote aariina masheethwani ootakhala

²⁶ Yinsa na anakhiyoni awe khulankha khulokhela Keraaza, kaapu ya Kalileya. ²⁷ Wakathi Yinsa apakhuwiweeo nkalawa, khuta nlume mmote wa sitati ethitile aariina masheethwani a waatta. Ye eekhaliye siikhu za waatta ahiwalaka kuwo na ahiikhala vaje, aari wiikhala mvilalo. ²⁸ N'oomoona Yinsa khunyakula, khunkokhorela khukhuwa araka: "Onkitakhela-ni, Yinsa mwaana wa Nnyizinku Nwulu wa Pinkuuni? Safwtatali ohikhukhumu." ²⁹ Ye aalupiye mattakhuzi apa mwaasa yoori Yinsa aarumiye onsuruwa masheethwani. Masheethwani apale eekhaliye siikhu za waatta mmwiili wa nlume otule. Na afukaniwaavo makwinjili khwinkhiwa atthu oomweekesela, eetta ottumulaka n'ooothuuliwa pi masheethwani n'onlawana makuluttu.

³⁰ Aphano Yinsa khumuuzela yoori: "Weeyo nzina lawo o paani?" Ye khujipu yoori: "Miiyo nzina laka ki omathi," mwaasa yoori ntthu otule aamweettiye masheethwani a waatta mmwiili mwawe. ³¹ Masheethwani apale khusala anvekela Yinsa yoori ahiikarele khilintti.

³² Liphanko liwululene la kuluwe laari oshukisiwa vamwaako, masheethwani apale khunvekela ruhusa Yinsa yoori eette nkuluwe, ye khukhupalela. ³³ Wakathi aliiyeemo masheethwani apale mmwiili wa nlume otule khweetta nkuluwe, aphano kuluwe khusala zithira ziishukhela vantthatta khutupweela.

³⁴ Apale aari oshukisaaye kuluwe epile nawoona vitthu epile zaarettikhaniyezo, khutthira khulawa khulupa hapari epile nsitati mphule na miti mikinoko zaya. ³⁵ Khulawa atthu a waatta olawa woona vitthu epile zaarettikhaniyezo. Wakathi amwaattamiyeeyo Yinsa, khumoona nlume otule ansaruwiyeeyo masheethwani eekhaliye nshini wa moolu a Yinsa awaliye kuwo zawe na athhiyemo akhili zawe, yo khwiya awoova. ³⁶ Apale ooniiyeeyo, khulawa khuwooza atthu nanna aavonisiweezo nlume otule. ³⁷ Aphano atthu ooshi apale a nti opule wa Keraaza khunvekela Yinsa yoori aleemo mmuti mwaya mwaasa wa woova channu, Ye khuwela nkalawa khulaawo.

³⁸ Nlume otule ansaruwiyeeyo masheethwani khusala anvekela Yinsa amuuzaka yoori anlikhe alawe vamote na-ye. Ila Yinsa khumuuzala olawa araka: ³⁹ "Orutele owawo wawooze atthu etile Nnyizinku ooreteliyeeyo." Nlume otule khulankha khusala alawa owawe alafeyaka sitati yooshi etile aaretteliweeyo ti Yinsa.

Owahi wa Yinsa khwa marati na ofwa

⁴⁰ Wakathi Yinsa arutiyeovo, khunti khuluyeene ya atthu ooshi atthaapale aari onwejaaye khumpokherela na furaha. ⁴¹ Aphano mwinyi mmote aari wiithiwaaye Yayiru namalokozela wa nyuupa yoosifwiwamo Nnyizinku, khuta khunkokhorela Yinsa nshini wa moolu awe anvekelaka yoori alawe owawe, ⁴² mwaasa yoori mwanawewe aariina mmote paasi wa nyaakha khumi na miwiri aari osaleela ofwa.

Yinsa alawaka, atthu khusala aphunyana-phunyana. ⁴³ Attaaphale khutavo muukha aariina nyaakha khumi na miwiri ari nlwele, yaari omwitikhaaye taamu wakhula siikhu. Khuharipu nzurukhu awe wooshi aariina nkathhi wa akulukhala, ila khuhiiivo mmote aawahiyeeyo onvonisa. ⁴⁴ Ye khuta mpakha onyoko wa Yinsa khusapa ajapi yawe vattithiiru, omuuta othuupule khulikha wiittikha taamu etile.

⁴⁵ Yinsa khuuzela yoori: “Paani akisapiyeyo?”

Atthu ooshi khusala akhana, Pheeturu khulupa yoori: “Mbwana, atthu pi a waatta pa yo anuuphunyaaaye na wuusukhuma!”

⁴⁶ Ila Yinsa khusala avira akhanyarelaka yoori: “Nna akisapiyeyo keetta woona okisaruwiye owahi waka.”

⁴⁷ Aphano muukha otule ooniyeovo yoori khaari owahi ojivitha, khuta eettaka othukumela khunkokhorela Yinsa vakatthi wa atthu ooshi khusala alupa wa nanna ansapiyeezo na avoniyeozo nasaapiru. ⁴⁸ Attaaphale Yinsa khumuza yoori: “Mwanankha waamini wawo woovonisa! Olawe na heeri.”

⁴⁹ Attakhulaka ethhiipile Yinsa, khuta karumeya mmote wa vaje vawe Yayiiru khumuza yoori: “Ohimwantipu Mbwana olawa vamote na-weyo, maana mwanawo aya afwa.”

⁵⁰ Yinsa n'osoila khumuza Yayiiru yoori: “Ohoove, wiiyane amini, mwanawo ontta wiiya nkumi.”

⁵¹ N'oofiya owawe Yayiiru, Yinsa khuhinlikhi hatha ntthu ovira nnyupa mphule, khuvira na Pheeturu, Yaahaya, Yaakhumpa, papaaawe mwaana na mamaawe. ⁵² Atthu ooshi aasaliye vaje eettaka olila, Yinsa khuwooza yoori: “Mwihilile, otu khafveeni ontta olala.”

⁵³ Yo khusala antheya Yinsa mwaasa wa ojuwa yoori afwa. ⁵⁴ Ye khuntheteezel nkhono awe khumuza yoori: “Mwaari, lankha!” ⁵⁵ Rooho yawe khunrutela khulankha nasaapiru. Aphano Yinsa khumuza papaaawe yoori amwinkhe ethhu-yoojiwa. ⁵⁶ Papaawe na mamaawe khwiyya ooshanka, ila Yinsa khuwooza yoori mwihimuze hatha ntthu vitthu epi zirettikhaniyezo.

9

Yinsa oniwaaruma maaswihaapa awe khumi na awiri

¹ Yinsa khuwaakusanya maaswihaapa awe khumi na awiri khuwenkha owahi na ofwalume wa wiikara masheethwani a wakhula nanna na woovonisa. ² Khuwaaruma olawa olaleya ofwalume wa Nnyizinku na owaavonisa alwele. ³ Khuwooza yoori: “Mwilawaka mwihithuule hatha ethu, wala pakhora, wala mfukho, wala phaawu, wala nzurukhu, wala ajapi yaphiiri. ⁴ Nyuupa ethiito mwinttelaaaye opokhereliwa, mwimake attaapho mpakha olaavo. ⁵ Amana mwihipokhereliwi saana, mwilaakamo nsitati mwaya mpho mwitatthe lifufu la mmoolu mwenu khwa oshaahiti waya yo.”

⁶ Aphano yo khulankha khusala alawa aviraka mmamiti alaleyaka hapari zooshapweya na awaavonisaka alwele wakhula phantte.

Mishikili za Herooti

⁷ Nsatoro Herooti khusiila vitthu zaari orettikhanaazo ye khwiyya wootikiniwa mwaasa atthu akina aari olupa yoori Yaahaya ti ye asisimuviye muufwa. ⁸ Akina aari olupa yoori oto napiyu mmote wa raku eetta osisimuwa. ⁹ Ila Herooti khulupa yoori: “Yaahaya miiyo kaarumiye yoori ashijiwe, khi oto kininsilaaye alupiwaka na anrettaaye vitthu epo ti paani?” Khusala atakhacha yoori amoone.

Yinsa oninkha khuntti ya atthu ethhu-yoojiwa.

¹⁰ Maaswihaapa apale n'ooruti khumuza Yinsa zooshi aarettaziyezo. Aphano, ye khuwaathu khusala alawa sitati moote yaari wiithiwaayye Betesayita. ¹¹ Ila khuntti ya atthu n'oojuwa khusala anlotta. Ye

khuwaapokherela khusala awooga monkoni woofwalume wa Nnyizinku na awaavonisaka apale aari ohithajiyaae ovonisiwa.

¹² Njuwa leettelaka oveva, apale khumi na awiri khumwaattama Yinsa khumuza yoori: "Owooze attu apa alawe mmamiti mpho amake eekesaka ethu-yoojiwa, maana mphu nriimo makuluttu." ¹³ Ye khuwaajipu yoori: "Mweeyeena mwiwenkhe ethu-yoojiwa." Yo khunjipu araka: "Niriinaaye apha, phaawu thaanu na swi piiri paasi, woohiiyi olawa wuuzanya ethu-yoojiwa khiniwaafiyela attu ooshi apa." ¹⁴ Alume aariivo aari etthu ya alufu thaanu, ila ye khuwooga anakhiyoni awe yoori: "Mwiweekhaze attu hamusiini wakhula khuntti." ¹⁵ Yo khuretta ethhiipo khuweekhaza ooshi. ¹⁶ Khuthuula phaawu thaanu na swi epile piiri khweekesa otulu, khuparikhya khumeya khuwenkha anakhiyoni awe yoori awaawanyeye attu apale. ¹⁷ Ooshi khuja khurupala, epile zaasaliye khulokotheliwa khwiitaala khelenke khumi na piiri.

Otukhuru wa Pheeturu

¹⁸ Siikhu moote, Yinsa eetta olompa otthwe, anakhiyoni awe ari kharipu, nawiisha khuwoozela yoori: "Atthu anri miiyo ki paani?"

¹⁹ Yo khunjipu yoori: "Akina anri weeyo o Yaahaya Namoosa, akina Aliyaasi, akina theenya anlupa yoori weeyo o napiyu mmote wa raku weetta osisimuwa."

²⁰ "Khi mweeyo mwinri ki paani?" Pheeturu khujipu araka: "Weeyo o Al-Masihu wa Nnyizinku."

²¹ Yinsa khuwaahirimiza yoori vitthu epile ahimuze hatha ntthu. ²² Khuwooga araka: "Mwaana wa Pinaatamu ona yoohoowa nkaththi wa vitthu za waatta na okathaliwa pi anamalokozela a tiini na attunkhulu a mahaakhimu a tiini mpakha anamanozela a kano; onlawa afwe, siikhu yattaatthu asisimuwe."

²³ Khuvira awoozaka attu ooshi yoori: "Nkhama ntthu atakha okilotta miiyo, ona yoojikathala mwennyewe, khuvikela nsalapa awe wakhula siikhu khusala akilotta. ²⁴ Amana ntthu atakha wuuusuru ohaayi awe, onnta ompwetheya; ila otule onimpwetheyaaye ohaayi awe mwaasa wa miiyo, oto onteela wuusurukha. ²⁵ Ona fwayita-ni ntthu opattha vitthu zooshi z'oolumwenku, ila khujipwetechaa amaa khujitapanya mwennyeweru? ²⁶ Otule anikoonelaaye haaya miiyo na mattakhuzi aka, na Mwaana wa Pinaatamu onteela omoonela haaya mmana ataaka nnuru mwawe na nnuru wa Paapa na malayikha oottakatthiifu. ²⁷ Kiniwuuzani khweele yoori awaapo apha akina ahintelaaye ofwa mpakha oone ofwalume wa Nnyizinku."

Ozukulisiwa wa Yinsa

²⁸ Ziviriyeevo ethu ya siikhu naane paata yoolupa mattakhuzi apale, Yinsa khunthuula Pheeturu, Yaahaya na Yaakkumpa, Ye khuwela vamwaako olawa olompa. ²⁹ Alompaka ethhiipile omaasho wawe khuzukuluwawo, kuwo zawe khwiya zoolakala na za waara nkhamma ozerima. ³⁰ Nasaapiru khumpuwelela attu awiri khusala attakhulana, aari Munsa na Aliyaasi. ³¹ Aatiye nnuru ya pinkuuni khusala amuuza Yinsa khwa nanna aari weettelaazo ohoowa na ofwa Yeruzaleemu nkhamma ethhiipo Nnyizinku asharutheliyeeyo.

³² Pheeturu na ashirikha awe aarettiye eettaka olala, wakathi asisimuwy-eovo khoona nuuru ya Yinsa na attu awiri amweemeleliye. ³³ Atthu apale

eettaka olawa Pheeturu khumuuzsa Yinsa yoori: "Mwanliimu, ti yooshapweya wiikhala attaapha! Nintta ojeka mapantta mattatthu, limote laawo, limote la Munsa, na limote la Aliyaasi." Pheeturu khaari ojuwa ethtu aari ottakhulaaye.

³⁴ Attakhulaka ethhiipile, khuta liwiku khuwaafinikha, anakhiyoni apale khwiyya awoova wakathi ooniyeovo liwiku liwaafinikhaka atthu apale.

³⁵ Mmawiku mphule khupuwamo huula yaari oraaye: "Otu mwanaka woorthawuliwa; mwinsileze etile anlupaaye." ³⁶ Paata yoonyamala huula etile Yinsa khusalavo otthwe. Siikhu zaya epile anakhiyoni apale khwiyya oonyamala, khuhimuuzi hatha ntthu vitthu epile ooniyeozo.

Ovonisiwa wa shapu aariina sheethwani

³⁷ Mmeesho mwaya nawiishukha vamwaako, khuta khuntti ya atthu a waatta oteela okutthanana Yinsa. ³⁸ Vakatthi wa khuntti ya atthu atthaapale khupuwavo mwinyi aari okhuwaaye araka: "Mwanliimu, kinuuvekela yoori wamoone mwanaka, maana kina mmote othuuto paasi. ³⁹ Sheethwani eetta onvelavelisa khusala anthukumelisa, onnyakulisa na onkwisela vathi n'oolaza maphovu, khaninlikha ahinvulaliseeni. ⁴⁰ Kaawaavekeliye anakhiyoni awo yoori amwiikare sheethwani aya oto, yo khumoojeela."

⁴¹ Yinsa khujipu araka: "Oo! Atthu oohaarmini na ootakhala rooho! Mpakha lini kiyyaka vamote na-mweyo na kuuvilelakan? Ontiise apha mwanawo ayo oto."

⁴² Alawaniwaka ethhiipile, sheethwani khunkwisela vathi khusala anthukumelisa, Yinsa khumwiikara sheethwani khuvona mwaana otule, khumwinkha papaawe. ⁴³ Atthu ooshi khwiyya ooshanka mwaasa woowahi wa Nnyizinku.

Yo aashankeliye vitthu epile aari orettaazo Yinsa, ye khuwooza anakhiyoni awe yoori: ⁴⁴ "Mwisiileze saana mattakhuzi apa kiniwuzaanini: Mwaana wa Pinaatamu onttela winkheleliwa mmakhono wa anaatamu."

⁴⁵ Ila yo khuhisala ajuwa maana a mattakhuzi aya apale mwaasa yoori aari ovitheya yoori ahiweeleye na khusala oova omuuzela.

Nttunkhulu muufwalume wa pinkuuni

⁴⁶ Khupuwa onyakulisanava vakatthi wa anakhiyoni apale eekesaka onjuwa paani wa yo aari weettelaaye wiiya nttunkhulu. ⁴⁷ Ila Yinsa khujuwa ethtu aari wuupuwelaaye yo, khunthuula mwaana khumweemesa omaasho wawe. ⁴⁸ Aphano khuwooza anakhiyoni awe yoori: "Otule animpokherelaaye mwaana otu khwa nzina laka, onikipokherela miyo; otule anikipokherelaaye, onimpokherela otule akirumiyeeyo. Otule anjipushuwisaaye vakatthi venu mooshi, nttunkhulu ti othuuto."

⁴⁹ Yaahaya khulupa yoori: "Mwanliimu, namoona ntthu anikaraaye masheethwani khwa nzina lenu. Fweeyo khunkhattaza mwaasa woohiiyi wa khuntu yetthu."

⁵⁰ Yinsa khuwooza yoori: "Mwihinkhattaze. Maana otule ahinvirkanaaye na-fweyo ori phantte yetthu."

Asamariiya aninkathala Yinsa

⁵¹ Osaleelaka ofiya wakathi wa Yinsa orutela pinkuuni, khujilakelela weetta sitati ya Yeruzaleemu. ⁵² Khuwaalokozisa akarumeya awe, yo alawaka khusapuwa nti wa Samariiya yoori amweekesele puuro yoomakavo. ⁵³ Ila atthu a nti wa Samariiya khuhimpokhereli, maana aajuwiyen yoori eetta ovira eettaka Yeruzaleemu. ⁵⁴ Yaakhumpa na Yaahaya nawoona vitthu zaya epile khumuuzsa Yinsa yoori: "Mbwana, ontakha

yoori nirume moottho wa pinkuuni owaalukuze, nkhama ethhiipo Aliyaasi aaretiyyeezo*?” ⁵⁵ Ila Yinsa khuzukuluwa khuwaamaruwela araka: “Mweeyo khamwinjuwa rooho mwiriinaazo†. ⁵⁶ Mwaana wa Pinaatamu khateeleeni opwetecha nafusi za atthu, aateeliye wuusuru.” Aphano khulankha khusala alawa nti nkina.

Monkoni wa apale aninlottaaye Yinsa

⁵⁷ Ettaka olawa ntarikhi khupuwa ntthu mmote khumuaza yoori: “Kintta wuulotta wakhula vhali oneettaavo.”

⁵⁸ Yinsa khunjipu araka: “Ananthala anaaye maphotto aya, anyannyi anaaye viaaro zaya, ila Mwaana wa Pinaatamu khana vhali woovumulisavo eeshwa yawe.”

⁵⁹ Yinsa khumuaza ntthu nkina yoori: “Okilotte.”

Ye khujipu araka: “Mbwana, okilikhe khapula kilawe kanzikhe paapa.”

⁶⁰ Yinsa khumuaza yoori: “Owaalikhe anamfwa awaazikhe anamfwa aya; weeyo olawe walaleye ofwalume wa Nnyizinku.”

⁶¹ Khupuwa ntthu nkina theenya khumuaza Yinsa yoori: “Kintta wuulotta Mbwana, ila okilikhe khapula kawaaleeze ajamaazaku.”

⁶² Yinsa khunjipu yoori: “Otule aneesaaye makhono awe alimaka khusala eekesa nyuma khaneezela muufwalume wa Nnyizinku.”

10

Yinsa oniwaaruma anakhiyoni awe sapiyiini na awiri

¹ Paata ya toole, Mbwana khuwaathawula anakhiyoni awe akinoko sapiyiini na awiri, khuwaaruma yoori alawe awiri-awiri alokoze nsitati na mmiti wooshimo mphule aari weettelaaye oviramo. ² Ye khuwoza yoori: “Wu-urula pu wa waatta, ila anakhaazi vattithiiru. Mwinvekele Mwennyewe nshapa yoori awaaperekhe anakhaazi a wuurrula. ³ Mwilawe, kinuurumani nkhama pwittipwitthi zinttaaye vakathi wa miiji. ⁴ Mwihiithuule mfukho wala napampa, ama jampali wala mwiheemele ntarikhi mwichelisa.

⁵ Wakhula nyuupa mwimfiyaaye mwilupe khapula yoori: ‘Heeri yiye vamote na-mweyo vaje apha.’ ⁶ Amana eeyavo ntthu wa heeri, heeri yenu enttela wiiya vamote na othuuto; amana ahiiivo entta wuрутelani.

⁷ Mwiheetette nyuupa khwa nyuupa, ila mwiikhale nyuupa ethiito mwije mwinywe wakhula etile mwinttelaaye winkhiwa, maana nakhaazi eninsuhu phakari yawe.

⁸ Wakhula sitati mwimfiyaaye khupokhereliwa saana, mwije ethuyoojiwa mwinttelaaye winkhiwa. ⁹ Mwiavaonise alwele mwinttelaaye owaasikana na mwiwooze atthu yoori: ‘Ofwalume wa Nnyizinku ori kharipu na-mweyo.’ ¹⁰ Wakhula sitati mwineettaaye amana mwihipokhere-liwi, mwileemo mwilawe ntarikhi mwiwooze yoori; ¹¹ ‘Lifufu la sitati yenu ntthi liniphariyeyo mmoolu mwetthu, nootathelani mwamwennyewe; ila mwijuwe yoori ofwalume wa Nnyizinku ori kharipu na-mweyo.’ ¹² Yinsa khuwoza theenya yoori: “Kiniuuuzani yoori siikhu ya kхиyaama, Nnyizinku onteela woonela tthakaraka Sotooma zayita sitati eto.

¹³ Olaanikha pu waawo weeyo Korazini, na weeyo Betesayita! Eriwaka minjuza epi zirettikhaniyeezo mphu, zeettiye orettikhana sitati ya Tiiro na Sidooni, athupwiyiye raku twampi zaya awala saakhu eekhala vafuutha.

¹⁴ Nakataalikha siikhu ya kхиyaama, Nnyizinku onteela woonela tthakaraka

* **9:54** Aaya eti kithaapu kiina khayatikhweenimo. † **9:55** Aaya eti kithaapu kiina khayatikhweenimo.

Tiiro na Sidooni zayita mweeyo. ¹⁵ Weeyo Kafwaranawu onoona yoori onsiswiwa mpakha pinkuuni? Wala! Apho onteela wiishukhela motthooni.

¹⁶ Otule anuuusilezaanini, onikisiileza miyo; otule anuukatthalaaanini, onikikatthalaa miyo. Otule anikikatthalaaaye miyo, oninkatthalaa otule akirumiyeeyo.”

Oruti wa anakhiyoni sapiyini na awiri apale aarumiweeyo

¹⁷ Anakhiyoni apale sapiyini na awiri khuruti ari oofurahi khulupa yoori: “Mbwana, hatha masheethwani aari onishututela amana nittakhlaka khwa nzina lawo.”

¹⁸ Yinsa khuwaajipu yoori: “Miiyo kamoona Epiliisi akwaka otulu nkhama ozerima. ¹⁹ Mwikisiileze! Kiniwinkhani owahi wooluwattha nyookha, wenyenkuhurettini hatha ethu, na oshintta owahi wooshi wa atuwi*. ²⁰ Mwihifurahi mwaasa wa masheethwani wuushututelani, mwifurahele mazina enu waatakhiwa pinkuuni.”

²¹ Wakathi otthuupule Yinsa khwiya woofurahi nkathhi wa Rooho Ttakatthiifu, khuri: “Kinuusifu weeyo Paapa, Mbwana wa pinkuuni na vathi maana vitthu epi zeeya zoovitheya vakatthi wa ajuwi na asomi, khuwaathoonyeza asimaana; khweele Paapa, ti nanna waatakhiyeelo.”

²² Zooshi kenkhiwa ti Paapa; na khaavo aninjuwaaye Mwaana woohiiyi Paapa, wala aninjuwaaye Paapa woohiiyi Mwaana, na otule Mwaana anintakhelaaye yoori anjuwise.”

²³ Paata ya toole, khuwaakkhuwela anakhiyoni aweru paasi khuwooza yoori: “Ooparikhiiya pi apale anoonaaye epi mwinoonaazo.”

²⁴ Kiniuuuzani yoori manapiyu a waatta na afwalume aari otakha woona vitthu ethiipi mwinoonaazo ila khuhoomi na aari otakha osila epi mwinsilaazo ila khuhisiili.”

Nsamariiya wooshapweya rooho

²⁵ N'ooreeta toole, namanozela mmote wa kano khulankha yoori amweeze Yinsa khuri: “Mwanliimu, kirette-ni yoori kipatthe ohaayi wa mileele?”

²⁶ Yinsa khumuuzela yoori: “Yaatkhiwa niini nkithaapu ya kano wala eniweleya toovi amana osomaka?”

²⁷ Ye khujipu araka: “Omphete Mbwana Nnyizinku awo na rooho yawo yooshi na nafusi yawo yooshi, na kuvu zawo zooshi na akhili zawo zooshi’ na ‘omphete namwaattamanani awo nkhama ethiipo onjiphetaazo omwennyewe’.”

²⁸ Aphano Yinsa khumuuzza yoori: “Wajipu saana. Orettaru ethiipo ontta opattha ohaayi wa mileele.”

²⁹ Ila namanozela wa kano otule aari otakha ojihakikhi khumuuzela Yinsa theenya yoori: “Namwaattamanani aka ti paani?”

³⁰ Yinsa khunjipu araka: “Aarivo ntthu mmote aari olankhaaye Yeruza-leemu eettaka Yeriko, khuvithaaleliwa pi malatarawu khunyakanyiwa vitthu zawe, khuvuliwa kuwo zawe, khupiwa khulikhiwa asaleelaka ofwa.

³¹ Erettiyeevo toole, khuviravo haakhimu wa tiini mmote, n'oomoona ntthu otule khunwerawera. ³² Khuviravo theenya nleevi† mmote, n'oomoona ntthu otule ari ntarikhi mphule khunwerawera. ³³ Aphano khuviravo nsamariiyat‡ mmote aari weettaaye safwari zawe, n'oomoona ntthu otule khumoonela huruma. ³⁴ Khumwaattamela khoosa makhwatta awe na

* **10:19** Atuwi otu Epiliisi.

† **10:32** Aleevi aari awaziri a mahaakhimu a tiini.

Asamariiya aari attu ootarawiwa pi mayaahuuti.

‡ **10:33**

mafuttha na aalikoro khufuka na alikatuura, khunthuula khunttha vapuuru vawe khunlawana onyuupa ya aletto khumwiinanelan. ³⁵ Mmeesho mwaya, khulaza mizurukhu miwiri za feeta aariinaazo khumwinkha mwennyewe nyuupa khumuuba yoori: ‘Omwiinanele ntthu otu mpakha wakathi kinrutaavo, wakhula etile onttelaaaye oharipu khwa ye, kintta ota kuuriphe n’ooruti.’”

³⁶ Aphano Yinsa khumuuzela namanozela wa kano otule yoori: “Khwa atthu apa attatthu paani omooniyeeyo wiiya namwaattamanani awe nampiipa pi malatarawu?”

³⁷ Ye khujipu yoori: “Ti otule amooneleyeeyo huruma.” Yinsa khumuuba yoori: “Na-weyo olawe warette ethiipo.”

Owawe Maarata na Mariyamu

³⁸ Yinsa na anakhiyoni awe eetta ovira alawaka khufiya mmuti, khupuwa muukha mmote aari wiithiwaaye Maarata, khumpokherela.

³⁹ Ye aarina ttwiye aari wiithiwaaye Mariyamu, eekhaliye nshini a moolu wa Mbwana Yinsa khusala asiila mattakhuzi apale aari olupaaye.

⁴⁰ Ila Maarata eetta ojizukulela mwaasa wa waatta khaazi, khulawa aphale aariivo Yinsa khumuuba yoori: “Mbwanu, khinujali ttwiyyaku okilikhela khaazi za waatta otthome? Omuuze ate akikholise!”

⁴¹ Mbwana khunjipu yoori: “Weeyo Maarata washukulikha na wajkhaza na vitthu za waatta. ⁴² Ila eti moote ti yiye yootafikhana. Mariyamu athawula phantte yooshapweya ahinnyakanyeyaaye.”

11

Yinsa oniwaanozela anakhiyoni awe nanna yoolompa

¹ Siikhu moote Yinsa eetta olompa vahali vaya apho, eeshiyeevo mmote wa anakhiyoni awe khuri: “Mbwanu, oninozele olompa nkhamma ethiipiile Yaahaya Namoosa na-ye awaanozeliyeeyo anakhiyoni awe.” ² Aphano, Yinsa khuwooza yoori: “Amana mwilompaka mwisala mwiri toono:

Papeetthu,

littithimisiwe nzina lawo loottakatthifu.

Wiishushe Ofwalume awo.

³ Oninkhe wakhula siikhu ethu-yoojiwa ninhithajijaaye.

⁴ Oniswaamihii twampi zeththu,

nkhamma ethiipi na-fweyo nininswaamihajaaye
wakhula otule annikosaaye.

Ohinilikhelele nizayiniwaka ti sheethwani, [[ila onuusuru khwa vitthu zootakhala]]*.”

⁵ Yinsa khuwooza theenya yoori: “Nkaakanyerelani mmote wa-mweyo anlankhaaye osikhu layili, khulawa ompiyela nlako swaahipu awe araka: ‘Swaahipu, kiipaashe phaawu ttatthu, ⁶ mwaasa yoori eetta ota swaahipu aka onti’na akina hatha ethu yoomwinkha.’

⁷ Khi amana swaahipu enu oojipuni ari nnyupa mwawe araka: ‘Ohikan-tipu! Miyo kafuka milako zaka, karapalela na aanaaka alala; akinwahi olankha yoori kuupathisse phaawu zaya.’ ⁸ Weekhwelle miyo kiniuwuzani yoori, hatha nkhamma khatakheeni olankha yoori oopathisse phaawu mwaasa w’ooswaahipu, oniishela olankha na awinkhe zooshi onhithajijaazo mwaasa wa nthiti.

* ^{11:4} Warakha za raku khina aaya eti ya 4.

⁹ Ti eto kiniwuzaanini yoori: Mwiveke, mwintta winkhiwa; mweekese mwintta opattha; mwipiye nlako mwintta ofukuleliwa. ¹⁰ Maana wakhula anvekaaye oninkhiwa, aneekesaaye ompattha, ampiyaaye nlako ontta ofukuleliwa.

¹¹ Paapa-ni mmote wa mweeyo anraaye mwanawе anvekeliye phaawu khumwinkha liwe? Ama anvekeliye swi khumwinkha nyookha?[†] ¹² Wala anvekeliye laayi khumwinkha wenye? ¹³ Moone, mweeyo wootakhala rooho mwiniyuwa Owenkha aaneenu vitthu zooshapweya, sapiseni Paapa wa pinkuuni khanziti Owenkha Rooho Ttakatthiifu apale aninvekelaaye?”

Owahi wa Yinsa wa wiikara masheethwani

¹⁴ Siikhu moote, Yinsa aari omwiikara sheethwani mmwiili wa mwinyi mmote antotheliyeeyo ohittakhuli. Wakathi ansaruwiyeovo sheethwani otule, ye khwaaza ottakhula; apale aari omoonaaye khushanka. ¹⁵ Ila atthu akina khusala alupa yoori: “Ye onikara masheethwani na owahi wa Belezibuuli[‡], mfwalume wa masheethwani.” ¹⁶ Akinoko eetta omweeza, khusala anvekela alama moote ya pinkuuni.

¹⁷ Yinsa khujuwa vitthu aari ofikhiraazo, khuwooza yoori: “Ofwalume woojaawanya khusala wuumana oniishelana otapanye, na ojama wa waawanyeya oniishelana wiisha. ¹⁸ Nkhama Epiliisi eetta ojaawanya, ofwalume awe onttela wiiyavo toovi? Mweeyo mwinlupa yoori miiyo kiniikara masheethwani khwa owahi wa Belezibuuli. ¹⁹ Nkhama pi ethiipo, khi aaneenu aniihara na owahi waani? Atthaapo pa yo anttelaaaye wuuthoonyezani yoori khamwina shariya. ²⁰ Ila nkhamma khweele masheethwani apa kiniikhara na owahi wa Nnyizinku, eto enthoonyeza yoori ofwalume wa Nnyizinku wafiya vakaatti venu.

²¹ Ntthu woozivala na woojuumaanya, amana eekeselaka vaje vawe saaneene, mali zawe ziniiya zookholeleleya. ²² Ila ntthu woozivala zayita ye, amana ankukuttela khunshintta onta onnyakanya zaana zawe anrromosome-lazzo athuule phantte ya mali zawe.

²³ Otule ahina vamote na-miyo oto ona lupattha na-miyo, otule ahinkusanyaaye na-miyo ontta omwaza.”

²⁴ Yinsa khurutela olupa yoori: “Sheethwani, amana alaamo mmwiili oneekesa puuro yoohiina maati yoori avumule, n'oohisikani puuro ye onlupa yoori kintta orutela mphule kaariimo. ²⁵ Amana aruti asikana nnyupa ori wooseeliwamo na wa waattaleliwamo, ²⁶ onta oruti eettele masheethwani makinoko sapa ootepa zayita otule, aviremo asala eekhala nttumphule. Attaaphale ohaayi wa ntthu aya otule oniiya wootepa zayita omwanzo.”

²⁷ Yinsa eettaka olupa mattakhuzi apale, muukha mmote aari attaaphale khunyakula araka: “Wooshapweyiwa muukha otule oovokoliyyeyo khuwaamwisa.”

²⁸ Ila Yinsa khunjipu araka: “Ooshapweyiwa pi apale ansiilaaye nttakhuzi la Nnyizinku khushututela.”

Alama ya Yuunusa

²⁹ Wakathi attu akusanyeyiyeovo vahali vamote, Yinsa khusala alupa yoori: “Atthu a leelo pi ootakhala rooho, anveka woona alama ya minjuza ila khanlawa othoonyeziwa hatha alama moote, yoohiyyi etile ya napiyu

[†] **11:11** Kithaapu za kiina khina mattakhuzi aya apa: ‘anvekeliye phaawu khumwinkha liwe?’

[‡] **11:15** Nzina likina la Epiliisi ti Belezibuuli.

Yuunusa. ³⁰ Nkhama ethiipo Yuunusa eeyiyeyo alama ya atthu a Neniive, na-ye Mwaana wa Pinaatamu ontela wiiya alama ya atthu a leelo. ³¹ Siikhu ya khiyaama rayisi wa kusini ontela olankha awaaphuke atthu aaphano; maana ye alankha okhu wiisheliyewo olumwenku oteela osiila ojuwa wa Seleyimaana, ila otu mwiriina apha anziti Seleyimaana. ³² Siikhu ya khiyaama atthu a Neniive anttela wuuphukani mweeyo, maana yo athupwiya twampi zaya, n'oosiila tafusiiri epile aari olupaazo Yuunusa; otu mwiriina apha nasaapi anziti Yuunusa.”

Nuuruya mwiili

³³ Yinsa khuvira alupaka yoori: “Khaavo ntthu ankhoaaye khantteya khuvitha ama khukhufela na yuuku, ila entthiwa vahali wa wooneyavo yoori esala ewaamwasikhela apale anviraaye nnyupa. ³⁴ Khantteya ya mwiili maasho, amana maasho awo eeya oosaana, mwiili awo wooshi oniiya wa nuuru. Ila amana maasho awo ahiiyi saana mwiili awo oniiya n'yiiza. ³⁵ Wiyane phoole na nuuru eto oriinaaye yoori ehiyi yiiza. ³⁶ Amana mwiili awo wooshi wiyanu nuuru khuhinya hatha phantte moote ya yiiza, oniiya woomwasikheliwa nkhamma khantteya yuumwasikhelaka weeyo.”

Yinsa na mafwarizeewu na anamanozela a kano

³⁷ Wakathi Yinsa eeshiyeevo ottakhula, mafwarizeewu mmote khumuuzza olawa oja owawe. Ye n'oofiya khwiikhala vameeza. ³⁸ Mfwarizeewu otule khushanka mwaasa woomoona Yinsa eettela oja woohinawi.

³⁹ Mbwana khuwooza yoori: “Mweeyo mafwarizeewu, mwinoosa koopho na parathu oje waya, ila rooho zenu zeetaala vitthu za omaasho kopho na zoohusuti. ⁴⁰ Alolo! Otule aattaliyeyo oje khahi othuuto attaliyeyo nkathhi? ⁴¹ Khapula mwaaze winkha etile eriye nkathhi wa rooho yenu nkhamma zimola, toowo mwintta woona zooshi ziwiikhaleiyeni saana.

⁴² Olaanikha pu weenu mweeyo mafwarizeewu, maana mwininkha l-funku lakhumi mathapa na vitthu za nwoorotha, ila khusala mwitarawu shariya na pheta ya Nnyizinku! Mweeyo mwina yooretta vitthu epo woohilikh phantte kiina.

⁴³ Olaanikha pu weenu mweeyo mafwarizeewu, wawuutvelani puuro ya wiilokozi nnyupa woosifwiwamo Nnyizinku na ochelisiwa wa shitahavo vamwantwiha.

⁴⁴ Olaanikha pu weenu mweeyo, mwiiyiyeeyo nkhamma khapuri yoohooneyi anviraavo atthu vatulu vaya khuhijuwi.”

⁴⁵ Aphano namanozela wa kano mmote khunjipu Yinsa araka: “Khahiyoo toowo! Mattakhuzi apo kinoona yoori annithoonya fweeyo.”

⁴⁶ Yinsa khuri: “Olaanikha pu weenu mweeyo anamanozela a kano, mwiniwaapwecherisaaye atthu mapwattha oolemela wala mweeyo mwihinwahaaye osapa na yaala yenu.

⁴⁷ Olaanikha pu weenu mweeyo mwiniwaajekelaaye khapuri zooshap-weya manapiyu, atthaapale ooliweeyo pi amarehemu apapazenu. ⁴⁸ Apho mweeyo mwinthoonyeza yoori mwinklawela oshaahiti wookhupalela epile apapazenu arettiyeeyo, yo awoola manapiyu, mweeyo khuwaajekela khapuri zooshapweya. ⁴⁹ Ti eto Nnyizinku alupiyeeyo nkathhi woojuwa wawe yoori: ‘Kinlawa kawaaperekhe manapiyu na maaswihaapa; yo anteela owoola, akina aweekarise.’ ⁵⁰ Mwaasa wa manapiyu apa ooliiweeyo tokhiya olumwenku waazaka, atthu ooshi apa a leelo eti ana paathuli. ⁵¹ Waaza taamu ya Apeele mpakha taamu ya Zakariya otule ooliiweeyo kharipu ya

vaalitaari vaje wa nyuupa ya Nnyizinku. Kiniuuuzani yoori, atthu a leelo anlawa ahukhumwiwe mwaasa wa ethiito.

⁵² Olaanikha pu weenu mweeyo anamanozela a kano, maana mwathuula efukulo yoojuwa, ila khuhivirimo na khuwaakhattaza apale aari otakhaaye oviramо.”

⁵³ Paata ya Yinsa olaavo aphale vaya, mafwarizeewu na anamanozela a kano khwaaza omuuzela vitthu za waatta ari ookatipukha. ⁵⁴ Yo aari onwazela shawuri yoori kusapi onalupa ethtu, apatthe onlokoveza.

12

Ohirimiza na olipisela

¹ Khuntti ya atthu khukusanyeya, mwaasa wa waatta akinoko khusala aluwatthana. Yinsa khuwooza khapula anakhiyon i awe yoori: “Phoole na thwapiya zoonaafikhi za mafwarizeewu. ² Khayivo yoovithiwa ehintee-laaye ovithuliwa na zooshi epile zoottiyeleliwa zinteeela ojuwiwa.” ³ Zooshi zinlupiwaazo n'yiiza, zinlawwa zasaruleliwe veetakale, na zooshi epile zinlupiwaazo sirini zinlawwa zeeye payana.

Nimoove Nnyizinku paasi

⁴ Yinsa khuvira attakhulaka araka: “Miiyo kiniuuuzani ashirikha yoori: Mwihiwoove apale anuulaaye mwiili, nawiisha khuhiretteli hatha ethtu.

⁵ Miiyo kintta wuuthonyezani paani woomoova: Mwimoove Nnyizinku otule anwahaaye wuula mwiili enu, nafusi yenu khweeselela motthooni. Oto ti mwiriina yoomoova. ⁶ Anyannyi athaanu attiitthi-attiitthi khanu-uzanyisiwa sinku piiri? Ila apo aya khaavo mmote Nnyizinku anins-hawaaye. ⁷ Hatha na nyuuli za mmwishwa mwenu zooshi pi za waalakiwa. Mwihoove, mweeyo mwinaaye fwayita zayita anyannyi apo a waatta.”

Otukhuru na onkatthala Yinsa

⁸ Yinsa khuri: “Miiyo kiniuuuzani yoori: otule antukhurwaaye vakatthi wa atthu yoori namalottela aka, Mwaana wa Pinaatamu onteela otukhuru vakatthi wa malayikha a Nnyizinku. ⁹ Ila otule ankikatthalaaye vakatthi wa atthu, na-ye onteela okatthaliwa vakatthi wa malayikha a Nnyizinku. ¹⁰ Wooshi otule anintarawaaye Mwaana wa Pinaatamu onswaamihowi, ila otule ankufurwelaaye Rooho Ttakatthiifu khanswaamihowi.

¹¹ Amana mwithuuliwa olawa ophukiwa nnyupa woosifwiwamo Nnyizinku ama wa awfalume, mwihiiyane shaakha khwa nanna mwinttelaaaye ojaakisa ama ethtu mwinttelaaaye olupa. ¹² Wakathi otthuupo Rooho Ttakatthiifu entta wuuthonyezani ethtu yoolupu.”

Thaajiri woohiina akhili

¹³ Mwinyi mmote wa khuntti etile khunvekela Yinsa araka: “Mwanliimu, omuuze ttviyyaku akaawanye maali epile alikhieeyo papeetthu.”

¹⁴ Yinsa khunjipu araka: “Weyo, paani akirettiye wiiya namaphuka enu wala namwaawanya wa maali zenu?” ¹⁵ Khuwooza yoori: “Phoole na omaashokopho wooshi wa vitthu, mwaasa yoori ohaayi wa pinaatamu khunlipa na vitthu epile ampatthaazo za waatta.”

¹⁶ Yinsa khulupa nlikaniso araka: “Aarivo mwinyi mmote wa thaajiri aaruweriyeyo channu. ¹⁷ Ye khusala awaza toono: ‘Kurette-ni? Akina vahali wootthaavo peewu zaka epi.’

¹⁸ Khulupa yoori: ‘Aa, kajuwa ethtu yooretta. Kintta opwecha matthala apa mattiithi kijeke mawulu-mawulu yoori kittheemo peewu zaka na

vitthu zaka zooshi epile kiriinaazo. ¹⁹ Nawiisha, kuuze nafusi yaka yoori: onaaye peewu na vitthu za waatta zintoshelezaaye nyaakha za waatta; ovumule, oje, onywe na opuhe.’

²⁰ Ila Nnyizinku khumuaza yoori: ‘Nlolo! Osikhu otthuupu ontta ofwa. Maali zawo paani anttelaaye osalana?’

²¹ Yinsa khumarisela araka: “Ntthu oto ori nkama atthu apale anlipanaaye maali zaya ila khuhiyi mathaaajiri mmakhono wa Nnyizinku.”

Onroromela Nnyizinku

²² Aphano Yinsa khuwooza anakhiyon i awe araka: “Ti eto kiniwuzaanini yoori: mwiliiyane shaakha na ohaayi enu, wala ethu mwinttelaaye oja ama ethu mwinttelaaye owala. ²³ Maana ohaayi ona fwayita khuluy-eene zayita ethu-yoojiwa na mwili ona fwayita khuluyeene zayita kuwo. ²⁴ Mwiwoone anakhuku; khanzala wala khanuurula hatha ntthala khana loopwehavo vitthu-zoojiwa zaya, ila Nnyizinku oniwenka ethu-yoojiwa. Mweeyo mwinaaye fwayita khuluyeene zayita anyannyi apo! ²⁵ Paani vakathi venu anwahaaye weekezelaa mansha awe hatha nkama eetta oshukulikhela? ²⁶ Mweeyo khamwinwahi oshintta vitthu ttiithi-ttiithi, khi mwinshukulikhela toovi kinoko zaya?

²⁷ Moone nanna anwulaazo maluwa oshapweya ntthuttu, khankhola khaazi wala hanvaasha kuwo, ila kiniuuuzani yoori: Selyimaana aari thaajiri nwulweene, ila khawaleeni kuwo zooripelela nkama maluwa atthaapo. ²⁸ Nnyizinku onwalisa nyaani ziriiye ntthuttu leelo meesho zeetelaka olukula, sapiseni mweeyo atthu a amini ttiithiru khatepeeni wuuwalisani? ²⁹ Mwiishukulikhela ethu mwinttelaaye oja ama onywa. ³⁰ Atthu apale ahinijuwaaye Nnyizinku pa yo anshukulikhelaaye vitthu epo, ila mweeyo Papeenu onjuwa yoori enuuhitajiyani vitthu epo. ³¹ Mweekese khabula Ofwalume wa Nnyizinku, vitthu zaya epo mwintta weekezelawi.”

³² Yinsa khulupa theenya araka: “Mwihoove mweeyo mwiiyiye nkama khuntti ttiithiru ya pwittipwitthi, maana Papeenu ti ye atakhiye owinkhani Ofwalume awe. ³³ Muuzanyize zooshi mwiriinaazo nzurukhu aya mwiwenkhe asikhini, mwijaattalelele mifukho zihinvaruwaaye, toowo mwinthokorela maali pinkuuni zihiniishaawo, okhu ahimfiyaawo nantarawu wala maweephe yoori aharipu. ³⁴ Maana attaapho eniiyaavo maali zawo rooho yawo eniiya attaapho.”

Anamarumeyela oojeekesela

³⁵ Yinsa khuvira alupaka yoori: “Mwiye anamarumeyela oojeekesela na khantteya zenu ziri zookhoziwa. ³⁶ Mwina yawiya nkama anamarumeyela aninwejelaaye mbwanaaya yoori arutaka onjampo la harusi, amana apiya nlako amfukulele nasaapiru. ³⁷ Ooshapweyiwa anamarumeyela apale mbwanaaya anttelaaye owaasikana eettaka ojeekesela. Kiniuuuzani khweele yoori mbwanaaya na-ye ontta ojivalisa yoori arum-eye, awooze wiikhala vameeza asala awaarumeyela. ³⁸ Hatha nkama ata osikhu layili ama lifwjiri, ooshapweyiwa anamarumeyela apale mbwanaaya anttelaaye owaasikana ari oojeekesela. ³⁹ Mwijuwe yoori eriwaka mwennyewe nyuupa eetta ojuwa wakathi nantarawu antaavo, toono ahinlikhaka ovira nnyupa mwawe. ⁴⁰ Na-mweyo mwiiye woojeekesela, maana Mwaana wa Pinaatamu ataaka khaavo anjuwaaye wakathi aya.”

Karumeya wa waamineya na woohaamineyi

⁴¹ Aphano Pheeturu khumuuzela Yinsa yoori: “Mbwana, nlikaniso opo pu weetthu ama pu wa atthu ooshi?”

⁴² Mbwana khujipu araka: “Paani eeyiyeyo karumeya wa waamineya na w'aakhili, mbwanaawe amwinkhiyeyo owaalokozela akarumeya azaawe na Owenkha ethhu-yoojiwa mmana ofiya wakathi? ⁴³ Wooshapweyiwa karumeya otule mbwanaawe amana ataaka anttelaaye onskana arrettaka ethhiipo. ⁴⁴ Weekhweele, kiniuuuzani yoori onttela wiiya wa waaminawa alikheliwe weettettisa maali zooshi. ⁴⁵ Mwaakantere, karumeya otule amana alupa nroho mwawe yoori: ‘Mbwanaaka khanta nasaapi,’ khwaaza owaapiya akarumeya apale akina aakha na aalume, okhuno ajaka, anywaka na ahapaliwaka, ⁴⁶ mbwanaawe onttela ota siikhu etile ye ahaari waakanyerelaaye na wakathi ahaari ofikhirelaaye, ahukhumwiwe venkivene athi-iwe puuro ya atthu oohaaminey.

⁴⁷ Karumeya otule anjuwaaye matakhele a mbwanaawe, ila khuhisala ajeekesela na khuhisala aretta epile antakhaazo mbwanaawe, onteela ohukhumwiwa na ojaphiwa venkivene. ⁴⁸ Ila otule ahinrettaaye matakhele a mbwanaawe mwaasa woohijuwi, onteela ojaphiwa na ohukhumwiwa vattithiiru. Wakhula otule enkheweeyo za waatta ona yoorutisa za waatta; na otule aaminiweeyo venkivene, onlawa avekeliwe zozziti channu.”

Waawanyeya mwaasa wa Yinsa

⁴⁹ Yinsa khuri: “Miiyo kateela okhoza mootho vatuniya, enikituvela ovira okholelaka! ⁵⁰* Ila yamwanzo kina yoohoowa kifwe, kina huzuni mpakha vitthu epi zirettikhane ziishe! ⁵¹ Mweeyo mwinaakanyera yoori miiyo katana heeri vatuniya? Wala! Kiniuuuzani khweele yoori miiyo katiisa ohisiilani. ⁵² Waaza leelo eti mpakha okho ninttaawo, nkatti woojama wa atthu athaanu, onteela opuwamo waawanyeya; attatthu ohisiilanani apale awiri, apale awiri ohisiilanani apale attatthu. ⁵³ Paapa wuumana na mwanawee na mwaana wuumana na papaaawe. Maama wuumana na mwanawee wankha, mwaana wankha wuumana na mamaawe, namaraliwa wuumana na nkhwewe, akhwe wuumana na namaloola.”

Alama za wakathi

⁵⁴ Yinsa khuwooza atthu aakusanyeyiyeeyo yoori: “Mweeyo amana moona liwiku liwelelaka phantte y'ookhu lintupweelaawo njuwa mwinlupaka yoori: ‘Entakha onya vuula’, khweele khurettikhana. ⁵⁵ Amana moona pheevo ya kuusi mwinlupaka yoori: ‘Enteela opuwa haari’, khweele khurettikhana. ⁵⁶ Manaafikhi! Mweeyo mwinjuwa olupa alama za vatuniya na z'ootulu; aphano toovi mwihijuwaka olupa alama za wakathi opu?

⁵⁷ Mwaasa aya niini mwihijuwaka othawula etile yiliyeeyo ya shariya? ⁵⁸ Amana weeyo na muumania awo mwilawaka wa namaphuka, enhithajija osilana khapula rakuzeene mwihiinalawe, maana amana ofiya wa namaphuka onta omuuza namweekesela ootthe nkalamoos. ⁵⁹ Miiyo kiniuuuzani khweele yoori khunlaamo ohiripeeni khapula.”

13

Othupwiya ama ofwa

¹ Wakathi aya opule, atthu aariivo khumuuzza Yinsa yoori Pilaatu awoola atthu akina a Kalileya wakathi aari orettaavo twaha zaya. ² Yinsa khuwaajipu yoori: “Mweeyo mwinoona yoori akalileya apo aari anatwampi zayita

* ^{12:50} ‘Eu seja batizado com um certo batismo’ khwa luuka ya kereeku.

attu akina, mwaasa woohoowa toowo? ³ Miiyo kiniwuzani yoori: wala! Apho amana na-mweyo mwihihupwyi twampi zenu, mooshi mwintta opwetheya nkhamo yo. ⁴ Ama mweeyo mwinaakanyera yoori apale khumi na wanaane yaawaakweliyeeyo korofwa ya Siloowe aari anapaathuli zayita apale aniikhalaaye Yeruzaleemu? ⁵ Wala! Kiniwuzani theenya yoori amana mwihihupwyi twampi zenu mooshi mwintta opwetheya nkhamo ethiipo na-yo apwetheyiyeozo.”

Mfikeera woohiimi

⁶ Aphano Yinsa khulupa nlikaniso opu onraaye: “Mwinyi mmote aarina mfikeera awe aazaliyeeyo mmashapa mwawe. Khulankha olawa oshuma mishumo zaya, hatha mmote khuhisikanimo. ⁷ Aphano khumuza na malimela nshapa nthile yoori: ‘Kina nyaakha mittatthu kitaaka oshuma, kihisikanakamo hatha ethtu. Okakatte! Mwaasa wa ethtu-ni ottiyelelaka puuro ya mahala?’

⁸ Ila karumeyaawe otule khunjipu araka: ‘Mbwana, kinuuvekelani yoori mwilikhe mfikeera opu wiiye ntumphu mpakha mwaakhani; miiyo kintta othipa nshini mwaya kisala kiiithela vitutu. ⁹ Mwaakha nkina amana wiima mishumo ti yooshapweya; amana ohiimi okakatte.’”

Muukha Woovonisiwa Saapatu.

¹⁰ Siikhu ya saapatu, Yinsa eetta osomisa nnyupa moote yoosifwiwamo Nnyizinku. ¹¹ Nttumphule aarimo muukha aari ohoochiwaaye ti sheethwani khwa nyaakha khumi na minaane, aari wookhutupuwa ahaari owa-haaye wookowa. ¹² Wakathi Yinsa amooniyeevo khunkhuwela khumuza yoori: “Maama mwavona orati enu.”

¹³ Yinsa khunttheela makhono nunu otule omuuta otthuupule khookowa, khwaaza otthapa ansifwaka Nnyizinku. ¹⁴ Ila haakhimu wa nyuupa yoosifwiwamo Nnyizinku khwiya wa wiiphiiriwa mwaasa wa Yinsa ovonisa siikhu ya saapatu, ti eto aawooziyeeyo attu yoori: “Ziwaapho siikhu sitha zookhola khaazi; mwisala mwita siikhu ethiipo yoori mwivonisiwe, ila saapatu wala.”

¹⁵ Aphano Mbwana khujipu araka: “Manaafikhi! Paani mmote wa mweyo anraaye efiye saapatu khuhifikuli mompe zawe na apuuru awe olawa onywisa maati? ¹⁶ Nunu otu peewu ya Eburahiiima, eettiye ofukiwa ti Epiliisi khwa nyaakha khumi na minaane, nanna-ni ahaari weettelaaye otaphuliwa mwaasa wa wiiya saapatu?”

¹⁷ Alupiyeovo mattakhuzi apale, maatuwi awe Yinsa ooshi khuwaapattha haaya, attu ooshi aariivo khwiya oofurahi mwaasa wa vitthu zooshapweya epile aari oreittaazo Yinsa.

Nlikaniso wa phunje ya mfikeera na Fwaramento

¹⁸ Yinsa khulupa yoori: “Ofwalume wa Nnyizinku onlattana na niini, wala kilattisane niini? ¹⁹ Opo ori nkhamo phunje ya mfikeera, mwinyi mmote anthuulaaye khulawa khuzala mmashapa mwawe. Khuwula khwiya muutthi nwulweene, anyannyi o'otulu khusala ajekamo viaaro zaya nvirapi mwaya.”

²⁰ Yinsa khulupa theenya araka: “Ofwalume wa Nnyizinku walattana na niini? ²¹ Opo ori nkhamo fwaramento muukha anthuulaaye khuttha ofu koopho ttatthu, khujakhuwa wooshi.”

Nlako woophunyeya

²² Yinsa eetta ovira anozelaka nsitati na miti mikina za waatta eettaka Yeruzaleemu. ²³ Ntthu mmote khumuuzela yoori: "Mbwana, vattithiiru atthu anttelaaye wuusurukha?"

²⁴ Yinsa khunjipu araka: "Mwjjilipise yoori mwivire vanlako woophunyeya, maana a waatta anlawa eekese ovira ila khanteela owahi.

²⁵ Mwenneyewe nyuupa amana alankha afuka nlako awe, mweeyo mwinsala vaje mwipiyyaka nlako na mwivekaka yoori: 'Mbwana mwinifukulele!'

Ye onnta wuujipuni araka: 'Akinjuwa ohali mwinlankhaawo.'

²⁶ Aphano mwinlawwa mwalupe yoori: 'Naja vamote, khunywa vamote na wanozela mmuti mweththu.'

²⁷ Ila ye onlawa ajipu yoori: 'Akinuujuwani wala ohali mwinlankhaawo akinjuuwawo, mwikisuse mweeyo anamareetta zootakhala.'

²⁸ Mwinlawwa mwamoone Eburahiiima, Esiyaakha, Yaakhumpa na manapiyu ooshi ari muufwalume wa Nnyizinku, ila mweeyo mwiikareliwe oje. Attaapho onlawa weeyevo olila na oluma meeno. ²⁹ Atthu anttela olankha malawa-njuwa akina okhu lintupweelaawo njuwa, kusini na kashikhazini ate eekhale vameeza woofwalume wa Nnyizinku. ³⁰ Miyo kiniwuuzani khweele yoori, awaapho amwanzo anttelaaye wiiya awiishela, na awiishela anttelaaye wiiya amwanzo."

Yinsa onoonela huruma Yeruzaleemu

³¹ Wakathi otthuupule khutavo mafwarizeewu khumuuz Yinsa yoori: "Oleovo apha, maana Erooti ontakha owuula."

³² Ye khuwaajipu yoori: "Mwilawe mwamuuze nanthala aya oto yoori: Leelo na meesho kiniikara masheethwani na owaavonisa alwele, siikhu yattaathu kintta wiishisa khaazi yaka. ³³ Enhithajiya, leelo, meesho na nrotto ovira kilawaka; maana weekhwhee khaavo napiyu amfwaaye nti nkina woohiyyi Yeruzaleemu!"

³⁴ Yeruzaleemu, Yeruzaleemu, oniwoolaaye manapiyu na owaavonya anamalaleya apale omperekheziwaaye! Swaafu kavi miyo kitakhaka owaakusanya aanaawo nkhamma mwanakhu aniwaakusanyaazo aanaawee mmapaphelo mwawe, ila weeyo khuhitakhi? ³⁵ Apho moone yoori nyuupa yenu enttela wiiya puuro yoohiikkaliwi. Weekhwhee kiniwuuzani yoori khamwinteeela okoona theenya mpakha wakathi mwinttelaaye olupa yoori: 'Attottopeliwe otule antaaye khwa nzina la Mbwana! "

14

Ovonisa nkina Siikhu ya Saapatu

¹ Saapatu moote, Yinsa aalawiye wa ntunkhulu mmote wa mafwarizeewu olawa oja, atthu aari ntumphule khusala amweekesela Yinsa. ² Attaaphale aariivo, arivo mwinyi aavipiyeeyo mwiili awe wooshi.

³ Yinsa khuwoozela mafwarizeewu na anamanozela a kano araka: "Enkhupaleliwa onvonisa nlwele saapatu ama wala?" ⁴ Ila yo khwiyya oonyamala. Attaaphale, khunkhola mwinyi otule nkhone awe, khunvonisa khumuuz olawa safwari zawe.

⁵ Aphano khuwoozela yoori: "Paani wa mweyo anraaye amooniye mwanawee ama mompe yawe ekweliye vanlipu khuhilazivo nasaapiru eri saapatu?"

⁶ Yo khuhiwahi ojipu.

Ojipushuwisa na omakeleya.

⁷ Wakathi ajuwiyeovo yoori atthu apale aalaleyiweeyo njampo aari othawula puuro za wiilokozi, Ye khulupa nlikaniso opu: ⁸ “Amana olaleyiwa njampo la harusi, ohithawule puuro etile ya wiilokozi, maana khinjuweya alaleyiwe ntthu wootepa oshitaahiwa zayita weeyo. ⁹ N'oota otule oolaleyiyeeyo onnta owuuza yoori: ‘Puuro eto omwinkhe otu’. Attaaphale weeyo oniiya woopatthiwa ti haaya olawaka wiikhala puuro ya wiishela. ¹⁰ Ila amana olaleyiwa ona yawiikhala puuro ya wiishela, n'oota otule oolaleyiyeeyo onnta owuuza yoori: ‘Swaahipu, ote wiikhale puuro eti ya wiilokozi’. Aphano, weeyo onttela wiiya woohishimiwa venkivene vakaththi wa ananlaleyiwa ooshi. ¹¹ Maana wakhula otule anjiwilisaaye onnta opushuwisiwa na otule anjipushuwisaaye onnta owulisiwa.”

¹² Attaaphale Yinsa khumuza mwinyi otule anlaleyiyeeyo yoori: “Amana wiiyana eththu-yoojiwa yawo ama njampo lawo ohiwaalaleye attwiizo, ashirikhaawo, ajamaazo ama anamwaattamanani awo oothaaajiri, yoori nayo ahuulaleye wumpuwa nkhamma oriphana. ¹³ Ila amana wiiyana njampo owaalaleye asikhini, anamarakala na atthu oochooni. ¹⁴ Toowo oparikhiiyiwa onttela wiiya wawo, maana apo aya khanlawa wiiyana eththu yawuurutisela. Oraphiwa wawo onttela ota siikhu yoosisimuliwa anashariya.”

Nlikaniso wa njampo liwululene

¹⁵ Ntthu mmote wa atthaapale aariina vameeza asiiliyeovo mattakhuzi apale khumuza Yinsa yoori: “Ooshapweyiwa pi apale anttelaaye oja njampo l'oofwalume wa Nnyizinku.”

¹⁶ Aphano Yinsa khujipu yoori: “Mwinyi mmote aarina njampo lawe khuwaalaleya atthu a waatta. ¹⁷ N'oofiya wakathi khunruma karumeyaawe olawa owoozza anamalaleyiwa yoori: ‘Mwite, zalikana.’

¹⁸ Ila wakhula mmote khwaaza olupa tafwawuthi zawe, wamwanzo khulupa yoori: ‘Keetta wuuzanya nshapa laka, apha kinttela woona, kinveka nswammaha.’

¹⁹ Waphiiri khulupa yoori: ‘Keetta wuuzanya mompe khumi zoolima, kintakha kilawe keezelele, kinveka nswammaha.’

²⁰ Wattaaththu khuri: ‘Kintta wiisharu ooloa, akinwahi olawa.’

²¹ Karumeya otule khuruti khulawa khumuza mbwanaawe vitthu epile. Mwennyewe njampo khwiya wa wiiphiiriwa khulupa yoori: ‘Waakuve olawe mmatarikhi na mmamuti wa sitati wawaatiise anamarakala, asikhini na apale oochooni.’

²² Karumeya otule n'ooruti khulupa yoori: ‘Mbwana, kareetta epile mwaakirumiyeeko, ila nalelo zinsala puuro.’

²³ Mbwanaawe khumuza yoori: ‘Olawe mmatarikhi khuulu na mmamiphiitelo, wa waakhanyarele apale onttelaaye owaasikana ate eetaale vaje vaka. ²⁴ Kiniwuuzani yoori khaavo khwa apale aalaleyiweeyo anttelaaye oja njampo laka.’”

Nanna ya wiiya namalottela wa Yinsa

²⁵ Siikhu moote, atthu a waatta eetta onlottelela Yinsa, Ye khuzukuluwa khuwooza yoori: ²⁶ “Otule antakhaaye okilotta, ona yookipheta channu zayita papaaawe, mamaawe, muukhaawe, aanaawe, attwiize, alupuwe, ama ohaayi awe, n'oohiretti ethhiipo khaniyya nakhiyon iaka. ²⁷ Wakhula otule ahinthuulaaye nsalapa awe akilotta khaniyya nakhiyon iaka.

²⁸ Paani wa mweeyo anraaye atakhaka ojeka korofwa yawe, ahinaazaaye wiikhala khapula attheela hisapu vitthu zintakhaavo oona nkhamma onwahi wiishisa? ²⁹ Ahirettiru ethhiipo, ye onnta waaza ila khaniishisa. Atthu apale

anttelaaye omoona antta ontheaya alupaka yoori: ³⁰ ‘Mwinyi otu aaza ojeka ilaa khanwahi wiishisa.’

³¹ Ama mfwalume-ni anraaye alawaka wuumana viitha na mfwalume nkina khuhaazi wiikhala khapula apheleleza na anajanka awe apale alufu khumi, nkhamma anlawa awaakhitiri apale alufu eshiriini anttelaaye wumanana? ³² Amana ahiretti toowo, apale ahinafiye ari peetiwene nalelo, onta onruma waziri awe olawa owaavekela heeri. ³³ Khwa nanna ethiipo wakhula mmote wa mweyo ahinlikhaaye epile ariinaazo khansuhi wiiya nakhiyon iaka.

³⁴ Mwiinyu ona fwayita, khi mmana olilha onyuunya onrutiseleya toovi onyuunya waya? ³⁵ Khunretteliwa ethu wala mmashapa ama shiturumu, onta wiithiwa.

Otule ariina mashiilo, ti asiile.”

15

Pwittipwitthi ya waashikha

¹ Wakathi nkina anamariphisa lumpuru na anatwampi khusala ata oteela onsiila Yinsa. ² Mafwarizeewu na anamanozela a kano khusala aapa araka: “Mwinyi otu oniwaapokherela anatwampi khusala aja vamote na-yo.”

³ Aphano Yinsa khuwooza nlikaniso mmote araka: ⁴ “Paani mmote wa mweyo anraaye arina pwittipwithi zawe miya khumwaashikha moote, khuhilikhni ntthuttu epile tiisiini na tiisiya zisaliyeezo, eettela etile moote emwaashikhiyeeyo mpakha opattha? ⁵ Amana asikana onta ovikela ari woofurahi, ⁶ khusala arutela owawe. N'ooifiya oniwaakhuwela maswaahipu zawe na anamwaattamanani awe awooze yoori: ‘Nlaweni nitthape, maana kapattha pwittipwithi yaka etile yaakaashikhiyeeyo.’ ⁷ Khwa nanna ethiipo kiniwuuzani yoori ontela wiiyawo otthapa nwulweene pinkuuni mwaasa wa natwampi othupwiya, zayita atthu tiisiini na tiisiya anashariya ahinhithajiyaaye othupwiya.”

Nzurukhu wa waashikha

⁸ Kuvira araka: “Ama muukha-ni anraaye arina nzurukhu awe khumi, khumwaashikha mmote khuhikhozi khantteya aseela nnyupa mwawe, eekesa w'aakhilivo mpakha opattha? ⁹ Amana apattha oniwaakhuwela maswaahipu zawe na anamwaattamanani awe awooze yoori: ‘Nlaweni nitthape, maana kapattha nzurukhu aka opule waakaashikhiyeeyo.’ ¹⁰ Miyo kiniwuuzani yoori eniiyavo furaha khuluyeeene vakatthi wa malayikha a Nyizinku mwaasa wa natwampi mmote othupwiya.”

Nlikaniso wa mwaana wa waashikha

¹¹ Yinsa khurutela theenya yoori: “Aarivo mwinyi mmote aariina aanaawe awiri. ¹² Otu ntiithi aya khumuuzza papaawe yoori: ‘Paapa, mwikinkhe lifunku la erathi yaka.’ Papaawe khuwaawanyela maali epile aanaawe.

¹³ Oviriyeovo wakathi vattithiiru, mwaana otule ntiithi khuthuuula maali zawe epile aawanyeliweezo khulawa tuniya kiina ya woolepawo. Ottuukho khuharipu maali zawe epile khwa mwentto woololo. ¹⁴ N'ooharipu zooshi khupuwa jala ya waatta mmuti mwaya mphule, ye khusala ahankayikha. ¹⁵ Khulankha mpakha wa mwinyi mmote wa tuniya ethiitile khunvekela khaazi, ye khumwinkha oshukisa kuluwe zawe ntthuttu. ¹⁶ Ye aari ohithajiya oja vitthu epile zaari ojiwaazo pi kuluwe na khaavo aari omwinkhaaye ethu-yoojiwa.

¹⁷ Khujipayini khuri: ‘Anakhaazi a paapa ana ethu-yoojiwa yoowaafiyela, miliyo kiri okhuno entta okikhola jala. ¹⁸ Kintta olankha kilawe wa paapa khamuuze yoori: Paapa, kakosa mmakhono wa Nnyizinku na mmakhono mwenu. ¹⁹ Akinsuhi theenya wiithiwa yoori ki mwananetu, mwikipokherele nkhamma mmote wa anakhaazi enu.’ ²⁰ Khulankha khusala alawa mpakha wa papaawe.

Nalelo ari peetiwene papaawe khumoona, khwiyyana huruma khuluy-eene khusala antthirela khulawa khumpatikha na khumpejari.

²¹ Attaaphale mwaanaa otule khumuuzza papaawe yoori: ‘Paapa, kakosa mmakhono wa Nnyizinku na mmakhono mwenu. Akinsuhi wiitthiwa yoori ki mwananetu.’

²² Ila papaawe khuwooza akarumeya awe yoori: ‘Mwaakuve, mwitiise kuwo zooziti oshapweya mwinwalise. Na peetthe mwinwalise nzaala mwaawe na shapattho mmoolu mwawee. ²³ Mwilawe onzizi mwanantuule mwaana wa mompe otule eesheliyeeyo oneneva mwite mwishije, nirette njampo la furaha. ²⁴ Mwaasa yoori mwanaka otu aafwiye apha ori haayi; aashikhiye apha apattikhana.’ Khwaaziwa njampo.

²⁵ Epo zaari orettikhana mwaanaa otule nwulu ari omashapa. Khuta mpakha kharipu na vaje, khusala asiila koma zeettaka ovuma na atthu eettaka wiina. ²⁶ Aphano ye khunkhuwela karumeya mmote wa vaje attaaphale khumuuzela niini yaari orettikhanaaye. ²⁷ Ye khumuuzza yoori: ‘Twiyo ti ye arutiyeeyo, papaawo khunshijela mwaana wa mompe otule eesheliyeeyo oneneva, mwaasa wompokherela ari haayi.’

²⁸ Mwaanaa otule nwulu khwiippiiriwa khuhisala atakha oviramo. Attaaphale papaawe khusaruwa khusala ankhanyarela. ²⁹ Ila ye khumuuzza papaawe yoori: ‘Moone! Nyaakha za waatta kuurumeyelakan, wala aki-nakhijilele hatha ntakhuzi lenu limote. Ila khamwinakinkhe hatha puuзи moote yoori kirette njampo na ashirikha aka. ³⁰ Arutiyeeyo mwananetu oto aharipiyeeyo vitthu zenu na amalempe, mwanshijela mwaana wa mompe otule wooneneva aya.’

³¹ Aphano papaawe khumuuzza yoori: ‘Mwanaka! Wakhula siikhu oniiya vamote na-miyo, wakhula etile kiriina ti yaawo. ³² Ila yaari ohithajiya oretta njampo la furaha, mwaasa yoori twiyo aafwiye apha ori haayi, aashikhiye apha apattikhana.’ ”

16

Nlikaniso wa namalokozela wa anakhaazi woohaaminey

¹ Yinsa khuwooza anakhiyoní awe yoori: “Aarivo mwinyi mmote wa thaajiri aariina namalokozela wa anakhaazi awe, khuuziwa yoori: ‘Namalokozela otule ontta ohariju maali zavo.’ ² Ye khunkhuwelisa khumuuzela yoori: ‘Niini epi kinsilaazo onrettaazo weeyo? Otiise warakha za kontha koone ethu oretteliyeeyo nzurukhu aka. Maana khunteela orutela wiya namalokozela wa anakhaazi.’

³ Namalokozela wa anakhaazi otule khuupuwela toono: ‘Kinttela oretta-ni mbwanaaka amana akilikhisa khaazi? Othipa akinkhitiri na olawa olola enikipattha haaya. ⁴ Aa, kajuwa ethu yooretta yoori amana kiikariwa atthu akipokherele mmavaje mwaya.’

⁵ Aphano ye khuwaakhuwela ooshi apale aari wiiliwaaye ti mbwanaawe. Khumuuzela otule wamwanzo yoori: ‘Oniwiila kavi mbwanaaka?’ ⁶ Ye khujipu yoori: ‘Onikiilla ttompwiyo miiya za mafuttha.’

Namalokozela wa anakhaazi otule khuri: ‘Teeni yawo ti eti eriiye vawarakha apha, wiikhale waatikhe hamusiini.’

⁷ Elottelanaka khumuuzela otule waphiiri yoori: ‘Khi weeyo oniiliwa kavi ti mbwanaaka?’ Ye khujipu yoori: ‘Kinilifwa miphimo miiya za tiriku.’ Namalokozela wa anakhaazi otule khumuuzza yoori: ‘Teeni yawo eti eriiye vawarakha apha, waatikhe thamaaniini.’

⁸ Aphano mbwanaawe khunttottopela namalokozela wa anakhaazi otule woohaamineyi mwaasa wa akhili epile aariinaazo. Miyo kiniwuuzani yoori, atthu a voolumwenku apha ana akhili za waatta mmenttezi mwaya, zayita atthu apale aneettettaaye nnuuru. ⁹ Apho kiniwuuzani yoori: mwirumeyele maali zenu za voolumwenku apha zoohiiyi za shariya yoori mwiiwaapatthe ashirikha, amana ziwiishelani yo oopokhereleni pinkuuni.

¹⁰ Otule anaamineyaaye khwa ethu ttiithiiru onaamineya khwa ethu khuluyeene; otule ahinaamineyaaye khwa ethu ttiithiiru hatha ethu khuluyeene khanaamineya. ¹¹ Nkhama khamwaamineyeeni na maali za voolumwenku zoohiiyi za shariya, paani anttelaaaye owaaminini na maali zookhweele? ¹² Nkhama khamwaamineyeeni na vitthu za watthu, paani anttelaaaye owinkhani ethu enttelaaaye wiiya yeenu?

¹³ Khaavo karumeya anwahaaye owaarumeyela a mbwana awiri, mwaasa yoori onta omwiiphiirisa mmote, antuvelite otu nkina; ama oniyya wa waamineya khwa otu mmote, antarawu otu nkina. Khinwaheya onrumeyela Nnyizinku na Nzurukhu.”

¹⁴ Mafwarizeewu apale oopheta nzurukhu na kuvu, n'oosiila mattakhuzi apale khusala antheya Yinsa antarawaka. ¹⁵ Aphano Ye khuwoza yoori: “Mweeyo pi apale oojoona wiya anashariya vakatthi wa atthu, ila Nnyizinku onjuwa rooho zenu. Etile atthu anoonaaye wiiya ya fwayita, omaasho wa Nnyizinku ti yootaraweya.

Ownahwa Kano

¹⁶ Kano na manapiyu khazilikheleenei mpakha wakathi wa Yaahaya. Waaza wakathi otthuupo hapari za Ofwalume wa Nnyizinku zinvira zilaleyiwaka, wakhula ntthu onjilipisa yoori eettemo. ¹⁷ Ti yookhwuya pinku na vathi wiisha zayita olaziwavo alama ttiithiiru ya ntthakhuza la kano.

¹⁸ Wakhula nlume animwaashaaye muukhaawe khunrala muukha nkina onta oraruwa; na aninralaaye muukha otule wa waashiwa na-ye onta oraruwa.”

Thaajiri na Laazaru

¹⁹ Yinsa khurutela olupa theenya yoori: “Aarivo mwinyi mmote wa thaajiri aari owalaaye kuwo zooshapweya na zootafikhana, na wakhula sikhу eetta opuha, owawe yaari wiipikhiwaho ethu-yoojiwa ya nnofu.

²⁰ Vanlako wa thaajiri otule aattattikheliwevo masikhini mmote wa waatta makhwatta aari wiithiwaaye Laazaru. ²¹ Aari ohithajiyi oja tathela zaari okwaazo vameeza wa thaajiri otule, anapwa khusala ata olapa makhwatta awe.

²² Masikhini otule khufwa, khuthuuliwa pi malayikha khulawa khwiisiya vamote na Eburahiima. Na-ye thaajiri otule khufwa khulawa khuzikhwa.

²³ Motthooni okhule eettaka woona shaani, ye khulansa maasho awe khweekesa otulu khumoona Laazaru ari mpavu wa Eburahiima. ²⁴ Ye khusala akhuwa araka: ‘Paapa Eburahiima, kooneleni huruma! Mwinrume Laazaru anaanise yaala yawe na maati ate azizimise nlimi laka, maana kintta ohukhumweya vamootho apha kiriivo.’

²⁵ Eburahiima khunjipu yoori: ‘Mwanaka, omfwahamu yoori muuhaayi mwawo waapokheriye vitthu zooshapweya, ila Laazaru muuhaayi mwawe eetta ohoowa. Aphano ye asithirikha, weeyo onta ohoowa.’ ²⁶ Olikha vakathi vethu yatthiwavo khilintti khuluyeene ehinlokheyaaye ntthu olankha okhuno ataaka okho wala okho ataaka okhuno.’

²⁷ Thaajiri khulupa yoori: ‘Paapa Eburahiima, safwatali kinuuvekelani yoori mwinrume Laazaru alawe wa ajamaazaku, ²⁸ kinaaye attwiizaku athaanu alawe awooze yoori ahipatthe ota okhuno kiriwo woohoowiwawo.’

²⁹ Eburahiima khunjipu yoori: ‘Attwiizo anaaye kano za Munsa na kithaapu za manapiyu, asiileze ethiiopo.’

³⁰ Thaajiri khukhanyarela araka: ‘Wala paapa Eburahiima! Amana ntthu asisimuwa muufwa alawa awooza, antta othupwiya.’

³¹ Eburahiima khujipu yoori: ‘Ahisiieziru kano za Munsa na za manapiyu, hatha nkhamma ntthu eetta osisimuwa muufwa, yo khanteela okhupali.’”

17

Twampi na nswammaha

¹ Yinsa khuwooza anakhiyoni awe yoori: “Enteela opuwa vitthu zinteeelaaye owaakwisela atthu ntwampi, ila atakhaliwa otule anttelaaye othowelela. ² Awfataali ntthu otupweeziwa mpahari afukeleliwe liwe liwulene mmwisiko, ehiyee ni owaathowelelisa apele eeyiye oohikhomaali. ³ Mwiiyane ophoole: twiyo amana ookosa, onshowere; amana athupwiya, onswaamihi. ⁴ Amana ookosa swaafu sapa siikhu moote, na wakhula swaafu khusala ata olupa yoori: ‘Kathupwiya’, onswaamihi.”

Weekezelialiwa wa amini

⁵ Maaswihaapa khunvekela Yinsa yoori: “Mbwnana, weekezelie amini yetthu!”

⁶ Mbwnana khujipu araka: “Eriwaka amini yenu yeettiye wiiya nkhamma phunje ttiitthiiru ya muuyu, mweetta wuuzaa muutthi opu yoori: ‘Okhuleye watupweele mpahari,’ opo weetta wuushututelani.”

⁷ Yinsa khuvira alupaka yoori: “Paani mmote wa mwewyo anraaye nakhaazi awe woolima, ama wooshukisa pwittipwithi ntthuttu, eettaka otaru animuzaaye yoori: ‘Ote niikhale vameeza apha nije!’ ⁸ Kinoona yoori khaavo! Ila khapula onimuza yoori: ‘Wiipikhe ethu-yoojiwa, owale kuwo zawo okirumeyele kijaka na kinywaka. Aphano amana kiisha na weeyo oje na onyweli’ ⁹ Karumeya otule oninsuhi oshukhurweliwa mwaasa wooretta etile aarumiweeyo? Kinoona yoori wala! ¹⁰ Ethiiipo na-mwewyo, amana mwiretta epile mwirumiweezo, mwina yoolupa yoori: ‘Naakarumeya oohipina maana; naretta etile naariina yooretta paasi.’”

Yinsa oniwaavonisa anamakuttula khumi

¹¹ Yinsa eettaka Yeruzaleemu, aaviriye enakatthi-nakatthi ya Samariiya na Kalileya. ¹² N’oofiya nti aya opo, khuta anamakuttula khumi khweemela peetiwene ¹³ khusala ankhuwela araka: “Yinsa, Mwanliimu, noonele hruma!”

¹⁴ Ye n’oovoona khuwooza yoori: “Mwilawe mwajithoonyeze wa mahaakkimu a tiini.” Eettaka olawa ethiiipile, yo khwiya oovona.

¹⁵ Mmote wa apale khumi, nawoona yoori avona, khuruti ansifwaka Nyizinku na huula yoonyakula. ¹⁶ Khukokhora khufiyisa ajihi yawe vathi, khunshukhurwela Yinsa; ye aari nsamariiya.

¹⁷ Yinsa khumuuzela yoori: "Khahi atthu khumi avoniyeeyo? Khi apa akina tiisiya ari vayi?" ¹⁸ Khaavo awahiyeyo oruti oteela onshukhurwela Nnyizinku, woohiiyi otu wa malaponi?" ¹⁹ Yinsa khumuuzla yoori: "Olankhe olawe amini yawo yawuusuru."

Matelo a Ofwalume wa Nnyizinku

²⁰ Yinsa eetta wuuzeliwa pi a mafwarizeewu wakathi waari weettelaavo ota Ofwalume wa Nnyizinku. Ye khujipu araka: "Ofwalume wa Nnyizinku otaaka khunttela wiiya eththu enooneyaaye. ²¹ Khina anttelaaye olupa yoori: 'Moone, opu ori apha!' ama 'Opule orikiye okhule!' Maana ofwalume wa Nnyizinku ori vakatthi venu."

²² Attaaphale khuwooza anakhiyoni awe yoori: "Ontela ofiya wakathi mwinttelaaye otakha wiiyana vamote nerikwu siikhu moote Mwaana wa Pinaatamu, ila ehisala ewaheya. ²³ Akinoko anlawa alupe yoori: 'Ori okhule!' ama 'Ori apha!' ila mwihilankhe olawa omweekesa. ²⁴ Nkhama ethiipo taari enerimaaye phantte moote yeettaka phantte kiina, enteela wiiya ethiipo siikhu anttelaaye ota Mwaana wa Pinaatamu. ²⁵ Ila mwanzo ye ona yoohoowa venkivene na okathaliwa pi atthu a leelo.

²⁶ Nkhama zaarettikhaniyeego wakathi opule wa Nuuhi, enttela orettikhana ethiipo wakathi wa Mwaana wa Pinaatamu. ²⁷ Atthu eetta oja na onywa, na oralana, mpakha siikhu Nuuhi aapakhiriyeeyo mmwaarakka, khuta nnyeri ooshi khufwa.

²⁸ Nkhama zaarettikhaniyeego wakathi wa Loothi. Atthu eetta oja na onywa, wuuzanya na wuuzanya, ozala na ojeka manyupa aya. ²⁹ Wakathi Loothi aliiyeewo Sotooma, khukwa vuula pinkuuni ya moottho na oka, khuwooola atthu ooshi.

³⁰ Enttela orettikhana ethiipo siikhu anttelaavo ota Mwaana wa Pinaatamu. ³¹ Siikhu yaya eto, otule anttelaaye wiiya vatulu wa nyuupa ahiishukhe yoori alokotthele vitthu ziriiye nnyupa mwawe; otule anttelaaye wiiya ntthutu ahirutele onti. ³² Mwimfikhirele muukha wa Loothi! ³³ Otule antakhaaya wuusuru ohaayi awe onnta ompwethaya, ila otule onimpwethaya onnta wuusuru. ³⁴ Miyo kiniwuuzani yoori: osikhu wa siikhu ethiitile, atthu awiri oorapalela olili mmote, onttela othuuliwavo mmote asalevo mmote. ³⁵ Atthu awiri achilaka tiriku, onttela othuuliwavo mmote asale mmote. ³⁶ [Atthu awiri ari mmashapa, onttela othuuliwavo mmote asale mmote.]^{*}

³⁷ Yo khumuuzela Yinsa yoori: "Mbwana, enttela orettikhana vayi?" Yinsa khuwaajipu yoori: "Vahali aniiyaavo muufwi, anakhuku aniiya attaapho."

18

Nlikaniso wa namaphuka wootakhala rooho

¹ Yinsa khuwooza anakhiyoni awe nlikaniso mmote yoori aarina yoolompa woohilikheleli wala woohinyoonyeyi. ² Ye khulupa yoori: "Sitati moote aariwo namaphuka mmote ahaari omoovaaye Nnyizinku, wala ahaari onshitahaaye ntthu. ³ Sitati ethiitile aariwo nunu mmote woofweliwa ti mannawe aalawiiyeeyo onyekela namaphuka otule araka: 'Okaawanyele haakhi khwa muumanii aka.'

⁴ Khunkatthalela wakathi mwinkeene, ila omwiisho waya khusala alupa nroho mwawe yoori: 'Nakihimoovi Nnyizinku na ohinshitahi ntthu, ⁵ nunu

* ^{17:36} Warakha za raku khina aaya eti ya 36.

otu aaza raku okantipu; kintta omwaawanyela haakhi na paathuli yoori ahirutele okiwuti.’”

⁶ Mbwana Yinsa khuvira alupaka yoori: “Mwisiileze saana etthu anlupaaye namaphuka otu woohiiyi wa shariya. ⁷ Nnyizinku khariwaawanyela shariya ananthawuliwa awe apale aninvekelaaye nthana na osikhu, hatha nkhamma Ye eetta orupaza owaajipu? ⁸ Kiniwuuzani yoori Ye oniwaawanyela shariya woohirupazi. Aphano Mwaana wa Pinaatamu wakathi anrutelaavo voolumwenku apha, onteela osikanavo amini?”

Nlikaniso wa mfwarizeewu na namariphisa lumpuru

⁹ Yinsa khulupa nlikaniso mmote awoozaka atthu apale aari ojoonaaye wiya makhaamili khusala awaaatarawu azaaya. Ye khuri: ¹⁰ “Alume awiri aaviriye Nnyupa wa Nnyizinku khusala olompa; mmote aari mfwarizeewu, nkina aari namariphisa lumpuru. ¹¹ Mfwarizeewu ari wa weemela, aari olompa nkathhi-nkatthi araka: ‘Nnyizinku, miiyo kinuuushukhurwela maana miiyo aki nkhamma atthu, apale oheetetteli shariya, malatarawu ana-mararuwa, wala nkhamma namariphisa lumpuru oto ariiye apho. ¹² Miiyo kimfuka siikhu piiri wakhula sumana na kininkha zaakha khwa lifunku lakhuumi ya wakhula etile kimpatthaaye.’

¹³ Ila namariphisa lumpuru eemeliye peetiwene, ye hatha khaari wiinuwa yoori eekese otulu, ila ajipiyaka veefuwa aari ori: ‘Oo Nnyizinku koonole huruma, miiyo ki natwampi’.

¹⁴ Miiyo kiniwuuzani yoori, namariphisa lumpuru aalawiye owawe ari woohakikiwa ti Nnyizinku, ila otule woojikhupali wala. Maana otule anjiwulisaaye ontta opushuwisiwa, ila otule anjipushuwisaaye ontta owulisiwa.”

Yinsa oniwaaparikhiya asimaana

¹⁵ Atthu akina khusala awaatiisa asimaana yoori asapiwe ti Yinsa. Ila anakhiyoni awe n'oowoona khusala awaamaruwela. ¹⁶ Ila Yinsa khuwaakhuwela asimaana apale araka: “Mwiwaalikhe asimaana akiteele miiyo, mwihihwaakhattaze; maana Ofwalume wa Nnyizinku pu waaya apale eeyiye nkhamma asimaana. ¹⁷ Miiyo kiniwuuzani khweele yoori wakhula otule ahimpokherelaaye Ofwalume wa Nnyizinku nkhamma nsimaana, khanteela weettamo.”

Thaajiri na Yinsa

¹⁸ Ntunkhulu mmote khumuuzela Yinsa yoori: “Mwanliimu woosaana, kirette niini yoori kipatthe ohaayi wa mileele?”

¹⁹ Yinsa khunjipu araka: “Mwaasa wa niini okihuvelaka yoori woosaana? Khaavo ntthu woosaana woohiiyi Nnyizinku paasi. ²⁰ Weeyo onjuwa mirumo za Nnyizinku: ohiraruwe, ohuule, ohiiye, wala ohilawele oshaahiti woovonyeya, onhishimu papaa wo na mamaawo.”

²¹ Mwinyi otule khujipu yoori: “Waaza osimaana aka zooshi epo kinretta.”

²² Yinsa n'oosiila mattakhuzi apale khumuuzala yoori: “Enuuualeela etthu moote. Wuuzanyise vitthu zawo zooshi nzurukhu aya owenkhe asikhini, toowo ontta wiiyana maali pinkuuni; nawiisha ote okilotte.”

²³ N'oosiila mattakhuzi apale khwiya woozinkuwa venkivene, mwaasa yoori ye aari thaajiri nwulweene. ²⁴ Yinsa n'oomoona yoori azinkuwa khulupa yoori: “Nanna enlipaazo thaajiri weetta muufwalume wa Nnyizinku! ²⁵ Ti yookhwuya enkamiiya ovira valiphotto la sikano zayita thaajiri weettamo muufwalume wa Nnyizinku.”

²⁶ Apale aari onsiilaaye khumuuzela yoori: "Nkhama pi toowo, paani anwahaaye wuusurukha?"

²⁷ Yinsa khujipu yoori: "Etile pinaatamu ahinwahaaye Nnyizinku on-wahi."

²⁸ Aphano Pheeturu khumuuz Yinsa yoori: "Woone! Fweeyo nalikha vitthu zetthu zooshi, khusala nuulotta."

²⁹ Yinsa khujipu araka: "Miiyo kiniwuuzani khweele yoori, wakhula otule anlikhaaye nyuupa yawe ama muukhaawe, ama attwiize ama apapaze, ama aanaawe mwaasa wa Ofwalume wa Nnyizinku, ³⁰ oto onteela opokhera venkivene vathi attaapha, na omwiisho waya apokhere ohaayi wa mileele."

Yinsa oniwooza anakhiyoni awe ofwa na osisimuwa wawe

³¹ Yinsa khuwaakhuwelela othetekeli anakhiyoni awe apale khumi na awiri khuwooza yoori: "Mwisiileze! Apha nintta Yeruzaleemu, ottuukho zinttelaaawo orettikhana zooshi epile zaatikhieeyo pi manapiyu monkoni wa Mwaana wa Pinaatamu. ³² Ye onttela winkheeliwa mmakhono wa amalapo, antheyeye, anveyise, antthemele, ³³ anjaphe na amuule. Ila siikhу yattaatthu onttela osisimuwa."

³⁴ Anakhiyoni awe khuhieeleyi mattakhuzi aya apale maana aari oovitheya, yo khuhijuwi eththu aari olupaaye.

Ovonisiwa wa ntthu woohooni wa Yeriko

³⁵ Yinsa asaleelaka ofiya Yeriko, mwinyi mmote woohooni eekhaliye nshini wa tarikhi alolaka zimola. ³⁶ N'ooсиila shintto za atthu aari oviraaye, ye khuuza etthu yaari orettikhanaaye. ³⁷ Khuuza yoori: "Yinsa wa Nazareeti ti ye anviraaye."

³⁸ Aphano ye khusala akhuwa araka: "Yinsa, Mwaana wa Daawuuda, koonele huruma!"

³⁹ Atthu apale aari oviraaye khusala ammaruwela yoori anyamale, ila ye khusala atepa okhuwa araka: "Yinsa, Mwaana wa Daawuuda, koonele huruma!"

⁴⁰ Aphano Yinsa khweemela khuruma yoori atiseliwe mwinyi otule. N'ootiiseliwa khumuuzela yoori: ⁴¹ "Ontakha yoori kuuretele niini?"

Ye khujipu yoori: "Mbwana, kintakha kirutele woona."

⁴² Attaaphale Yinsa khumuuz yoori: "Ona! Amini yawo yoovonisa."

⁴³ Nasaapiru ye khurutela woona, khusala anlotta Yinsa ansifwaka Nnyizinku. Wakathi atthu ooniyeovo etile yaarettikhaniyeeyo, khunsifu Nnyizinku.

19

Yinsa na Zakewu namariphisa lumpuru

¹ Yinsa khuvira sitati ya Yeriko ettaka olawa. ² Ottuukho aariwo mwinyi mmote aari wiitthiwaaye Zakewu, ntunkhulu wa anamariphisa lumpuru na aari thaajiri. ³ Ye aari otakha omoona Yinsa, ila khuhisala awahi mwaasa woofupheya channu na atthu aari enkeene. ⁴ Aphano khutthira khulokoza khulawa khuwela mmutthi yoori awahi omoona, mwaasa yoori Yinsa aari weettela ovira attaaphale.

⁵ Yinsa n'oofiya puuro etile, khweekesa otulu khumoona khumuuz yoori: "Zakewu, waakuve wiishukhe, leelo kinttela omaka vaje vavo."

⁶ Attaaphale, ye khwiishukha wa waakuvavo khumpokherela Yinsa na furaha.

⁷ Atthu apale akinoko aari woonaaye vitthu epile, khwaaza ottettha araka: "Nka mooneni otu onttela omaka vaje wa natwampi!"

⁸ Zakewu khulankha khweemela khumuuzza Mbwana yoori: “Woone Mbwana! Kintta Owenkha asikhini phantte moote ya maali zaka na apale kaari oweeyelaaye, kintta owaarutiselis swaafu nne.”

⁹ Aphano Yinsa khulupa yoori: “Leelo vaje apha yafiyavo nusura maana otu na-ye peewu ya Eburahiima. ¹⁰ Mwaasa yoori Mwaana wa Pinaatamu ateela oweekesa apale aashikhiyeeyo awoosuru.”

Nlikaniso wa nzurukhu khumi wa feeta

¹¹ Yinsa aattameliyeovo Yeruzaleemu, atthu khusala oopuwela yoori Ofwalume wa Nnyizinku waari oteela orettikhana nasaapiru. Aphano Yinsa khulupa nlikaniso opu araka: ¹² “Nlume mmote w'oojama wootafikhana, aasaafiriye khulawa nti woolepawo yoori athawaziwe ofwalume nawiisha aruti. ¹³ Ahinalawe khuwaakhuwela akarumeya awe khumi, wakhula mmote khumwinkha nzurukhu wa feeta* khuwooza yoori: ‘Mwirettele zanshara mpakha miyo oruti.’

¹⁴ Ila atthu a mmuti mwawe khwiya awiiphiiriwa, khunruma waziri onlotta olawa olupa yoori: ‘Khanimweepu wiiya mfwalume ethtu.’

¹⁵ N'ooothawaziwa ofwalume khurutela owawe, khulawa khuwaakhuwela akarumeya awe apale aawenkhieeyo nzurukhu wa feeta yoori ajuwe fwayita apattheliyeeyo wakhula ntthu.

¹⁶ Khuta otule wamwanzo khulupa yoori: ‘Mbwnana, nzurukhu opule mmote mwaakinkhiyeeyo kapatthela fwayita, wafiya khumi.’

¹⁷ Mbwnanaawe khunjipu yoori: ‘Waretta saana, o karumeya wa waamineya. Mwaasa yoori weeyo waamineya khwa vitthu vattithiiru, aphi onttela wiiya mfwalume wa sitati khumi.’

¹⁸ Otule waphiiri khuta khulupa yoori: ‘Mbwnana, nzurukhu enu opule mwaakilikheliyeeyo, kapatthela fwayita wafiya mitthaanu.’

¹⁹ Khumuuzza yoori: ‘Kemaani, weeyo onttela wiiya mfwalume wa sitati thaanu.’

²⁰ Otule wa wiishela khuta khulupa yoori: ‘Mbwnana, nzurukhu enu opu, miyo kaatthiiye mmufukho khuthokorela. ²¹ Miyo keetta owoovani mwaasa woojuwa yoori mweeyo mwa awoopisa, mwinthuula ethtu mwi-hithokoreleeni na mwinuurula mwihizaleeni.’

²² Mbwnana otule khuri: ‘Karumeya wootakhala rooho! Kintta wuuphuka khwa mattakhuzi awo atthaapo! Weeyo waajuwiyiye yoori ki ntthu wa woopisa, kinthuulavo etile kihithokoreleeni na kinuurula etile kihizaleeni. ²³ Khi wahaathuuliye nzurukhu aka ottha mpango n'ooruti kisikana ot-theerelaniye?’

²⁴ Khuwooza apale aari attaphale yoori: ‘Mwinnyakanye nzurukhu aya opo mwimwinkhe otule ariina khumi.’

²⁵ Yo khujipu yoori: ‘Otu aya mwinlupaaye yoori nimwinkhe onaaye nzurukhu khumi!’

²⁶ Mbwnana khulupa yoori: ‘Kiniwuuzani khweele yoori otule ariina ontta weekezelawa, otule ahina hatha etile ariina ontta onyakanyiwa. ²⁷ Maatuwi aka apale ahaari okitakhelaaye ofwalume, mwiwaatiise apha ooliiwe ki-woonaka.’

Ofiya wa Yinsa Yeruzaleemu

²⁸ Paata ya wiisha olupa mattakhuzi apale, Yinsa khusala avira awelelaka eettaka Yeruzaleemu. ²⁹ Asaleelaka ofiya nti wa Betifwaye na wa Betaaniya

* ^{19:13} Hisapu ya wakhula karumeya aari opokheraaye yaari ofiyela ya nyeezi mine.

kharipu ya mwaako Oluveera[†], khuwaalokozisa anakhiyoni awe awiri. ³⁰ Khuwooga yoori: "Mwilawe mmuti mphule, mwifiyaka mwinlawa mwansikane mwaana wa puuru afukeleliwe woohaazi opakhiriwa. Mwimfukule mwintiise. ³¹ Amana apuwa nthu awuuzelani yoori: 'Mwinimfukulela-ni?' Mwinjipu yoori: 'Mbwaneeetthu ti ye anintakhaaye.'"

³² Apale aawaarumiyeeyo khulawa khusikana nkhamma ethhiipile aalupiyeezo Yinsa. ³³ Wakathi aari omfukulaavo mwaana wa puuru otule, ennyewe khuwoozela yoori: "Mweyo! Mwaana wa puuru oto mwintimfukulela-ni?"

³⁴ Yo khujipu yoori: "Mbwaneeetthu ti ye anintakhaaye."

³⁵ Aphano khuntiisela Yinsa, yo khuttattikhavo kuwo zaya vapusu Ye khupakhiravo. ³⁶ Ataaka Yinsa, attu khusala attattikha kuwo zaya ntarikhi.

³⁷ Wakathi aattameliyeovo vamwiishukhelo wa mwaako Oluveera, khuntti ya anakhiyoni ooshi khwiya oofurahi khwaaza onyakula ansifwaka Nnyizinku khwa minjuza epile ooniiyeeko, ³⁸ araka:

"Attottopeliwe mfwalume antaaye
khwa nzina la Mbwana.
Yiiyewo heeri pinkuuni
na siifwa otulu."

³⁹ Mafwarizeewu apale aari vakathi wa atthu apale khusala amuuza Yinsa yoori: "Mwanlimu, owoze anakhiyoni awo anyamale."

⁴⁰ Ye khuwooga yoori: "Atthu apa amana anyamala, mawe pi anttelaaaye onyakula."

Yinsa onila oonelaka huruma Yeruzaleemu

⁴¹ Wakathi Yinsa afiyeevo Yeruzaleemu, nawoona sitati etile khulila, ⁴² araka: "Oo! Yeruzaleemu, eriwaka waari onjuwa otule aniwinkhaaye heeri leelo! Ila apho epo zaya zavitheya khwa weyo. ⁴³ Onlawa wafiye wakathi maatuwi enu anttelaaaye wuukukuttelani phantte zooshi ari mmaphotto mwaya. ⁴⁴ Onttela ophwanteliwa vamote weeyo na aanaawo, khalinlawa osala hatha liwe vatulu wa liwe nzaaya, maana weeyo khumpokhereleeni Nnyizinku wakathi aateeliyeeyo owuusuru."

Yinsa Nnyupa wa Nnyizinku

⁴⁵ Yinsa khuvira Nnyupa wa Nnyizinku khusala aweekara apale aari wuuzanyisaamo, ⁴⁶ awoozaka yoori: "Yaatikhwa yoori: 'Nyuupa yaka enttela wiiya nyuupa yoolompiwamo, ila mweeyo mwarettisa wiiya puuro ya malatarawu.'

⁴⁷ Wakhula siikhu Yinsa eetta onozela Nnyupa wa Nnyizinku, ila attunkhulu a mahaakhimu a tiini, anamanozela a kano na anamalokozela a atthu aari weekesa shawuri zoomuula, ⁴⁸ ila khuhisala apattha nanna yooretta, maana atthu ooshi aari omwiitaalela Ye n'onsileza.

20

Ofwalume wa Yinsa na woosa wa Yaahaya

¹ Siikhu moote, Yinsa aari owaanozela atthu Nnyupa wa Nnyizinku na awaatafusirelaka hapari zooshapweya. Nttumphule khutamo attunkhulu a mahaakhimu a tiini, anamanozela a kano na anamalokozela a tiini. ² Yo

[†] 19:29 Oluveera muutthi oriina mishumo zaya enriwaaye azetoona.

khusala amuuzela araka: "Vithu epi onrettana ofwalume-ni, wala ti paani awinkhiyeeyo ofwalume aya opo?"

³ Yinsa khuwaajipu yoori: "Na-miyo kintta owuuzelani ethu moote mwikuze; ⁴ woosa wa Yaahaya waari wa pinkuuni ama wa anaatamu?"

⁵ Yo khusala oozelana atthaaporu araka: "Amana nilupa yoori wa pinkuuni, onnta onnuuzela yoori: 'Khi mwaasa aya niini mwhinkhupale-laka?' ⁶ Na amana nilupa yoori waari wa anaatamu, atthu ooshi antta onivonya na mawe maana ankupalela yoori Yaahaya napiyu."

⁷ Attaaphale yo khujipu yoori: "Khanijuweeni nlupa amwinkhiyeeyo ofwalume."

⁸ Aphano Yinsa khuwooza yoori: "Na-miyo akiniwuuzani ofwalume kin-rettanaaye vitthu epi."

Anamalima oohisuhi

⁹ Yinsa khulupa nlikaniso awoozaka atthu yoori: "Aarivo mwinyi mmote aazaliyeeyo mmashapa mwawe miitthi za wuuva, khuweekesa atthu yoori asala alimela, ye khulawa safwari yawe khwiikhala siikhu za waatta. ¹⁰ N'ooziya wakathi wa wuurula khunruma karumeyaawe mmote yoori alawe enkiwe wuuva, ila anamalima apale khumpiya, khumwiikara woohimwinkhi etthu. ¹¹ Mwennyewe nshapa khunruma nkina, na oto theenya yo khunveyisa, khumpiya khumwiikara woohimwinkhi etthu. ¹² Aphano khunruma wattaatthu, anamalima apale khumpiya, khunvulaisa na khumwiikara.

¹³ Paata ya toole, mwennyewe nshapa khusala oopuwela araka: 'Kiretteni? Aa! Kintta onruma mwanaka kinimphetachaaye, n'oomoona khweele khweele antta onhishimu.'

¹⁴ Anamalima apale wakathi amooniyeovo mwaana wa mwennyewe nshapa ntthile khulupa yoori: 'Namarithi nshapa ntthi ti otu. Olawa nimuule, liye leetthu.' ¹⁵ Khunsukhumela othetekele wa nshapa khumuula.

Mwennyewe nshapa ontela owaarettela niini? ¹⁶ Ye onnta ota awoole anamalima apale, nshapa laya ntthile awenkhe atthu akina."

Atthu apale aariivo n'oosiila mattakhuzi apale khulupa yoori: "Zihiret-khane vitthu epo!"

¹⁷ Yinsa khuweekesa khuwoozela yoori: "Maana a mattakhuzi apa aatikhiweeyo anlupa-ni?

'Liwe ntthile eeseliyeeyo anamajeka nyuupa,
larettiwa wiiya liwe lootafikhana zayita mawe ooshi.'

¹⁸ Otule anttelaaye okwela liwe nttho onnta onyeneyaya, na otule lininkwe-laaye onnta osakeya eeye lifufu."

Wuuzela monkoni wa lumpuru

¹⁹ Attunkhulu a mahaakhimu a tiini na anamanozela a kano khusala eekesa nanna yonkhola wakathi otthuupule, maana yo aajuwiye yoori nlikaniso opule oniwaalupa yo. Ila khuhisala akholeya mwaasa woowoova atthu apale aari attaaphale.

²⁰ Aphano yo khusala anlupattha, khuwaaruma atthu aari ojinkhele-laaye wiiya anashariya onsaya sirini, yoori ansikanane paathuli ankhole anlawane wa mfwalume.

²¹ Yo khusala amuuzela yoori: "Mwanliimu, fweeyo najuwa yoori onttakhula na onnozela epile ziiyiyeeyo za shariya, ninjuwa yoori khuninthawula ntthu, onnozela haakhi wa nanna Nnyizinku antakhaazo.

²² Nkanuuze, nkhama ti yooshapweya oriph'a lumpuru la Seezari ama wala?"

²³ Yinsa khujuwa olavilavi aya khuwooza yoori: ²⁴ "Nkakitiiseleni nzu-rukhu apha. Ratarato eti vanzurukhu apha ti yaani?" Atthu khujipu yoori: "Ti ya Seezari!"

²⁵ Khuwooza yoori: "Mwimwinkhe Seezari etile yiyyiye ya Seezari na mwimwinkhe Nnyizinku etile yiyyiye ya Nnyizinku."

²⁶ Yo khuhisala ansikanana hatha paathuli vakathi wa atthu apale; khwi-iya ootikinisiwa pi mattakhuzi apale aajipwiweeyo ti Yinsa, yo khunyamala.

Wuuzela monkoni woosisimuwa

²⁷ Masatukhi apale ahaari okhupalaaye osisimuwa wa anamfwa, khulawa akina khumwaattama Yinsa. ²⁸ Khusala alupa yoori: "Mwanliimu, Munsa aatikha yoori, nlume amana afwa, muukhaawe ahinvokoleenei mwaana, ona yooraliwa ti ttwiye ampatthele aana eeye a marehemu ttwiye. ²⁹ Aarivo attwi sapa: otu nwulu aya khuloola khufwa, muukhaawe ahimpattheleeni mwaana. ³⁰ Khuraliwa ti ttwiye, khufwa ahimpattheeni mwaana, ³¹ khuraliwa ti ttwiye wattaatthu, khufwa ahimpattheleeni mwaana, ooshi apale sapa khufwa woohimpattheli mwaana. ³² Omwiisho waya muukha otule khufwa. ³³ Siikhu yoosisimuwa ontela wiiya muukha waani maana oosaapa anraliye?"

³⁴ Aphano Yinsa khuwaajipu yoori: "Atthu a voolumwenku apha an-loola na anraliwa. ³⁵ Ila atthu apale anttelaaye osuhi olawa pinkuuni noosisimuwa muufwa, khanlawa ooloala wala oralika; ³⁶ maana kham-fwa theenya, anttela wiiya nkhama malayikha na aana a Nnyizinku, mwaasa yoori asisimuleliwa muuhaayi. ³⁷ Hatha napiyu Munsa athoonyeza monkoni woosisimuwa wa anamfwa, wakathi moottho opule waari ok-holelaaye vamutthi nwishi, ye khunkhuwela Mbwana yoori, Nnyizinku wa Eburahima wa Esiyaakha na wa Yaakhumpa. ³⁸ Eto enthoonyeza yoori Nnyizinku khahiyo wa anamfwa, Nnyizinku wa atthu awoona. Maana khwa Ye atthu ooshi anaaye ohaayi."

³⁹ Anamanozela akina a kano apale aari attaphale khumuuzha yoori: "Wajipu saana Mwanliimu!" ⁴⁰ Khuhiivo hatha ntthu kiina wootakha omuuzela theenya.

Al-Masiihu Mbwana wa Daawuuda

⁴¹ Elottelanaka Yinsa khuwoozela yoori: "Mwaasa aya niini atthu alupaka yoori Al-Masiihu mwaana wa Daawuuda?

⁴² Daawuuda alupa nkithaapu ya Zaapuuri yoori:

'Mbwana Nnyizinku,
amuza Mbwanaaka yoori:
"Wiikhale nkhono-nlume aka,
⁴³ mpakha miiyo kitthe
moolu awo vatulu wa maatuwi awo."'

⁴⁴ Nkhama Daawuuda onimwiittha Al-Masiihu yoori Mbwana, enret-tikhana toovi wiiya mwanawee?"

Yinsa na anamanozela a kano

⁴⁵ Atthu ooshi khusala ansileza, Yinsa khuwooza anakhiyoni awe yoori:
⁴⁶ "Phoole na anamanozela a kano, apale woowaatuvela owala ajapi zoolepisana, ochelisiwa vaparasa na woowaatuvela wiikhala puuro za wiilokozi nnyupa woosifwiwamo Nnyizinku na puuro za wiilokozi vanjampo,
⁴⁷ aniweeyelaaye anamfweliwa pi amanna zaya vitthu zaya*", ajinkhaka oretta lompa zoolepa. Apo aya anlawa apokherele hukhmu khuluyeene."

21

Zaakha ya muukha woofweliwa ti mannawe

¹ Yinsa khuwoona mathaajiri alazaka zaakha zaya atthaaka n'yopo ya zaakha. ² Khumoona theenya nunu mmote wa masikhini woofweliwa ti mannawe, alazaka zaakha ttoosu piiri. ³ Yinsa khulupa yoori: "Kiniuuuzani khweele yoori nunu otu wa masikhini woofweliwa ti mannawe, enkha zayita atthu ooshi. ⁴ Maana apale ooshi na othaajiri aya enkha tathela na khusalana, ila nunu otu na osikhini awe enkha wooshi aari ororomelaaye."

Yinsa onlupa monkoni wa woopwechiwa Nyuupa ya Nnyizinku

⁵ Anakhiyoni awe akina khusala attottopela Nyuupa ya Nnyizinku yaajekaniweeyo mawe ooshapweya na vitthu zaatthiiweemo zoolaziwa nkhamma zaakha, Yinsa khuwooza yoori: ⁶ "Enlawa zafiye siikhu vitthu zaya epo mwinoonaazo zinttelaavo opwecheliwa, maana Khalinlawa olikhiiwa liwe vatulu wa liwe nzaaya."

Olupaththiwa na ohoowa

⁷ Yo khumuuzela yoori: "Mwanliimu, vitthu zaya epo zinteeela orettikhana lini? Wala alama-ni enttelaaye onijuwisa yoori zasaleela orettikhana?"

⁸ Yinsa khuaajipu yoori: "Phoole! Mwihihatiwe, maana anlawa apuwe atthu a waatta araka, 'Al-Masihu ti miyo!' ama 'Wakathi wafiya!' Ila mwihiwalotte apo aya. ⁹ Amana mwisilaka viittha ama nzuuzu mwihoove, maana epo zaya zina yoorettikhana khapula, ila wakathi aya opo khahiyoo wiisha w'oolumwenku."

¹⁰ Yinsa khulupa theenya yoori: "Khapila moote enlawa yoomanane na khapila kiina, na ofwalume woomanane ofwalume nzaaya. ¹¹ Phantte za waatta za miti zinlawaa zapuwe visikinyaatthi khulu-khulu, jala, marati, vitthu zootkinisa na theenya alama khulu-khulu zoolankha pinkuuni.

¹² Khapula zihinarettikhane vitthu zaya epo, mwinlawa mwalupaththiwe, mwilawaniwe mmakhono wa afwalume na mahaakhimu, mwiphukiwe nnyupa woosifwiwamo Nnyizinku, mwifukeliwe mwaasa wookilotta miyo. ¹³ Enttela orettikhana yoori wiiye oshaahiti enu. ¹⁴ Mwiye awiitthaaza rooho zenu, mwiishukulikhele ethtu mwinttelaaye ojipu mmana ofiya wakathi aya opo. ¹⁵ Maana miiyo kinlawa kawinkheni mattakhuzi na ojuwa nanna yoowajipu maatuwi enu, ahinttelaaye owahi ozukulisa wala okheeti. ¹⁶ Mwinlawa mwafukisiwe wa afwalume pi apapazenu, attwiizenu, ajamaazenu na ashirikha enu, akinoko a mweeyo anlawa ooliwie. ¹⁷ Atthu awaatta anttela wiiya awiiphiriwa ti mweyo mwaasa wa nzina laka. ¹⁸ Ila hatha nyuuli yenu moote khinlawa waashikha. ¹⁹ Mwiye woovilela, toowo mwintta wuusurukha."

Yinsa onrutela olupa opwechiwa Yeruzaleemu.

* ^{20:47} Aniwaajelaaye anamfweliwa pi amanna zaya khwa luuka ya ekereeku.

²⁰ Yinsa khulupa theenya yoori: “Amana moona sitati ya Yeruzaleemu ezukuleliwe pi anajanka, mwijuwe yoori wafiya wakathi woopwechiwa. ²¹ Aphano apale anttelaaye wiya nti wa Yudeya atthirele omwaako, apale anttelaaye wiya nsitati atthiremo na apale anttelaaye wiya ntthuttu ahirutele ositati. ²² Maana siikhu zaya epo enttela wiya siikhu za hukhumu khuluyeene yoori erettikhane zooshi epile zaatikhiiweezo nkaththi wa nt-takhuzi la Nnyizinku. ²³ Atakhalawa muukha otule anttelaaye osikaniwa ari wa wiimitha ama eettaka waamwisa siikhu zaya epo, maana vatuniya an-lawa apuwevo mashakha mawulweene na hukhumu vakatthi wa anaatamu ooshi. ²⁴ Awaatta anttela wuuliwa na phanka, akinoko athuuliwe nkhamma anapherezu eettettsiwaka miti zooshi z'oolumwenku. Yeruzaleemu enlawa yakurumuliwe pi amalapo mpakha yenzi ya amalapo wiisha.”

Ota wa Mwaana wa Pinaatamu

²⁵ Yinsa khuvira awoozaka theenya yoori: “Zinlawaa zeeyeve alama vanjuwa, vamweezi na vamatthottowa. Atthu a voolumwenku anteela wi-iyana huzuni na woova nwulweene mwaasa woottithima na otapanyeya wa pahari. ²⁶ Anlawa azirikhe atthu a waatta mwaasa wa woova vitthu zinttelaaye orettikhana voolumwenku, maana owahi wa pinkuuni ontela osakhinyeya. ²⁷ Aphano phi anttelaavo wooneya Mwaana wa Pinaatamu ataaka enakthi-nkaththi ya mawiki na owahi na nuuru khuluyeene. ²⁸ Mmana zaazaka vitthu zaya epo, mwilankhe mwiiniwe mweekese otulu, maana wuusurukha wenu ori kharipu na-mweyo.”

Nlikaniso wa mfikeera

²⁹ Elottelanaka Yinsa khulupa nlikaniso mmote araka: “Moone mfikeera na miitthi zooshi. ³⁰ Amana aazaka ophutuwela mathapa aya, mwinoona na mwinjuwa yoori wasaleela ofiya mwiita. ³¹ Wa nanna ethiipo, amana moona zirettikhana vitthu epo, mwijuwe yoori Ofwalume wa Nnyizinku wasaleela ofiya.

³² Miiyo kiruuuzani khweele yoori atthu apa aleelo khanlawa ofwa ooshi vitthu epi zihirettikhaneeni. ³³ Pinku na vathi zooshi zinteela ovira, ila mattakhuzi aka khanviraru.”

Owahi woojeekesela

³⁴ Yinsa khulupa yoori: “Mwiye woojeekesela yoori rooho zenu zi-hipakhire vitthu zoohifwayi, ohapaliwa, ama tafwawuthi za muuhaayi mwunu, yoori siikhu yaya ethiito ehuusikaneleni. ³⁵ Maana siikhu yaya eto enttela owaatael atthu ooshi a voolumwenku nkhamma nraakho. ³⁶ Mwiye woojeekesela na olompa wakhula wakathi, yoori zuuwerawereni vitthu zaya epo zinttelaaye orettikhana na yoori mwapatthe weemela omaasho wa Mwaana wa Pinaatamu amana ata.”

³⁷ Yinsa wakhula siikhu aari onozela vaje wa Nyuupa ya Nnyizinku, immana oripa aari weettaka vamwaako Oluveera khwiya ottuukho mpakha ocha. ³⁸ Atthu ooshi supuyeeene aari weettaka vaje wa Nyuupa ya Nnyizinku olawa osiila vitthu aari onozelaazo Yinsa.

Shawuri za wuuliwa Yinsa

¹ Osaleelaka ofiya wakathi woorettiwa njampo la phaawu yoohiina fwaramento, liniitthiwaaye Paashikowa*, ² attunkhulu a mahaakhimu a tiini na

* ^{22:1} Nzina la Paashikowa lina maana a wakathi Nnyizinku awaataphulyeeyo Meezirayeele mmakhono wa Amisuri.

anamanozela a kano aari owaza shawuri zoomuula Yinsa sirini, khuhisala ewahaya mwaasa woooova athu.

³ Ila Epiliisi khumweetta Yuuda, aari wiittheliwaaye Shikariyooti, wa khunti ya apale khumi na awiri. ⁴ Ye khulawa osiilanana attunkhulu a mahaakhimu a tiini na attunkhulu a anamweekesela a Nyuupa ya Nnyizinku, yoori eekese shawuri yonkholisa Yinsa. ⁵ Yo khuwaatuvela khumwaahiti Yuuda omwinkha nzurukhu wa feeta. ⁶ Ye khukhupali khusala eekesa kiphenyo yonkholisa Yinsa, woohiivo hatha ntthu.

⁷ Khufiya siikhu yoorettiwa njampo la phaawu yoohiina fwaramento, siikhu yaya ethiito yaarina yootwahiwa pwittipwithi yoojeliwa Paashikowa. ⁸ Yinsa khunruma Pheeturu na Yaahaya araka: "Mwilawe mwaattalele etthu-yoojiwa ya Paashikowa."

⁹ Yo khumuuzela yoori: "Ontakha naattalele vayi?"

¹⁰ Ye khuwaajipu yoori: "N'oofiya ositati mwinlawwa mwansikane mwinyi apwecheriye yuuku ya maati. Mwinlotte mpakha nyuupa anttaamo.

¹¹ Mwimuuze mwennyewe nyuupa yaya eto yoori: 'Mwanliimu eetta oniruma owuuzelani yoori puuro anttelaaye ojavo njampo la Paashikowa na anakhiyoni awe pi vayi?' ¹² Othuuto ontaa wuuthoonyezani nsana nwulweene wa vatulu oriina zaana zooshi, mwaattalele attaapho njampo nttho."

¹³ Yo khulawa khusikana epile Yinsa aawooziyezo, khwaattalela etthu-yoojiwa ya Paashikowa. ¹⁴ N'oofiya wakathi Yinsa na maaswihaapa awe khwiikhala vameeza. ¹⁵ Khuwooza yoori: "Kaari ohithajija venkivene onja Paashikowa vamote na-mweyo kihinalawee ohoowa. ¹⁶ Kiniwuuzani yoori akintela oja theenya njampo ntthi mpakha linttelaavo omariseliwa muufwalume wa Nnyizinku."

¹⁷ Athuuliyeovo jiikira khunshukhurwela Nnyizinku, khuwooza yoori: "Mwithuule mwaawanyena. ¹⁸ Kiniwuuzani yoori akinrutela onywa nshumo wa nrayı wa wuuvaa mpakha ontaavo Ofwalume wa Nnyizinku."

¹⁹ Athuuliyeovo phaawu khunshukhurwela Nnyizinku, khumeya khuwenkha khuwooza yoori: "Opu mwili aka onttelaaye ovahiwaa khwa mweeyo, mwisala mwiretta ethiipi mwifikifkhiraka miiyo."

²⁰ Khwa nanna ethiito nawiisha oja khuthuula jiikira khulupa yoori: "Jiikira eti wahati mpheya onrettiwaaye ti taamu yaka, enttelaaye wiittikhia khwa mweeyo.

²¹ Ila mwijuwe yoori, otule anttelaaye okikhola ori vameeza attaapha vamote na-miyo. ²² Mwaana wa Pinaatamu onttela ofwa khwa nanna ethiipo Nnyizinku asharutheliyezo. Ila atakhaliwa otule anttelaaye onkhola.

²³ Yo khusala oozelana atthaaporu yoori anjuwe nlupa aari weettelaaye oreitta etthu yaya eto.

Nttunkhulu muufwalume wa Nnyizinku ti paani?

²⁴ Aphano maaswihaapa khusala anyakulisana atakhaka onjuwa paani eezelieeyo ottunkhulu vakatthi vaya. ²⁵ Yinsa khuwooza yoori: "Afwalume a vathi apha aniiyana oshintta vakatthi wa athu aya, na apale aneettisaaye ofwalume oniwaatuvela olupeziwa onamarettaa saana. ²⁶ Ila mweeyo mwihiiye toowo, nttunkhulu vakatthi venu eeye ti ntiithi aya, otule anlokozelaaye eeye ti namarumeyela aya. ²⁷ Nttunkhulu ti paani, ti otule aniikhalaaye vameeza ama otule anrumeyaaye? Khaniya otule aniikhalaaye vameeza? Ila vakatthi venu mweeyo, miiyo kiri nkhamma otule anrumeyaaye. ²⁸ Mweeyo ti ye mwiriiye vamote na-miyo mphule

kinzayiniwaamo. ²⁹ Nkhama ethiipo Paapa akinkhiyeeyo ofwalume, na miiyo kiniwinkhani mweeyo, ³⁰ yoori mwije na mwinywe vameeza vaka muufwalume mwaka, na mwiikhale vakhukulu y'oofwalume yoori mwi-phuke mahimo khumi na mawiri a Ezirayeеле.

³¹ Simawu, Simawu, Epiliisi avekela yoori awootooten i nkhamma empepet-thiwaazo tiriku. ³² Ila miiyo koolompela yoori amini yawo ehwaashikhe. Amana orutela wiiya vamote na-miyo, owaalipisele azaawo."

³³ Simawu khujipu yoori: "Mbwanaaka, miiyo kakhupali wuulotta hatha nkhamma nklapooso, hatha nkhamma ofwa."

³⁴ Ila Yinsa khujipu araka: "Miiyo kiniwuza weeyo Pheeturu yoori leelo eti likukhuwi lihineekhe, onkikhana swaafu ttatthu oraka khunkijuwa."

³⁵ Aphano Yinsa khuwooza araka: "Wakathi opule koorumiyeenini mwi-hina hatha mfukho wala napampa, ama shapatthu, niini yoosaleeliy-enini?"

Yo khujipu yoori: "Hatha eththu khayaanisaleeliye."

³⁶ Ye khuwooza yoori: "Ila nasaapi eti otule ariina mfukho athuule na napampa awe anthuule. Otule ahina phanka oozanyise ajapi yawe oozanye.

³⁷ Nkhama ethiipo Nttakhuzila Nyizinku linlupaazo yoori: 'Ye onaalakiwa nkhamma nanretta zootakhala.' Miiyo kiniwuuzani khweele yoori sharuthi vitthu epi zirettikhane khwa miiyo, maana etile yaatikhieeyo monkoni wa miiyo ena yooretikhana."

³⁸ Maaswihaapa apale khulupa yoori: "Fweeyo apha Mbwana ninaaye phanka piiri." Ye khujipu araka: "Weesha mwaasa aya opo!"

Yinsa onlompa vamwaako wa Oluveera

³⁹ Khulankha khusala alawa vamwaako wa Oluveera nkhamma ethiipo aazowereliyezo, anakhiyonu awe khunlotta. ⁴⁰ N'ooifiya khuwooza yoori: "Mwilompe yoori mwihiwakele muuzayiniwa." ⁴¹ Ye khuwaasusa vattithi-iru[†] khukokhora khusala alompa araka: ⁴² "Paapa amana otakha, okilaze jikira eti yoohoowa; ila ehirettikhane otakha waka miiyo, arettikhane matakhelo awo." ⁴³ [Aphano khumpuwelela nlayikha la pinkuuni khusala linlipisela. ⁴⁴ Ari mmashakha, khusala alompa woojilipisavo, mattottonka oovujuwela wawe khuretteya wiiya taamu khusala akwela vathi.]‡

⁴⁵ N'oolaavo aphale aari olompaavo, khweetta aphale aariivo anakhiyonu awe, khuwaasikana eettaka olala mwaasa woohuzunikha. ⁴⁶ Khuwoozela araka: "Mwinlala-ni? Mwilankhe mwilompe yoori mwihiwakele muuzayiniwa."

Okholiwa wa Yinsa

⁴⁷ Eettaka ottakhula ethiipile, khutavo atthu a waatta alokoziwe ti mmote wa anakhiyonu apale khumi na awiri aari wiiithiwaaye Yuuda. Ye khuta aphale aariivo Yinsa yoori amwinkhe peezyu. ⁴⁸ Attaaphale Yinsa khuri: "Yuuda, Mwaana wa Pinaatamu oninkholisa na peezyu?"

⁴⁹ Anakhiyonu awe nawoona vitthu epile khulupa yoori: "Mbwana, ni-woomanane na phanka?" ⁵⁰ Aphano anakhiyonu mmote khunshija nshiilo la nkhone-nlumé mwiitthwaana wa haakhimu nwulu wa tiini.

⁵¹ Ila Yinsa khuri: "Onlikhe ohinrutele!" Ye khukhola nshiilo la ntthu otule khunvonisa.

† 22:41 Owaasusa vattithiiru: luuka ya Ekereku ena maana 'yoosusa kiyasi ya likolokotto la weesiwa.' ‡ 22:44 Aaya epi kithaapu kiina zaraku khina.

⁵² Aphano Yinsa khuwoozela attunkhulu a mahaakhimu a tiini na attunkhulu a anamweekesela a Nyuupa ya Nnyizinku na anamalokozela a tiini apale aateeliye onkhola araka: “Mwakiteela na phanka na puutta nkhamma kiiyiye namalokozela wa anazompere? ⁵³ Wakhula siikhu kaari wiyya vamote na-mweyo vaje wa Nyuupa ya Nnyizinku khuhisala mwikikhola, aphano, opu wakathi enu na otule ariina ofwalume wa n’yiiza.”

Pheeturu oninkhana Yinsa

⁵⁴ Aphano Yinsa n’ookholiwa khulawaniwa mpakha vaje wa haakhimu nwulu wa tiini. Pheeturu khusala anlottelela Yinsa woohimwaattami. ⁵⁵ Yo khukhoza moottho vaje khusala oottha, na-ye Pheeturu khuta attaapho khwiikhala. ⁵⁶ Njaazi mmote aariivo n’oomoona eekhaliye nshini wa moottho khumweekesa saaneene khuri: “Otu aari vamote na Yinsa.”

⁵⁷ Pheeturu khukhana araka: “Weyo mwanankha! Miiyo akininjuwa ntthu aya oto.”

⁵⁸ N’oovira wakathi vattithiiru, Pheeturu khooniwa ti ntthu nkina kumuuy yoori: “Weeyo o wa khuntti ethiitile.”

Ila Pheeturu khukhana araka: “Mwinyi, khahiyi miiyo!”

⁵⁹ Oviriyeovo wakathi mmote, ntthu nkina theenya khulupachacha yoori: “Khweele-khweele otu aari vamote na-ye, maana otu aya na-ye nkalileya.”

⁶⁰ Pheeturu khujipu araka: “Mwinyi! Miiyo akinjuwa etthu mwinlu-paaye.” Eettaka ottakhula ethiipile, likukhuwi khwiikhala. ⁶¹ Mbwana khuzukuluwa khumweekesa Pheeturu, ye khufikhiri mattakhuzi apale ooziveeyo ti Mbwana yoori: “Leelo ethiiti likukhuwi lihineekhe, onteela okikhana swaafu ttatthu.” ⁶² Pheeturu khulaavo aphale vaya khusala alila ari wookafilikha.

⁶³ Atthu apale aari omweekeselaaye Yinsa khusala anveyisa na ompiya, ⁶⁴ khumfinikha omaasho wawe khusala amuuzelaa yoori: “Weeyo khahi o napiyu? Onluge otu oopiyiyeyo!” ⁶⁵ Khusala anlupeza mattakhuzi a waatta a mattukhano.

Yinsa onlawaniwa wa amashawuriyya awulu

⁶⁶ N’oocha khukusanyeya attunkhulu a mayaahuuti, attunkhulu a mahaakhimu a tiini na anamanozela a kano, khuthuuliwa Yinsa khulawaniwa nhali anthukumanaamo attunkhulu oophuka milattu. ⁶⁷ Khusala amuuzelaa yoori: “Nkahaya, nkanuze nkhamma weeyo o Al-Masiihu.”

Ye khujipu araka: “Amana kiwuuzani khamwinkaamini, ⁶⁸ na amana kiuuuzelani khamwinkijipu.” ⁶⁹ Ila waaza nasaapi ethiiti Mwaana wa Pinataamu onttele wiikhala nkhone-nlume wa Nnyizinku Woowahi.”

⁷⁰ Aphano ooshi khumuuzela yoori: “Apho niri weeyo o Mwaana wa Nnyizinku?”

Yinsa khujipu araka: “Mweeyo mwalupa yoori ti miiyo.”

⁷¹ Yo khulupa yoori: “Nininhithajiya shaahiti theenya? Mwennyewe alupa na nlomo awe.”

Yinsa onlawaniwa wa Pilaatu

¹ Khulankha khuntti yooshi khunthuula Yinsa khusala anlawana wa Pilaatu. ² N’ooifiya khusala anlokoveza yoori: “Nansikana otu awaalikhisaka atthu etthu oriphla lumpuru la Seezari, khusala ajilupeza yoori ti Al-Masiihu na mfwalume.”

³ Aphano Pilaatu khumuuzela yoori: “Ti weeyo mfwalume wa mayaaahuuti?”

Yinsa khujipu yoori: “Weeyo walupa.”

⁴ Pilaatu khuwooza attunkhulu a mahaakhimu a tiini apale na khuntti ya atthu etile yaariivo yoori: “Miiyo akinimoona nana hatha paathuli otu.”

⁵ Atthu apale khusala avira akhanyarelaka olupa yoori: “Otu onta owaatapanya atthu a Yudeya yooshi eti, aaza Kalileya mpakha ofiya okhuno.”

⁶ Paata yoosiila mattakhuzi apale, Pilaatu khuuuzela yoori: “Otu aya nkalileya?” ⁷ Pilaatu ajuwiyeveo yoori Yinsa aari wa nti wa mfwalume Herooti, khuruma olawaniwa ottuukho. Wakathi aya opo Herooti na-ye aaretti ari Yeruzaleemu.

⁸ Herooti n'oomoona Yinsa, khwiyya woofurahi venkivene maana aaziye raku otakha omoona mwaasa woosiila vitthu aari orettaazo, khusala aweeja woona minjuza arettaka. ⁹ Aphano khusala amuuuzela vitthu za waatta, ila ye khuhisala anjipu hatha ethu. ¹⁰ Attunkhulu a mahaakhimu a tiini na anamanozela a kano khusala anlokoveza mattakhuzi mawulu-mawulu. ¹¹ Herooti na anajanka awe khwaaza onveyisa Yinsa na ontarawu, khunwalisa ajapi y'oofwalume khuruma yoori arutiseliwe wa Pilaatu. ¹² Herooti na Pilaatu khaari osilanaka, ila siikhu ethiito khupuwa oshirikha.

Yinsa onttela wuuliwa

¹³ Aphano Pilaatu khuwaakhuwela attunkhulu a mahaakhimu a tiini, anamaphuka milattu na atthu, ¹⁴ khuwooza yoori: “Mwakititisa otu mwinlupezaka yoori onta owaatapanya atthu, ila miiyo kamuuuzela vakathhi venu mweeyo, akimoonaneeni hatha paathuli khwa vitthu epo mwininlupezaazo. ¹⁵ Herooti na-ye khamoonaneeni hatha paathuli, ti eto arumiyeeyo orutiseliwa okhuno. Eto enthoonyeza yoori kharetteeni etthu yoosuhi wuuliwa. ¹⁶ Miiyo kintta oruma opiiwa nawiisha kinleve.” ¹⁷ [[N'oofiya siikhu ya njampo la Paashikowa, Pilaatu aarina sharuthi yoowaafukulela atthu napherezu mmote.]]*

¹⁸ Attaaphale atthu ooshi khusala anyakula araka: “Mwimuule oto! Mwinifukulele Baraba!” ¹⁹ Baraba aafukeliwe mwaasa woolaza onazompere nsitati na khumuula ntthu.

²⁰ Aphano Pilaatu khurutela owooza atthu atakhaka onleva Yinsa. ²¹ Ila atthu khusala anyakula venkivene araka: “Akhomeliwe, akhomeliwe vansalapa!”

²² Pilaatu khuwoozela swaafu yattaatthu: “Niini arettiyeeyo yootakhala? Miiyo akinimoona nana hatha paathuli yoosuhi wuuliwa. Kinruma yoori mwinhukhmu nawiisha kinleve.”

²³ Ila yo khusala avira anyakulaka avekaka yoori Yinsa alawe akhomieliwe, akhanyarelaka onyakula. ²⁴ Aphano Pilaatu khukhupalela oretta etile aari otakhaaye atthu apale. ²⁵ Ye khumfukulela Baraba otule aafukeliweeyo mwaasa woolaza onazompere na wuula, khuwenkha Yinsa otule anvekiyeeyo yoori alawe anrettele etile aari ontakhelaaye.

Simawu onthuulisiwa nsalapa wa Yinsa

²⁶ Yinsa khuthuuliwa khusala alawaniwa, eettaka olawaniwa ethiipile, khusikanowiwa mwinyi mmote wa Sireeni aari wiithiwaaye Simawu, aari olankhaaye omashapa. Khukholiwa khuthuulisiwa nsalapa opule yoori anlottisele Yinsa. ²⁷ Aari olottiwa pi atthu a waatta na aarivo aakha aari onlilelaaye ankhupanyeraka. ²⁸ Yinsa khuzukuluwa khuweekesa aakha

* ^{23:17} Warakha za raku khina aaya eti ya 17.

apale aari onlilelaaye khuwooza yoori: "Aakha a Yeruzaleemu, mwihikililele miyo, ila mwijililele mweeyo na aaneenu. ²⁹ Maana zinteela ofiya siikhu mwinttelaaye olupa yoori: 'Ashapweyiwa aakha apale oohiina mavokozi, ahinavokole na ahinaamwise.'

³⁰ Siikhu ethiito mwinlawa mwalupe yoori:

'Nyaako zinikwele
kulu zinifinikhe!'

³¹ Muutthi nwishi onretteliwa toono khi wa wuuma onttela wiiya toovi?"†

³² Khuthuuliwa theenya anazompere awiri yoori alawe ooliwe vamote na Yinsa. ³³ N'ooziya puuro eniithiwaaye Kalavaariyu‡, Yinsa khukhomeliwa na anazompere apale awiri, mmote nkhono-nlume nkina nkhono-nkha. ³⁴ [Aphano Yinsa khulupa yoori: "Paapa, owaaswaamihi atthu apa maana khanjuwa etthu anrettaaye."]§ Elottelanaka yo khwaawanyelana kuwo epile za Yinsa nkathhi wa nasipu.

³⁵ Atthu aari attaaphale aari woona zooshi. Mahaakhimu a Yudeya khusala antarawu Yinsa araka: "Ye awoosuru atthu akina, mwinlikhe ajuusuru mwennyewe nkhama khweele ti Al-Masiihu nanthawuliwa ti Nnyizinku."

³⁶ Anajanka na-yo khusala antarawu Yinsa antiiselaka viinyu yoonyunya, ³⁷ n'oomuuza yoori: "Nkhama khweele weeyo o mfwalume wa mayaahuuti, ojuusuru omweenyewe."

³⁸ Vansalapa attaaphale aakhomeliweevo, khutthiiwavo lipawu laatikhiiweeyo yoori: "OTU MF WALUME WA MAYAAHUTI."

³⁹ Anazompere apale aakhomeliweeyo vamote na Yinsa, mmote aya khusala anveyisa amuuzaka yoori: "Nkhama weeyo o Al-Masiihu, ojuusuru na onuuusurwaka na-fwego."

⁴⁰ Otule nkina khujipu ammaruwelaka nzaawe araka: "Weeyo khuni-moova Nnyizinku, ye na-fwego hukhumu yetthu moote? ⁴¹ Fweeyo khweele ninsuhi ohukhumweliwa epile nirettiyeego, ila ye kharetteeni hatha etthu yootakhalha."

⁴² Aphano khulupa yoori: "Yinsa, okuupuwele amana ofiya muufwalume mwawo."

⁴³ Yinsa khujipu yoori: "Miiyo kiniwuza khweele yoori leelo eti weeyo onttela wiiya vamote na-miyo pephooni."

Ofwa wa Yinsa

⁴⁴ Esaleelaka ofiya elukuluku njuwa khuzima, khupuwa yiiza olumwenku wooshi mpakha makaaripi. ⁴⁵ Phazira khuluyeene yaari Nnyupa wa Nnyizinku khuvaruwa vakatthi. ⁴⁶ Aphano Yinsa khukhuwa na kuvu araka: "Paapa, rooho yaka kininkhelela mmakhono mwawo." N'oolupa ntakhuizi ntthile, khuttiya phuumu.

⁴⁷ Nrooma mmote aari ntunkhulu wa anajanka, nawoona vitthu epile zaarettikhaniyeego, khunsifu Nnyizinku araka: "Khweele-khweele otu aari ntthu aari weettettisaaye shariya." ⁴⁸ Ooshi apale aari attaaphale, nawoona vitthu epile zaarettikhaniyeego, khuruti apiyaka vifuwa zaya athoonyezaka

† ^{23:31} Maana a muutthi nwishi anthoonyeza Yinsa otule eeyiye wa haakhi, muutthi wa wuuma onthoonyeza anatwampi. ‡ ^{23:33} Kalavaariyu maana aya likurakuza la eeshwa ya ntthu woofwa.

§ ^{23:34} Warakha za raku khina aaya eti ya 34.

huzuni.⁴⁹ Ashirikha awe Yinsa ooshi na aakha apale anlottiyeeyo a Kalileya, aarettiye ari peetiwene eettaka woona vitthu epile.

Ozikhwa wa Yinsa

⁵⁰⁻⁵¹ Aarivo mwinyi mmote aari wiithiwaaye Yuusufu wa sitati ya Arumateeyya nti wa Yudeya. Ye aari wooshapweya rooho na wa shariya, na aari weekeselaaye ota wa Ofwalume wa Nnyizinku. Aari wa khuntti ya mashawuriiya, ila ye khaakhupaleeliye epile mashawuriya aawaziyeeyo na aarettiyeeyo.⁵² Ye khulawa wa Pilaatu oveka mwiili wa Yinsa.⁵³ Khulazavo vanskalapa aphale, khuputaputela vajoora khulawa khuzikha nliphottu la mwaako laari ahinazikhiwemo hatha ntthu.⁵⁴ Epo zaarettikhaniye juumwa ochelaniwa jumwaa-monsi**.

⁵⁵ Aphano, aakha apale aataniyeeyo Yinsa Kalileya, khunlottelela Yusufu omwaako okhule eetteliyeewo ozikha mwiili wa Yinsa, olawa woona khapuri na mwiili nanna waazikhiweezo.⁵⁶ Nawiisha, khurutela owaya olawa waattalela mafuttha oonukhela yoori alawe avaaze mwiili wa Yinsa. Jumwaa-monsi yo khuvumula nkhama ethhiipo enrumaazo kano.

24

Osisimuwa wa Yinsa

¹ Siikhu yamwanzo ya sumana, jumwaa-phiili supuyeene, aakha apale khusala alawa okhapuri okhule aazikhiweewo Yinsa athuuliye mafuththa oonukhela apale aattaliyeeyo.² Yo n'oofiya khoona liwe ntthile laafukaniweeyo nlako wa khapuri liri loolaziwavo.³ N'oviramo, mwiili wa Mbwana Yinsa khusikana ohimo.⁴ Khwiya oozinkuwa venkivene, attaphale khuwaapuwelela atthu awiri awaliye kuwo za waara.⁵ Aakha apale khuwaappatha woova khukokhora khufiyisa ajihi zaya vathi, atthu apale khusala awoozela yoori: "Mwinimweekesela-ni ntthu wa woona vakatthi wa alupa oofwa?⁶ Ye khaamo mphu; asisimuwa, muupuwele mattakhuzi apale aauuuziyeenini ari nti wa Kalileya!⁷ Aalupiye yoori: 'Mwaana wa Pinaatamu ona ya winkleheeliwa mmakhono wa anatwampi, akhomeliwe vanskalapa, siikhu yattaatthu asisimuwe.'⁸ Aphano aakha apale khuupwela mattakhuzi apale aalupiyeeyo Yinsa.

⁹ N'ooluti okhapuri okhule, khuwooza vitthu epile zooshi maaswihaapa apale khumi na mmote na atthu apale akinoko aariivo.¹⁰ Aakha aya aari Mariyamu Mataleena, Yowaana na Mariyamu mamaawe Yaakhumpa na aakha akinoko aalawaniyeeyo ottuukhu. Yo khuwooza maaswihaapa vitthu epile.¹¹ Ila maaswihaapa khuhisala akhupali mattakhuzi aakha apale, oonaka yoori aari oololo.¹² Aphano Pheeturu khulankha khusala atthira alawaka okhapuri, n'oofiya khuthurumelamo khusikanamo jooraru, khusala aruti ari wootkinisiwa khwa epile zaarettikhaniyeeyo.

Anakhiyon eettaka Emawu

¹³ Siikhu ethiitile, anakhiyon awiri a Yinsa khulankha khusala alawa nti waari wiithiwaaye Emawu woolepelana Yeruzaleemu kiysi ya phiima alufu khumi na moote.¹⁴ Yo aari olawa attakhulaka monkoni wa vitthu epile zaarettikhaniyeeyo.¹⁵ Eettaka olawa ethhiipile apiyaka mwaasa na akheetisanaka, Yinsa mwennyeweene khuwaatthoowela khusala alawa vamote na-yo.¹⁶ Ila yo khumpuwa nkhama oowaariipa omaasho, khuhisala anjuwa yoori Yinsa aya aari othuutule.

** ^{23:54} Jumwaa-monsi: yiiyiye saapatu, siikhu ttakathifiu ya mayaahuuti.

¹⁷ Ye khuwoozela yoori: “Niini mwinnyakulisanelaaaye ntarikhi mphu mweettaka weettetta?”

Yo khweemela omaasho waya athoonyezaka ohuzunikha. ¹⁸ Mmote wa yo aari wiithiwaaye Keleyoopa, khumuuzela Yinsa yoori: “Niri weeyo o nletto mmote paasi wa Yeruzaleemu ohinjuwaaye vitthu zirettikhaniyeeko siikhu epi?”

¹⁹ Yinsa khuwoozela yoori: “Niini erettikhaniyeeyo?”

Yo khunjipu yoori: “Epile zinrettikhaneliyeyo Yinsa wa Nazareeti. Ye aari napiyu woowahi khwa zooretta zawe na mattakhuzi awe vakatthi wa Nnyizinku mpakha wa atthu ooshi. ²⁰ Ila attunkhulu a mahaakhimu a tiini na afwalume a mmuti mwetthu, khuruma ohukhumweliwa ofwa khulawa khukhomeliwa vansalapa. ²¹ Fweeyo naari ororomela yoori ti ye aari weettelaaye owoosuru atthu a Ezirayeele, thanku zirettikhane vitthu zaya epo leelo siikhu yattaathu. ²² Neeya wooshanka mwaasa yoori aakha akina a nkuntti mwetthu, aalawiye okhapuri leelo lifwajiri ²³ kuhuisikani mwiili awe, khuta khunuza yoori ooniye malayikha, atthaapo pi alupiyeeyo yoori Ye asisimuwa ori haayi. ²⁴ Khulawa ashirikha eththu akina okhapuri, khusikana etthiipile aalupiyeeko aakha apale, ila yo khuhimooni.”

²⁵ Aphano Yinsa khuwooza yoori: “Atthu oorupaza weeleyiwa na oolipa waamini zooshi epi alupiyeeko manapiyu! ²⁶ Al-Masiihu khaarina yooohoowa etthiipo, yoori eette nnuuru mwawe?” ²⁷ Khusala awweleza mattakhuzi ooshi aatikhiiyeeyo nkithaapu aari onlupaaye Ye, waaza kithaapu ya napiyu Munsa mpakha za manapiyu akinota.

²⁸ Asaleelaka ofiya nti opule aari weettaaye, Yinsa khusala ompuwa nkhamma aari otakhaaye owaavikana. ²⁹ Ila yo khunkhanyarela araka: “Ohivikane wiiye attaapha na-fweyo, njuba linttela otupweela waripa.” Yinsa khuvira nnyupa khwiiya vamote na-yo.

³⁰ Wakathi eekhaliyeovo vameeza vamote na atthaapale awiri, khuthulula phaawu khuparikhya, khumeya khuwenkha. ³¹ Attaaphale, oowiri maasho aya khufunuwa khunjuwa yoori ti Yinsa, na-Ye khunaanelu. ³² Aphano khusala oozelana araka: “Wakathi opule naari ottakhulanaavo ntarikhi aneellezaka mattakhuzi a nkithaapu, rooho zetthu khazeetta onikaphula?”

³³ Yo khulankha nasaapiru khusala arutela Yeruzaleemu, khuwaasikana maaswihaapa apale khumi na mmote na anakhiyoni akina a Yinsa akusanyeye vahali vamote, ³⁴ alupaka yoori: “Khweele Mbwana asisimuwa, ampuwelela Simawu.” ³⁵ Na-yo apale awiri khusala alupa epile ooniyeeko ntarikhi na nanna anjuwiyeeko Mbwana wakathi ameyiyeovo phaawu.

Yinsa oniwaapuwelela anakhiyoni awe

³⁶ Anakhiyoni apale nalelo eettaka ottakhula etthiipile, Yinsa khuta vakatthi vaya, khulupa yoori: “Heeri yiiye vamote na-mweyo.”

³⁷ Yo khwiiya oosuthuwa na woova amoonaka nkhamma nshitapehe.

³⁸ Yinsa khuwoozela yoori: “Mwasuthuwa-ni? Wala mishikili ziriye nroho mwenu pi za niini? ³⁹ Moone makhono aka na moolu aka yoori ti miyo! Mwikikhole moone, maana nshitapehe khuniiyana nyama wala makhonkolo nkhamma etthiipo mweeyo mwinikoonaaizo.”

⁴⁰ Attakhulaka etthiipile, khuwaathoonyezaka makhono awe na moolu awe.

⁴¹ Mwaasa wa furaha khuluyeene na oshanka, yo khuhisala aamini nalelo, aphano Yinsa khuwoozela yoori: “Mwinaaye eththu-yoojiwa mwikinkhe

kije?” ⁴² Yo khumwinkha phantte ya swi yawoochiwa. ⁴³ Khuthuula khusala arafuna attaapho yo amoonaka.

⁴⁴ Nawiisha khulupa yoori: “Pi ethiipi kaawuuziyeenini wakathi opule kaari vamote na-mweyo, yoori zaarina yooretikhana zooshi epile zaatikhieweyo khwa miiyo nkithaapu ya kano ya napiyu Munsa na kithaapu za manapiyu akina na nzaapuuri.”

⁴⁵ Aphano Yinsa khuwaapatthisa fwahamu yoori ziweeleye zawaatikhawa za nkithaapu. ⁴⁶ Khuwooza araka: “Yaatikhawa yoori Al-Masiihu aarina yoohoowa na osisimuwa siikhu yattaatthu vakatthi wa anamfwa; ⁴⁷ na khwa nzina lawe onlawa walaleyiwe othupwiya yoori ziswaamihewe twampi, waaza Yeruzaleemu mpakha khapila zooshi za voolumwenku. ⁴⁸ Mweeyo mwa amashaahiti wa vitthu zaya epi. ⁴⁹ Miiyo kinlawaa kooperekhezeni etile Paapa aahitiyeeyo, mweeye Yeruzaleemu ottuukho mpakha mwiiataazaniwe owahi wa pinkuuni.”

Owela wa Yinsa pinkuuni

⁵⁰ Aphano Yinsa khuwaathuula anakhiyoni awe khulawana Betaaniya, n'oofiya khulansa makhono awe khuwaaparikhya. ⁵¹ Awaaparikhyaaka ethiipile, khuwasusa khusala aweziwa alawaka pinkuuni. ⁵² Yo khumwaaputu, khurutela Yeruzaleemu na furaha khuluyeene. ⁵³ Wakhula siikhu aari othukumana vaje wa Nyuupa ya Nnyizinku ansifwaka Nnyizinku.

Yaahaya

Nttakhuzi la Nluku lajiretta opinaatamu

¹ Omwanzo laari Nttakhuzi. Nttakhuzi laari vamote na Nluku na Ntakhuza laari Nluku. ² Ye laari vamote na Nluku omwanzo.

³ Vitthu zooshi zarettiwa khwa ye; eriwaka khaari ye khayiivo moote yaari weettelaaye orettiwa. ⁴ Ohaayi waari nkatthi mwawe, ohaayi opo yaari nuuru ya anaatamu. ⁵ Nuuru enaara n'yiiza, na yiiza khuhikhitiri oshintta.

⁶ Aarivo nlume mmote aaperekhiweeyo ti Nluku aari wiithiwaaye Yaahaya. ⁷ Ye ata nkhamma shaahiti yoori alawele oshaahiti monkoni wa nuuru, yoori atthu ooshi apatthe osiila hapari na akhupali khwa ye. ⁸ Ye khaari nuuru, ila ata nkhamma shaahiti wa nuuru. ⁹ Nuuru yeekhweele, eniwaamwasikhelaaye anaatamu ooshi, yata voolumwenku.

¹⁰ Nttakhuzi laari voolumwenku na olumwenku wompiwa ti ye, ila olumwenku khuhinjuwi. ¹¹ Awaateliye apale eeyiyeyo awe, yo khuhimpwekhereli. ¹² Ila apale ampwekhereliyeeyo na akhupaliyeeyo nzina lawe, awenkha ruhusa yooretteya aana a Nluku. ¹³ Atthaapo ahivokoliweeni khwa ephattu, waala khwa matakholo a onaatamu wala ohiyi makhaamu a nlume, ila avokoliwa khwa matakholo a Nluku.

¹⁴ Nttakhuzi khujiretta ntthu na khwiikhala na-fweyo. Noona siifwa yawe, siifwa nkhamma mwaana mmote paasi wa Paapa wawiitaala rehema na khweele.

¹⁵ Yaahaya alaza oshaahiti awe araka: “Otu ti otule kaari onlupaaye, aari otaaye paata ya miiyo na nwulu zayita miiyo, maana ye aarivo miiyo kihineeyeyo.” ¹⁶ Maana fooshi fweeyo napokherela phantte ya zooshi ariina na rehema khwa rehema. ¹⁷ Maana kano zatiisiwa khwa yakathhi wa Munsa; rehema na haakhi yata khwa Yinsa Al-Masiihu. ¹⁸ Khina anamoone Nluku, ila Nluku mmote paasi, othuuto ariiye mpavu wa Paapa, ti anithoonyeziyeyo.

Oshaahiti wa Yaahaya Namoosa

¹⁹ Opu oshaahiti wa Yaahaya, wakathi mayaahuuti a Yeruzaleemu awaaperekhiyeeyo anamalokozela a tiini na aleevi* yoori amuuzele yoori: “Opaani weeyo aya.” ²⁰ Ye khutukhuru na khuhikatthali, khulupa woosileyayo yoori: “Akiyo Al-Masiihu!”

²¹ Khumuuzela yoori: “Aphano, weeyo o paani? Ti weeyo Aliyaasi?”

Khuri: “Akiyo!”

“Ti weeyo Napiyu aari weettelaaye ota?”

Khujipu yoori: “Wala!”

²² Khumuuzela yoori: “Khi o paani? Onijipu yoori nawooze apale anirumiyeeyo. Nanna eti onjilupezaaye omweenyewe?”

²³ Yaahaya khujipu na mattakhuzi a napiyu Ezaaya araka: “Miiyo ki huula enkuhuwaaye n'yaara eraka: ‘Mookolele tarikhi ya Mbwana.’”

²⁴ Apale aarumiweeyo aari akhuntti ya mafwarizeewu, ²⁵ khumuuzela yoori: “Khi oniwooselani atthu ohi Al-Masiihu wala Aliyaasi ama Napiyu?”

* ^{1:19} Aleevi awaziri a mahaakhimu a tiini.

²⁶ Yaahaya khuwaajipu yoori: “Miiyo kinoosa na maati, ila vakatthi venu mweeyo owaapho ntthu mwihininjuwaaye, ²⁷ antaaye paata ya miiyo na wala akinsuhi ofukula mikhoyi za jampali zawe.”

²⁸ Vitthu epo zarettikhana nti wa Betaaniya phantte ya khipula ya muuth-tho Yorotaani, ottuukho Yaahaya aari orettaawo njampo la woosa.

Pwittipwitthi ya Nluku

²⁹ Mmeesho mwaya Yaahaya khumoona Yinsa eettaka ota khuri: “Mwimoone! Oto antaaye apho, pwittipwitthi ya Nluku anlazaaye twampi voolumwenku! ³⁰ Otu ti otule kaari onlupaaye, wakathi opule kaari oraaye: ‘Onta nyumani waka ntthu akizitiye maana ye aarivo miiyo khineeyeyevo.’ ³¹ Miiyo akaari onjuwa paani yaya, kateela omoosa na maati yoori athoonyeziwe Ezirayilu.”

³² Aphano Yaahaya khulawela oshaahiti alupaka theenya yoori: “Miiyo koona Rooho Ttakatthiifu yiishukhaka pinkuuni nkhamma jiwa khummorela ye. ³³ Miiyo akaari onjuwa paani yaya, ila otule akirumiyeeyo omoosa na maati, khukuza yoori: ‘Weeyo onteela woona Rooho Ttakatthiifu yiishukhaka na emmorelaka, ntthu aya oto ti anoosanaaye Rooho Ttakatthiifu.’ ³⁴ Miiyo koona vitthu epo, tiito kinlawelaaye oshaahiti yoori ye Mwaana wa Nluku.”

Anakhiyoni a Yinsa a mwanzo

³⁵ Mmeesho mwaya Yaahaya aari attaaphale opheya na anakhiyoni awe awiri. ³⁶ Noomoona Yinsa aviraka, khuri: “Mwimoone! Oto antaaye apho Pwittipwitthi ya Nluku!”

³⁷ Anakhiyoni apale awiri a Yaahaya noosiila mattakhuzi apale khusala anlotta Yinsa. ³⁸ Aphano Yinsa khuzukuluwa khweekesa nyuma, khuwoona anakhiyoni apale awiri eettaka onlotta khuwoozela yoori: “Mweeyo mwineekesani?”

Khujipu araka: “Rabi” (liriina maana a mwaaliimu), “wamaka vayi?”

³⁹ Khuwaajipu yoori: “Olawa moonewo.”

Khulawa khoonawo ohali Yinsa amakiyeewo na khwiya vamote na ye sikhуaya etile yooshi. Epo zaarettikhaniye payina ya saa-khuumi ya njuwa-looveea.

⁴⁰ Antere, ttwiye Simawu Pheeturu, aari mmote wa mamwinyi apale awiri ansiliyeeyo Yaahaya attakulaka monkoni wa Yinsa, tiito anlottiyeyo. ⁴¹ Mwanzo wonsikana aari ttwiye Simawu, na khumuza yoori: “Nampattha Al-Masiihu” (enlupaaye yoori Namathawaziwa). ⁴² Antere khunthuula ttwiye khunlawana wa Yinsa. Yinsa khumweekesa Simawu khuri: “Weeyo o Simawu, mwaana wa Yaahaya, ila waaza nasaapi nzina lawo eriwaka Seefwa.” (Seefwa enlupa yoori Pheeturu†).

Yinsa oninkhuwela Filiipe na Natanayeele

⁴³ Mmeesho mwaya Yinsa khulakela olawa Kalileya na khunsikana Filiipe, khumuza yoori: “Okilote!”

⁴⁴ Filiipe aari wa sitati ya Betezayiita ottuukho waari owawe Pheeturu na Antere ⁴⁵ Filiipe khunsikana Natanayeele khumuza yoori: “Nampattha otule Munsa aatikhiyeeyo nkithaapu ya kano monkoni wa ye na manapiyu. Ti Yinsa wa Nazareeti, mwaana wa Yuusufu!”

⁴⁶ Natanayeele khuuzela yoori: “Nazareeti, enlankhawo ethu yooshap-weya?”

† 1:42 Liriina maana a liwe

Filiipe khunjipu yoori: “Ote woone!”

⁴⁷ Yinsa amooniyeevo Natanayeele amwaattamaka khuri: “Oto mwizirayiilu weekhwhee, ntthu woohiina ottetekha va rooho vawe.”

⁴⁸ Aphano Natanayeele khumuuzela Yinsa yoori: “Mwaari okijuwa vayi?”

Yinsa khunjipu yoori: “Filiipe ahinookhuwele miiyo kiwooniye wikhaliye nshini wa nfikeera opule.”

⁴⁹ Attaaphale Natanayeele khushanka khuri: “Rabi, weeyo o Mwaana wa Nluku. Weeyo O Mfwalume wa Ezirayiilu!”

⁵⁰ Yinsa khunjipu yoori: “Weeyo wakikhupali mwaasa wa olupa yoori kaawooniye nshini wa nfikeera? Toowo ontela woona vitthu khulukhulu zayita epi.” ⁵¹ Khuvira alupaka yoori: “Miiyo kiniuwuzani khweele yoori, mwinoona pinku eri yoofukuwa na malayikha a Nluku awelaka na wishukha amwiishukhelaka Mwaana wa Pinaatamu.”

2

Yinsa onnta oharusi

¹ Siikhu ya ttaatthu, khwiyyawo harusi Kanaani ya Kalileya na mamaawe Yinsa aari ottuukho. ² Yinsa na anakhiyoni awe khulaleyiwa awe olawa oharusi. ³ Paata ya wiisha viinyu, mamaawe Yinsa khumuuzla yoori: “Yaweeshela viinyu.”

⁴ Ila Yinsa khujipu araka: “Muukha, enihithajiyi okuuza? Nalelo khunafiyi wakathi aka.”

⁵ Aphano mamaawe khuwooza anamarumeyela yoori: “Mwirette zooshi epile anttelaaaye owuuzani.”

⁶ Attaaphale, zaarivo zuuku sitha mayaahuuti aari orumeyelakaaye wakathi wa otwahareshiwa zaari za maliituru thamaaniini kiina zaari za maliituru miiya na eshiriini.

⁷ Yinsa khulupa yoori: “Mwiitaaze maati wakhula yuuku,” yo khwiitaaza mpakha omilomo waya.

⁸ Aphano Yinsa khuwooza yoori: “Mwittekhe vattithiiru mwimweetisele mahutumu wa njampo.” Yo khuretta ethhiipile. ⁹ Attaaphale mahutumu wa njampo khoota maati apale aarettiweeyo viinyu woohijuwi ohali yaalankhiyeewo, aari ojuwaaye anamarumeyela apale attekhiyeeyo maati aya. Aphano mahutumu khumuuzla mposi, ¹⁰ araka: “Atthu ooshi azowerela owenkha atthu viinyu ya mwanzo anamalaleyiwa, amana anywa ewaatosha phi mwiniwenkhaavo viinyu yoohawiifweya, ila weeyo nalelo wapweha viinyu yooshapweya mpakha apha.”

¹¹ Alama ya eto ya minjuza, yaari ya mwanzo Yinsa oretta nti wa Kanaani ya Kalileya. Siifwa yawe yaathonyezeyiye attaapho, na anakhiyoni awe khunkhupali.

¹² Paata ya vitthu epile khusala alawa Kafwaranaawu na mamaawe, attiize na anakhiyoni awe. Khwiya ottuukhule siikhu vattithiiru.

Yinsa ontwaharesha Nyuppa Yoosifwiwamo Nluku

¹³ Osaleelaka ofiya wakathi wa njampo la Paashikowa wa mayaahuuti, Yinsa khuwelela Yeruzaleemu. ¹⁴ Khuwaasikana Nyuppa Woosifwiwamo Nluku atthu aari wuuzanyisaaye mompe, pwittipwithi, jiwa, na atthu aari opatilisaaye nzurukhu. ¹⁵ Aphano khweesa puutte ya nkhoyi, khuweekaramo atthu ooshi Nyuppa Woosifwiwamo Nluku, vamote na pwittipwithi mpakha mompe zaya. Khumwazela vathi nzurukhu wa apale aari opatilisaaye na khuphinttu meeza aya. ¹⁶ Na khuwooza apale aari

wuuuzanyaaye jiwa yoori: "Mwilazemo vitthu zooshi! Mwilikhe oretta pazari nyuupa ya Paapa."

¹⁷ Aphano anakhiyoni awe khuupuwela zawaatikhwa ttakatthiifu en-raaye: "Ojilipisana waka khwa nyuupa yawo, Oo Nluku, enlukuzela nkathhi mwaka nkhamma moottho."

¹⁸ Attaaphale anamalokozela amayaahuuti khumuuzela yoori:" Alama-ni ya minjuza ontakhaaye onithoonyeza" yoori weeyo onaaye owahi wooretta vitthu zooshi epo?"

¹⁹ Yinsa khujipu yoori: "Mwipweche nyuupa eti ya Nluku, miiyo kintta ojeka opheya khwa siikhу ttatthu!"

²⁰ Yo khulupa yoori: "Ojekwa wa nyuupa eti yaathuuliye nyaakha arupayiini na sitha, weeyo onlupa yoori onttela ojeka opheya khwa siikhу ttatthu?" ²¹ Ila Yinsa nyuupa aari olupaaye waari mwili awe.

²² Wakathi Yinsa asismuwiyeevo nkhapuri, anakhiyoni awe khuupuwela epile aalupiyeeyo, aphano khukhupalela zawaatikhwa ttakatthiifu na mat-takhuzi awe.

Yinsa onjampo la Paashikowa

²³ Wakathi Yinsa aari Yeruzaleemu, onjampo la Paashikowa, atthu awaatta khunkhupali nzina lawe mwaasa wa woona alama za minjuza epile aari orettaazo. ²⁴ Ila Yinsa khaari owaamini maana aari owaajuwa ooshi.

²⁵ Khaari ontakha ntthu woomwinkha oshaahiti monkoni wa pinaatamu, maana ye aari ojuwa niini ephattu ya onaatamu.

3

Nkutthaano wa Yinsa na Nikoteemu

¹ Aarivo mfwarizeewu mmote aari wiitthiwaaye Nikoteemu, ntunkhulu wa mayaahuuti. ² Ye khulawa okutthanana Yinsa osikhu na khumuuzela yoori: "Rabi, ninjuwa yoori onsomisa khwa phantte ya Nluku, maana khina anwahaaye oretta alama za minjuza nkhamma epo, aheetteeni Nluku wiiya vamote na-ye."

³ Yinsa khujipu yoori: "Miiyo kiniwuzzani khweele yoori, khina antakhaaye woona ofwalume wa Nluku aheetteeni ovokoliwa opheya."

⁴ Nikoteemu khumuuzela yoori: "Nanna-ni ntthu anvokoliwaaye opheya ooluvaliye? Kinretteya ntthu weetta mwiirukulu wa mamaawe swaafu yaphiihi khuvokoliwa opheya!"

⁵ Yinsa khujipu yoori: "Miiyo kiniwuzzani khweele yoori, aheetteeni ovokoliwa na maati na Rooho khina anwahaaye weetta muufwalume wa Nluku. ⁶ Maana otule anvokoliwaaye khwa mwili, mwili, na otule anvokoliwaaye khwa Rooho, rooho. ⁷ Ohiye wootikinisiwa mwaasa wa miiyo olupa yoori: 'Enihihajiya mweeyo ovokoliwa opheya.' ⁸ Pheevo envitelela aphale entakhaavo, ensileya evumaka, ila khinjuweya ohali enlankhawo wala eneettaawo. Enrettikhana ethiipo khwa apale ooshi oovokoliwa khwa Rooho."

⁹ Nikoteemu khuuzela theenya yoori: "Epo enttela orettikhana toovi?"

¹⁰ Yinsa khujipu araka: "Weeyo o mwaaliimu wa nti wa Ezirayiil khini-weeleya vitthu epo? ¹¹ Miiyo kiniwuzzani khweele yoori, fweeyo ninlupa etile ninjuwaaye na ninlawela oshaahiti wa etile noonieeyo; ila mweeyo khamwinkhupalela oshaahiti ethu. ¹² Miiyo kawuuzani vitthu za vathi khamwinkhupaleeni khi mwinttelaa okhupalela toovi amana kiwuuzakani vitthu za pinkuuni? ¹³ Maana khina anawele pinkuuni woohiiyi otule

alankhiyeeyo pinkuuni: Mwaana wa Pinaatamu. ¹⁴ Nkhama ethiipo Munsa alansiyeyo nyookha n'yaara, ethiipo theenya enihithajiya Mwaana wa Pinaatamu wiiya woolansiwa, ¹⁵ yoori wakhula otule aninkhupalaaye eeyane ohaayi wa mileele.

¹⁶ Khwa nanna ethiipo Nluku apheta olumwenku afiyelela onleva Mwanawe mmote paasi, yoori wakhula otule aninkhupalaaye ahipweth-eye ila eeyane ohaayi wa mileele. ¹⁷ Nluku amperekha Mwanawe voolumwenku, khahijo yoori ahukhumu olumwenku, ila yoori olumwenku wuusurukhe khwa ye. ¹⁸ Wakhula otule aninkhupalaaye khamphukiwa, ila otule ahininkhupalaaye aphukiwa, mwaasa wa ohikhupali nzina la Mwaana mmote paasi wa Nluku. ¹⁹ Ophukiwa waya pi opu; nuuru yata voolumwenku, ila atthu khupheta yiiza, khwiippiiriwa ti nuuru, mwaasa wa menttezi aya aari ootakhala. ²⁰ Otule anrettaye zootakhala oniiphiiriwa ti nuuru na wala kheepu waattamela nuuru ontakha yoori khaazi zawe zihooneye. ²¹ Ila otule aneettetisaaye haakhi onta nnuuru, yoori zooneye saaneene, yoori khaazi zawe enkholiwa khwa Nluku.”

Oshaahiti wa Yaahaya Namooosa monkoni wa Yinsa

²² Paata ya vitthu epile Yinsa na nakhiyoni awe khweetta nti wa Yudeya, ottuukho eeshiyewo wakathi vattithiru nooretta njampo la woosa. ²³ Yaahaya naye aari owoosa atthu nti wa Enoomi, kharipu ya Salimi maana aariwo maati awaatta na atthu aari ota oteela woosiwa. ²⁴ (Vitthu epo zarettikhana Yaahaya ahinathhiwe nkalapooso). ²⁵ Khupuwa onyakulisana khwa anakhiyoni akinaaya a Yaahaya na yaahuuti mmote monkoni wa njampo la otwahareshiwa. ²⁶ Yo khulawa wa Yaahaya na khumuuzza yoori: “Rabi, mwinyi otule waariina kaapu ya muuttho Yorotaani warlaweliyeeyo oshaahiti, onta woosa na atthu ooshi antta olawa ottuukho ariiwo.”

²⁷ Yaahaya khujipu yoori: “Khina ampwekheraaye ethu aheetteeni winkhiwa pinkuuni. ²⁸ Mweeyo mwa mashaahiti wa etile kilupiyeeyo yoori: “Miiyo akiyo Al-Masihu, ila ki otule aperekhiweeyo wiilokozi wawe.” ²⁹ Namaposiwa ti wa namaposa. Swaahipu aninrumeyelaaye namaposa oninjali na onsiileza oniiya woofurahi amana asiila huula ya namaposa. Eto furaha yaka yookamilikha. ³⁰ Enihithajiya yoori ye awule na miiyo kijipushuwise.

³¹ Otule anlakhaaye otulu weekhweele ori vatulu wa vitthu zooshi. Otule ari wa vathi ti wa vathi na onttakhula vitthu za vathi; ila otule alankhiyeeyo pinkuuni ori vatulu wa vitthu zooshi. ³² Ye ahakikhi epile oniyeezo na asiliyeezo ila khina ankhupalelaaye oshaahiti awe. ³³ Otule ankhupalelaaye oshaahiti awe onhakikhi yoori Nluku haakhi. ³⁴ Otule Nluku amperekhiyeeyo onttakhula mattakhuzi a Nluku, maana ye oninkha Rooho Ttakatthiifu woohiphimi. ³⁵ Paapa onimpheta Mwanawe na zooshi attha mmakhono mwawe. ³⁶ Otule aninkhupalaaye Mwaana onaaye ohaayi wa mileele, ila otule aninkatthalaya Mwaana khanlawa woona ohaayi na theenya katapu ya Nluku empharelela khwa ye.”

4

Yinsa omiya mwaasa na muukha wa Samariiya

¹ Wakathi Yinsa asiiliyeevo yoori mafwarizeewu asiila yoori Yinsa onta owaaretta anakhiyoni na owoosa zayita Yaahaya, ² (eettiye ohiiyiru Yinsa aari woosaaye ila anakhiyoni awe), ³ Yinsa khulaawo Yudeya khurutela Kalileya.

⁴ Ila yaari ohithajiya ye ovira nti wa Samariiya. ⁵ Ye khufiya sitati moote ya Samariiya yaari wiitthiwaaye Sikaari yaattamananiyeeyo nshapa la Yaakhumpa amwinkhiyeeyo mwanawee Yuusufu. ⁶ Ottuukhule waariwo nlipu wa Yaakhumpa. Yinsa ari wooshokhera nkathhi wa safwari, khulawa khwiikhala nshini wa nlipu. Zarettikhaniye payina ya atuhuri.

⁷ Wakathi otthuupule khuta muukha wa Samariya ottekha maati. Yinsa khumuuba yoori: "Kimeele maati vattithiiru kinywe." ⁸ (Zarettikhaniye wakathi anakhiyoni awe eettiyeeye ositati wuuzanya ethhu-yoojiwa.)

⁹ Muukha otule wa Samariiya khumuuzela Yinsa yoori: "Weeyo oyaahuuti onikivekela maati miiyo, muukha wa Samariiya?" (Maana mayaahuuti na asamariiya khansiilana saana.)

¹⁰ Yinsa khunjipu yoori: "Weeyo eriwaka waari ojuwa tthuovo ya Nluku na paani anuuvekelaaye maati, weeyo weetta onvekela na-ye eetta owinkha maati ohaayi."

¹¹ Muukha otule khuri: "Mbwna khuna ethhu yoottekhana maati maana nlipu opu wiicha. Onttela opattha vayi maati aya apo ohaayi? ¹² Talili weeyo onwulweene zayita papeethu Yaakhumpa? Ye aninkha nlipu otthuupo aari onywakaavo na aana awe na mompe zawe."

¹³ Yinsa khumuuba yoori: "Otule annywaaye maati apa onlawa eeyane nnyottha theenya, ¹⁴ ila otule anttelaaye onywa maati kinttelaaye omwinkha khanlawa wiiyana nnyottha theenya. Olikha toowo, maati kinttelaaye owinkha anttela oretteya naattuuttu wa wiittikha maati a ohaayi wa mileele."

¹⁵ Muukha otule khumuuba yoori: "Mbwna, kimeele maati aya apo yoori kihiruttele wiiyana theenya nnyottha, wala kihiruttele vanlipu apha ottekha maati theenya."

¹⁶ Yinsa khumuuba yoori: "Olawe owawo, wankhuwele mannawo ote."

¹⁷ Muukha otule khujipu araka: "Akina manna."

Yinsa khuri: "Weeyo wajipu saana olupa yoori khuna manna. ¹⁸ Maana waaria amanna athaanu, ila aphano otu oriina nasaapi khahiyoo mannawo. Eto olupiyeeyo nasaapi khweele."

¹⁹ Muukha otule khuri: "Mbwna, kiniwoona yoori o napiyu."

²⁰ Amarehemu apapazetthu aari waaputwaka vamwaako apha, ila mweeyo mayaahuuti mwinri Yeruzaleemu ti yiyyiye puuro ya waaputwiwawo."

²¹ Yinsa khumuuba yoori: "Okhupali epi kiniwuzaaye muukha, maana ontta waattamelia wakathi mweeyo mwihinttelaaye omwaapetu Paapa vamwaako apha wala Yeruzaleemu. ²² Mweeyo asamariiya mwinaapetu ethu mwihinjuwaaye, ila fweeyo ninaapetu etile ninjuwaaye maana nusura enta khwa mayaahuuti. ²³ Khwa attaapho ontta ofiya wakathi na khweele wafiyaa, anamwaapetu eekhwhee anttela omwaapetu Paapa khwa rooho na khweele. Anamwaapetu Paapa aniweekesaaye pi atthaapo. ²⁴ Nluku rooho ti eto eniwaahithajiyaaye apale animwaaputwaaye ana ya omwaapetu khwa rooho na khweele."

²⁵ Muukha otule khuri: "Miiyo kajuwa yoori o Al-Masiihu (aniitthiwaaye Namathawaziwa) onsaleela ota. Amana ata onteela onuuza zooshi."

²⁶ Aphano Yinsa khumuuba yoori: "Ti miiyo! Othuuto ontthakhulanaka ye"

Anakhiyoni a Yinsa antta oruti ositati

²⁷ Wakathi otthuupule anakhiyoni awe khuruti khwiiya ooshanka mwaasa wa onsihana apiyaka mwaasa na muukha. Ila khuhiiivo hatha mmote aamuzeliyeeyo yoori: "Oneekesa-ni?" Ama "Ottakhulanaka ye mwaasa aya niini?"

²⁸ Aphano muukha otule khulikha yuuku yawe khurutela ositati khuwooza atthu yoori: ²⁹ “Mwite mwimoone mwinyi akuuziyeeyo zooshi kinrettaazo. Talili khahiyo Al-Masiihu?” ³⁰ Aphano khulankha atthu nsitati khulawa okhule aariwo Yinsa.

³¹ Wakathi wa vitthu epile anakhiyoni awe aari onkhanyarela yoori: “Rabi, mwije ethhu-yoojiwa.”

³² Ila ye khuwooza yoori: “Kinaaye ethhu-yoojiwa mwihinjuwaaye.”

³³ Aphano anakhiyoni awe khusala oozelana araka: “Talili ena ntthu antiseliyeeyo ethhu-yoojiwa?”

³⁴ Yinsa khuri: “Ethhu yoojiwa yaka oretta matakhero a otule akiperekhiyeyo na okhola khaazi zawe. ³⁵ Mweeyo khamwinlupaka yoori: ‘Nkathi wa nyeezi mine ninuurula?’ Miyo kiniwuuzani yoori: Mwifunule maasho enu na moone mmashapa! Vitthu zakhomala entakha wuuriwi. ³⁶ Otule anurulaaye ompwekhera phakari yawe na onuurula mishumo za ohaayi wa mileele, khwa nanna namuurula anttelaaye ofurahi vamote na anamazala. ³⁷ Maana khweele etile elupiweeyo yoori: ‘Mmote onzala nkina khuurula.’ ³⁸ Miyo koorumani yoori moorule epile mwihizaleeni. Akina akhola khaazi, mweeyo khuta opuhela khaazi yaya.”

Asamariiya awaatta a sitati etile aninkhupali Yinsa

³⁹ Asamariiya awaatta a sitati etile khunkhupali Yinsa mwaasa wa os-haahti alupiyeeyo muukha otule araka: “Ye akuuza zooshi epile kaarettyeeyo.” ⁴⁰ Attaaphale paata ya Asamariiya ofiya aphale aariivo Yinsa, khunvekela yoori eeye vamote na-yo. Yinsa khwiya vamote na-yo siikhu piiri. ⁴¹ Mwaasa wa mattakhuzi awe atthu awaatta khunkhupali.

⁴² Na khumuuba muukha otule yoori: “Aphano nakhupali, khahiyo mwaasa wa mattakhuzi apale olupiyeeyo, maana fweeyo nansiila na na-juwa yoori khweele Namusuwa wa olumwenku.”

Yinsa oninvonisa mwaana wa waziri wa mfwalume

⁴³ Ziviriyeevo siikhu piiri, khulaawo okhule waya khusala eetta Kalileya. ⁴⁴ Maana Yinsa Mweenyeweene alupa yoori napiyu khanshitahiwa saana mmuti mwawe. ⁴⁵ Afifyeevo Kalileya, akalileya khumpwekherela saana yo ooniye zooshi aaretiyeego Yeruzaleemu, vanjampo la Paashikowa, maana yo aari ottuukho.

⁴⁶ Khurutela theenyia othotola Kanaani ya Kalileya, ottuukho athatushiyewo maati khwiya viinyu. Aariwo waziri mmote aariina mwanawе aari olwaaziwaaye Kafwaranaawu. ⁴⁷ Wakathi asiiliyeeyo elupiwaka yoori Yinsa ori Yudeya onlankha Kalileya, khusala amweekesa nonsikana khunvekela yoori anvonise mwanawе, aari osaleelaaye ofwa.

⁴⁸ Yinsa khuri: “Mweeyo mwinkhupali paasi amana moona alama za minjuza miwulu-miwulu.”

⁴⁹ Waziri otule khuri: “Mbwana, waakuve okilotte mwanaka ahinafwe.”

⁵⁰ Yinsa khujipu yoori: “Olawe, mwanawo ontta wiya haayi.” Mwinyi otule khukhupalela mattakhuzi apale a Yinsa khulawa owawe. ⁵¹ Nalelo mwinyi otule ari ntarikhi, akarumeya awe khusala anthepeeza oeteela omuuba yoori mwanawo ori haayi. ⁵² Paata awoozeliyeeyo yoori wakathi-ni mwaana otule apatthiyeeyo ashikhaali, yo khujipu yoori: “Hooma yanlikha taana payina ya saa-sapa ya makaariipi.”

⁵³ Aphano papaawe mwaana khufwahamu yoori wakathi ooziweeyo ti Yinsa waari otthuupule yoori: “Mwanawo ontta wiya haayi.” Attaaphale

khunkhupali Yinsa ye na vaje vawe wooshivo. ⁵⁴ Eto yaari alama yaphiiri ya minjuza Yinsa aarettiyeeyo, paata ya olankha Yudeya eettaka Kalileya.

5

Ovonisiwa wa namarakala

¹ Ziviriyeevo vitthu epile, Yinsa khulawa Yeruzaleemu mwaasa wa njampo la mayaahuuti. ² Ewaakho Yeruzaleemu, kharipu ya Vanlako wa Pwittipwithi, kulaathayini khwa luuka ya meepeereewu eniithiwa Betezita, eriina mapantta mathaanu oovikhiwa. ³ Attaapho aari orapalelakaavo anamarati enkeene; anamarakala, anahooni na anasupiyaani awejaka nziko wa maati*, ⁴ maana nlayikha la Mbwana laari wiishukhaka swaafu kiina na wunttula maati apale. Otule aari wiyyaaye wa mwanzo weetta nkulaathayini noovona marati awe. ⁵ Attaaphale aarivo mwinyi aariina nyaakha talaathiini na minaane arina supiyaani. ⁶ Yinsa khumoona mwinyi otule ari woorapalela ajuwiyeeyo yoori aaza raku olwaaziwa, khumuuzela yoori: "Weeyo ontakha ovonisiwa?"

⁷ Nlwele otule khujipu yoori: "Mbwanan aka, akina hatha ntthu wookaawuni okitha nkulaathayini amana maati onttuliwa. Kitakhaka weettamo, akina antta weettamo miiyo kihineettemo."

⁸ Aphano Yinsa khumuuzza yoori: "Olankhe, othuule nrepa lawo weettette!" ⁹ Nasaapiru mwinyi otule khwiliya woovona, khuthuula nrepa lawe khwaaza weettetta.

Siihku yaya etile yaari saapatu. ¹⁰ Mwaasa wa ethiito mayaahuuti khumuuzza otule aavonisiweeyo yoori: "Leelo saapatu, enikhattaziwa weeyo othuula nrepa lawo."

¹¹ Ye khuwaajipu yoori: "Ntthu akivonisiyeeyo ti akuuziyeeyo yoori: 'Othuule nrepa lawo na weettette."

¹² Khumuuzela theenya yoori: "Paani mwinyi aya oto awuuziyeeyo: 'Othuula nrepa lawo na weettetta?'

¹³ Mwinyi otule aavonisiweeyo khaari onjuwa paani otule aya, maana Yinsa khaari wooneya mwaasa wa wawaattiwavo.

¹⁴ Paata ya vitthu epile, Yinsa khukutthanana Nnyupa Woosifiwamo khumuuzza yoori: "Woone, weeyo wavonisiwa! Ohirutele ntwampi yoori ehuurettikhanele etthu yooziti." ¹⁵ Mwinyi otule khulawa khuwooza mayaahuuti yoori aari Yinsa anvonisiyeeyo. ¹⁶ Aphano mayaahuuti khwaaza onlupattha Yinsa, maana ye eetta ovonisa saapatu. ¹⁷ Ila Yinsa khuwooza yoori: "Paapa onitta okhola khaazi mpakha leelo, na-miyo kintta okhola." ¹⁸ Mwaasa wa ethiito mayaahuuti khusala atakha omuula, woohiyyi paasi mwaasa wa ohishututeli kano monkoni wa saapatu, ila theenya eetta olupa yoori Nluku ti Paapa na ajilikanisanaka Nluku.

Yinsa oneeleza khaazi yawe

¹⁹ Aphano Yinsa khuwooza yoori: "Miiyo kiniwuuzani khweele yoori, Mwaana khanretta etthu yawe, ila onretta etile animoonaaye Paapa arettaka. Maana zooshi epile anrettaaye Paapa, Mwaana onretta ethiipo.

²⁰ Maana Paapa onimpheta Mwaana na oninthonyeza zooshi anrettaazo, onteela onthonyeza khaazi kiina zooziti epi yoori mweeyo mwishanke.

²¹ Maana ethiipo Paapa aniwaasisimulaaye ananfwa na khuwinkha ohaayi, Mwaana naye oniwinkha ohaayi apale ye aniwatakhaaye. ²² Paapa khanimphuka hatha ntthu, ila Paapa amwinkha Mwanawewe ophuka wooshi,

²³ yoori ooshi anshitahi Mwaana nkhama aninshitahaazo Paapa. Otule ahinrishitahaaye Mwaana khaninshitahi Paapa otule anrumiyeyo.

²⁴ Miyo kiniuuuzani khweele yoori, otule ansiilaaye ntakhuzi laka na aninkhupalaaye otule akiperekhiyeeyo onaaye ohaayi wa mileele, wala khamphukiwa, ila avirela ofwa yoori eeyane ohaayi. ²⁵ Miyo kiniuuuzani khweele yoori ontta ofiya wakathi, na wafiya, ananfwa anttelaaye osiila huula ya Mwaana wa Nluku na otule anttelaaye osiila oniyya haayi. ²⁶ Nkhamma ethiipo Paapa eeyiyeyo mweenyewe ohaayi, amwinkha mwanawewe wiya mweenyewe ohaayi, ²⁷ na amwinkha ofwalume yoori aphuke, maana ye Mwaana wa Pinaatamu.

²⁸ Mwihiyi wooshankela epo zaya, maana ontta ofiya wakathi wa ooshi apale ari nkhopuri anttelaaye osiila huula yawe ²⁹ arlawwa asisimuwe nkhopuri. Apale aari orettaaye zooshapweya anttela osisimuwa eeye haayi, apale aari orettaaye zootakhala anttela osisimuwa eeye ophukiwa. ³⁰ Otthome akinwahi oretta hatha ethu. Miyo kimphuka khwa nanna Paapa akuuzyeeyo, na ophuka waka pi wa shariya maana akineekesa ojituvelisa, ila matakhele a otule akiperekhiyeeyo.

Oshaahiti monkoni wa Yinsa

³¹ Nkhamma kinjilawela oshaahiti kimweenyewe, oshaahiti aka khahi wa khweele. ³² Ila owaapho nkina anlawelaaye oshaahiti monkoni wa miiyo na miiyo kinjuwa yoori oshaahiti aya opo alupiyeeyo monkoni wa miiyo haakhi.

³³ Mwawaarumiye atthu olawa omuuzela Yaahaya, yo khulaza oshaahiti wa khweele. ³⁴ Miyo akininhithajiya hatha ntthu okilawela oshaahiti, ila kinlupa vitthu epo yoori mweeyo mwiyye wa wuusurukha. ³⁵ Yaahaya aari nkhamma likhompe laari okholelaaye nuuru yaya nawuumwasikhelani, mweeyo khukhupalela khwa wakathi vattithiiru ofurahela nuuru yaya eto. ³⁶ Ila miiyo kinaaye oshaahiti nwulweene zayita Yaahaya, mwaasa wa khaazi akinkhiyeeyo Paapa yoori kikhole. Ethiito oshaahiti yoori Paapa ti akirumiyeeyo. ³⁷ Paapa otu akiperekhiyeeyo, onlaza oshaahiti monkoni wa miiyo. Mweeyo khamwina siile huula yawe, wala khamwina moone nanna ariiyo, ³⁸ theenya khamwina ntakhuzi lawe nroho, maana khamwinkhupaleeni otule amperekhiyeeyo. ³⁹ Mwasoma zawaatikhiwa ttakatthiiifu, maana mwinoona yoori khwa yo mwinaaye ohaayi wa mileele, ila pi ethiipo zinikilawelaaye oshaahiti, ⁴⁰ ila mweeyo khamwintakha okiteela miiyo yoori mwiiyane ohaayi.

⁴¹ Miyo akinkhupalela siifwa za anaatamu. ⁴² Maana miiyo kajuwa yoori mweeyo khamwina pheta ya Nluku nkathhi mwenu. ⁴³ Miyo kata khwa nzina la Paapa, ila khamwikipwekhoreleeni. Nkina amana ata khwa nzina lawe mweenyewe, weekhweele mwintta ompwekherela. ⁴⁴ Mwinttela okhupali toovi mwitakhaka osifwiwa pi atthu, mwihitakhaka siifwa ya Nluku mmote paasi?

⁴⁵ Khwa ethiipo mwihaakanyere miiyo wuulokovezani mmakhono wa Paapa. Anttelaaye wuulokovezani ti Munsa, othuuto mwiriinaaye nromelo enu. ⁴⁶ Eriwaka mwaari okhupalela epile Munsa alupiyeeyo, mweetta okikhupalela na-miyo, maana ye aatikha vitthu monkoni wa miiyo. ⁴⁷ Ila amana mwihikhupalaka etile aatikhiyeeyo, nanna-ni mwinttelaaye okhupalela etile miiyo kinlupaaye?"

6

Yinsa onjisa khuntti ya atthu

¹ Paata ya vitthu epile, Yinsa khulokha ntthatta la Kalileya theenya liniit-thiwaaye Tiperiyaati. ² Khuntti khuluyeene ya atthu khusala enlotta, maana eettiye woona alama za minjuza aarettiyeelo za owaavonisa alwele. ³ Ye khuwela vamwaako khwiikhala attaapho na anakhiyoni awe. ⁴ Esaleelaka ofiya siikhu ya orettiwa njampo la Paashikowa la mayahuuti.

⁵ Aphano alansiyeevo maasho khoona khuntti khuluyeene ya atthu yeettaka onteela, Yinsa khumuuzela Filiipe yoori: “Noozanye vayi phaawu niwenkhe atthu apa aje?” ⁶ Aamuzeliye yoori amweeze, maana ye aajuwiyete ethtu aari weettelaaye oretta.

⁷ Filiipe khujipu araka: “Nzurukhu miiya piiri wa feeta khunfiyela wuuzyanya phaawu yoori wakhula ntthu apatthe pattaasu.”

⁸ Aphano nakhiyoni mmote anithiwaaye Antere, ttwiye Simawu Pheeturu, khuri: ⁹ “Shaapu otu ariiye apha onaaye phaawu thaanu na swi piiri, ila epo zaya niini khwa atthu awaatta apa?”

¹⁰ Yinsa khuri: “Mwiwooze atthu apo eekhale.” Puuro yaya etile zaarivo nyaani zawaatta. Atthu apale khwiikhala, alumbe aari ethu ya alufu thaanu. ¹¹ Aphano Yinsa khuthuula phaawu khunshukhurwela Nluku, khwaawanya na khuretta ethhiipo khwa swi, wakhula ntthu khwa kiiima aari otakhaaye. ¹² Paata ya orupalaza, Yinsa khuwoza anakhiyoni awe yoori: “Mwilokotthele zooshi epo zisaliyeelo yoori ehaashikhevo hatha moote.” ¹³ Khulokothela tathela za phaawu epile thaanu, khwiitaala khelenke khumi na piiri, aalikhiiyeeyo apale aari orafunaaye. ¹⁴ Ooniyeovo alama etile ya minjuza Yinsa aarettiyeelo khulupaza yóori: “Woohiivo hatha shaakha otu ti Napiyu aari weettelaaye ota voolumwenku.” ¹⁵ Yinsa noojuwa yoori aari otakha onthuula na kuvu zaya anrette wiya mfwalume aya, khulaavo aphale vaya khulawa theenya omwaako othwe.

Yinsa oneettetta vatulu wa maati

¹⁶ Njuwa-looveva anakhiyoni a Yinsa khwiishukhela ontthatta. ¹⁷ Khupakhira nkalawa, khulokhela kaapu phantte ya Kafwaranaawu. Vathi waariipyeyevo, ila Yinsa khaari vamote na-yo. ¹⁸ Khusala evuma pheevo yookhomaala na mpahari khupuwamo mawipi. ¹⁹ Anakhiyoni eettaka ofuttha alawaka ethhiipile eettettiye kiyasi ya phiima alufu thaanu ama sitha, khusala amoona Yinsa eettaka ota eettettaka vatulu wa maati aattamelaka kalawa; yo khwiiya awoova. ²⁰ Ila Yinsa khuwoza yoori: “Ti-miyo! Mwihoovel!” ²¹ Aphano anakhiyoni apale khumpwekherela na furaha nkalawa mphule nasaapiru khufiya ohali aari weettaawo.

Yinsa phaawu ya ohaayi

²² Mmeesho mwaya, atthu apale asaliyeeyo phantte etile kiina ya ntthatta, khujuwa yoori kalawa moote etile yaari aphale, Yinsa kapakhiriymo, anakhiyoni awe aalawiye ottho. ²³ Elottelanaka, kalawa kiina za sitati ya Tiperiyaati khufiya khariju ya aphale atthu aari orafunaavo phaawu wakathi Yinsa anshukhurweliyeovo Mbwana. ²⁴ Wakathi atthu apale ajuwiyeyevo yoori Yinsa khaarivo aphale na anakhiyoni awe, khweetta nkalawa mwaya khusala alawa Kafwaranaawu olawa omweekesa.

²⁵ Nonsikana kaapu ya ntthatta, khumuuzela yoori: “Rabi, wafiya lini okhuno?” ²⁶ Yinsa khuwaajipu yoori: “Miiyo kiniwuuzani khweele yoori, mwueeyo mwinikeekesa, khahiyio mwaasa wa woona alama za minjuza, ila

mwaasa wa orafuna phaawu khwiya woorupala.²⁷ Mwihikhole khaazi khwa ethtu-yoojiwa enharipweyaaye, ila khwa ethtu-yoojiwa eninkhaaye ohaayi wa mileele, ethiito Mwaana wa Pinaatamu aniwinkhaanini. Maana, Nluku Paapa, anttheliyeeyo alama yawe ya onhakikhi."

²⁸ Aphano khumuuzela Yinsa yoori: "Ninhithajiya oretta niini yoori nikhole khaazi Nluku antakhaaye?"

²⁹ Yinsa khuwaajipu yoori: "Khaazi Nluku antakhaaye tiiti, onkhupali otule amperekhiyeeyo."

³⁰ Aphano khumuuzela yoori: "Alama-ni ya minjuza onttelaaye onithoonyeza yoori noone na nuukhupali weeyo? Wala onttela oretta-ni?"

³¹ Amarehemu apapazethu aja mana n'yaara, nkhamma eththiipo enlupaazo zawaatikhwa ttakatthiifu eraka: 'Ye awenkha ethtu-yoojiwa ya pinkuuni.' "

³² Yinsa khuwooza yoori: "Miiyo kiniuuuzani khweele yoori: Khahiyo Munsa awinkhiyeenini phaawu ya pinkuuni, ila Paapa ti aninkhaaye phaawu ya khweele ya pinkuuni. ³³ Maana phaawu ya Nluku ti otule eeshukhiyeeyo pinkuuni khwinkha ohaayi olumwenku."

³⁴ Yo khuri: "Mbwana, oninkhe phaawu ethiito khwa mileele!"

³⁵ Aphano Yinsa khulupa yoori: "Miiyo ki phaawu ya ohaayi. Otule aniki-teelaaye miiyo khinteeela onkhola theenya jala na otule anikikhupalaaye miiyo khalinteeela onkhola theenya nnyotha. ³⁶ Ila nkhamma eththiipo miiyo kiuuzyieenini yoori, mweeyo mwakoono, ila nalelo khamwinkikhupali.

³⁷ Wakhula otule Paapa anikinkhaaye, onikiteela miiyo, na otule anikiteelaaye miiyo akinteeela onthanya ³⁸ Maana keeshukha pinkuuni, khahiyo yoori kirette matakheloa aka, ila kirette matakheloa awe otule akiperekhiyeeyo. ³⁹ Matakheloa otule akiperekhiyeeyo pi apa: ahikaashikhe hatha mmote wa otule akinkhiyeeyo, ila miiyo kinsisimule siikhu ya mwiisho. ⁴⁰ Maana matakheloa a Paapa pi yoori wooshi otule animoonaaye Mwaana na khunkhupali eeyane ohaayi wa mileele na miiyo kintta onsisimula siikhu ya mwiisho."

Waapa wa mayaahuuti

⁴¹ Mayaahuuti khusala aapa mwaasa wa Yinsa owooga yoori: "Miiyo ki phaawu yiishukhiyeeyo pinkuuni." ⁴² Khurutela olupa yoori: "Khahi Yinsa otu, mwaana wa Yuusufu? Onoona yoori fweeyo khanninjuwa papaawe na mamaawe? Onlupa toovi yoori: 'Keeshukha pinkuuni?'"

⁴³ Yinsa khuwaajipu yoori: "Mwilikhe okaapa. ⁴⁴ Khaavo ankiteelaaye miiyo woohiiyi otisiwa ti Paapa, otule akiperekhiyeeyo na miiyo kininsisimula siikhu ya mwiisho. ⁴⁵ Yaatikhwa nkithaapu za manapiyu yoori: 'Ooshi anttela osomisiwa ti Nluku.' Nakatalikha, wooshi otule asiliyeeyo phantte ya Paapa na khujuwa, onikiteela miiyo. ⁴⁶ Khina anamoone Paapa, ila otule alankhiyeeyo wa Nluku ti amooniyeeyo Paapa. ⁴⁷ Miiyo kiniuuuzani khweele yoori: Otule anikikhupalaaye onaaye ohaayi wa mileele. ⁴⁸ Miiyo ki phaawu ya ohaayi. ⁴⁹ Apapazenu aja mana n'yaara na khufwa. ⁵⁰ Eti phaawu yiishukhiyeeyo pinkuuni, yoori wakhula otule anjaaye ahifwe. ⁵¹ Miiyo ki phaawu ya ohaayi yiishukhiyeeyo pinkuuni. Ntthu amana aja phaawu yaya eto, ontaa wiyyana ohaayi wa mileele na phaawu kininkhaaye olumwenku yoori wiyyane ohaayi, mwili aka."

⁵² Aphano mayaahuuti khwaaza onyakulisana atthaaporu araka: "Mwinyi otu onttela oninkha toovi mwiili awe yoori nirafune?" ⁵³ Yinsa khuwooza yoori: "Miiyo kiniuuuzani khweele yoori: Amana mweeyo mwihirafuni mwiili wa Mwaana wa Pinaatamu na khuhinywi taamu yawe,

khamwina ohaayi mwaamweenyewe. ⁵⁴ Wakhula otule anrafunaaye mwiili aka na khunywa taamu yaka onaaye ohaayi wa mileele na miiyo kinteele onsisimula siikhu ya mwiisho. ⁵⁵ Maana mwiili aka ethu-yoojiwa ya khweele na taamu yaka etthu yoonywiwa ya khweele. ⁵⁶ Otule anrafunaaye mwiili aka na khunywa taamu yaka oto oniikhala khwa miiyo na miiyo khwa ye. ⁵⁷ Nkhama Paapa akiperekhiyeeyo eeyiyeyo haayi, na miiyo kiniikhala mwaasa wa ye. Khwa ethiipo otule anrafunaaye mwiili aka oniiyana ohaayi mwaasa wa miiyo. ⁵⁸ Eti phaawu elankhiyeeyo pinkuuni. Apapazenu aja mana na khufwa, ila otule anrafunaaye phaawu eti oniiya haayi mileele.” ⁵⁹ Ye aalupiye mattakhuzi apa wakathi aari osomisaaye nsinakooka ya Kafwaranaawu.

Anakhiyoni awaatta anintthira Yinsa.

⁶⁰ Paata ya osila mattakhuzi apale, anakhiyoni enkeene khulupa yoori: “Olipa mattakhuzi aya apa. Paani anwahaaye okhitiri?”

⁶¹ Ila Yinsa khujuwa nkathhi mwawwe yoori anakhiyoni awe eetta onyakulisana khuwoozela yoori: “Mattakhuzi aka antta wuutapanyani?

⁶² Khi enttela wiiya toovi amana mwimoona Mwaana wa Pinaatamu arute-laka okhu alankhiyeewo? ⁶³ Rooho ya Nluku eninkha ohaayi, ila mwiili khuna fwayita; mattakhuzi apa kiwuuziyeenini pi a rooho na ohaayi. ⁶⁴ Ila khwa ethiipo awaapho vakatti venu akina ahinkhupalealaaye.” Ila Yinsa aari ojua omwanzwenee paavi apo aya ahaari okhupalaaye na paani aari weettelaaye onzukuluwela. ⁶⁵ Ye khuri: “Tiiro kiniwuzanini yoori, khina anwahaaye okiteela miiyo kiheetteeni winkhiwa ti Paapa.”

⁶⁶ Wakathi otthuupule anakhiyoni enkeene khuntthira na khulikha on-lotta.

⁶⁷ Yinsa khuwoozela apale khumi na awiri yoori: “Na mweeyo mwintakha okithira mwilawe?”

⁶⁸ Simawu Pheeturu khujipu yoori: “Ninttela onlotta paani? Weeyo on-aaye mattakhuzi a ohaayi wa mileele. ⁶⁹ Fweeyo ninkhupalela na ninjuwa yoori o Ttakatthiifu wa Nluku.”

⁷⁰ Aphano Yinsa khujipu yoori: “Khahi miiyo kiwaathawuliyeeyo apale khumi na awiri? Ila mmote wa mweeyo sheethwani.” ⁷¹ Ye aari onlupa Yuuda, mwaana wa Simawu Eshikariyoote, aari mmote wa apale khumi na awiri, ila ti aari weettelaaye onzukuluwela Yinsa.

7

Yinsa onnta onjampo la heema

¹ Paata ya vitthu epile, Yinsa khusala eettetta nti wa Kalileya, maana khaari otakha wiiya Yudeya, mwaasa wa mayaahuuti aari otakha omuula.

² Ila njampo la heema la mayaahuuti leetta waattamela. ³ Yinsa khuuziwa ti attwiize yoori: “Weeyo ona yoolaamo mphu olawe Yudeya yoori anakhiyoni awo awahi woona khaazi onkholaaye. ⁴ Maana khina aneekesaaye ojuwiwa pi atthu awaatta ankholaaye khaazi zawe sirini. Nkhama weeyo onretta vitthu epi, othoonyeze vamwanttiwa.” ⁵ Maana hatha attwiize khaari onkhupali.

⁶ Yinsa khuwoza yoori: “Wakathi aka nalelo khunafiye, ila khwa mweeyo wakhula wakathi pi woolikana. ⁷ Olumwenku khunwahi wiiphiiriwa ti mweeyo, ila oniiphiriwa ti miiyo, maana miiyo kininkha oshaahiti wa yoori khaazi zaya pi zootakhala. ⁸ Mwilawe onjampo, ila miiyo akinlawa maana

khunafiye wakathi aka.” ⁹ Paata ya olupa mattakhuzi apale khwiikhala Kalileya ottuukhule.

¹⁰ Aphano paata ya attwiize olawa onjampo, ye khaalawiye payana, ila sirini. ¹¹ Vanjampo aphale mayaahuuti eetta onsaya na omuzelela araka: “Mwinyi otule ori vayi?”

¹² Vakathi wa atthu apale waario waapa monkoni wa ye, akina aari olupa toono: “Mwinyi wooshapweya rooho.” Akina araka: “Wala, oniwaat-tettekha atthu.” ¹³ Ila khaavo aari ottakhulaaye payana mwaasa wa owoova mayaahuuti.

Yinsa oneetta onjampo

¹⁴ Wakathi lifiyeevo vakathi njampo ntthile, Yinsa khweetta Nnyupa Woosifwiwamo khwaaza osomisa. ¹⁵ Amayaahuuti khwiiya ooshanka na khuuzela yoori: “Mwinyi otu ajuwa toovi kano ahisomeeni?”

¹⁶ Yinsa khuwaajipu yoori: “Osomisa waka khahiyo waka, walankha wa otule akiperekhiyeyo. ¹⁷ Amana ntthu ajilakelela oretta matakhero a Nluku, ontha osophela nkhamma osomisa waka onlankha wa Nluku ama kinjilupa ki mweenyewe. ¹⁸ Otule anjilupaaye mweenyewe oneekesa si-ifwa yawe, ila otule aneekesaaye siifwa ya otule amperekhiyeyo, oto ti wa khweele; khayiivo hatha etthu yoovonyeya vakathi vawe. ¹⁹ Munsa awinkhani kano! Ila khina mmote wa mweeyo anshututelaaye. Khi mwineekeselani okuula?”

²⁰ Atthu apale khujipu yoori: “Weeyo ona sheethwani! Antakhaaye owuula ti paani?”

²¹ Aphano Yinsa khuri: “Keetta oretta minjuza, mooshi mweeyo khwiiya wooshanka. ²² Mwaasa wa yoori Munsa awenkha okhiriya (weetta ohiiyiru woolankha wa Munsa ila walankha wa amarehemu apapazethu), mweeyo mwinkhiriyisana saapatu. ²³ Moone, nkhamma athuuliwa nlume khukhiriyisiwa saapatu, yoori kano za Munsa zimariseliwe, khi mwiniphireli-wani ti miiyo mwaasa wa ovonisa mwiili wooshi wa ntthu otu saapatu? ²⁴ Mwihiphukane mwaasa woona nanna ariizo ntthu aya, ila mwisala mwiphukana khwa shariya.”

Yinsa onsomisa vanjampo

²⁵ Atthu akina a Yeruzaleemu khusala alupa yoori: “Khahiyo mwinyi othuutu mwaari omwekesaaye yoori mwimuule? ²⁶ Mwimoone, ye ontakhula vamwanttiwa, ila khuhisala apuwa hatha ntthu wonkheeti! Talili afwalume anjuwa saaneene yoori otu ti Al-Masiihu? ²⁷ Ila fweeyo ninjuwa ohali alankhiyeyo. Amana Al-Masiihu ata, khina anttelaaye ojuwa ohali alankhiyeyo.”

²⁸ Wakathi aari osomisaaye Nnyupa Woosifwiwamo, Yinsa khuttakhula woosileyavo araka: “Aaa, mweeyo mwakijuwa na mwinjuwa ohali kilankhiyeyo. Miyo akiri apha khwa matakhero aka, ila otule akiperekhiyeyo ti eeyiye khweele. Otule mweeyo mwihininijuwaaye, ²⁹ ila miiyo kinjinjuwa maana kata khwa ye na ti akiperekhiyeyo.”

³⁰ Aphano khusala atakha onkhola, ila khuhiivo mmote ansapiyeyo maana wakathi waari ohinafiye. ³¹ Atthu enkeene aari aphale khumkhupali na khusala alupa yoori: “Amana Al-Masiihu ata, onteela oretta alama zootokinisa zayifa epi arettiyeeyo mwinyi otu? Wala!”

Anamweekesela arumiweeyo yoori ankhole Yinsa

³² Mafwarizeewu noowasiila atthu aapaka monkoni wa Yinsa, aphano mahaakhimu a tiini na mafwarizeewu khuwaaruma anamweekesela a

Nnyupa Yoosifwiwamo yoori ankhole. ³³ Yinsa khuwooza yoori: "Kiri vamote na mweeyo wakathi vattithiru nawiisha kinlawa wa otule akiperekhiyeeyo. ³⁴ Mweeyo mwinlawa mwakeekese, ila mwihikipatthe; maana mweeyo khamwinwahi ofiya okhu kinttelaaye wiyyawo." ³⁵ Mayaahuuti khusala oozelana atthaaporu yoori: "Ontta varyi mwinyi aya otu nihittelaaye onsikana? Talili ontela wiikhala na mayaahuuti apale anikhalaaye malaponi, ama ontela owaasomisa akereeku? ³⁶ Maana aya niini, a eto aalupiyeeyo yoori: 'Mweeyo mwinlawa mwakeekese ila mwihikipatthe,' maana 'mweeyo khamwinwahi ofiya okhu kinttelaaye wiyyawo?"

Nlipu wa maati ohaayi

³⁷ Siikhu ya mwiisho, siikhu khuulu ya njampo, Yinsa khulankha khweemela khukhuwelela araka: "Nkhama owaapho linkholiyeeyo nnyotta, akiteele miyo anywe. ³⁸ Maana otule anikikhupalaaye miyo, nkhamma enlupaazo zawaatikhiwa ttakathiiifu; 'nkatthi mwawe zinttela wiittikhamu nyuuttho za maati ohaayi.' ³⁹ Ye aari olupa monkoni wa Rooho Ttakathiiifu etile aari oteelaaye winkhiwa apale akhupaliyeeyo. Maana nalelo Yinsa aari ahinasifiwi.

Waawanyeya wa atthu

⁴⁰ Aphano noosiila atthu apale athukumaniyeeyo aphale khuri: "Otu ti Napiyu weekhweele!" ⁴¹ Akina khusala alupa yoori: "Ye ti Al-Masiihu!" Akina khusala oozelana yoori: "Al-Masiihu ontela olankha Kalileya? ⁴² Zawaatikhiwa ttakathiiifu zinlupa yoori Al-Masiihu ontela olankha khwa peewu ya Daawuuda nti wa Belemu, okhu aari wiikhalaawo Daawuuda." ⁴³ Mwaasa wa ye khupuwa waawanyeya khwa atthu apale. ⁴⁴ Akina khusala atakha onkhola Yinsa, ila khuhiiro hatha ntthu ansapiyeeyo.

Anamalokozela amayaahuuti aninkathala Yinsa

⁴⁵ Anamweekesela khulawa wa mahaakhimu a tiini na mafwarizeewu, atthaapo oozeliyeeyo yoori: "Mwaasa aya niini mwihintisaka?" ⁴⁶ Yo khujipu yoori: "Khina anattakhule nkhamma mwinyi oto anttakhulaazo." ⁴⁷ Mafwarizeewu khuuzela yoori: "Niri talili na mweeyo mweetta ohatiwa? ⁴⁸ Awaapho afwalume ama mafwarizeewu ankhupaliyeeyo? ⁴⁹ Ila atthu apo ahinjuwaaye hatha ethtu ya kano alaanikha." ⁵⁰ Mmote wa atthaapale aari wiitthiwaaye Nikoteemu, otule swaafu moote alawiyeeyo okutthanana Yinsa, khuuzela yoori: ⁵¹ "Kano zeethu khazininhukhumu ntthu, ahaazeeni khapula osiiliwa khujuwiwa ethtu arettiyeeyo, khahi eththiipo?" ⁵² Yo khujipu yoori: "Na weeyo wa Kalileya? Woone na onta ojuwa yoori Kalileya khampuwawo hatha napiyu." ⁵³ Aphano wakhula mmote khulankha khusala alawa owawe.

8

Muukha aasikaniveeyo araruwaka

¹ Attaaphale Yinsa khulankha khusala alawa omwaako wa Oluveera. ² Supuyeene khurutela Nnyupa Woosifwiwamo, atthu ooshi khusala alawa onkutthanana, ye khwiikhala khusala awaasomisa. ³ Anamanozela a kano na mafwarizeewu khuntana muukha mmote ansikaniveeyo eettaka oraruwa. Khumweemesa vakatthi wa atthu apale. ⁴ Khuuziwa Yinsa yoori: "Mwaaliimu, muukha otu asikaniwa eettaka oraruwa. ⁵ Muukha toowo, nkaththi wa kano za Munsa, enniruma onvonya na mawe. Khi weeyo onlupa

ni?” ⁶ Aari olupa toowo atakhaka yoori apatthe nanna yonlokoveza. Ila Yinsa khwiinama khusala aatikha vathi na yaala. ⁷ Wiya eetta okhanyarela omuuzel, Yinsa khulankha khuwooza yoori: “Otule khwa mweeyo, ahina twampi eeye wamwanzo omweeselela liwe muukha otu.” ⁸ Khurutela wiinama khusala aatikha theenya vathi.

⁹ Noosiila mattakhuzi apale, ooshi khulaazavo mmote mmote, aaziye apale awulu. Khusalavo Yinsa na muukha otule eemeliye, attaphale. ¹⁰ Aphano Yinsa khulankha khweemela khumuuzela yoori: “Muukha, ari vayi apale aya? Khina oohukhumwiyeeyo?”

¹¹ Ye khujipu yoori: “Khina mmote, Mbwana.” Aphano Yinsa khumuuzela yoori: “Na miiyo akinuuuhukhumu. Olawe na ottharuwe oretta twampi.”

Yinsa nuuru ya olumwenku

¹² Yinsa khurutela owooza theenya yoori: “Miiyo ki nuuru ya olumwenku; otule aniklottaye khaneetteta n’yiiza, ila oniiyana nuuru ya ohaayi.”

¹³ Mafwarizeewu khusala amuuza yoori: “Weeyo ojilawela oshaahiti omwenyeweru. Apho oshaahiti awo khahiyi wa khweele.”

¹⁴ Yinsa khuwaajipu araka: “Hatha nkhamma kintta ojilawela oshaahiti, oshaahiti aka pi wa okhwhee, maana kinjuwa ohali kilankhiyeewo na ohali kineettaawo. Ila mweeyo khamwinjuwa ohali kilankhiyeewo wala ohali kineettaawo. ¹⁵ Ophuka wenu mweeyo pi wa phantte ya onaatamu; ila miiyo akinimphuka hatha ntthu. ¹⁶ Hatha nkhamma kintta ophuka, ophuka waka pi wa khweele, maana akiri otthome. Kina Paapa otule akiperekhiyeeyo. ¹⁷ Nkano zenu mweeyo yaatikhwa yoori oshaahiti wa atthu awiri pi wa khweele. ¹⁸ Miiyo kinjilawela oshaahiti na Paapa otule akiperekhiyeeyo onkilawela oshaahiti.”

¹⁹ Aphano khumuuzela yoori: “Papaawo aya ori vayi?” Yinsa khuwaajipu yoori: “Mweeyo khamwinikijuwa miiyo na khamwininjuwa Paapa, eri-waka mwaari okijuwa, mweetta onjuwa Paapa.” ²⁰ Ye aalupiye mattakhuzi apa eettaka osomisa Nnyupa Woosifwiwamo, kharipu ya puuro etile enthiwaamo zaakha. Ila khina mmote ankholiyeeyo, maana waari ohinafiye wakathi aya.

Yinsa onaakisela khaazi yawe na ofwalume

²¹ Yinsa khurutela olupa theenya yoori: “Miiyo kintta olawa, mweeyo mwinlawwa mwakeekese na mwinfwa na twampi zenu. Ohali kineettaawo mweeyo khamwineettawo.”

²² Aphano mayaahtu kihuuzelana yoori: “Talili ye ontela ojuula? Tiito anlupaaye yoori: ‘Ohali kineettaawo mweeyo khamwineettawo?’”

²³ Yinsa khurutela olupa theenya yoori: “Mweeyo mwa atthu a vathi attapha; miiyo ki wa otulu. Mweeyo mwa voolumwenku; ila miiyo akiyo wa olumwenku. ²⁴ Tiito kinlupaaye yoori mwinttela ofwa ntwampi mwenu. Nkhama mweeyo khamwinkhupali yoori Miiyo Ti Miiyo, weekhweele mwinttela ofwa ntwampi mwenu.”

²⁵ Aphano khumuuzela Yinsa yoori: “O paani weeyo?” Yinsa khujipu yoori: “Tokhiya omwanzo kawuuzani. ²⁶ Kinaaye vitthu zawaatta zoolupa na ophuka monkoni weenu mweeyo. Ila otule akiperekhiyeeyo ti wa khweele na kinuuza olumwenku epilekinsiliyeeyo paasi.”

²⁷ Yo khuhieeleyi yoori Yinsa aari owuza monkoni wa Paapa. ²⁸ Aphano Yinsa khuri: “Amana mweeyo mwinsifu Mwaana wa Pinaatamu, mwinttua ojuwa yoori Miiyo Ti Miiyo na akinretta hatha ethhu ya matakhelo aka, ila kinlupa etile Paapa akisomisiyeeyo. ²⁹ Otule akiperekhiyeeyo ori vamote

na-miyo, ye khakilikheeni wiiya otthome, maana wakhula wakathi kinretta etile enintuvelaaye.” ³⁰ Alupiyeevo mattakhuzi apale, atthu awaatta khumkhupali.”

Aana a Eburahiima na aana a sheethwani

³¹ Yinsa khuwooza mayahuuti apale ankhpupaliyeeyo yoori: “Amana mweeyo mwijilipisana ntakhuizi laka, mwinttela wiiya anakhiyoni aka khweele; ³² na mwinttela ojuwa haakhi, na haakhi ethiito entta wuutaphulani.”

³³ Yo khunjipu yoori: “Fweeyo na peewu ya Eburahiima wala khani-neeyeke viiththaana za ntthu nkina. Weeyo onlupa toovi yoori ninttelaa wiyya wootaphuliwa?”

³⁴ Yinsa khuwaajipu araka: “Miiyo kiniuuuzani khweele yoori, wooshi otule ankosaaye mwiiththaana wa twampi. ³⁵ Mwiiththaana khaniyana puuro ya mileele vakatthi wa ajaama, ila mwaana oniiyana puuro ya mileele. ³⁶ Amana Mwaana ootaphulani, weekhwheele mwiniyya wootaphuwa. ³⁷ Miiyo kinjuwa saaneene yoori mweeyo mwa peewu ya Eburahiima, ila mwineekesa okuula, maana khwa mweeyo ntakhuizi laka khalina puuro. ³⁸ Miiyo kiniuuuzani epile kooniyeezo wa Paapa, na mweeyo mwinretta epile mwisiiliyeezo wa papeenu.”

³⁹ Aphano yo khunjipu yoori: “Papeetthu ti Eburahiima!” Yinsa khuwooza theenya yoori: “Nkhamma mwa aana a Eburahiima, mwikhole khaazi epile Eburahiima akholiyeeyo. ⁴⁰ Ila mweeyo mwintakha okuula, kiri miiyo kiwuuyieenini haakhi etile kisiiliyeeyo wa Nluku. Eburahiima kharetteeni toowo. ⁴¹ Mweeyo mwinretta etile papeenu arettiyeeyo.” Yo khujipu yoori: “Fweeyo khaniyo aana pure, ninaaye Paapa mmote paasi Nluku.”

⁴² Yinsa khuwooza yoori: “Eriwaka Nluku aari Papeenu, mweetta okipheta, maana miiyo kalankha wa Nluku tiito kiriyo apha. Miiyo akitiiseeni otthome, ila ye ti akiperekhiyeeyo. ⁴³ Mwaasa wa niini mweeyo eheweleyakan hapari zaka? Ama mwintta woona olipa ntakhuizi laka.

⁴⁴ Mweeyo mwinaaye papeenu, sheethwani, na mwintakha oretta etile enintuvelaaye. Ye namahusuti waaza omwanzweene wala khanalotteleke haakhi, maana ye khana haakhi. Amana ahataka onlupa mattakhuzi awe, maana namahata, paapa wa ohata. ⁴⁵ Maana mwaasa wa miiyo olupa haakhi khamwinkitakha! ⁴⁶ Paani wa mweeyo anwahaaye okilokoveza oretta twampi? Nkhamma kinlupa haakhi, khi mwaasa wa niini mwihikikhuspalaka? ⁴⁷ Otule eeyiyeyo wa Nluku onsiila mattakhuzi a Nluku; mweeyo khamwininsiileza maana khayi mwa a Nluku.”

Yinsa na Eburahiima

⁴⁸ Mayaahuuti khumuuzu Yinsa yoori: “Fweeyo khanivonyeleeni olupa yoori weeyo o nsamariiya na onaaye sheethwani.”

⁴⁹ Yinsa khuwaajipu yoori: “Miiyo akina hatha sheethwani; olilha toowo, kininshitahi Paapa, ila mweeyo mwinkitarawu. ⁵⁰ Miiyo akineekesa ojisifu, ila owaapho anekesaaye khwa miiyo na namaphuka. ⁵¹ Miiyo kiniuuuzani khweele yoori, otule anshututelaaye ntakhuizi laka khanteela woona ofwa.”

⁵² Mayaahuuti khujipu araka: “Aphano ninjuwa yoori khweele onaaye sheethwani! Eburahiima afwa, na manapiyu, ila weeyo onlupa yoori: ‘Ntthu amana ashututela ntakhuizi aka khanteela ofwa.’ ⁵³ Weeyo onwulweene zayita papeetthu Eburahiima? Ye afwa na manapiyu afwa, khi weeyo onjoona nkhamma paani?”

⁵⁴ Yinsa khuwaajipu yoori: “Nkhama kintta ojisifu, ojisifu waka khuna maana. Paapa otule mweeyo mwinraaye ‘Nluku ethtu,’ ti anakisifwisaaye.

⁵⁵ Mweeyo khamwininjuwa, ila miiyo kininjuwa. Eriwaka keettiye olupa yoori akininjuwa, kaari wiya namahata nkhama mweeyo, ila miiyo weekhwhee kininjuwa na kinshututela ntakhuzi lawe. ⁵⁶ Eburahiima papeenu aari woofurahi paata ya woona siikhu ya ota waka; khoona na khufurahela.”

⁵⁷ Mayaahuuti khumuuzela yoori: “Weeyo nalelo khuneeyane nyaakha hamusiini, wamoona toovi Eburaahima?”

⁵⁸ Yinsa khuwaajipu yoori: “Miiyo kiniwuuzani khweele yoori, Eburaahima ahinavokoliwe Miiyo Ti Miiyo.” ⁵⁹ Aphano mayaahuuti khuthula mawe yoori anvonye, ila Yinsa khujivitha na khusaruwamu Nnyupa Woosifwiwamo.

9

Yinsa oninvonisa ntthu aavokoliweeyo ahoonaka.

¹ Yinsa alawaka, ntarikhi khumoona mwinyi mmote aavokoliweeyo ari woohooni. ² Anakhiyoni awe khumuuzela yoori: “Rabi, otu ovokoliwa ahoonaka, mwaasa wa twampi zawe, ama, twampi za apapaze?”

³ Yinsa khuwaajipu yoori: “Khahiyo ye wala apapaze akosiyeeyo, ila vitthu epi zarettikhana yoori owahi wa Nluku othoonyezeye muuhaayi mwawe. ⁴ Maana enihithajiya okhola khaazi nthana otthuupu za otule akiperekhiyeeyo, amana oripa khina anwahaaye okhola khaazi. ⁵ Wiya kiri voomwenku, ki nuuru ya olumwenku.”

⁶ Paata ya olupa mattakhuzi apale khutthemela vathi, maattha awe khuphakanya na mattophe khuttukunttela mmaasho wa mwinyi otule.

⁷ Aphano khumuuzela yoori: “Olawe wajoose nkulaathayini ya Siloowe” (liriina maana a “operekhiwa”). Mwinyi otule khulawa khijoosa khuruti eettaka woona.

⁸ Anamwaattamanana awe na apale aamoniyeeyo raku alolaka zimola khuuuzela yoori: “Khahiyo mwinyi othuutu aari wiikhalaahaae na olola zimola?” ⁹ Akina khusala alupa yoori aari ye. Akina khusala alupa yoori: “Khahiyo, eetta olattanana.” Ila mweenyeweene khusala akhanyarela yoori: “Ti miiyo ena.”

¹⁰ Aphano khusala amuuzela yoori: “Afunuliwa toovi maasho awo?”

¹¹ Mwinyi otule khuuajipu yoori: “Mwinyi anitthiwaaye Yinsa eetheyiye mattophe, khuttha mmaasho mwaka na khukuza olawa ojoosa okulaathayini ya Siloowe. Miiyo khulawa khijoosa apha kinoona.”

¹² Yo khumuuzela yoori: “Ori vayi mwinyi aya oto?” Mwinyi otule khujipu yoori: “Akijuweeni.”

Mafwarizeewu animuuzela nanhooni

¹³ Khuthuuliwa mwinyi otule ahaari woonaaye khulawaniwa wa mafwarizeewu. ¹⁴ Siikhu Yinsa eetheyiyeeyo mattophe khufunuluna mmaasho a mwinyi otule, yaari Saapatu. ¹⁵ Aphano mafwarizeewu khumuuzela theenya mwinyi otule nanna awahiyeego woona. Mwinyi otule khujipu yoori: “Ye eettiye weetheya mattophe khuttha mmaasho mwaka miiyo khulawa khijoosa, apha kinoona.”

¹⁶ Mafwarizeewu akina khulupa yoori: “Mwinyi oto khahiyo wa Nluku, maana khanshitahi Saapatu.” Akina aya khusala oozela yoori: “Natwampi onretta nanna-ni alama nkhama epo zootkinisa?” Attaaphale khupuwavo ohisilani.

¹⁷ Khurutela omuuuzela otule ahaariwoonaaye yoori: "Khi weeyo onttela olupa niini monkoni wa oto aya, maana oofunula maasho awo?" Mwinyi otule khujipu yoori: "Ye napiyu."

¹⁸ Mayaahuuti khaari okhupalela yoori ye khaari woonaka apha ti anwa-haaye woona. Tiito khukhuwelwa apapaze. ¹⁹ Khuwoozela yoori: "Otu mwanenu othuutu mwaari onlupaaye yoori avokoliwa woohooni? Khi nanna-ni anoonaavo nasaapi ti?"

²⁰ Apapaze khujipu yoori: "Fweeyo ninjuwa yoori otu mwanetthu na avokoliwa ari woohooni; ²¹ ila khanijuweeni nanna oniyeezo nasaapi eti na ntthu anfunuliyeyo maasho khaninjuweeni. Mwimuuzele mweenyewe, hirimu eto ariina, onwahi onlupa." ²² Apapaze aajipwiye toowo mwaasa wa owoova mayaahuuti; maana eettiye olupa yoori otule anttelaaye olupa yoori Yinsa ti Al-Masiihu, ontaa wiikariwa nsinakooka. ²³ Tiito apapaze alupiyeeyo yoori: "Khwa hirimu eto ariina, mwimuuzele mweenyewe."

²⁴ Khunkhuwela swaafu ya phiiri mwinyi otule ahaari woonakaaye kumuza yoori: "Olaphe khwa Nluku na olupe haakhi. Maana najuwa yoori mwinyi aya oto natwampi."

²⁵ Mwinyi otule khujipu yoori: "Nkhama natwampi miiyo akijuweeni; ethku kinjuwaaye ti yoori miiyo akaari woona ila apha kinoona!"

²⁶ Khumuuzela theenya yoori: "Ooretela niim? Ama oofunula toovi maasho?"

²⁷ Mwinyi otule khujipu yoori: "Miiyo kawuuzani! Mweeyo khuhikisilezi. Mwaasa niini mwintakhelaaye osiila theenya? Na-mweyo mwintakha mwi-iyie anakhiyoni awe?"

²⁸ Aphano khunttukhana na khulupa yoori: "Nakhiyoni awe ti weyo! Fweeyo na anakhiyoni a Munsa! ²⁹ Fweeyo ninjuwa yoori Nluku attakhula na Munsa; ila mwinyi oto fweeyo wala khaninjuwa ohali alankhiyeewo."

³⁰ Mwinyi otule ahaari woonakaye khujipu yoori: "Eto ethu yootikinisa! Mweeyo khamwinjuwa ohali alankhiyeewo, ila akifunula maasho miiyo. ³¹ Ninjuwa yoori Nluku khaninsileza natwampi; ila olika toowo, nkhamma ntthu onimoova Nluku na khusala aretta matakhele awe, oto Nluku ontaa onsiila. ³² Tokhiya olumwenku wumpiwe khina hatha ntthu mmote ana siile yoori maasho a ntthu woovokoleliwa ohooni afunuliwa. ³³ Eriwaka mwinyi oto khaari wa Nluku, khaari owahi oretta hatha ethtu."

³⁴ Mayaahuuti khunjipu yoori: "Weeyo wavokoliwa ntswampi; onaaye makhaamu ononisomisa fweeyo?" Attaaphale khumwiikara.

Ohooni wa nroho

³⁵ Yinsa khusila yoori mwinyi otule eekariwa nsinakooka. Khulankha olawa omweekesa nonsikana khumuuzela yoori: "Weeyo oninkhupali Mwaana wa Pinaatamu?"

³⁶ Ye khujipu yoori: "Mbwana, paani oto aya yoori na miiyo kinkhupali?"

³⁷ Yinsa khumuuzela yoori: "Weeyo wamoona ti othuutu ontakkulanaaye."

³⁸ Aphano mwinyi otule khulupa yoori: "Oo Mbwana, kookhupali!" Khunkokhorela.

³⁹ Yinsa khuri: "Miiyo kata voolumwenku apha oteela ophuka, na yoori apale ahinoonaaye oone, apale anoonaaye azukuluwe eeye oochooni".

⁴⁰ Mafwarizeewu akina aya aari attaaphale nonsiila alupaka mattakhuzi apale khumuuzela yoori: "Talili na-fweyo khaninoona?"

⁴¹ Yinsa khuwaajipu yoori: "Eriwaka mweeyo mweettiye wiiya woohooni, khamwaari wiiyana paathwili ya twampi; ila apha wiiya mwinlupa yoori mwinwahi woona, paathwili yenu nalelo mwinaaeye."

10

Yinsa nshuki wookhaamili

¹ "Miiyo kiniwuuzani khweele yoori: Otule ahinviraaye vanlako wa nzizi la pwittipwitthi, ila khweetta wawirukhelamo, oto nantarawu na nazompere. ² Otule anviraaye vanlako, oto nshuki wa pwittipwitthi. ³ Amana ataaka oto aya, namweekesela ontta ofukula nlako na pwittipwitthi zintta osiila huula yawe na ye ontta okhuwela wakhula moote na nzina laya asarulelaka vaje. ⁴ Paata ya osarula zooshi epile ziyyiyeyo zawe, ontta olokozela, khusala zinlotta maana zinjuwa huula yawe. ⁵ Ila khazinlawaa onlotta nthu woohijuweyi: zininthira oto aya, maana khazinjuwa huula yawe." ⁶ Yinsa awooziyen nikaniso opo, ila yo khuhiveeleyi maana a epile ari owoozaaye.

⁷ Yinsa khurutela owooza theenya yoori: "Miiyo kiniwuuzani khweele yoori: Miiyo ki nlako wa pwittipwitthi. ⁸ Ooshi apale atiiyeyo kihinate, manantarawu na anazompere, ila pwittipwitthi khuhivaasiili. ⁹ Miiyo ki nlako; otule anviraaye khwa miiyo ontta wuusurukha. Na onaaye ruhusa ya ovira khusarawa na onsinkana nnyepu. ¹⁰ Nantarawu onteela wiiya, wuula na otapanya; ila miiyo kata yoori mwiyyane ohaayi wawaatta na woolikana.

¹¹ Miiyo ki nshuki wookhaamili. Nshuki wookhaamili onleva ohaayi awe mwaasa wa pwittipwitthi zawe. ¹² Namapokhera, khahiyon nshuki wa pwittipwitthi na khahiyon mweenyewe, amana oona mijji zitaaka, ontta otthira khulikha pwittipwitthi ottho. Aphano mijji ontta wiikarisa pwittipwitthi zimwazeye. ¹³ Ye ontta otthira maana ontta opokhera na khanjali pwittipwitthi zaya.

¹⁴ Miiyo ki nshuki wookhaamili; kinjuwa pwittipwitthi zaka na yo zinikijuwa, ¹⁵ ethiipo Paapa anikijuwaaye na-miyo kininjuwa Paapa; na kininkha ohaayi aka pwittipwitthi zaka. ¹⁶ Kinaaye theenya pwittipwitthi kiina zihimo mmwizizi mphu. Epo enikihithajiya weettela kikusanye na epi ziyye liphanko limote na nshuki mmote na epo zinteela osiila huula yaka. ¹⁷ Tiito Paapa onikipheta, maana miiyo kininkha ohaayi aka yoori kipwekhorele opheya. ¹⁸ Khina anikinyakanyaaye, ila miiyo kininkha khwa matakhero aka ooshi. Kinaaye ruhusa ya winkha na othuula. Oruma opo kapokhera wa Paapa."

¹⁹ Mwaasa wa mattakhuzi atthaapo, mayaahuuti khurutela waawayeyea theenya. ²⁰ Akinoko aari olupa yoori: "Ye onaaye masheethwani na ona tutu! Mwininsiilezela-ni?" ²¹ Akina khusala alupa yoori: "Nanna nkhamma eto yoottakhula khahiyon ya namasheethwani; sheethwani khanwahi ofunula maasho a nthu woohooni!"

Mayaahuuti khaninkhupali Yinsa

²² Waari wakathi wa mwiita Yeruzaleemu laariwo njampo la winkhelela. ²³ Yinsa aari ovira Nlivenu la Soleyimaana vaje wa Nnyupa Woosifwiwamo. ²⁴ Aphano mayaahuuti khunzukulela khusala amuuzelaa yoori: "Onnilikhela mishikili mpakha lini? Onuuze saana nkhamma weeyo o Al-Masihu?"

²⁵ Yinsa khuwaajipu yoori: "Miiyo kawuuzani, ila mweeyo khuhikhupali. Khaazi kinkholaaizo miiyo khwa nzina la Paapa enhakikhi monkoni waka miiyo. ²⁶ Ila mweeyo khamwinkhupalela maana khayi mwa pwittipwitthi zaka. ²⁷ Pwittipwitthi zaka ensiila huula yaka na miiyo kinjuwa na enikilotta. ²⁸ Miiyo kininkha ohaayi wa mileele; wala khazimpwetheyaa on khaavo anttelaa olazamo mmakhono mwaka. ²⁹ Paapa otu akinkhiyeeyo epi,

nwlweene zayita vitthu zooshi, na mmakhono wa Paapa khina anwahaaye olazamo.³⁰ Miyo na Paapa na amote.”

³¹ Mayaahuuti khuthuula mawe opheya yoori anvonye,³² Yinsa khuwooza yoori: “Miyo karettu vakathi venu vitthu zawaatta zooshapweya Paapa akirumiyeeyo oretta, khwa zooshi ti tiivi mwintakhelaaye okivonyela?”

³³ Mayaahuuti khunjipu Yinsa yoori: “Khahiyo mwaasa wa khaazi zooshapweya ninttelaye wuupwechela, mwaasa wa okufuru, maana weeyo o pinaatamu, ila onjiretta wiiya Nluku.”

³⁴ Yinsa khuwooza yoori: “Yaatikhiwa nkano mwenu na ‘Miyo khulupa yoori: Mweeyo mwa miluku!’³⁵ Nkhama ye awaaatthaja o miluku apale liwaateliyeeyo ntakhuzi la Nluku, (na zawaatikhwi ttakathifiu khazinfijiwa),³⁶ aphano otule Paapa anttakatthisiyeeyo na khumperekha voolumwenku, mwinri: ‘Weeyo onamakufuru,’ mwaasa wa niini kilupaka yoori ‘Ki mwaana wa Nluku?’³⁷ Amana kihikholi khaazi ya paapa, khamwinkikhupalela miiyo, mwikhupalele khaazi ethiito, yoori mwiwahi ojuwa na oweleyani yoori Paapa ori vamote na miiyo na miiyo kiri wa paapa.”³⁸ Ila nkhamma kinretta, hatha nkhamma khamwinkikhupali miiyo, mwikhupalele khaazi ethiito, yoori mwiwahi ojuwa na oweleyani yoori Paapa ori vamote na miiyo na miiyo kiri wa paapa.”³⁹ Khusala atakha onkhola theenya, ila Yinsa khusuruwamo mmakhono mwaya.

⁴⁰ Aphano Yinsa khulokha opheya muuttho Yorotaani khulawa mpakha puuro etile Yaahaya aari owoosaawo atthu, eettaka waazaru khaazi yawe. Khwiikhala ottuukho.⁴¹ Atthu awaatta khulawa mpakha aphale aariivo khusala alupa yoori: “Yaahaya khaarettiye alama za minjuza, ila zooshi epile aari olupaazo monkoni wa mwinyi otu zaari za haakhi.”⁴² Attaaphale atthu awaatta khumkhupali Yinsa.

11

Ofwa wa Laazaru

¹ Aarivo mwinyi mmote aariwitthiwaaye Laazaru ye aari wa nti wa Betaaniya, ottuukho aari wiikhalaawo Mariyamu na twiye Maarata. Laazaru otule khwiyya nlwele.² Mariyamu otu, nlupuwe Laazaru aari olwaaziwaaye, ti otule aavaziyeeyo mafutha oonukhela moolu a Yinsa khukukutta na nyuuli zawe.³ Alupuwe khunruma ntthu olawa omuuza Mbwana yoori: “Mbwanu, jiraani awo nlwele.”

⁴ Wakathi Yinsa asiiliyeovo vitthu epile khuri: “Olwele aya opo khunlawa omuula, pi wa siifwa ya Nluku, yoori Mwaana wa Nluku asifwiwe khwa olwele otthuupo.”⁵ Yinsa aari omphetta Maarata, Mariyamu na Laazaru.⁶ Ila wakathi asiiliyeovo olwele opule aarupaziywero siikhu piiri okhule aariwo.

⁷ Nawiisha khuwooza anakhiyoni awe yoori: “Nlaweni theenya nirutele Yudeya.”

⁸ Anakhiyoni khulupa araka: “Rabi, onfwahamu yoori khwa siikhu vattithiiru mayaahuuti aari otakha wuuvonya, aphi onrutela ottuukho?”

⁹ Yinsa khujipu araka: “Nthana khuna wakathi khumi na miwiri? Ntthu amana eeftetta nthana khankwakwattuwa, maana onoona nuuru ya olumwenku otthuupu.¹⁰ Ila amana ntthu eeftetta osikhu ontta okwakwanttuwa maana khiniiyavo nuuru.”

¹¹ Paata ya olupa toowo, khurutela theenya araka: “Swaahipu eetthu Laazaru onitta olala, ila miiyo kineetta ottuukhu kanlanse.”

¹² Aphano anakhiyoni awe khumuuzaa theenya yoori: "Mbwana, nkhamma ye ontta olala, onvona." ¹³ Ila Yinsa aari olupa yoori Laazaru afwa. Ila yo aari waakanyera yoori aari olupa osikizi paasi.

¹⁴ Aphano Yinsa khuwooza saana yoori: "Laazaru afwa, ¹⁵ ila Miyo ki woofurahi mwaasa woohiiwo okhuwaya, maana toowo mweeyo mwinttela okikhupali. Nlaweni mpakha owawe."

¹⁶ Aphano Tome aari wiithiwaaye Maphapo khuwooza anakhiyoni aza-awe: "Nlaweni nafwe vamote na-ye."

Yinsa oniwaathuza nafusi alupuwe Laazaru

¹⁷ Wakathi Yinsa afiyyevo ansikaniye Laazaru azikhiwe ziviriyeevo si-ikhu nne. ¹⁸ Betaaniya waari kharipu kiyasi ya mwentto wa phiima alufu ttatthu olankha Yeruzaleemu, ¹⁹ na mayaahuuti enkeene aalawiye onthotola Maarata na Mariyamu na onzuru mwaasa wa opwethheyiwa ti nlupwaaya. ²⁰ Maarata noosiila yoori Yinsa ontta ota khunthepeeza, ila Mariyamu aasaliye eekhaliye onti.

²¹ Maarata khumuuzaa Yinsa yoori: "Mbwana, eriwaka waario, nlupwaaka khaari ofwa. ²² Ila theenya kinjuwa yoori hatha nkhamma nasaapi eti, Nluku oniwickha wakhula etile oninvekelaaye."

²³ Yinsa khumuuzaa: "Nlupuwo onteela osisimuwa."

²⁴ Maarata khuri: "Miyo kajuwa yoori onsisimuwa va osisimuliwa wa siikhu ya mwiisho."

²⁵ Yinsa khulupa araka: "Miyo ki osisimuwa na ohaayi; otule anikaaminaaeye miiyo hatha nkhamma eetta ofwa oniiya ohaayi, ²⁶ na wakhula otule ari haayi na khukaamini miiyo khanfwari. Weeyo onkhupali epo zaya?"

²⁷ Ye khujipu yoori: "Miyo, Mbwana kinkhupali yoori o Al-Masiihu, mwaana wa Nluku, aari weettelaaye ota voolumwenku."

²⁸ Paata ya olupa mattakhuzi apale, khulawa owawe na khunkhuwelela Mariyamu othetekele khumuuzaa yoori: "Oo, Mwaaliimu otu ari apha onuukhuwela weeyo." ²⁹ Wakathi Mariyamu asiiliyeevo mattakhuzi apale, khulankha nasaapiru na khulawa okuthanana Yinsa. ³⁰ Yinsa nalelo aari ahinafiye oluwanii, ila aari ottuukhule Maarata eetteliyeeyo onkutthanawo. ³¹ Mayaahuuti aari nnyupa na Mariyamu, aateliyeeyo onzuru, khusala oopuwela yoori ye aari weetta ovilalo yoori alile ottuukho. Na-yo khulankha khusala anlotta. ³² Wakathi Mariyamu afiyyevo aphale aariivo Yinsa, noomoona khunkokhorela moolu awe khumuuzaa yoori: "Mbwana, eriwaka waari attaapha nlupwaaka khaari ofwa."

³³ Yinsa amooniyeevo eettaka olila na mayaahuuti apale aataniyeeyo, ye khwiiya wawantipweya nroho mwawee venkivene na wooshukulikha.

³⁴ Ye khuuzela yoori: "Mwanzikha yayi?" Yo khujipu yoori: "Mbwana, ote omooone."

³⁵ Yinsa khulila.

³⁶ Mayaahuuti khulupa yoori: "Mmoone nanna aari omphetaazo!"

³⁷ Akina khusala alupa yoori: "Otu aari owaavonisa apale ohooni, khaari owahi oretta eththu Laazaru khuhifwi?"

Yinsa onisisisimula Laazaru

³⁸ Yinsa nalelo ari woohuzunikha khulawa ovilalo. Yaari likurakuza laattiyelelaniweeyo liwe liwululene va nlako vaya.

³⁹ Yinsa noofiya khulupa yoori: "Mwilazevo liwe nttho." Maarata khulupa araka: "Leelo ona siikhu nne; aaza onukha."

⁴⁰ Yinsa khunjipu yoori: “Akaawuuziye yoori amana okhupali ontta woona siifwa ya Nluku?”

⁴¹ Aphano yo khulazavo liwe ntthile. Yinsa khweekesa otulu khulupa yoori: “Paapa, miiyo kinuushukhurwela mwaasa wookisiila. ⁴² Miiyo kinjuwa yoori weeyo onikisiila wakathi wooshi, ila mwaasa wa khuntti eti ya atthu apa ariivo ti eto, kinlupaaye toowo yoori yo apatthe okhupali yoori weeyo ti okiperekhiyeeyo.” ⁴³ Paata ya olupa toono, khukhuwa venkivene araka: “Laazaru, osaruvele oje okhuno!” ⁴⁴ Otule aafwiyeeyo khusaruwa, moolu awe na makhono awe ari oopachiwa na tarapu na wuuso awe na makhono awe khuzukulelisiwa. Aphano Yinsa khulupa yoori: “Mwintaphule tarapu eto mwinlikhe alawe.”

Shawuri yoori ooliwe Yinsa

⁴⁵ Mayaahuuti enkeene alawiyeeyo onthotola Mariyamu, ooniyeovo vithu epile arettiyeeyo Yinsa, yo khunkhupali. ⁴⁶ Ila akina khulankha olawa owooza mafwarizeewu monkoni wa epile Yinsa arettiyeeko. ⁴⁷ Aphano mahaakhimu a tiini na mafwarizeewu khuwaakkhuwela mashawuriya khusala awooza yoori: “Niri je? Okho owaakho mwinyi oto anrettaaye alama zawaatta za minjuza. ⁴⁸ Amana ninlikha ethiipo, atthu ooshi antta onkhupali na antta ota arooma aninyakanye puuro yeetthu ttakatthiifu na nti eththu.”

⁴⁹ Aphano mmote wa-yo, aari wiithiwaaye Kayifwa, aari haakhimu nwulu wa tiini wa mwaakha aya opule, ye khulupa yoori: “Mweeyo khamwinjuwa hatha eththu! ⁵⁰ Khamwinjuwa yoori awfataali ofwa ntthu mmote awaaafwelaka atthu ooshi zayita olikha khapila zooshi waashikha.”

⁵¹ Wakathi aya opule Kayifwa khaari ojilupa mweenyewe. Ila mwaasa wa yoori ye aari haakhimu nwulu wa tiini mwaakha aya opule, etta ohupiri yoori Yinsa aari oteela ofwela khapila ya mayaahuuti, ⁵² khahiyo paasi khwa khapila ya mayaahuuti, ila theenyia yoori awakusanye khwa mwiili mmote aana a Nluku apale amwazeyiyeeyo. ⁵³ Waaza siikhu ethiitile khusilana omuula.

⁵⁴ Khwa ethiito Yinsa khuhisala ajithoonyeza vakatthi wa mayaahuuti, khulawa nti waattameliyeeyo n'yaara waari wiithiwaaye Efwarayiimu. Khwiikhala ottuukho na anakhiyoni awe.

⁵⁵ Yaarettiye esaleelaka ofiya siikhu ya Paashikowa wa mayaahuuti, atthu enkeene a nti aya opule aalawiye Yeruzaleemu olawa ojitwaharesha ehinafiye siikhu ya Paashikowa ⁵⁶ Yo aari omweekesa Yinsa oozelanaka ari vaje wa Nnyupa Woosifwiwamo: “Nkahayani niri toovi? Talili onta vanjampo?” ⁵⁷ Ila mahaakhimu a tiini na mafwarizeewu aarumiye yoori, amana ntthu amoona Yinsa vahali ariivo, awooze, yoori yo alawe ankhole.

12

Yinsa onvaaziwa mafuttha oonukhela nti wa Betaaniya

¹ Siikhu sitha ehinafiye siikhu ya Paashikowa Yinsa eettiye Betaaniya, ottuukho aari wiikhalaawo Laazaru, otule Yinsa ansisimuliyeeyo muufwa.

² Ottuukho khwiipikheliwa eththu woojiwa ya osikhu; Maarata khusala arumeya, Laazaru eekhaliye vameeza vamote na Yinsa. ³ Aphano Mariyamu khuthuula suupha ya mafuttha oonukhela awaatta nzurukhu, khuttukuntela moolu a Yinsa khusala akukuttha na nyuuli zawe. Nnyupa wooshimo khwiitaalamo arufu ya mafuttha apale.

⁴ Aphano mmote wa anakhiyoni awe, Yuuda Eshikariyoote othuuto aari weettelaaye onzukuluwela khulupa yoori: ⁵ “Ahoozanyisiwe mafuttha aya apo nzurukhu aya enkhiwa asikhini?” Nzurukhu aya yaari phakari ya nakhaazi khwa mwaakha mmote!” ⁶ Ye khaalupiye toowo mwaasa wa wiiyana huruma na asikhini ila mwaasa wa wiya nantarawu; na tiye aari opwehaaye nfukho wa nzurukhu, amana otthiiwamo eetta olazakamo. ⁷ Yinsa khunjipu araka: “Onlikhe khwa heeri! Yoori apwehe mafuttha apo mpakha siikhu ya ozikhiwa waka. ⁸ Asikhini ari vamote na mweeyo mpakha mileele, ila miiyo khanniiya vamote mpakha mileele.”

⁹ Paata ajuwiyeovo yoori Yinsa aariattaaphale, khuntti khuluyeene ya mayaahuuti khuta, woohiiyi mwaasa wa Yinsa paasi, ila theenya yoori amoone Laazaru, otule ansisimuliyeeyo muufwa. ¹⁰ Khwa ethiipo mahaakhimu a tiini khuwaza shawuri zoomuula Laazaru naye; ¹¹ maana atthu enkeene mwaasa wa ye eetta ophakuwanana mayaahuuti na khusala ankhpali Yinsa.

Ovira wa oshintta

¹² Siikhu ya phiiri, khuntti khuluyeene ya atthu yaatiyeewo onjampo khusiila yoori Yinsa ontta ota Yeruzaleemu. ¹³ Khuthuula virapi za mirita, khusala alawa onkutthanana ye, anyakulaka araka:

“Ozaana!

Woottithimisiwa ti otule atiiyeeyo khwa nzina la Mbwana, Woottithimisiwa ti Mfwalume wa Ezirayiilu!”

¹⁴ Yinsa ampatthiyeovo mwaana wa puuru khupakhira attaapho, nkhamma ethiipo yaatikhieezo yoori:

¹⁵ “Atthu a Yeruzaleemu,
mwihooeve
mfwalume enu onta
aapakhiriye va mwaana wa puuru!”

¹⁶ Omwanzo anakhiyoni awe khazaaweleyiye epo za; ila wakathi aaziyeovo osifwiwa Yinsa yo eetta wuupuwela yoori ethu yaya eto yaatikhiee monkoni wa ye, na khweele khurettikhana ethiipo.

¹⁷ Atthu apale aariina wakathi opule anrumiyeyo Laazaru osaruwamo nkhapuri khusisimuwa muufwa, yo khuvira alawelaka oshaahiti vitthu epile zaarettikhaniyeeyo. ¹⁸ Mwaasa wa ethiito, khuwaakusanya atthu awaatta olawa okutthanana, maana eettiye osiila elupiwaka yoori Yinsa aarettiye alama eto. ¹⁹ Aphano mafwarizeewu khusala oozana yoori: “Khanipattheenivo ethu. Nkoonani olumwenku wa atthu ontta onlottelela.”

Yinsa onlupa ofwa wawe

²⁰ Khwa atthu apale aalawiyeeyo omwaaputu Nluku onjampo la Paashikowa akina aari akereku. ²¹ Yo, khulawa ottakhulana Filiipe aari wa nti wa Betezayiita ya Kalileya, khunvekela araka: “Mwinyi, nintakha omoona Yinsa”. ²² Filiipe khulawa khumuuzza Antere; aphano yo oowiiri khumuuzza Yinsa.

²³ Yinsa khunjipu yoori: “Wafiya wakathi woosifwiwa Mwaana wa Pinaatamu. ²⁴ Miiyo kiniwuuzani khweele yoori, amana phunjye ya tiriku ehikweli vathi na ehifwi nalelo eniyya phunjye paasi, ila amana efwa empuwisa mishumo zawaatta. ²⁵ Otule amphetaaye ohaayi awe, onteela

ompwetheya; ila otule antarawaaye ohaayi awe khwa voolumwenku apha, onthokorela ohaayi wa mileele. ²⁶ Otule antakhaaye okirumeyela, akilotte; na puuro kiniiyaavo na karumeya aka oniyya attaapho. Otu anikirumeyelaaye, Paapa onteela ontitithimisa.

²⁷ Nasaapi eti rooho yaka ti yoohankayikha. Kiri niini? Kiri paapa, okusuru wakathi opu wa ohoowa waka? Wala! Maana miiyo kateela ethiito. ²⁸ Paapa osifu nzina lawo!” Aphano khuta huula yoolankha pinkuuni yaari olupaaye yoori: “Koosifu na kinteela wuusifu opheya.” ²⁹ Khuntti etile yaariivo noosiila aariye taari eto; akina khusala alupa yoori: “Nlayikha ti lattakhulaniyeyo Yinsa.”

³⁰ Yinsa khulupa yoori: “Huula eto khiteeni mwaasa wa miiyo yata mwaasa wa mweeyo. ³¹ Wafiya wakathi woophukiwa olumwenku opu, nasaapi eti onttela wiikariwa mfwalume wa olumwenku opu. ³² Ila miiyo amana kilansiwaa vathi apha kintta ojitiisela atthu ooshi.” ³³ Ye aalupiye mattakhuzi apa yoori athoonyeze nanna aari weettelaazo ofwa.

³⁴ Khuntti etile khunjipu yoori: “Fweeyo ninsiilaka kano elupaka yoori: Al-Masihu ona yawiyyavo khwa mileele, khi weeyo onlupa toovi yoori Mwaana wa Pinaatamu ona ya olansiwa? Mwaana wa Pinaatamu aya oto ti paani?”

³⁵ Aphano Yinsa khuwooza yoori: “Nuuru eri vamote na mweeyo khwa wakathi vattithiiru. Mweettette wakathi otthuupu mwiriinaavo nuuru, yoori yiiza ehuusikaneni, maana ntthu aneettettaaye n'yiiza khanjuwa ohali aneettaawo. ³⁶ Wakathi otthuupu mwiriinaavo nuuru mwikhupalele nuuru ethiito yoori mwiretteye wiiya aana a nnuuru.” Paata ya olupa toowo Yinsa khulaavo khujivitha khuhisala amoona.

Ohikhupali wa mayaahuuti

³⁷ Hatha nkhamma Yinsa eettiye owaarettela alama epile zooshi za minjuza vakatthi vaya, khankhupaleliye, ³⁸ yoori limariseleye nttakhuzi la napiyu Ezaaya, linraaye:

“Mbwana, paani akhupaleliyeeyo
tafusiiri yeeththu?
Na paani athoonyeziweeyo
nkhone wa Mbwana?”

³⁹ Khwa ethiito yo khaari oteela okhupali, nkhamma ethhiipo aalupiyeeyo Ezaaya theenya yoori:

⁴⁰ “Oola maasho aya
na oomisa rooho zaya,
yoori ahoone na maasho aya,
eweelya nroho mwaya
aruti kiwaavonisa.”

⁴¹ Ezaaya aalupiye mattakhuzi apa maana ooniye siifwa ya Yinsa na khulupa monkoni wa ye.

⁴² Nakatalikha, attunkhulu awaatta a mayaahuuti khunkhupali Yinsa. Ila mwaasa wa mafwarizeewu, khuhisala atukhuru amini yaya, na woova wiikariwa nsinakooka. ⁴³ Maana yo waari owaatuvela venkivene osifwiwa pi atthu zayita osifwiwa ti Nluku.

⁴⁴ Aphano Yinsa khulupa woosileyavo araka: “Otule anikaaminaaye miiyo, khanikaamini miiyo paasi, ila otule akiperekhiyeeyo. ⁴⁵ Na otule anikoonaaye, amoona otule akiperekhiyeeyo. ⁴⁶ Miiyo kata voolumwenku nkhamma nuuru, yoori wakhula otule anikikhupalaaye miiyo, ahijileme n'yiiza.

⁴⁷ Amana ntthu asiila mattakhuzi aka na khuhishututeli, miiyo akin-inphuka. Maana miiyo akaateeliye ophuka olumwenku ila wuusuru olumwenku. ⁴⁸ Owaapho namaphuka wa otule anikikathalaaye na ahinkhupalelaaye mattakhuzi aka; ntthu laka ntinttho kinlupiyeeyo ti linttelaaye omphuka siikhu ya mwiisho. ⁴⁹ Akinjilupa miiyo, ila Paapa otu akiperekhiyeeyo ti akirumiyeeyo etthu yoolupa na olaleya. ⁵⁰ Miiyo kinjuwa yoori oruma wawe ohaayi wa mileele. Nakatalikha etile akirumiyeeyo paapa kinlupa ethiito.”

13

Yinsa onoosa moolu a anakhiyoni awe

¹ Esaleelaka ofiya siikhu ya Paashikowa, Yinsa aajuwiye yoori wafiya wakathi wa ye olika olumwenku opu eette wa Paapa, khuwaapheta apale awe aari voolumwenku, awaaphetiye mpakha mwiisho.

² Wakathi wa etthu-yoojiwa ya osikhu, sheethwani aarettiye ahatiye rooho ya Yuuda Eshikariyoota mwaana wa Simawu, yoori anzukuluwele, ³ Yinsa aajuwiye yoori Paapa vitthu zooshi attha mmakhono mwawe, na alankhiye wa Nluku na aari orutela wa Nluku, ⁴ khulankhavo vameeza aphale, khuvula ajapi yawe khuthuula epakuso khujifukelela n'yuunu. ⁵ Khuttha maati mpasiya khwaaza woosa moolu a anakhiyoni awe awaa-pakusaka na epakuso etile aafukeleliyeeyo n'yuunu mwawe.

⁶ Khufiya zwaamu ya Simawu Pheeturu, othuuto aamuziyeeyo yoori: “Mbwana, ontakha woose moolu aka?”

⁷ Yinsa khunjipu yoori: “Eti kinrettaaye apha NASAAPI khiniweeleya; ila owulu-othana enteela oweeleya.”

⁸ Pheeturu khulupa yoori: “Wala! Khinretteya weeyo woosa moolu aka.”

Yinsa khunjipu araka: “Miiyo amana kihwoosi, weeyo khunteela wiyyana phantte na-miyo.”

⁹ Simawu Pheeturu khulupa yoori: “Mbwana, khayi moolu aka paasi na theenya na makhono aka na eeshwa yaka!”

¹⁰ Yinsa khujipu: “Ntthu owiyeeyo eninhithajiya woosa moolu paasi, maana mwili awe wooshi pi woottakattha. Mweeyo mwa oottakattha, ila khahi mooshi.” ¹¹ Maana ye aari onjuwa ntthu aari weettelaaye onzukuluwela; ti eto aalupiyeeyo yoori: “Khayi mooshi mwiyyeeyo oottakattha.”

¹² Paata ya wiisha owoosa moolu, khuthuula ajapi yawe khuwala khrutela aphale eekhaliyeovo. Aphano khuwoozela yoori: “Eniweeleyani vitthu epi khuuretteliyeenini? ¹³ Mweeyo mwikiitthaka miiyo mwinri ‘Mwaaliimu’ na ‘Mbwana,’ mwina shariya, miiyo ki othuuto. ¹⁴ Aayo, pi ethiipo miiyo kiiyiye Mbwana na Mwaaliimu enu, kawoosani moolu, namweyo theenya mwina ya woosana moolu mmote na nzaawe. ¹⁵ Miiyo kawinkhani nthoonyezo yoori ethiipi kirettiyeeyo na-mweyo mwisala mwiretta ethiipi. ¹⁶ Miiyo kiniwuuzani khweele yoori, khaavo karumeya wonziti mbwana awe, nkhamma ethiipo nanhupi khaninziti otule anrumiyeyo. ¹⁷ Nkhamma mwinjuwa vitthu zaya epo, amana mwiretta, mwa-parikhiyiwa.”

Yinsa onlupa yoori onlawa azayiniwe

¹⁸ Akinuulupani mooshi, kiniwaajuwa apale kiwaathawuliyeeyo. Ila epo enttela orettikhana yoori emariseleye epile zilupiyeyo zawaatikhwa ttakathiiwu, yoori: "Othuuto kimeelaniyeeyo phaawu yaka akizukuluwela."

¹⁹ Kinaaza nasaapi ethiiti owuuzani ehinarettikhane, yoori amana erettikhanaaka mweeyo mwikhupali yoori Miyo Ti Miyo. ²⁰ Miyo kini-wuuzani khweele yoori: Otule animpokherelaaye otule kininrumaaye onikipokherela miiyo; na anikipokherelaaye, onimpokherela otule akirumiyeeyo."

²¹ Paata ya olupa toowo, rooho yawe khwiya yawaantipweya, khutukhuru alupaka yoori: "Miyo kiniwuuzani khweele yoori, ntthu mmote wa mweeyo onlawa akizukuluwela."

²² Anakhiyoni khusala eekesana mmote na nzaawe ahinjuwaka paani aninlupaaye. ²³ Mpavu mwawe eekhaliyemu nakhiyoni mmote otule aari omphetachaaye. ²⁴ Simawu Pheeturu khunttheela alama nakhiyoni othuttle; yoori amuuzele Yinsa anlupe oto ari weettelaaye onzukuluwela.

²⁵ Aphano nakhiyoni otule khwiinamela vamweeyo wa Yinsa khumuuzela yoori: "Mbwana, paani oto aya?"

²⁶ Yinsa khunjipu yoori: "Ti otule kinttelaaye omwinkha pattaasu ya phaawu kinaanisiye n'yopo." Aphano khunaanisa pattaasu ya phaawu, khumwinkha Yuuda Eshikariyoote, mwaana wa Simawu. ²⁷ Paata ya Yuuda orafuna phaawu etile, Epiliisi etta omweetta. Yinsa khumuuzza yoori: "Etthu ontakhaaye oretta, orette nasaapi." ²⁸ Ila apale aari vameeza khuhiivo mmote yamweliyiyeeyo mwaasa niini Yinsa aamuzeliyeeyo toowo. ²⁹ Maana Yuuda ti aari opwehaaye nfukho wa nzurukhu, akina aari waakanyera yoori Yinsa amuuza olawa wuuzanya vitthu zooreteliwa njampo, ama yoori alaze etthu awinkhe asikhini. ³⁰ Paata ya wiisha orafuna phaawu etile, Yuuda khulankha nasaapiru. Na waari osikhu.

Nrumo mpheya

³¹ Wakathi Yuuda aliyeovo, Yinsa khulupa yoori: "Nasaapi Mwaana wa Pinaatamu onsifwiwa, na Nluku onsifwiwa khwa ye. ³² Nkhamma Nluku onsifwiwa khwa ye, na-ye Nluku onsifwiwa mwanawe khwa ye mweenyewe, na onteela osifwiwa woahirupazivo.

³³ Aanaaka, nalelo khwa wakathi vattithiiru kiri vamote na-mweyo. Mweeyo mwinlawwa mwakeekese, ila miiyo kiniwuuzani nkhamma kiwooziyeezo mayahuuti yoori: ohali kineettaawo mweeyo khamwinlawwa. Namweyo enasaapi eti kiniwuuzani ethiipo. ³⁴ Kiniwinkhani oruma mpheya kiraka: mwiphetane mmote na nzeenu. Nkhamma ethiipo kuuphetieneini, mwiphetane mmote na nzeenu. ³⁵ Khwa ethiipo attu ooshi antta ojuwa yoori mwa anakhiyoni aka, amana mwiphetanaka mmote na nzaawe."

Yinsa onlupa yoori Pheeturu onteela onkatthala

³⁶ Simawu Pheeturu khumuuzela yoori: "Ontta vayi Mbwana?"

Yinsa khunjipu: "Ohali kineettaawo, weeyo khunikilotta nasaapi eti, ila owulu-othana onteela okilotta."

³⁷ Aphano Simawu khuri: "Mbwana, mwaasa wa niini kihuulottaka nasaapi? Miiyo kinleva ohaayi aka mwaasa wa weeyo!"

³⁸ Aphano Yinsa khujipu araka: "Weeyo onleva ohaayi awo mwaasa wa miiyo? Miyo kiniwuuzani khweele yoori, khapula likukhuwi lihineekhe, weeyo onteela okikhana swaafu ttatthu."

14

Yinsa oniwaalipisela maaswihaapa awe

¹ Mwihihankayikhise rooho zenu. Mwinkhupali Nluku, na theenya mwikikhupali miiyo. ² Owawe papaaka awaakho mapuro menkeene; eri-waka khayaari ethiito, akaari owuuuzani, yoori kinttela otthenkeza puuro yenu. ³ Na amana kilawa kitthenkeza puuro yaya eto, kinlawaa karuti kuthuleni mweeye vamote na-miyo attaapho kinttelaaye wiiyavo. ⁴ Mweeyo mwinjuwawo ohali kineettaawo na tarikhi yaya.”

⁵ Khujipu Tome yoori: “Mbwana, fweeyo khaninjuwa ohali oneettaawo! Khi ninjuwa toovi tarikhi yaya?”

⁶ Yinsa khujipu yoori: “Miiyo ki tarikhi, haakhi na ohaayi. Khina anfiyaaye wa Paapa, ahiiyeeni khwa miiyo. ⁷ Eriwaka khweele mwaari okijuwa, nka mwinjuwaka Paapa. Apha enasaapi eti mwinjuwu na mwaaza omoona.”

⁸ Filiipe khulupa yoori: “Mbwana, onithoonyeze Paapa, ethiito enni-tosheleza.”

⁹ Yinsa khunjipu yoori: “Filiipe, kiikhaliyeezo wakathi mwinkeene na-mweyo; nalelo khunikujuwa? Ótule akooniye miiyo amoona Paapa. Khi onlupa toovi yoori: ‘Onithoonyeze Paapa?’ ¹⁰ Weeyo khunkhupali yoori miiyo kiri wa Paapa na Paapa ona miiyo? Mattakhuzi apa kiniuuuzanini kahaiyo aka paasi. Ila, Paapa anikkhalaaye khwa miiyo, ontta okhola khaazi yawe. ¹¹ Mwikikhupali miiyo amana kilupa yoori kiri khwa Paapa na Paapa ori khwa miiyo; ama nenkawu mwikikhupali mwaasa wa khaazi epi kinkholaazo. ¹² Miiyo kiniuuuzani khweele yoori, otule anikikhupalaaye miiyo onkhola khaazi epi kikholiyeezo hatha okhola zooziti epi, maana miiyo kineetta wa Paapa. ¹³ Na zooshi mwinttelaaye oveka khwa nzina laka, miiyo kinretta, yoori Paapa asifwiwe khwa mwanawee. ¹⁴ Wakhula etile mwinvekaaye khwa nzina laka kintta oretta.

Yinsa onaahiti operekha Rooho Ttakatthiifu

¹⁵ Nkhama mweeyo mwinikipheta, mwintela oshututela oruma waka.

¹⁶ Miiyo kinttela onvekela Paapa yoori awinkheni Namalipisela nkina, yoori eeye vamote na-mweyo khwa mileele, ¹⁷ Rooho ya okhwhee, atthu a voolumwenku ahinttelaaye opokhera, maana, khanteela woona na wala khanjuwa. Ila mweeyo mwinjuwa, maana Yo eniikhala nkathhi mwenu na enttela wiiya na-mweyo.

¹⁸ Miiyo akinuulikhani mwiri anasisa, kinlawaa kooruteleni. ¹⁹ Khwa wakathi vattithiiru atthu a voolumwenku khanteela okoona theenya, ila mweeyo mwinlawaa mwakoone. Mwaasa wa miiyo wiiya haayi, na mweeyo mwinlawaa mweeyane ohaayi. ²⁰ Siikhu ethiito enteela oweeleyani yoori kiri khwa Paapa, mweeyo mwiri khwa miiyo na-miyo kiri khwa mweeyo. ²¹ Otule ansiilaaye oruma waka na khushututela oto ti anikiphetaaye; na otule anikiphetaaye oniiya woophetiwa ti Paapa, na-miyo theenya kinipheta na kinjithoonyeza khwa ye.”

²² Yuuda (nkina woohiiyi Yuuda Eshikariyoote) khuri: “Mbwana, mwaasa aya niini weeyo ontakhaaye ojithoonyeza khwa fweeyo paasi khuhi-jithoonyezi olumwenku wooshi?”

²³ Yinsa khujipu yoori: “Nkhama ntthu onikipheta, onshututela mat-takhuzi aka na Paapa onta ompheta. Paapa na-miyo nintta wiikhala na-ye. ²⁴ Otule ahinikiphetaaye khanshututela mattakhuzi aka. Na ntakhuza mwinisillaaye khahaiyo laka, ila tthi la Paapa otule akirumiyeeyo.”

²⁵ Kaari olupaka zooshi epo nalelo niri vamote.” ²⁶ Ila Namalipisela, Rooho Ttakatthiifu, eto Paapa anttelaaye omperekha khwa nzina laka, onteela wusomisani mweeyo vitthu zooshi na wuukupuselani zooshi epile kiwuuzyeenini. ²⁷ Kinuulikhelani heeri, heeri yaka kiniwinkhani, ila akiniwinkhani nkhamma oninkhaazo olumwenku. Mwihihankayikhise rooho zenu, wala mwilhoove.

²⁸ Mwasiila eti kilupiyeyeo: ‘Miiyo kintta olawa, ila kinlawa kooruteleni mweeyo. Eriwaka mwaari okipheta, mweetta ofurahi mwaasa wa miiyo weetta wa Paapa, maana Paapa akiziti miiyo. ²⁹ Kiniuuuzani nasaapi eti zihinarettikhane, yoori wakathi zinttelaavo orettikhana, mweeyo mwikhupale. ³⁰ Enasaapi eti akinlawa ottakhulana mweeyo, maana mfwalume wa voolumwenku onta ota; ye khana hatha ruhusa khwa miiyo, ³¹ nakatalikha yoori atthu a voolumwenku ojuwe yoori miiyo kininpheta Paapa, enikihithajiya oretta etile akirumiyeeyo. Lankhani, nileevo apha.”

15

Nrayi wa nviteera na virapi zaya

¹ Yinsa khulupa yoori: “Miiyo ki nrayi wa wuuba weekhwhee, Paapa namalima. ² Wakhula erapi etile eriiye khwa miyo khuhisala yiima, ye onta oshija; na wakhula etile eniamaaye onta okasurela yoori etepe wiima. ³ Mweeyo mwattakaththisiwa ti ntakhuzi kiwuuziyeenini. ⁴ Mwjjilipisane miiyo, na-miyo kintta ojilipisana mweeyo. Nkhamma ethiipo erapi ehiniamaaye ottho ehijilipisaneeni nrayi, na-mweyo pi ethiipo khamwiniima mishumo woohijilipisani miiyo.

⁵ Miiyo ki nrayi, mweeyo mwa virapi. Otule anjilipisanaaye miiyo, na-miyo khwa ye, oto aya oniima mishumo zawaatta; maana mweeyo woohiiyani miiyo, khina ethu mwinwahaaye oretta. ⁶ Amana ntthu ahili-pani miiyo, onta weeseleliwa oje, oome nkhamma erapi enlokothiwaaye khweeseleliwa va moottho khulukuziwa. ⁷ Ila amana mwjjilipisana miiyo na mattakhuzi aka khwiya na mweeyo, mwiveke wakhula etile mwin-takhaaye mwintta winkhiwa. ⁸ Paapa onsifwiwa mwaasa wa mweeyo wiima mishumo zawaatta, ethiipo enthoonyeza yoori mweeyo mwa anakhiyonaka. ⁹ Khwa nanna ethiipo Paapa akiphetieezo, na-miyo koophetani; mwjjilipisane pheta yaka. ¹⁰ Amana mweeyo mwishututela oruma waka mwiniiya nkathhi wa pheta yaka, nkhamma ethiipo na miiyo kinshututelaaye oruma wa Paapa na kiriyeeyo nkathhi wa pheta yawe. ¹¹ Kaawuziényi vitthu epi yoori furaha yaka yiye khwa mweeyo, na yoori furaha yenu ekamilikhe.

¹² Oruma waka pi opu: Mwiphetane mmote na nzaawe nkhamma ethiipo miiyo khinuuphetanini mweeyo. ¹³ Khina ariina pheta yooziti, woohiiyi otule aninkhaaye ohaayi awe khwa maswaahipu zawe. ¹⁴ Mweeyo mwa maswaahipu zaka, mwirettaru etile kinuurumanini. ¹⁵ Akiniwiitthani theenya akarumeya, maana karumeya khanjuwa niini anrettaaye Mb-wana awe. Nakatalikha, miiyo kiniwiitthani yoori maswaahipu zaka, maana zooshi epile kinsiliyeeyo Paapa koojuwisan. ¹⁶ Khahiyoo mweeyo mwilkithawuliyeeyo miiyo, ila miiyo ti kuuthawuliyeenini mweeyo na khu-utthomani yoori mwilawé mweeme mishumo, mishumo zoolipaneya, yoori Paapa awahi owinkhani wakhula etile mwinvekaaye khwa nzina laka.

¹⁷ Opo pi oruma waka: mwiphetane mmote na nzaawe.

Olumwenku oniipiiriwa ti anakhiyoni

¹⁸ Amana atthu a voolumwenku eephiriwaka ti mweeyo, mwifikhiri khabula yoori yo eephiriwe ti miiyo. ¹⁹ Eriwaka mweeyo mwaari atthu a voolumwenku, yo aari otuveliwa ti mweeyo mwaasa wa wiiya aya. Nakatalikha mweeyo khahi mwa atthu a olumwenku, ila miiyo koothawulani khulazani vakatthi wa atthu a olumwenku. Tiito atthu a olumwenku aniihiriwaaye ti mweeyo. ²⁰ Mwifikhiri mattakhuzi kiwuuziyeenini yoori: 'Khaavo karumeya anzitiyeeyo Mbwana awe.' Nkhama akilupatthiyeozo miiyo, na anlawa oolupattheni mweeyo theenya. Nkhama anshututela mattakhuzi aka, theenya anlawa ashututele apale mwinttelaaye olupa mweeyo. ²¹ Zooshi epo anlawa oorettele mweeyo, mwaasa wa nzina laka, maana khaninjuwa otule akirumiyeeyo. ²² Eriwaka akaatiye kilupa, yo khaari wiiyana paathwili ya twampi. Ila apha khana hatha nanna ya ojaakisa monkoni wa twampi zaya. ²³ Otule aniihiriwaaye ti miiyo na theenya oniihiiriwa ti Paapa. ²⁴ Eriwaka akeettiye oretta vitthu vakatthi vaya ahinwahaaye oretta ntthu nkina, yo khaariwiyana paathuli ya twampi. Ila yo oona epi kirettiyeozo na khusala akhanyarela wiiphiiriwa ti miiyo na Paapa. ²⁵ Ila epo zaya zarettikhana yoori lilikaniseliwe ntthakhuza ntthile laatikhiweeyo nkatthi wa kano zaya yoori: 'Yo eephiriwa ti miiyo woohiivo hatha kiiswa.'

²⁶ Ila, amana ata Namalipisela, otule kinttelaaye wuuperekhezani woolankha phantte ya Paapa, Rooho ya okhwhee ya olankha wa Paapa, ye onttela olaza oshaahiti monkoni wa miiyo. ²⁷ Na mweeyo mwinlawwa mwalande oshaahiti, maana mwina miiyo thanku omwanzo.

16

¹ Miiyo kawuuzani mattakhuzi apa yoori mwihanswi amini yenu. ² Mweeyo mwintelea wiikariwa nsinakooka; weekhwhee, onlawa wafiyi wakathi onraaye ntthu amana awuulaani khoona nkhama ankholaaye khaazi ya Nluku. ³ Yo anttela oretta toowo mwaasa woohinjuwi Paapa wala miiyo.

Khaazi ya Rooho Ttakatthiifu

⁴ Mattakhuzi apa kiniwuuzani yoori amana ofiya wakathi enttelaavo orettikhana muupuwele yoori miiyo kaawuuziyeeni ⁵ Ila enasaapi eti kineetta wa otule aakirumiyeeyo, khaavo mmote anikuuzelaaye yoori: 'Oneetta vayi?' ⁶ Ila mwaasa woolupa vitthu epo, rooho zenu zahuzunikh. ⁷ Miiyo kiniwuuzani haakhi yoori ena fwayita khwa mweeyo miiyo olawa, maana amana kihilawi, Namalipisela khanteela ota, ila amana kilawa, kintta omperekha. ⁸ Ye amana ata onteela owaakhitiri atthu a olumwenku monkoni wa twampi, wa shariya na ophuka: ⁹ khwa twampi, mwaasa wa ohikikhupali miiyo; ¹⁰ khwa shariya, maana kineetta wa Paapa, khamwinteela okoona theenya; ¹¹ khwa ophuka, maana mfwalume wa voolumwenku apha aphukiwa.

¹² Kinaaye nalelo vitthu zawaatta za owuuzani, ila nasaapi eti mweeyo khamwinteela ovilela. ¹³ Ila amana Rooho ya khweele eta, ye enttela wuusomisani khweele yooshi mweeyo. Ye kinteela ojilupa, ila enttela olupa zooshi esiliyeeyo na owuuzani mweeyo vitthu zinttelaaye orettikhana. ¹⁴ Ye enttela okisifu, maana enteela opokherela etile yiyyiye yaka na owuuzani mweeyo. ¹⁵ Yooshi Paapa ariinaaye ti yaka, tiito kilupiyeeyo yoori Rooho Ttakatthiifu epokheraka etile yiyyiye yaka na owuuzani mweeyo.

¹⁶ Khwa wakathi vattithiiru khamwinteela okoona, ila khwa wakathi vattithiiru theenya mwintelea okoona opheya."

Huzuni na furaha ya anakhiyoni

¹⁷ Anakhiyoni awe khushiweeleyi khusala oozelana yoori: “Khwa mat-takhuzi apo anlupaaye araka: ‘Wakathi vattithiiru khamwintela okoona; wakathi vattithiiru mwintela okoona opheya.’ Theenya onri: ‘Maana kineetta wa Paapa.’ Onri niini?” ¹⁸ Aphano khuuzelana theenya yoori: “Khwa wakathi vattithiiru enlupa niini? Khinneleya ethu ye anlupaaye.”

¹⁹ Ajuwiyeevo Yinsa yoori aari otakha omuuzela, monkoni wa mattakhuzi apale, ye khuwooza yoori: “Mweeyo mwintta wuuzelana monkoni wa mattakhuzi apa kilupiyeyo yoori: ‘Khwa wakathi vattithiiru khamwintela okoona; khwa wakathi vattithiiru theenya mwintela okoona opheya?’

²⁰ Miyo kiniuuuzani khweele yoori mwintela olila na ojikhupanyisa, ila atthu a olumwenku afurahiye. Mweeyo mwiri oohuzunikha, ila huzuni ya ethiito ezukuluwe yiye furaha. ²¹ Muukha amana atakhaka omnipattha mwaana, onoona olwaaza channu mwaasa wa ofiya wakathi awe woohoowa, ila amana ampattha oniiyana furaha, onsahawu olwaaza opule oniyeyo mwaasa wa ontana mwaana voolumwenku. ²² Zinrettikhana ethiipo khwa mweeyo: opu wakathi wa huzuni khwa mweeyo, ila miyo kinteela owoonani swaafu kiina theenya, na mwintela ofurahi, na furaha eto khaavo anttelaae yuulazani. ²³ Siikhu yaya eto khamwintela okuuzela hatha ethu. Miyo kiniuuuzani khweele yoori, amana mwinvekela ethu Paapa khwa nzina laka miyo, ye ontaa owinkhani. ²⁴ Mpakha nasaapi eti khamwinaveke hatha ethu khwa nzina laka. Mwiveke, mwintta winkhiwa, yoori furaha yenu ekamilikhe.”

Yinsa ashinta olumwenku

²⁵ “Miyo kiniuuuzani vitthu epo khwa nlikaniso. Onteela ofiya wakathi kihinttelaaye orumeyela mattakhuzi nkhamma apo, ila kinteelaaye owuuuzani saaneene monkoni wa Paapa. ²⁶ Siikhu yaya eto, mweeyo mwintela oveka khwa nzina laka na khinlawu ohithajiya miyo oveka zwaamu yenu mweeyo, ²⁷ Paapa mweenyeweene onuuphetani, maana mweeyo mwinikipheta na mwinkhupalela yoori miyo kalankha wa Nluku. ²⁸ Kalankha wa Paapa khuta voolumwenku; nakatalikha, kinlaavo voolumwenku kirutele wa Paapa.”

²⁹ Aphano anakhiyoni awe khulupa araka: “Onlupa woosileyavo, woohi-iyi khwa milikaniso! ³⁰ Nasaapi eti enneleya yoori onjuwa vitthu zooshi khinihithajiya opuwa ntthu owuuzela, khwa ethiipo nakhupali yoori weeyo walankha wa Nluku.”

³¹ Yinsa khuaajipu yoori: “Mwinkhupali nasaapi? ³² Wakathi waat-tama, weekhwhee wafiya, mweeyo mwinttelaaye omwazeya wakhula nt-thu alawe owawe, mwilikilike otthome. Ila akiri otthome, maana Paapa ona miyo.

³³ Miyo kauuuuzani vitthu epi yoori mwiiyane heeri khwa miyo. Voolumwenku apha mwintela wiiyana tafwawuthi; ila mwivile! Miyo kashintta olumwenku.”

17

Yinsa ontaa ojilompela

¹ Paata ya Yinsa wiisha olupa vitthu opo, khweekesa otulu na khulompa araka:

“Paapa, wafiya wakathi. Onsifu mwanawo, yoori naye mwanawo oosifu.

² Maana wamwinkha ofwalume khwa anaatamu ooshi, yoori awenkhe

ohaayi wa mileele ooshi apale omwinkhiyeeyo. ³ Na ohaayi opo wa mileele pi opu: Oojwee weeyo, Nluku mmote paasi weekhweele, na Yinsa Al-Masiihu otule omperekhiyeeyo. ⁴ Miiyo koosifu vathi, kimariselaka khaazi okinkhiyeeyo oretta. ⁵ Na, nasaapi eti, okisifu oo Paapa, vamote na-weyo khwa siifwa kaarinaaye na-weyo khapulathi olumwenku ohineeyevo.

Yinsa oniwaalompela anakhiyoni awe

⁶ Kawaathoonyeza nzina lawo apale okinkhiyeeyo voolumwenku. Apo aya aari awo; weeyo khukinkha miiyo, na yo anshututela ntakhuzi lawo. ⁷ Aphano yo anjuwa yoori vitthu zooshi onikinkhaaye zinlankha khwa weeyo. ⁸ Maana miiyo kawooza mattakhuzi okinkhiyeeyo yo khupokherela, ajuwa yoori khweele miiyo kalankha mmakhono mwawo na khukhupalela yoori weetta okiruma. ⁹ Miiyo kiniwaavekelela yo. Akiniwaavekelela attu ooshi a voolumwenku, ila apale okinkhiyeeyo maana pi awo. ¹⁰ Zooshi kiriinaazo pi zavo, na zooshi oriinaazo pi zaka. Miiyo kinsifwiwa mwaasa wa yo. ¹¹ Nasaapi eti akintelela wiikhala voolumwenku ila yo ari voolumwenku, maana miiyo kineetta okho oriwo weeyo. Paapa woot-takathifu, oweenanele khwa nzina lawo, nzina okinkhiyeeyo, yoori yo eeye vamote nkama niyyieezo fweeyo. ¹² Wakathi kaari vamote na-yo voolumwenku, miiyo kaaweenaneliye na khuwaathokorela khwa owahi wa nzina lawo, nzina ntintho okinkhiyeeyo. Kaaweenaneliye na khuhiiivo mmote aashikhiyeeyo, woohiiyi otule atthomeliweeyo waashikha yoori epile zilupiyeezo zawaatikhiwa ttakatthiifu zirettikhane.

¹³ Ila nasaapi eti kintta okho oriwo weeyo, kinlupa mattakhuzi apo nalelo kiri voolumwenku, yoori yo eeyane furaha yaka yookamilikha. ¹⁴ Miiyo kawinkha ntakhuzi lawo, attu a voolumwenku khwiiphiiriwa ti yo, maana yo khahiy a voolumwenku, nkama ethiipi miiyo kihiiy-enee. ¹⁵ Akinuuvekela yoori owaalazevo voolumwenku, ila oweenanele khwa ntakhali. ¹⁶ Yo khah a voolumwenku nkama ethiipo miiyo kihiiy-enee. ¹⁷ Owaattakathise na haakhi; ntakhuzi lawo haakhi. ¹⁸ Nkama ethiipo weeyo okirumiyeozy miiyo voolumwenku, na miiyo kawaaruma voolumwenku. ¹⁹ Khwa zwaamu yaya kinjittakathisa miiyo, yoori na-yo attakatthe khwa haakhi.

Yinsa oniwaalompela anamalottela awe ooshi

²⁰ Akiniwaavekelela apa ottho paasi, ila na apale anteelaaye okikhupali miiyo khwa ntakhuzi laya yo, ²¹ yoori ooshi eeye amote, nkama ethiipo niriizo miiyo na weeyo, na-yo ti eeye khwa fweeyo, yoori attu a voolumwenku akhupali yoori weeyo weetta okiruma. ²² Miiyo kawinkha siifwa etile weeyo okinkhiyeeyo, yoori yo eeye amote nkama fweeyo niyyieeyo amote. ²³ Miiyo khwa yo na weeyo khwa miiyo. Khwa nanna ethiito osiilana waya ontela wiiya khaamili, yoori attu a voolumwenku ajuwe yoori weeyo ti okirumiyeozy, na yoori oniwaapheta nkama ethiipo onikiphetaazo miiyo.

²⁴ Paapa, niiya yaka ti yoori attapho kiriivo miiyo na-yo eeye attapho ooshi apale okinkhiyeeyo, yoori oone siifwa okinkhiyeeyo, maana wakipheta khapulathi olumwenku ohinompiwe.

²⁵ Paapa wa shariya, attu a olumwenku khanujuwa, ila miiyo kinujuwa; na apa okinkhiyeeyo anjuwa yoori weeyo weetta okiruma. ²⁶ Miiyo kawaajuwisa nzina lawo, na nalelo kinvira kawaajuwisaka, yoori pheta etile okiphetaniyeozy yiye vamote na-yo, na miiyo kiiye vamote na-yo.”

18

Ofukiwa wa Yinsa

¹ Paata ya Yinsa wiisha olompa, khulankha na anakhiyoni awe khulokhela kaapu ya ntta po la Kedroni. Waariwo woorotha, ye khweetta ottuukho na anakhiyoni awe.

² Yuuda namazukuluwela aari ojuwa ohali okhule, maana Yinsa swaafu zinkizene aari okusanyeyaka ottuukho na anakhiyoni awe. ³ Aphano Yuuda khuthuula khuntti ya anajanka khweetta ottuukho na mawaziri akina aya arumiweeyo pi mahaakhimu a tiini na mafwarizeewu, athu-uliye vimwasikhelo, na zuuma za nvittha. ⁴ Yinsa, ajuwaka niini yaari weettelaaye orettikhana khwa ye, khuweettela khuwoozela yoori: "Mwinimweekesa paani?" ⁵ Yo khujipu: "Yinsa, wa Nazareeti!" Aphano ye khuwooza yoori: "Ti-miyo." Yuuda namazukuluwela, ti aariina atthu apale. ⁶ Wakathi Yinsa alupiyeovo yoori "ti-miyo," yo etta osusa khukwela vathi. ⁷ Yinsa khuwoozela opheya yoori: "Mwinimweekesa paani?" Yo khujipu: "Yinsa wa Nazareeti!" ⁸ Yinsa khuwooza yoori: "Miiyo kawuuzani yoori ti-miyo. Nkhama mwinikeesa miiyo, mwiwaalikhe apa alawe."

⁹ Yinsa aalupiye toowo yoori eretteye etile aalupiyeeyo rakuzeene yoori: "Paapa, ooshi apale okinkhiyeyo khakaashikheeni hatha mmote."

¹⁰ Aphano Simawu Pheeturu khusarula phanka, khunshija karumeya mmote wa haakhimu nwulu wa tiini, nshilo lawe la nkhono nlume. Nzina lawe karumeya aya otule laari Maliko. ¹¹ Ila Yinsa khumuuzza Pheeturu yoori: "Opwehe phanka yawo mmufukho mwawo! Niri akinteela onywela jikira akinkhiyeyo Paapa?"

Yinsa ontaniwa wa Anaasi

¹² Elottelanaka khuntti etile ya anajanka, namalokozela aya na anamweekesela wa mayahuuti khunkhola Yinsa na khunfuka.

¹³ Omwanzweene khumweettana wa Anaasi, nkhwewe Kayifwa, aari haakhimu nwulu wa tiini mwaakha aya opule. ¹⁴ Ti othuuto awooziyeyo mayahuuti yoori yaari yooshapweya ntthu mmote owaafwela atthu ooshi.

Pheeturu oninkathala Yinsa

¹⁵ Simawu Pheeturu na nakhiyoni nkina eetta onlottelela Yinsa. Mwaasa wa yoori nakhiyoni oto aari ojuwanana haakhimu nwulu wa tiini, ye awahiye ofiya vaje wa nyuupa ya haakhimu nwulu wa tiini, ¹⁶ ila Pheeturu aasaliye anwejaka othetekele wa nlako. Nakhiyoni otule nkina, aari ojuwananaye haakhimu nwulu wa tiini, khusaruwa, khulawa khuttakhulana nakhinzi otule aari weekeselaaye nlako khunlikha Pheeturu ovira.

¹⁷ Aphano njaazi otule aari weekeselaaye milako, khumuuzela Pheeturu yoori: "Weeyo khahi ommote wa anakhiyoni wa mwinyi otu?" Ye khujipu araka: "Akiyyol!" ¹⁸ Mwaasa wa ozizima, akarumeya na anamweekesela khusikhanyela moottho khusala oottha. Pheeturu khweemela attaapho na ye, khusala oottha.

Haakhimu nwulu wa tiini onimuuzela Yinsa

¹⁹ Aphano, haakhimu nwulu wa tiini khumuuzela Yinsa monkoni wa anakhiyoni awe na masomi awe. ²⁰ Yinsa khujipu araka: "Miiyo kawooza atthu a voolumwenku woosileyavo saaneene, na kaari osomisa nsinakooka mpakha Nnyupa Woosifiwamo, nttumpho aari othukumanamaamu mayahuuti. Khina ethtu kilupiyeeyo sirini. ²¹ Khi oniikuzeleni? Owoozele apale akisiliyeeyo, anjuwa saaneene vitthu kilupiyeeyo."

²² Wakathi Yinsa alupiyeovo toowo, namweekesela mmote amwaattamiy-eeyo khumpiya omaasho, araka: “Haakhimu nwulu wa tiini onjipwiwa ethiipo?” ²³ Yinsa khunjipu yoori: “Nkhama kajipu etthu yootakhala, olupe yootakhala, ila nkhamma kattakhula haakhi, khi mwakipiyelani?” ²⁴ Aphano, Anaasi khumperekha Yinsa wa Kayifwa haakhimu nwulu wa tiini ari woo-fukiwa.

Pheeturu oninkhana Yinsa swaafu ya phiiri

²⁵ Pheeturu nalelo aari oretta eettaka woottha moottho. Aphano khu-uzeliwa yoori: “Weeyo khahi mmote wa anakhiyoni a mwinyi otu?” Ye khukhana araka: “Miiyo akiyiyo.” ²⁶ Elottelanaka, karumeya wa haakhimu nwulu wa tiini, jaama mmote wa otule Pheeturu anshijiyeeyo nshiilo, khu-muuza yoori: “Miiyo kaawooniye nwoorotha orina othuuto!” ²⁷ Pheeturu khurutela theenya okhana. Wakathi otthuupo likukhuwi khwiikha.

Yinsa ari wa Pilaatu

²⁸ Nawiisha khuthuuliwaho Yinsa wa Kayifwa khulawaniwa nyuupa khu-ulu ya nsatoro. Yaari supuyeene. Anamalokozela a mayaahuuti khuhivir-imoo nnyupa mphule, aari ontakha yoori ehiwaalawe twahara, yoori awahi onja Paashikowa. ²⁹ Aphano Pilaatu khusaruwa olawa ottakhulana yo na owoozela yoori: “Niini mwininlupezaye ntthu otu?”

³⁰ Yo khujipu yoori: “Eriwaka khaari oretta vitthu zootakhala khanaari wuutisela weeyo.”

³¹ Pilaatu khuwaajipu yoori: “Mwinthuule mwilawe mwamphuke khwa nanna enlupaazo kano zenu.” Aphano mayaahuuti khujipu yoori: “Enikhat-taziwa fweeyo omuula ntthu.” ³² Epo zaarettikhaniye toowo yoori emarisеле mattakhuzi apale Yinsa aalupiyeeyo, wakathi aari ottakhulaavo monkoni wa nanna aari weettelaazo ofwa.

³³ Pilaatu khurutela nnyupa khuulu ya nsatoro, khunkhuvela Yinsa khu-muuzela yoori: “Weeyo o mfwalume wa mayaahuuti?”

³⁴ Yinsa khujipu yoori: “Mattakhuzi aya apo onikuuzelaaye pi awo, ama atthu akina ti awuuziyeeyo monkoni wa miiyo?” ³⁵ Pilaatu khunjipu yoori: “Miiyo ki yaahuuti? Atthu awo na mahaakhimu a tiini ti akitiseeliyeeyo weeyo. Niini orettiyeeyo?”

³⁶ Yinsa khujipu yoori: “Ofwalume aka khayi wa voolumwenku apha! Eriwaka ofwalume aka waari wa voolumwenku apha, akarumeya aka eetta wuumanana mayaahuuti awaakkhattazaka okikhola, ila wa ekhweele ofwalume aka khahiyo wa voolumwenku attaapha.”

³⁷ Aphano Pilaatu khulupa yoori: “Khupe weeyo o mfwalume.”

Yinsa khunjipu yoori: “Weeyo ti onlupaaye yoori ki mfwalume. Miiyo kavokoleliwa ethiito na ti ethiito ekitaniyeeyo voolumwenku, yoori kite kilawele oshaahiti wa haakhi. Wakhula otule eeyiye wa haakhi onsiila huula yaka.”

³⁸ Pilaatu khumuuzela yoori: “Haakhi niini?” Noolupa toowo khulankha opheya khulawa aphale aariivo mayaahuuti khuwooza yoori: “Miiyo akin-imoonana hatha nlattu.” ³⁹ Ila khwa zowera yenu mweeyo, miiyo kintta ontaphula napherezu mmote mwaasa wa ofiya wakathi wa Paashikowa. Mwintakha yoori miiyo kintaphule mfwalume wa mayaahuuti?”

⁴⁰ Yo khunyakula ajipwaka yoori: “Wala, ye wala! Ninintakha Baraba.” Ila Baraba aari namahusuti.

19

Yinsa ahukhumweliwa okhomeliwa

¹ Aphano Pilaatu khuruma ojaphiwa Yinsa. ² Anajanka khuvaasha khaara ya miiwa khunwalisa mmewishwa. Na khunwalisa ajapi yookhuttuwa. ³ Ansuselaka amuuzaka yoori: "Mfwalume wa mayaahuuti, otulu!" Na khusala ampiya omaasho wawe.

⁴ Swaafu kiina Pilaatu khulankha khuwooza mayaahuuti yoori: "Moone! Miiyo kinutiselani mweeyo yoori mwijuwe yoori miiyo akimoonaneeni hatha nlattu." ⁵ Wakathi atiisiweeyo vaje awaliye khaara ya miiwa, na ajapi yookhuttuwa, Pilaatu khuwooza yoori: "Mmoone mwinyi otule, otu ari apha!"

⁶ Wakathi amooniyeyo Yinsa mahaakhimu a tiini na anamweekesela, khusala anyakula alupaka yoori: "Akhomeliwe! Akhomeliwe!" Ila Pilaatu khujipu yoori: "Mwinthuule mweeyo-ena mwankhomele, miiyo akinimoo-nana hatha nlattu."

⁷ Yo khujipu yoori: "Fweeyo ninaaye kano, kano ethiipo enlupa yoori ooliwe maana onjilupeza yoori Mwaana wa Nluku."

⁸ Paata ya osila toowo, Pilaatu khutepa woova. ⁹ Khurutela nyuupa khuuli ya nsatoro, khumuuzela Yinsa yoori: "Weeyo owa vayi?" Ila Yinsa khuhinjipu. ¹⁰ Aphano, Pilaatu khumuuzala yoori: "Khunikijipu? Khunjuba yoori miiyo kinaaya owahi wa wuutaphula ama wuukhomela?"

¹¹ Yinsa khunjipu yoori: "Weeyo khawaari wiiyana hatha owahi khwa miiyo, eriwaka khawenkiwe otulu. Ti eto otule ootiseliyeyo Miiyo ona paathuli ya twampi yooziti."

¹² Waaza wakathi otthuupule Pilaatu khusala atakha ontaphula Yinsa, ila mayaahuuti khusala anyakula araka: "Amana onlikha Mwinyi oto ojitatha, khuniyya swaahipu wa Seezari. Wakhula otule anjilupanaaye ofwalume oniyya muumani wa Seezari!"

¹³ Pilaatu noosiila toowo, khunsarulela Yinsa vaje, khwiikhala vakhukulu ya namaphuka puuro yaari wiithiwaaye 'Eshotthelo ya mawe', khwa luuka ya meepereewu enriwa 'Kabata'. ¹⁴ Yaari payina ya saasiitha, yaari Siiku ya Ojilokothela, maana yaari sumana ya njampo la Paashikowa.

Aphano Pilaatu khuwooza mayaahuuti araka: "Mwimoone, otu ari apha Mfwalume enu!"

¹⁵ Ila yo khusala anyakula araka: "Onsarulele oje! Onsarulele oje! Akhomeliwe!"

Pilaatu khuwoozela yoori: "Kinkhomele mfwalume enu?"

Mahaakhimu a tiini khujipu araka: "Khanina mfwalume fweeyo woohiiyi Seezari!"

¹⁶ Aphano Pilaatu khunthuula Yinsa khuwenkha anajanka yoori ankhomele, yo khunthuula.

Okhomeliwa

¹⁷ Yinsa khusaruwa attikhiwe nsalapa awe, khusala alawaniwa puuro yaari wiithiwaaye Kalavaariyu, khwa luuka ya meepereewu yaari wiithiwa Kolokoota, ¹⁸ attaapho akhomeliweeyo ye na atthu awiri, wakhula mmote mpavu mwawe, ye khwiyya vakathi.

¹⁹ Pilaatu khwaatikha lipawu khuthomeya pontha wa nsalapa; attikhiyevo yoori: "YINSA WA NAZAREETI, MFWALUME WA MAYAAHUUTI! ²⁰ Mayaahuuti enkeene aasomiye lipawu ntthile, maana puuro etile Yinsa akhomeliweeyo yaari kharipu na va sitati, lipawu ntthile laatikhiwe luuka ya meepereewu, ya elatiinu na ekereeku. ²¹ Mahaakhimu

a tiini aari omuuza Pilaatu yoori: “Ohaatikhe yoori: ‘Mfwalume wa Mayaahuuti’, waatikhe etile aalupiyeyo yoori: ‘Miiyo ki Mfwalume wa mayaahuuti.’”

²² Pilaatu khujipu yoori: “Etile kaatikhiyeyo kaatikha.”

²³ Anajanka paata ya onkhomela, khuthuula kuwo zawe, khwaawanya phantte nne yoori wakhula najanka apatthe phantte moote; na khuthuula ajapi yawe theenya. Ila ajapi yaari yoohisoniwi waaza vathi mpakha vatulu.

²⁴ Yo khulupa yoori: “Nihivarule, ila neekese nasipu nimoone anttelaaye opattha.” Epo zaarettikhaniye yoori emarisele zawaatikhiwa ttakatthiifu enlupaaye yoori:

“Aawanya kuwo zaka, na khweekesa nasipu khwa ajapi yaka.

Na pi ethiipo anajanka aarettiyeozo.”

²⁵ Kharipu ya vansalapa wa Yinsa aarivo mamaawe, na ttwiye mamaawe, na Mariyamu muukha wa Kolopa, na Mariyamu Mataleena. ²⁶ Yinsa noomoona mamaawe ari vamote na nakhiyonи otule wompheta wawe, khumuuzu mamaawe yoori: “Muukha mwanawo oto,” ²⁷ na khumuuzu nakhiyonи awe yoori: “Omoone, mamaawo oto.” Waaza wakathi otthu-upule, nakhiyonи otule khuretteya wiiya jaama.

Ofwa wa Yinsa

²⁸ Paata ya Yinsa woona yoori zooshi zintta omariseleya, khushankela yoori zirettikhane epi zaari olupaazo zawaatikhiwa ttakatthiifu yoori: “Lakikhola nnyottha!” ²⁹ Yaarivo suupha aarimo viinyu yoonyuunya khuthuuliwa khunywisiwa ethiwei va shiponja yoofukeleliwa va ttekethe ya hisoopo na khuweziwa mpakha omilomo wa Yinsa. ³⁰ Yinsa wakathi anywiyeeyevo maati apale oonyuunya khulupa yoori: “Zooshi zamariseliwa”, khwiinamisa eeshwa yawe khwinkhelela rooho yawe.

³¹ Yaari Siikhu ya Ojilokothela na Saapatu eti yaari siikhu yootepa wiiya ttakatthiifu. Wiiya khaari otakha yoori mwiili wa Yinsa wiiye vansalapa mpakha Saapatu, mayaahuuti khunvekela Pilaatu yoori arume okakattiwa moolu otule akhomeliweeyo na olaziwavo vansalapa. ³² Khuta anajanka khukakatta moolu a ntthu otule wa waaza aakhomeliweeyo vamote na Yinsa elottelanaka khukakattiwa a otule nkina. ³³ Ila noofiyeliwa Yinsa, khooniwa yoori ye aari woofwa, khuhikakattiwi moolu awe. ³⁴ Ila najanka mmote khukuphula pavu ya Yinsa na nkokhi, nasaapiru khusala esaruwa taamu na maati. ³⁵ Otule oniyeyo vitthu zaya epo alawela oshaahiti, na oshaahiti awe pi wookhwhee. Ye onjuwa yoori onlupa haakhi, na onlaza oshaahiti yoori na-mweyo mwikhupali. ³⁶ Vitthu epo zarettikhana yoori emariseleye epile enlupaazo zawaatikhiwa ttakatthiifu yoori: “Hatha likhonkolo lawe limote khalintela opwecheya,” ³⁷ na nkhamma theenya enlupaazo zawaatikhiwa phantte kiina yoori: “Yo anttela omoona othuuto anshomiyeyo.”*

Ozikhiwa wa Yinsa

³⁸ Paata ya toole Yuusufu wa sitati ya Arimateeyya, khunvekela Pilaatu mwiili wa Yinsa. Yuusufu aari nakhiyonи wa Yinsa, ila wa sirini, maana aari owoova mayaahuuti. Pilaatu khwinkha ruhusa, na Yuusufu khulawa na khulazavo mwiili opule wa Yinsa. ³⁹ Ye aaperekhiwe ti Nikoteemu,

* ^{19:37} Moone kithaapu ya Zakariiya 12.10

otule alawiyeeyo ottakhulana Yinsa osikhu. Nikoteemu aathuliye mafuttha oonukhela oophakanyaniwa ela yaari ofiyaaye ethu ya miphimo talaathiini na thaanu. ⁴⁰ Khuthuula mwiili wa Yinsa, khuputaputela va joora yoottukuntteliwa ofu woonukhela, nkhamma anrettaazo mayaahuuti va ozikha. ⁴¹ Vahali akhomeliwevo Yinsa waariwo woorotha, waariina khapuri pheeya, yoohizikhewo hatha ntthu. ⁴² Maana yaari osaleela ofiya Siikhu ya Ojilokothela wa mayaahuuti, na khapuri yaari kharipu, khuzikhewa attaapho.

20

Osisimuwa

¹ Siikhu ya mwanzo ya sumana Jumwaa-phiili supuyeene, Mariyamu Mataleena khulawa ovilalo, khoona liwe ntthile laattiyelaniweeyo khapuri lilaziwevo. ² Aphano khutthira khulawa mpakha vhali aariivo Simawu Pheeturu na nakhiyonu nkina, otule Yinsa aari omphetaaye, khuwooza yoori: “Mbwana alaziwamo nkhapuri, khanijuweeni vhali atthiweeve!”

³ Pheeturu khulankha na nakhiyonu nkina khulawa mpakha okhapuri. ⁴ Oowiiri khulankha eettaka otthira, ila otu nkina khutthira channu khunziti Pheeturu, khwiya mwanzo woofiya ovilalo. ⁵ Khiwiinama khutturume-lamo, khoona joora, ila khuhivirimo nkhapuri mphule. ⁶ Aphano, Simawu Pheeturu otule aari onlottaaye, khufiya khuvira nkhapuri mphule na ye khoona joora etile, ⁷ na joora etile yaari veeshwa wa Yinsa, eri yooputaputeliwa eri phante kiina. ⁸ Aphano naye nakhiyonu otule aari mwanzo woofiya khuvira nkhapuri ntumphule, khoona na khukhupali. ⁹ Yo nalelo zaari ehinaaweeleye zawaatikhewa ttakatthiifu, zaari olupaaye yoori yaari ohithajija Yinsa osisimuwa muufwa.

Yinsa onimpuvelela Mariyamu Mataleena

¹⁰ Anakhiyonu apale khurutela onti theenya. ¹¹ Ila Mariyamu, khusala nalelo ari vanlako wa khapuri, eettaka olila, khwiinama khuthurumela nkathhi. ¹² Khoona malayikha mawiri awaliye kuwo zoolakala, eekhaliye aphale waariivo mwiili wa Yinsa, mmote ovishwa nkina omoolu.

¹³ Aphano malayikha apale khumuuzela yoori: “Weeyo muukha, onlila-ni?”

Ye khujipu araka: “Yo anthuula Mbwana aka khulawana safwari zaya na akinjuwa vhali antthiweeve.” ¹⁴ Paata ya olupa toowo, khuzukuluwa khumoona Yinsa eemeliye, ila khuhinjuwi yoori ti Yinsa.

¹⁵ Aphano Yinsa khumuuzela yoori: “Weeyo, muukha onlila-ni? On-imweekesa paani?”

Ye khusala oopuwela yoori aari namalimela woorotha, khunjipu yoori: “Mwinyi, nkhamma mweetta onlazamu, nkakuuzeni vhali mwintthiweeve, miiyo kilawe kanthuule.”

¹⁶ Yinsa khuri: “Mariyamu!”

Ye khuzukuluwa, khulupa khwa luuka ya meepereewu yoori: “Raboni!” (Eriina maana la Mwaaliimu). ¹⁷ Yinsa khulupa yoori: “Ohikikholele, maana nalelo akinarutele wa Paapa. Olawe vakatthi wa attwiizaku wawooze yoori: ‘Miiyo kinttu orutela wa Paapa na Papeenu mweeyo, wa Nluku aka na Nluku wenu mweeyo.’”

¹⁸ Aphano Mariyamu Mataleena khulawa khuwooza anakhiyonu a Yinsa yoori: “Kamoona Mbwana!” Na khuwooza zooshi epile oziweeyo ti Yinsa.

Yinsa oniwaapuvelela anakhiyonu awe

¹⁹ Njuwa-looveva siikhu ethiitile, siikhu ya mwanzo ya sumana, jumwaa-phiili, anakhiyoni akhusanyeyiye milako ziri zoofukiwa, mwaasa wa owoova mayaahuuti, Yinsa khuvira khweemela vakatthi vaya khuri: “Heeri yiye vamote na-mweyo!” ²⁰ Alupiyeevo vitthu epile khuwaathonyeza makhono awe na pavu yawe. Anakhiyoni apale khwiya ofurahi paata ya omoona Mbwana.

²¹ Yinsa khulupa theenya yoori: “Heeri yiye vamote na-mweyo! Nkhama ethhiipo Paapa akirumiyeeyo, na-miyo kinuuruman i mweeyo.” ²² Paata ya olupa toowo khuwaavitelela khuri: “Mwipokhere Rooho Ttakatthifu. ²³ Amana mwiswaamihi twampi za ntthu, twampi zaya epo eniiya zooswamahiwa, ila amana mwihiiswaamihi khazinswamahiwa.”

Yinsa onimpeweleta Tome

²⁴ Tome, aniiithiwaaye Maphapo, mmote wa anakhiyoni apale khumi na awiri, kaari vamote na anakhiyoni wakathi Yinsa awaapuweleliyeovo. ²⁵ Anakhiyoni apale akina khumuaza yoori: “Namooni Mbwana!” Ila ye khuri: “Miyo noohooni mmakhono alama za misumari epile, kitthaamo yaala yaka mphule aakhomeliweemo, na kittha nkhone pavu yawe, hatha vattiithiiru akinkhupali!”

²⁶ Paata ya ovira siikhu naane anakhiyoni awe khurutela okusanyeya ntturnphule theenya na Tome aarivo. Milako ziri zoofukiwa, Yinsa khuta khweemela vakatthi vaya khuri: “Heeri yiye vamote na-mweyo!”

²⁷ Aphano Yinsa khumuaza Tome yoori: “Otthe yaala yawo apha, na woone makhono aka, na wookole nkhone awo ottheele pavu yaka. Ohiiye nan-hikhupali, ila wiiye namakhupali.”

²⁸ Tome khujipu araka: “Mbwanu aka na Nluku aka!”

²⁹ Yinsa khumuaza yoori: “Mwaasa wa okoona, wakhupali? Ooparikhiyiwa pi apale ahooneeni ila khukhupali.”

³⁰ Yinsa khuretta alama za minjuza kiina zinkizene vakatthi wa anakhiyoni zihaatikiweenimo nkithaapu mphu, ³¹ ila epi zaatikiwa yoori mweeyo mwikhupali yoori Yinsa ti Al-Masiihu, Mwaana wa Nluku na yoori amana mwinkhupali mwiiyane ohaayi khwa nzina lawe.

21

Yinsa na ojya wootikinisa

¹ Paata ya toowo Yinsa khuwaapuwelela anakhiyoni awe opheya nshini wa ntthatta liniitthiwaaye Tiperiyati*. Ti nanna ye aajithonyeziyeeyo: ² aari vamote Simawu Pheeturu, Tome aniiithiwaaye Maphapo, Natanay-eeli wa nti wa Kanaani ya Kalileya, na aana a Zepeteewu na anakhiyoni akina awiri. ³ Simawu Pheeturu khwooza ashirikha awe yoori: “Kinttel a ojya.” Akinoko aya khulupa yoori: “Fweeyo nintta wuulotta!” Yo khulawa na khweetta mmwaatiya, ila osikhu aya opule khuhipatthi hatha etthu.

⁴ Ekhunkumu ya lifwajiri Yinsa aarettiye ari vapatari, ila anakhiyoni awe khuhinjuwi.

⁵ Ye khuzzozela yoori: “Aanaaka, mwapattha swi?”

Yo khujipu yoori: “Wala!”

⁶ Ye khulupa yoori: “Mweeselele ntthavi phantte ya nkhone nlume ya mwaatiya, mwintta opattha.” Yo khweesa, khuhisala awahi ofuttha ntthavi mwaasa wa swi waatta.

* ^{21:1} Tiperiyati theenya eniitheliwa nzina la ntthatta la Kalileya.

⁷ Nakhiyoni wa Yinsa woophetacha khumuuzha Pheeturu yoori: "Oto aya ti Mbwana!" Wakathi Simawu Pheeturu asiiliyeovo elupiwaka yoori aari Mbwana, khuwala juupa, maana eettiye ovula na khujeeselela mmaati. ⁸ Anakhiyoni akina khuta na mwaatiya, eettaka ofuttha ntthavi liitaaliye swi, aari kiyasi ya phiima miiya asaleela ofiya vapatari. ⁹ Wakathi afiyeovo vapatari, khoona vahali waariivo moottho, na swi vatulu a makhala; na erivo phaawu.

¹⁰ Aphano Yinsa khuwooza yoori: "Mwitiise swi vattithiiru ethhiipo mwijijiyeeyo nasaapi."

¹¹ Aphano Simawu Pheeturu khuwela mmwaatiya khupurulela ntthavi vathi. Liri lawiitaala swi miiya na hamusiini na ttatthu khuluzeene, ila ntthavi khuhivarawi. ¹² Aphano Yinsa khuwooza yoori: "Mwite mwije!" Khuhiivo hatha nakhiyoni awe mmote aminyaliyeeyo khumuuzela yoori: "Weeyo aya o paani?" Maana anjuwiye yoori otu ti Mbwana. ¹³ Yinsa khuwaattama khuthuula phaawu, khuwenkha na khuretta ethhiipo khwa swi. ¹⁴ Eto yaari swaafu ya ttaatthu Yinsa ajithoonyezaka vakatthi wa anakhiyoni awe, paata ya osisimuwa nkapuri.

Yinsa oninkaphula Pheeturu

¹⁵ Paata ya wiisha oja Yinsa khumuuzela Simawu yoori: "Simawu, mwaana wa Yaahaya, onikipheta zayita apa?"

Ye khuri: "Aa Mbwana, hatha na-weyo onjuwa yoori miiyo kinuupheta."

Yinsa khumuuzha yoori: "Ojise pwittipwitthi zaka."

¹⁶ Khumuuzela theenya swaafu ya phiiri yoori: "Simawu, mwaana wa Yaahaya, weeyo onikipheta?"

Ye khujipu yoori: "Aa Mbwana, hatha na-weyo onjuwa yoori miiyo kinuupheta."

Yinsa khumuuzha yoori: "Oshuke pwittipwitthi zaka."

¹⁷ Khumuuzela theenya swaafu yattaatthu, yoori: "Simawu, mwaana wa Yaahaya, weeyo onikipheta?"

Pheeturu khunyoonyeya mwaasa wa Yinsa omuuuzela swaafu ya ttaatthu, yoori: "Weeyo onikipheta?" Ye khuri: "Mbwana, weeyo onjuwa vitthu zooshi na onjuwa yoori miiyo kinuupheta."

Yinsa khumuuzha yoori: "Ojise pwittipwitthi zaka. ¹⁸ Miiyo kiniwuza khweele yoori, wakathi opule waari shaapu, weetta ojivalisa, khweetta wakhula aphale ontakhaavo, ila amana wuuluvala onteela owookolela makhono, azaawo oothuule aweettane ohali ohintakhaawo weettawo."

¹⁹ Yinsa aalupiye toowo yoori athoonyeze nanna ya ofwa Pheeturu aari weettelaaye onsfwana Nluku. Nawiisha, khumuuzha yoori: "Okilote!"

²⁰ Pheeturu azukuluwiyeovo khumona yoori nakhiyoni otule Yinsa aari omphetachaaye eta owaalotta. Oto ti aari mpavu wa Yinsa wakathi wa ethu-yoojiwa ya osikhu, na ti othuuto eenameliyeeyo vamweyo wa Yinsa khumuuzela yoori: "Mbwana paani anttelaaye wuuzukuluwela?"

²¹ Wakathi Pheeturu amooniyeevo khuri: "Mbwana, khi otu?"

²² Khunjipu Yinsa yoori: "Hatha nkama miiyo katakha yoori ye eeye haayi mpakha miiyo oruti, weeyo enuujali niini? Ila weeyo okilote miiyo."

²³ Khwa ethhiipo khumwazeyela vakatthi wa attwi yoori nakhiyoni otule khaari oteela ofwa. Ila Yinsa khaalupiye yoori khaari oteela ofwa; aalupiye yoori: "Nkama miiyo katakha yoori eeye haayi mpakha miiyo oruti, weeyo enuujali niini?"

²⁴ Otu ti nakhiyoni anlazaaye oshaahiti wa vitthu zaya epo na aatikhiyeeyo. Ninjuwa yoori oshaahiti awe pi wookhwhee.

25 Yinsa aretta vitthu kiina theenya zawaatta. Eriwaka wakhula moote yeettiye waatikhiwa, kinoona yoori hatha voolumwenku wooshi khayaari wiiyavo puuro zootthiiwavo kithaapu zaari weettelaaye waatikhiwa.

Khaazi za Maswihaapa

Oweziwa wa Yinsa

¹ Warakha yaka yamwanzo khaatikhiye kiwuuzaka weeyo Tiyoofilu, monkoni wa zooshi epile Yinsa arettiyeego na anozeliyeego, ² mpakha siiku aweziweevo pinkuuni, paata ya owaanozela khwa owahi wa Rooho Ttakathiifu atthu apale awaathawuliyeego yoori eeye maaswihaapa. ³ Yinsa n'osisimuwa awaapuweleliye ajithoonyezaka nanna nannazene yoori ti ye entta osismuwa. Khwiya vamote na yo mpakha siiku arupayini enttaka omoona, opiyana mwaasa na ojama vamote, na attakhulaka vitthu monkoni wa ofwalume wa Nnyizinku. ⁴ Wakathi aari ojaavo na maaswihaapa awe Yinsa khuwaaza yoori: "Mwihileewo Yeruzaleemu, mwiwejele etile kiwuuziyeenini aahitiyeego Paapa. ⁵ Yaahaya awoosani na maati, ila nkathi wa siiku vattithiiru, mweeyo mwinteeela woosiwa na Rooho Ttakathiifu."

⁶ Yo khumuuzela: "Mbwama, wakathi aya pi otthuupo ontelaaye owminkha ofwalume wa Nnyizinku atthu a Ezirayeele?"

⁷ Yinsa khuwaajipu yoori: "Kahi pantte yenu ojuwa wakathi ama siiku Paapa attattikhyeego ofwalume awe. ⁸ Ila mweeyo mwinteeela winkhiwa owahi wa Rooho Ttakathiifu ewiishukelani, mwinteeela wiiya mashahiti aka, waaza Yeruzaleemu na Yudeya yooshi, Samariya mpakha ohali wisheleyewo olumwenku."

⁹ Paata ya wiisha olupa mattakhuzi apa, khuweziwa pinkuuni, eettaka omweekesela olawaka khupuwa liwiku khunkutela khuhisala amoona. ¹⁰ Yo khusala nalelo ari wookhontola maasho aya enkesaka otulu ye eettaka olawa, khupuwa aluke awiri awaliye kuwo zoolakala, ¹¹ khuwooza yoori: "Mweyo akalileya, otulu mwineekesa-niwo? Yinsa alaziweeyo vakathhi venu khuweziwa pinkuuni onteela oruti khwa nanna ethiipile mwimooniyeego alawaka."

Matiiyasi oninrentteri Yuuda

¹² Aphano maaswihaapa khulankha vamwaako oniithiwaaye Oluveera oriiyeego kharipu na sitati ya Yeruzaleemu. ¹³ N'oofiya khuwela nyuupa ya vatulu nhali amakiyeemo, maaswihaapa aya apo aari Pheeturu, Yaahaya, Yaakhumpa na Antere; Filiipe, Tome, Paturumeewu na Mateewuzu; Yaakhumpa mwaana wa Alufayo, Simawu Zelooti na Yuuda mwaana wa Yaakhumpa. ¹⁴ Apo khaazi yaya yaari okhusanyeya na olompa wakhula siiku, na aakha akinaaya vamote na Mariyamu mamaawe Yinsa na attwwiize.

¹⁵ Aphano siiku moote mamuumini miiya na eeshiriini aakusanyeyiye vahali vamote. Pheeturu khulankha khweemela khulupa awoozaka mamuumini ooshi yoori: ¹⁶ "Atthwiizaku, zaarina yoorettikhana zooshi epile Rooho Ttakathiifu alupeyeezo nkathi ya ntakhuzi la Nnyizinku khwa Daawuuda monkoni ya Yuuda, othuuto awaalokoziyeego atthu olawa onkhola Yinsa. ¹⁷ Yuuda aya oto aari wa khuntti yetthu, aari oretta phantte ya khaazi ethiiti.

¹⁸ Ila mwaasa wa nzurukhu enkhiweeyo khumuuzanyisa Yinsa, nzurukhu aya khuuzanyela nshapa. Aakhweliye mmashapa mwawee ntumpho khufwa. Erukulu yawe khuphwetuwa marupo awe ooshi khumwazeyela

vathi. ¹⁹ Atthu ooshi a Yeruzaleemu khujuwa. Apho nshapa ntthile khutthajiwa nzina khwa luuka yaya yo la Akelataama: liriina maana a 'nshapa la taamu'.

²⁰ Nliivuru la Zaburi yaatikhiwamo yoori:

'Nhali mwawwe ethamiwe ahiikhalemo hatha ntthu.'

Khwaatikhiwa theenyia yoori

'khaazi yawe asalane ntthu nkina.'

²¹ Apho ninthawula ntthu nkina nintthe nkhuntti mwetthu eeya shaahitiwa osisimuwa wa Mbwana Yinsa. Ila ona ya wiiya ntthu aari onilottakaaye mphule naari ovirakamo Yinsa ari haayi, ²² waaza wakathi opule Yaahaya aari woosavo mpakha siikhu Yinsa alaziweeveo vakatthi vetthu aweziwaka pinkuuni."

²³ Aphano, khuthoonyiwa atthu awiri: Yuusufu aarina nzina likina la Barisapa, woojuwaniwa wiiya ntthu wa waaminey, na nlume nkina aari wiithiwaaye Matiiyasi. ²⁴ Nawiisha atthu khulompa araka: "Mbwana, weeyo ti onjuweeyo rooho za atthu ooshi. Khwa atthu apa awiri nintakha onithoonyeze onthawuliyeeyo ²⁵ yoori akhole khaazi ya omaaswihaapa vamote na-fweyo, eti Yuuda ahitakheeni khweetta puuru yaari onsuhaaye."

²⁶ Paata ya toole khweekesiwa nasipu khusala enthoonya Matiiyasi. Khwa ethiipo ye khuphakanyeya na apale khumi na mmote aasaliyeyo khwiya khumi na awiri.

2

Ota wa Rooho Ttakatthiifu Siikhu ya Takhiriima

¹ Efifyeeyevo siikhu ya takhiriima amamlottela a Yinsa ooshi aakhusanyeyiye vamote. ² Nasaapiru khuta huula yoolankha pinkuuni wuupuka nkama pheevo yaari ovumaaye saaneene, khwiitaala nnyupa wooshimo mphule aakusanyeyiyeemo. ³ Khuwaapuwela ethu yaari wuupuwaaye nkhamma nlimi la moottho laari waawanyeyaaye khusala linkwela vakhula ntthu veeshwa vawe. ⁴ Ooshi khwiya awiitaala Rooho Ttakatthiifu, khwaaza ottakhula luuka pheevo khwa nanna wakhula ntthu Rooho Ttakatthiifu yaari onthoonyezaazo ottakhula.

⁵ Yeruzaleemu aarivo ayudeya awaatta aari omwaaputwaaye Nnyizinku aalankhiyeeyo khapila zooshi za olumwenku. ⁶ Ooshi n'oosila huula etile khwiya ooshanka. Khukusanyeya vahali vamote maana ooshi aasiliye ovuma wa huula ya etile, na wakhula ntthu aari osiila khwa luuka yawe. ⁷ Aari oshankawene ethiipo milomo khuuma khusala olupa yoori: "Atthu apa ntthakhulaaye apha ooshi khahi akalileya apa? ⁸ Khi ensulukhwana toovi fweeyo niwaasiilaka khwa luuka zethu? ⁹ Fweeyo nalankha Parithiya, akina alankha Mediyya, akina Elaami, akina Mesopotamiya, akina Yudeya, akina Kapatosiya, akina Pontu na Aasiya, ¹⁰ akina alankha Firijiya, akina Pamfiliya, akina Misuri na pantthe za Liibiya kharipu na Sireeni, na anamathotola alankhiyeeyo Rooma. ¹¹ Waaza mayaahuti mpakha apale eettiyeeyo ntiini ya maya huuti, akereeti na aarapu. Ila nawaaasiila khwa luuka zethu yo alupaka vitthu zootkinisa na khuluzeene za Nnyizinku. ¹² Ooshi aari oshankisiwa khuhisala ajuwa hatha ethu yoolupa, khusala oozelana araka: "Maana a vitthu zaya epi niini?"

¹³ Atthu akina khusala awaatheya maaswihaapa apale owoozaka yoori eetta ohapaliwa.

Otafusiri wa Pheeturu

¹⁴ Aphano Pheeturu na ashirikhaawe apale khumi na mmote khlankha khusala owooza atthu yoori: "Maswahipu zaka mayaahuti mpakha mooshi mweeyo mwiniikhalaaye nti wa Yeruseleemu, mwisileze ethhu kintakhaaye olupa: ¹⁵ mweeyo mwinoona nkhamma atthu apa eettiye ohapaliwa, ila walá khahapaliweení nkhamma mwinaakanyerazo mpakha apha saawuuni ya supu. ¹⁶ Vitthu zaya epi zirettikhaniyeeyozzo zaalupiwe rakuzeene ti napiya Yowele araka:

¹⁷ 'Nnyizinku alupa yoori: "Siikhu za mwiisho
kinteela oweeshushela atthu ooshi Rooho Ttakatthiifu.
Aana enu aalume na apa aakha anteela alupa
vitthu zinteeelaaye orettikhana khwa nzina laka,
mashaapu anteela ooothoonyeziwa vitthu zootikinisa.
Ana khuuluvale anteela wiiyana jozi.

¹⁸ Khwa akarumeya aka aalume na aakha,
yo kiniweekha Rooho yaka siikhu zaya ethiipo
yo anteela olaleya hapari zaka.

¹⁹ Kinteela ooothoonyeza vitthu zootikinisa,
kinteelaazo ottha otulu pinkuuni
kinteela opuwisa vitthu zootikinisa vathi voolumwenku,
zinteeela orettikhana minjuza,
enteela wiiyavo taamu na moottho mawiku na loosi.

²⁰ Njuwa lithatuwe liiye looripa,
mweezi na-ye othatuwe wiye taamu,
epoza enteela orettikhana khapula
ehinafiye siikhu khuulu ya siifwa za Nnyizinku.

²¹ Ila atthu ooshi apale anttelaaaye onkhuwela Nnyizinku
yoori awaawuuni antta wuusurukha!"'

²² Mweeyo mwa atthu a Ezirayele mwisiileze mattakhuzi apa: Yinsa wa Nazareeti tu wookhupaliwa ti Nnyizinku. Ye Nnyizinku oretta minjuza za waatta vakathi venu mweeyo na alama kiina zaya khwa ye. ²³ Othuuto Nnyizinku awinkhiyeenini mweeyo arina shawurina, ila mweeyo khkusanyeya na atthu ootakhala rooho khunkhomela vansalapa khumuula. ²⁴ Nnyizinku othuuto ansisimula muufwa na khunsinttisa owahi woofwa maana yaari etthu yooronyiwa ye oshintti ti oofwa. ²⁵ Daawiuda anlopeziye yoori:

'Wakhula wakathi kaari omoona Mbwana ari omaasho waka
maana ye ori nkhona-nlume aka, yoori kihiveveluwe.

²⁶ T'iito rooho yaka yoofurahi na nlimi laka linittithimisa;
miili aka enteela onvumula orina nroromelo,

²⁷ maana khunteela olıkha nafusi yaka nkhapuri
khunteela okanswi,

khukhupaleli na khunteela okhupalela yoori

Nttakathhiifu awo oone vitthu zootakhala nkhapuri.

²⁸ Wakinozela tarikhi ya ohaayi,
onteela okiitaaza furaha amana kiiya vamote na-weyo.'

²⁹ Pheeturu khuri: “Attwizaka, mwikiwejele kiwuuzeni saana saana monkoni wa papeetthu Daawuuda yoori ye afwa khuzikhwa khaburi yawe eri mmuti mwetthu ntmphu mpakha leelo eti. ³⁰ Ye aari napiyu na aari ojuwa yoori Nnyizinku ahitiye yoori vakatthi wa peewu yawe aari on-teela opuwumo mfwalume ari oteelaaye osalana puuro yawe ya ofwalume. ³¹ Daawuuda aari ojuwa ethtu Nnyizinku aari weettelaaye oretta t'iito aari aalupiyeeyo monkoni wa osisimuwa wa Al-Masihu othuuto Nnyizinku ahanlikhiyeyo nkhaburi, wala mwiili awe ophomowa. ³² Nnyizinku an-sisimula Yinsa, fweeyo naamashaahiti a vitthu zaya epo. ³³ Khuweziwa olawa wiikhala nkhono-nlume wa Nnyizinku, ye enkhiwa Rooho Ttakaththifu ti Papaawe nkhama etthiipile aamwahitiyeeyo apha eetta oniitthelela t'iithiiti mwinoonaaye na mwinsilaaye enasaapi eti. ³⁴ Daawuuda khawezweeni pinkuuni, ila atukhunu alupaka yoori:

‘Mbwana amuuza Mbwanaaka yoori:

“Wiikhale pantteya nkhono weelume aka,

³⁵ mpakha miiyo kiwaattha maatuwi awo awaaluwatthele.”’

³⁶ Aphano, atthu ooshi a Ezirayeele ana yoojuwa yoori: Yinsa, othuuto mweeyo mwankhameliyeeyo, Nnyizinku omwinkha wiiya Mbwana na wi-iya Al-Masihu.

³⁷ Paata yoosiila mattakhuzi apale, khuwaapattha kupari nroho mwaya, khumuuzela Pheeturu na maaswihaapa apale akinaaya yoori nkahayani: “Attwizetthu, apho niri je?”

³⁸ Pheeturu khawaajipu araka: “Mwithupwiye na wakhula mmote wa mweeyo oosiwe khwa nzina la Yinsa Al-Masihu yoori mwipatthe nswammaha wa twampi zenu. Mwintta opokhera tthuuo ya Rooho Ttakaththiflu. ³⁹ Ahiti yaya eto ti yenu, mweeyo mpakha aaneenu na atthu akina awoolepawo: khwa apale ooshi Mbwaneeethu Nnyizinku awaakhuweliyeeyo.”

⁴⁰ Khwa mattakhuzi menkeene Pheeturu khusala awaalipisela atthu na awaatumenela araka;” Mwijuusuru vakatthi ya khapila ya atthu apa otakhala rooho.” ⁴¹ Atthu awaatta khukhupalela tafusiiri ya Pheeturu, khujilakelela olawa woosiwa. Siikhu yaya etile atthu ekezeleyiye khwiya alufu ttatthu.

Nanna aari wiikhalaayo atthu apale aakhupaliyeeyo

⁴² Yo aari ooshututela masomi apale oosomisiwa ti maaswihaapa aari oosiilana, na okusanyeya oja vamote na olompa vamote. ⁴³ Ooshi aarina woova nwulweene, maana Nnyizinku eetta ovira arettaka vitthu zootikinisa na minjuza zawaatta khwa khaazi ya maaswihaapa apale. ⁴⁴ Atthu ooshi apale ankhupaliyeeyo Yinsa aarina oosiilana wookhomaala saaneene, wakhula etile yaari opattikhanaaye eetta omeelana. ⁴⁵ Akina aari wuuzanya-isa mashapa aya na vitthu zaya: onzurukhu aya n'ootiisa oteela owaamela azaaya, wakhula nthu aari winkhiwa khwa khipi ya othowiwa wawe. ⁴⁶ Yo aazowereliye okusanyeya wakhula siikhu vaje wa Nyuupa ya Nnyizinku na mmawayna na omeyelana phaawu ajaka na furaha khuluyeeene na rooho yeemaani, ⁴⁷ ansifwaka Nnyizinku. Atthu ooshi aari wiiya ootuveeliwa phi mentezi aya. Apho Nnyizinku wakhula siikhu aari ovira oweekezelaka atthu ootakha wuusurukha.

3

Ovonosiwa wa Nthu Woorakala

¹ Siikhu moote Pheeturu na Yaahaya eetta owelela nnyupa woosifwiwamo Nnyizinku wakathi woolompa wakathi mittatthu wa makaaripi. ² Aarettiye athuuliwe nthu aavokoliweeyo ari woorakala eettaniwaka vanlako wa nyuupa yoosifwiwamo Nnyizinku, onitheliwaaye Nlako Wooshapweya, yoori asala awaavekela zimoola attu apale aari oviramo. ³ Amooniyeevo Pheeturu na Yaahaya aviraka nnyupa mphule, khusala awaavekela zimola. ⁴ Pheeturu na Yaahaya khusala amweekesa saana khulupa yoori; “Oneekese fweeyo!” ⁵ Mwinyi otule khusala aweekesa woophalevo awejelaka op-wkherele ethtu ya wenkiwa pi yo.

⁶ Pheeturu khulupa yoori: “Akina feeta na tahapu, ethtu kiriina ethiito kintta owninka. Khwa nzina la Yinsa Al-Masiihu Nnazareeti, ettetta!” ⁷ Khunkhalela nkhone-nlume awe khusala anshashulela yoori alankhe, nasaapiru moolu na khoza zawe khwiyya za wookowa. ⁸ Mwinyi otule khwiirukha khweemela khwaaza weettetta. Khuvira nnyupa woosifwiwamo Nnyizinku vamote na Pheeturu na Yaahaya, eettataka na wiirukha ansifwaraka Nnyizinku. ⁹ Wakathi attu ooshi amooniyeevo eettaka weettetta na ansifwaka Nnyizinku, ¹⁰ khunjuwa yoori mwinyi othuutule aari okitirakaaye wiikhala vaNlako Wooshapweya wa nyuupa yoosifwiwamo Nnyizinku khusala alola zimola. Ooshi aya khwiyya ootikiniwa na oshanka channu wa vitthu zanrettikanelyeeyo.

Otafusiri wa Pheeturu Nnyupa wa Nnyizinku

¹¹ Wakathi mwinyi otule aavoniseweeyo ti Pheeturu na Yaahaya aari owaaperekhaavo. Atthu ooshi khwiyya ootikiniwa, khusala atthirela attaaphale aarivo Pheeturu na Yaahaya, puuro yaari wiithiwaaye nlako wa Seleyimaana. ¹² Ooniyeovo vitthu epile, Pheeturu khuwaaza yoori: “Meezirayeele mwaasa aya niini mwisutisiwaka pi vitthu epo? Mwaasa aya niini mweeyo mwineekesaka fweeyo nkhamma ethtu emweettettsiyeeyo mwinyi otu owahi wetthu ama ththakaraka yetthu?” ¹³ Nnyizinku wa Eburahima wa Esiyaakha na wa Yaakhumpa, Nnyizinku wa mamarehemu ethtu ansifu karumeaya awe Yinsa, othuutule mweeyo mwaawenkhiiyeeyo attu yoori amuuile na khunkatthalaa vamote na Ponsiyu Pilatu, ye afilakelelieye onfukula. ¹⁴ Mweeyo mwankhana vamwantiaa Nttakatthiiyu wa shariya, khuveka yoori afukuliwe namahusuti. ¹⁵ Mweeyo khumuula mwennyewe ohaayi, ila Nnyizinku khunsisimula muufwa na fweeyo namashahiti wa vitthu zaya epo. ¹⁶ Mwaasa wa waamini nzina la Yinsa, nzina nttiuitho lanvonisa mwinyi otu mwinimaanaaye na mwininjuwaaye. Amini entaaye khwa nzina la Yinsa yamwinkha ekumi y'eehkweele, nkhamma ethhiipo mwinoonaaye mooshi.

¹⁷ Aphano attwizaku, miiyo kajuwa yoori mwaarettiye mwihijuwaka ata na anamalokozela enu. ¹⁸ Ti nanna yaya Nnyizinku eettettisiyeeyo etile aalupiyeyo awoozaka yoori Al-Masiihu awe aari oteela ohoowa. ¹⁹ Paapho mwithapwiye mwirutule wa Nnyizinku yoori twampi zenu ziiye zooswammihiiwa. ²⁰ Neekeselaka wakathi woovumula ontaaye wa Mbwana na Al-Masiihu aperekhiweeyo tokhiya asulani aniiithiwaaye Yinsa. ²¹ T'iito Yinsa ona ya wiiya pinkuuni mpakha ofiya wakathi Nnyizinku anttelaaaye arutisa vitthu zooshi ethhiipile Nnyizinku aari olupaazo waaza raku vakathhi wa manapiyu. ²² Munsa khulupa yoori: ‘Mbwana Nnyizinku onlawa anlanse vakathhi wa attwiize napiyu mmote nkhamma miiyo; mwinsileze

zooshi anttelaaye owuuuzani. ²³ Otule ahininsiilezaaye napiyu aya ota antta olaziwavo vakatthi wa atthu awe.'

²⁴ W'ookhweele manapiyu ooshi, waaza Samuweele na apale akinoko aya, aleaya vitthu zinrettikanaazo siikhu epi. ²⁵ Mweeyo mwaanamarithi wa manapiyu na olapha Nnyizinku alaphaniyeeyo mamarehemu aya, ye aamuuziye Eburahiima yoori: 'Mwaasa wa peewu yawo atthu ooshi a voolumwenku anttela wiiya aaparikhiiya. ²⁶ Nnyizinku nansisimula karumeya awe, amperekha omwanzo eene vakatthi venu mweeyo yoori ooparikhiiyeni na oolikisakani zootakhala epile mwaari orettaazo wakhula ntthu.'

4

Okholiwa wa Pheeturu na Yaahaya phi Atthunkhulu a Mayaahuuti

¹ Wakathi Pheeturu na Yaahaya aari ottakhulaavo owoozaka atthu, khutavo mahaakhimu na attunkhulu a anamweekesela a nyuupa ya Nnyizinku na masatukhi. ² Yo aari ookafilikha venkivene mwaasa wa yoori maaswihaapa entta owaasomisa atthu, na owoza yoori waapho osisimuwa wa ananfwa nkhamma ethtiipile Yinsa asisimuweyiyezo. ³ Aphano yo khunkhola Pheeturu na Yaahaya, khuwaattha nkaloopooso yaari makaaripi khuwaalikha mpakha ocha. ⁴ Ila atthu asiiliyeeyo hapari epile aari olupaaye enkeene eyiye omwamini Yinsa. Khwa ethhiipo mamuuni khusala avira ekezeleyaka khufiya eththu ya alufu thaanu.

⁵ Siikhu yaphiiri khuthukumana afwalume, mashawuriya na anamwaatikha nti wa Yerusalem. ⁶ Atthu aarivo pi apa: Anaasi, ntunkhulu wa mahaakhimu a tiini, Khayiifwa, Yaahaya, Alishantere na atthu ooshi apale aari oojama wa ntunkhulu wa mahaakhimu a tiini. ⁷ Yo khuruma okhuweliwa maaswihaapa apale awiri Pheeturu na Yaahaya. Khusala owoozela araka: "Mwirettaniyeeyo vitthu epi owahi-ni wala nzinaini?"

⁸ Pheeturu aari wa wiitaazaniwa Rooho Ttakathiiifu, khusala alupa awoozaka: "Afwalume na mashawuriya, ⁹ yoori mweeyo mwanikhuwela leelo yoori mwinuuzele vitthu zooshaphe ninretteliyeozo ntthu otule woorakala na nanna ovonisiveezo. ¹⁰ Ila apho mwijuwe saana mweeyo mooshi mpakha na atthu a nti wa Ezirayeele yooshi yoori khwa nzina la Yinsa Al-Masiihu wa Nazareeti, othuutule mweeyo ena mwankhomeliyeeyo na othuuto Nnyizinku ansisimuliyeeyo muufwa, nzina lawe tthi linvoniyeeyo namarakala otu mwinimoonaaye apha. ¹¹ Yinsa othuuto

'liwe lookatthaliwa ti mweeyo
anamajeka manyupa,
ila khurettiwa wiiya
ti liwe linkhomaazaaye nyupa.'

¹² Khaavo ntthu nkina ariina owahi wa owoosuru atthu: vathi apha wooshivo khahiivo nzina la ntthu nkina linuusurwaaye."

¹³ Attunkhulu apale ooshi khwiya onshankela Pheeturu na Yaahaya mwaasa wa ominala aarinaaye, yo khuaakikhi yoori khweele apa Yinsa ori vamote na-yo. ¹⁴ Mwaasa yoori aari oretta omoonaaka ntthu otule woorakala aavonisiweeyo, yo khuhisala oona hatha paatuli khwa Yaahaya na Pheeturu. ¹⁵ Khuwooza yoori asaruliwemo nnyupa mphule aathukumaneliweemo. Aphano attthunkhulu apale khwaaza onyakulisana atthaaporu, ¹⁶ oozelanaka yoori: "Nkahayani niwaarettele niini? Atthu

ooshi Yeruzaleemu eti ajuwa yoori yo aretta minjuza zawooneya zihinikheeteyaazo. ¹⁷ Apho yoori vitthu epo zihitepe omwajeyela mmuti wooshimo, nlaweni na atthu ooshi asiila, nlaweni niwoopopisa niwoozaka yoori ahirutele owooja atthu vitthu monkoni wa nzina la Yinsa.”

¹⁸ Aphano khukhuweliwa Pheeturu na Yaahaya khurutel nnyupa ntumpule aasaruliyeemo, khuriya yoori ahittakhule hatha ethu na ahisomise monkoni wa Yinsa. ¹⁹ Pheeturu na Yaahaya khuwaajipu araka: “Mwinoona yoori ethu ya eto ti yoohaakhi mmakhono wa Nnyizinku wuushututelani mweeyo khunlikha Nnyizinku. ²⁰ Fweeyo khaninwahi olıkha olupa epile nooniyeezo na nisiaaliyeemo.”

²¹ Khuwaatutushu khuwoojela khuwaalikha, maana khaari woona ethu woowaahukhumwela na atthu ooshi aari onsifwu Nnyizinku mwaasa wa minjuza epile zarettikhieeyo. ²² Mwinyi otule aavonisiweeyo wa minjuzavo aarina hirimu yooziti nyaakha arupayiini.

Lompa ya anamalothela a Yinsa a mwanzo

²³ Wakathi Pheeturu na Yaahaya aleviweeyo, n'oofiya vahali aarivo ashirikhaaya, khusala awaathatelela zooshi epile aari wuuziwaaye phi attunkhulu a mahaakhimu na anamalokozela a tiini. ²⁴ Paata ya ashirikhaaya apale osiila mattakhuzi apale, ooshi aya khusala alompa araka: “Mbwanà, ti weyo wumpiyeeyo pinku na vathi, pahari na vitthu zooshi ziriye voolumwenku. ²⁵ Weeyo wattakhula khwa Rooho Ttakatthii fu vakatthi wa papeetthu Daawuuda nrumeaya awo oraka:

‘Makaafiri ankatipukhaka-ni
wala atthu anaakanyerelaka-ni vitthu zoohiiyi ethiipo?
²⁶ Attunkhulu a vathi ajilokottela
na afwalume akhusanyeya yoori
anlupatthe Mbwana na alupatthe Al-Masiihu
otule Ye anthawuliyeeyo.’

²⁷ Ekhweele-khweele, Herooti na Pontiyu Pilaatu akusanyeya na makaafiri na atthu akina a Ezirayeele, ooshi ari sitati ethiipi na niyya yonlupattha Yinsa nrumeaya awo othuutu onthawaziyeyo. ²⁸ Na theenya amarisela maana aretta zooshi epile weeyo walakeliyeeyo oretta khwa owahi orinaaye. ²⁹ Apho weeyo Mbwana, woone shawulariinazo zootakhala khwa fweeyo na onikhomaze yoori nilaley eettakhuza lawo woohoovi hatha ethu. ³⁰ Wookole nkhone awo waaze ovonisa na oretta minjuza na vitthu zooshankisa khwa nzina la nrumeaya awo Yinsa.”

³¹ Paata ya maaswihaapa apale wiisha olompa puuro etile aari akhusanyeyiyeeyo, khusala esakhinyeya ooshi khuweelaala Rooho Ttakatthii fu, khusala alaleya eettakhuza la Nnyizinku woohoovi hatha ethu.

Anakhiyoni vitthu zaya eeta omelana

³² Ooshi rooho zaya zaari moote, akhili zaya zaari sawa-sawa. Khaarivo hatha mmote aari yonnaaye ethu yawe wiiya yaawe. Apale aari opatthaaye ama apattha etta waawanya na azaaya zooshi aari wiliyanzaazo.

³³ Maaswihaapa aari ovira alawelaka oshaahiti osisimuwa wa Bwana Yinsa na owahi nwulweene, na yaaweeshukhelie rehema khuluyeene.

³⁴ Vakatthi vaya khaarivo hatha ntthu mmote wooothowowi, apale aarina mapuwa ama manyupa eetta wuuzanyisa, nzurukhu aya n'ootisa,

³⁵ n'oowenkhā maaswihaapa yoori awaawanyeze atthu ooshi wakhula nt-thu khwa kхima yoothowiwa wawe.

³⁶ Yuusufu, antthajieeyo nzina la Baranabe, aari haakhimu, owawe waari Shippere, nzina lawe lirina maana oori 'maatumerela', ³⁷ khuuzanyisa nshapa lawe, nzurukhu aya khutiisa khuwenkhe maaswihaapa.

5

Ananiya na Safira

¹ Aarivo mwinyi mmote ari wiithiwaaye Ananiya, muukhaawe aari wiithiwa Safira, na-yo khuzanyisa nshapa laya. ² Ye khusilana na muukhaawe yoori nzurukhu opule ahilawane wooshi olawa Owenkhā maaswihaapa wooshi, khuthuulā nkina khupweha opule nkina muukhaaya khulawana wa maaswihaapa.

³ Aphano, Pheeturu khumuuzela Ananiya yoori: "Weyo, wanlikhelela toovi sheetwani oozokaka nrooho mwawo mpakha weeyo ofiyelela ohata Rooho Ttakathiifu na khujivithela nzurukhu wuuzanyisiyeeyo nshapa lawo? ⁴ Niri talili khalaari nshapa lawo? Wala paata ya wuuzanyisa nzurukhu aya khawarina weeyo enu omwennyewe? Khi eti ewuuupuwelisiye oretta vitthu nkhamā epo niini? Weeyo apho ohooni yoori wawaahata anaatamu, ila wanhata Nnyizinku."

⁵ Paata ya Pheeturu wiisha olupa mattakhuzi apale, Ananiya eetta ofwa attaaphale. Atthu ooshi apale aari omoonaaye na aari osiilaaye mattakhuzi aya apale khwiya awoova. ⁶ Khuta atthu khunkafwani khusala alawa onzikha.

⁷ Eviriyeevo woora mittatthu muukhaawe khuteela weekesa ojuwa ethtu emuuliyeeyo mannawē. ⁸ Pheeturu khumuuzela yoori: "Nkahaya nkakuuze nzurukhu muuzanyisiyeeyo nshapa lenu pi otthuupo?"

Muukha otule khujipu yoori: "Pi otthuupo."

⁹ Pheeturu khumuza yoori: "Epo za niini mweeyo osiilana yoori mootoote Rooho ya Mbwana? Atthu apo oniwoonaaye vamilako apho pi atthaapo anzikhiiyeeyo mannawo, alawa oozikhe na-weyo."

¹⁰ Kharipuzeena attaaphale, na-ye etta ofwa. Khuthuuliwa khulawa khuzikhīwa mpawa wa mannawē. ¹¹ Atthu ooshi a khuntti etile yaari onlottaaye Nnyizinku khwiya awoova na apale ooshi aasiiliyeeyo vitthu epo zaarettikhaniyezo.

Maaswihaapa aniwaavonisa alwele enkeene

¹² Minjūza za waatta zaari orettikhanaazo vakathi wa atthu zaari orettiwaazo pi maaswihaapa. Atthu ooshi apale onkhupaliyeeyo Yinsa aari okusanyeya nlipantta laajekiyeyo ti Seleyimaana. ¹³ Atthu akina etta woova okusanyeyana yo, ila atthu enkeene aari owaattottopela maaswihaapa apale. ¹⁴ Atthu omwamini Yinsa khusala atepa weekezeleya waaya alume mpakha aakha, ¹⁵ khufiyelela atthu akina awaathuula alwele n'ooawaapweha ntarikhi awaatthiiye vanrepa ama voolili yoori nenkawu Pheeturu amana avirikha, yo owaapathe mwiifuli awe. ¹⁶ Aari ota atthu enkeene theenya oolankha miti mikina za waattamelā Yeruzaleemu awaatisika alwele aya na apale aari ohoochiwaaye pi majini: ooshi khusala eeya oovoniswi.

Olupathiwa wa Maaswihaapa

¹⁷ Aphano, ntunkhulu a mahaakhimu na ashirikhaaya ooshi mpakha na atthu ooshi a khuntti ya masatukhi khuwaata nrima. ¹⁸ Khuruma

yoori okholiwa maaswihaapa khuwaafukela nkalapooso.¹⁹ Aphano osikhu wa siikhu ethiitile, nlayikha la Nnyizinku khufukula milako za kalapooso khuwaasarulela vaje,²⁰ khuwooza yoori: "Mwilawe nnyupa wa Nnyizinku, mwilawe mwawaasomise atthu monkoni wa ohaai opu mpheya."

²¹ Maaswihaapa khushututela mattakhuzi apale ooziweeyo ti nlayikha ntthile, n'oocha khulawa mpakha vaje wa nyuupa ya Nnyizinku, khwaaza owaasomisa atthu. Aphano ntthunkhulu a mahaakhimu a tiini na ashirikhaaya khuwaakusanya atthu na anamalokozela a tiini ooshi a Ezirayeele, khuruma olawa olaziwamo maaswihaapa apale nkalapooso. ²² Anamweekesela apale a kalapooso, n'oofiya nkalapooso khuhwaasikanimo, khuruti n'oota khusala alupa yoori:²³ "Khaniwaasikaneenimo na nasikana kalapooso ya eri ethhiipile naafukiyeezo na vaje aarivo anamweekesela akina, ila vakatthi nifukuliyeeyo milako khuhimo hatha ntthu." ²⁴ Paata ya atthunkhulu apale, anamweekesela a nyuupa ya Nnyizinku na atthunkhula a mahaakhimu osiila mattakhuzi apale, yo khwiya ooshanka mwaasa woohijuvi nanna eettettiyeezo maaswihaapa apale.

²⁵ Wakathi otthuupule khutavo ntthu aari olupaaye owoozaka yoori: "Atthu apale mweeyo mwawaathiyeeyo nkalapooso, miiyo kawaasikana vaje wa nyuupa wa Nnyizinku eettaka owaasomisa atthu." ²⁶ Khulankha anamweekesela na ntthunkhulu aya khuweettela khusala awaatiisa, woohi-waalazili hatha kuvu, maana aari woova ovonyiwa pi atthu apale aari owaasomisaaye.

²⁷ Khuwaalawana nnyupa aari othukumanaamo atthunkhulu yoori oozeliye ti ntthunkhulu wa mahaakhimu. ²⁸ Khuwooza yoori: "Fweeyo khanaawuuiyeni yoori mwihirutele owaasomisa atthu mattakhuzi monkoni wa nzina nttho. Ila mweeyo khusala mwivira mwisomisaka Yeruzaleemu yooshi na olikha toowo mwintakha onilokoveza fweeyo ofwa wa ntthu aya oto."

²⁹ Pheeturu na ashirikhaawe khujipu araka: "Ti yooshapweya yamwanzo onshututela Nnyizinku zayita anaatamu!" ³⁰ Nnyizinku wa apapa zetthu ansisimula Yinsa nkhopuri, othuuto mweeyo mwankhomeliyeeyo vansalapa khumuula. ³¹ Ila Nnyizinku antta phantte ya nkhono-nlume awe khumwinka ofwalume na khunretta wiiya namusuru yoori atthu a Ezirayeele apatthe othupwiya na opokherele nswammaha wa twampi zaya. ³² Fweeyo r'aamashahiti a vitthu zaya epo, vamote na Rooho Ttakatthiifu, etile Nnyizinku owenkhiyeeyo apale aninshututelaaye."

³³ Paata ya maaswihaapa olupa matthakhuzi apale, yo khwiya okafilikha khusala atakha owoola. ³⁴ Aarivo mfwarizeewu mmote aari wiithiwaaye Kamaliyele, aari namanozela wa kano na aari ntthu wooshitahiwa pi atthu a waatta. Ye khulankha khweemela vakatthi wa afwalume apale, khulupa yoori maaswihaapa asuruleliwe vaje khapula vattithiiru. ³⁵ Khuwooza atthunkhulu azaawe apa yoori: "Mweeyo atthu a nti ya Ezirayeele, mwiyane ophoole na vitthu mwintakhaazo owaarettela apo. ³⁶ Khwa siikhu ziviriyeeyo nyumani aapuweleliye ntthu aari wiithiwaaye Thewuda aari ojilupezaaye wiiya mfwalume, aarina atthu aari onlottaaye oofiya miiya nne. Aphano ye khuuliwa, atthu awe apale aari onlottaaye khuhiiheli hatha vahali ooshi khumwazeya. ³⁷ N'oofwa ye aapuweleliye nkina wa Kalileya aari wiithiwaaya Yuuda, wakathi atthu aari waatikiwaayo yoori alawe anthawule mfwalume, oto atthu enkeene aakhupaleliye onlotta,

ila na-ye khuuliwa anamalottela awe ooshi khumwazeya. ³⁸ Apho, kini-wuzani yoori atthu apa awiri mwiwaarettele hatha ethtu, mwiwaalikhe alawe maana nkhamma shawuri za ntthu na khaazi ya ntthu khinrupaza ehiisheeni. ³⁹ Ila nkhamma ti ya Nnyizinku, mweeyo khaninteela wiishisa, amana mwitakha oretta toowo mwinshittanana Nnyizinku.”

⁴⁰ Attunkhulu apale khukhupalela mattakhuzi apale alupiyeeyo Kamaliy-eele, khuruma okhuwelija maaswihaapa apale yoori avire nnyupa, khu-japhiwa khuuri yoori ahirutela olaleya hapari za Yinsa, rawiisha khu-likihiwa.

⁴¹ Maaswihaapa apale khusaruwa ari woofurahi mwaasa woohukhumweliwa olaleya nzina la Yinsa. ⁴² Yo khuhilikh khusala avira alaleya wakhula siikhu nnyupa wa Nnyizinku na nyuupa khwa nyuupa, woohilikh olupa Yinsa ti Al-Masihu.

6

Othawuliwa wa attu sapa

¹ Siikhu ethiipile eettaka ovira aattaka atthu aari anlattaaye Yinsa, mayaaahuuti aari ettakhulaaye ekereeku atthaaporu aari owaattakhula mayaaahuuti apale aari attakhulaaye eheberayiku, mwaasa yoori manankhwele aya eetta osahawiwa amana yaawanyiwaka ethtu-yooja ya wakhula siikhu. ² T'iito maaswihaapa apale khumi na awiri aawaakhusanyiyeeyo anakhiyonni ooshi, khusala awooza yoori: “Ajama zetthu, khan-inwahi alikha alaleya ntthakhuzi la Nnyizinku khusala nawanya ethtu-yoojiwa. ³ Attwiizethu, mwiwaathawule vakatthi venu atthu sapa ooshitahiwa, awiitaala Rooho Ttakathiifu na oofuwa yoori niwenkhe khaazi eto, ⁴ na-fweyo nisala nilompa na olaleya ntthakhuzi la Nnyizinku.

⁵ Mattakhuzi apale khuwaatuvela ooshi aya, khunthawula Shiteefanu, nlume wa wiitaala amini na Rooho Ttakathiifu, anlikha Filipi, Porokoro, Nikanore, Timomu, Parimenashi na Nikolawu, otule aari owaalatte-laaye mayaaahuuti wa nti wa Antiyookiya. ⁶ Khuwaathoonyeza atthu apale vakatthi wa maaswihaapa, atthaapo khuwaalampela awaattheliye a makhono.

⁷ Etthiipile ntthakhuzi la Nnyizinku khusala limwazeya. Khusala avira awulaka anakhiyooni wa waakhuvavo Yeruzaleemu. Theenya khuntti khuluyeene ya mahaakkimu a tiini khusala ashutulele amini.

Kalapooso ya Shiteefanu

⁸ Stefanu ntthu wa wiitaala mahala na owahi wa Nnyizinku aari oretta vitthu zootikinisa na alama vakatthi wa atthu. ⁹ Attaaphale khupuwa atthu a nnyupa enthukumaniaamo apale ‘Ooleviwa’, mayaaahuuti a Sireene na Alishanteriya na apale a nti ya Silisiya na Aasiya. Atthu aya apo khwaaza onyakulisanana Shiteefanu, ¹⁰ ila kuhisala awahi oshintta opuwa na Rooho etile aari ottakhulanaaye.

¹¹ Aphano khupankiwa atthu akinoko alupe yoori: “Nasiila Shiteefanu attakhulaka mattakhuzi onkufurwela napiyu Munsa na Nnyizinku.”

¹² Mwaasa wa mattakhuzi atthaapo, khuwaatapanya atthu, anamalokozela a tiini na anamanozela kano khunkhola Shiteefanu khunthuula khulawana onyuupa woophuteyiwawo milattu. ¹³ N'ooifiya khusala anlokoveza mattakhuzi oovanyeya aari oraaye: “Mwinyi otu okhitiri ottakhulawo pure opuuro okhuno woottakatthifuwo na nkaththi wa kano. ¹⁴ Nasiila eriwaka Yinsa Nnazareeti apwechela puuro eti na khuzukuliza thwapiya aalikhiyeozo napiyu Munsa.”

¹⁵ Wakathi amweekesiyevo, ooshi apale eekhaliye onyuupa woophukaniwawo khoona omaasho wawe ompuwaka nkhamma nlayikha.

7

Ojakisa wa Shiteefanu

¹ Aphano, nttunkhulu wa mahaakhimu a tiini khumuuzela Shitefaanu yoori: "Shariya mattakhuzi apa onlokoveziwaaye?"

² Shiteefanu khujipu araka: "Atwiizaku na apapazaku mwisiileze! Nnyizinku wa Nuuru ampuweleliye Eburahiima, papeethu, wakathi ari nti wa Mesopotamiya ahinalawe wiikhala Harani, ³ khumuuzza yoori: "Oleemo mmuti mwawo vakathi wa ajamaazo, olawe nti kinttelaaye wuthoonyeza." ⁴ Eburahiima khulankha nti wa Akaliteeni, khulawa khwiikhala Harani. Paata yoofwa papaawe, Nnyizinku khuntiisa nti opu mwiniikhalaaya. ⁵ Nnyizinku khawinkheene hatha eritho moote, wala puuro ya luwattho yawe, ila amwaahitiye yoori: 'Paata ya weeyo, peewu yawe enlawa yapatthe olumwenku.' Hatha nkhamma wakathi aya opule eettiye hiina pure mwaanaa. ⁶ Nnyizinku anttakhulaniye khwa nanna ethiipo yoori: 'Peewu yawe enttela osafirela nti wa malaponi, anlawa arettiwe oviiithwaana na ohukhumwiwa nyaakha miiya nne. ⁷ Miyo kinhukhumu nti ontalaaye owaarella oviiithwaana, attaapho aleewo okhulewa ate akaaputu puuro eththi.' ⁸ Nnyizinku khumwinkha Eburahiima osilana wa okiriyia. Tiito, Eburahiima khunvokola Esiyaakha khunkhiriyisa siikhu yanaane yoovokoliwa wawe. Elottelanaka Esiyaakha khunvokola Yaakhumpa, khwa apaapa atthaapa khupuwa khumi na awiri.

⁹ Apapa zetthu aya atthaapo khusala anlazela nrima Yuusufu. Khumuuzanisa a mwiitthwaana khulawaniwa Misuri, ila Nnyizinku aari vamote na ye. ¹⁰ Khunkholelela muhoowa wawe wooshimo na khumwinkha akhili khumpatthisa oshapweyiwa mmakhono wa lipili Firawuna, mfwalume wa Misuri. Mfwalume otu aamwinkhiye Yuusufu onsatoro wa Misuri na khumwinkha ottunkhulu wa atthu ooshi a vaje vawe.

¹¹ Paata ya toole, khupuwa jala Misuri yooshi na Kanaani na ohoowa mwinkeene, amarehemu ethu khuhisala awahi opattha ethu-yoojiwa.

¹² Yaakhumpa n'osoila yoori eewaakho tiriku Misuri, khuwaaperekha amarehemu ethu swaafu yamwanzo. ¹³ Swaafu yaphiiri yoorutelawo amarehemu ethu, Yuusufu khujijuwisa vakathi wa attwiize, Firawuna khuwahai owaajuwa ajaama a Yuusufu. ¹⁴ N'oojijuwisa Yuusufu khuwaaruma atthu omweetala papaaaze na ajamaaze ooshi, aari sapiini na athaanu atthu eene. ¹⁵ Aphano Yaakhumpa khusala alawa Misuri, ottuukho afwiyeewo ye na amarehemu ethu akina. ¹⁶ Mwiili aya khuthuuliwa khurutiseliwa Shekemu khuzikhiwa nlikulukupo ntthile oozanyiyeyo Eburahiima na aana Hamori wa nzurukhu khata. ¹⁷ Ofiyaka wakathi Nnyizinku aari weettelaaye oretta etile aamwaahitiyeeyo Eburahiima, khuweekezelaa atthu ethu khwiiya a waatta nti wa Misuri. ¹⁸ Khwinkhiwa ofwalume ntthi nkina, ahaari ojuwaawe hatha ethu monkoni wa Yuusufu, khwiiya mfwalume wa Misuri. ¹⁹ Mfwalume otule khusukuliwela ajama ethhu na khuwaahukhumu amarehemu ethu, awaakhanyerelaka owaalikha aanaaya yoori ahiwahi owula.

²⁰ Wakathi otthuupule khuvokoliwa Munsa, oto aari mwaana wooshapweya oomaasho wa Nnyizinku. Khwa nyeezi mittathu eettaka oleliwa

vaje wa apapaze. ²¹ N'oolikha oleliwa pi apapaze, mwaana wa Firawuna khunthuula khusala anlela nkhamma mwanawwe wonvokola. ²² Munsa khuleliwa na ojuwa wooshi wa Amisuri, khwiya ntthu woowahi khwa a mattakhuzi awe na khaazi zawe. ²³ Apatthiyeevo hirimu ya nyaakha arupayiini, Munsa khulekela olawa owaathotola attwiize Meezirayeel. ²⁴ Amooniyeevo Mmisuri anhukhumwaka Mwiizirayeele, khumpattha kat-apu mwaasa woohukhumwiwa, khumuula Mmisuri otule. ²⁵ Ye aari woona yoori attwiize enlawa yeweelye yoori Nnyizinku ontta onrumeyela yoori awoosuru, ila yo khayaari oweeleya hatha ethtu. ²⁶ Siikhу yaphiri, Munsa khulawa vahali aari oshezaavo Meezirayeele awiri, khusala awooza yoori: ‘Alume, mweeyo mwa ntthu na ttwiye; khi mwaasa aya niini mwilwaazanaka?’

²⁷ Ila nlume otule aari onlwaaazaaye nzaawe, khunsukhuma Munsa khu-muuza yoori: ‘Paani oothawuliyeeyo yoori wiiye namalokozaela ethtu na namphuka milattu zetthu fweeyo? ²⁸ Ontakha okuuu nkhamma omuuliyeeko Mmisuri taana?’ ²⁹ N'ooziila mattakhuzi apale, Munsa khutthirela nti wa Midiyana, khusala eekhala ottuukho nkhamma nletto, khuwaapattha aana awe awiri.

³⁰ Avirisiyeovo nyaakha arupayiini ottuukhule, khumpuwelela nlayikha vamweeke wa moottho wa haari ozimaaye n'yaara, kharipu ya mwaako Sinaayi. ³¹ Munsa vakatthi wa moottho opule khwiya wootikinisiwa. Khususela attaaphale yoori oonachache, khusila huula ya Mbwana Nnyizinku: ³² ‘Miiyo ki Nnyizinku wa amarehemu apapazenu, Nnyizinku wa Eburahiima, Nnyizinku wa Esiyakha, Nnyizinku wa Yaakhumpa.’ Munsa eettaka othukumela mwaasa wa woova, kuhisala awahi ofunula maasho awe. ³³ Aphano Mbwana Nnyizinku khumuza yoori: ‘Ovule jampali epo ziri mmoolu mwawo, mwaasa wa puuro li weeyo oriyo nti ttakatthiifu. ³⁴ W'eehkweele keetta owoona atthu aka ahukhumwiwaka nti wa Misuri. Kasiila olila waya khwiishuka yoori kiwoosuru apho. Ote nasaapi, miiyo kurutisele nti wa Misuri. ³⁵ Otu ti napiyu Munsa, othuuto mwankatthaliiyeeyo na mattakhizi apa yoori: ‘Ti paani oothawuliyeeyo yoori wiiye namalokozaela ethtu na namaphuka ethtu?’ Ye aaperekhiwe ti Mwennyewe Nnyizinku yoori eeye namalokozaela na namwawuni aya vakatthi wa nlayikha lampuweleliyeeyo vamweeke wa moottho wa haari ozimaaye. ³⁶ Munsa othuuto awaalaziyeewo amarehemu ethtu Meezirayeele nti wa Misuri, arettaka vitthu zootikinisa na minjuza za waatta nti wa Misuri, pahari yookhuttuwa na nyaara aavirisiyeemo nyaakha arupayiini.

³⁷ Otu ti Munsa othuuto awooziyeeyo Meezirayeele yoori: ‘Nnyizinku on-lawa ampuwise vakatthi wa attwiizenu napiya mmote nkhamma miiyo.’ ³⁸ Ye aari woothukumana, n'yaara na nlayikha laari ontakkulanaaye vamwaako Sinaayi na amarehemu ethtu, khupwekherela mattakhuzi haayi yoori anu-uze na fweyo.

³⁹ Ila amarehemu ethtu khukatthala oshututela, na theenya khunkhijilela na nroho mwaya khurutela Misuri. ⁴⁰ Khumuza Arawu yoori: ‘Onaat-talele nluku yoori anilokoze maana Munsa aya otule anilaziyeeyo Misuri khanijuweeni ethtu empatthiyeeeyo.’ ⁴¹ Wakathi otthuupule khwaattalla sanamu yoolattanana mompe. Khutiisela twaha na khuretta njampo khwa osifu etile aarettiyeeyo na makhono aya. ⁴² Ila Nnyizinku khuwaasusu na khuwenkha waaputu matthottowa nkhamma ethiipo yaatikhiweeyo a kithaapu ya manapiyu yoori:

‘Kaari miiyo

otule mweeyo mwanliseliyeeyo
 twaha na zaakha
 nyaakhu epile arupayiini mweekhaliyeezo n'yaara,
 mweeyo omathi wa Ezirayeel?
43 Olikha toowo, mwajeka
 puuro ttakatthiifu ya Moloke
 na matthottowa a nluku enu Reefwa
 sanamu mweeyo mwaattaliyeeyo yoori
 mwisale mwaaputu wa attaapho,
 miiyo kintta wuuperekhani
 ohali okinoko olilha Babiloniya.'

44 N'yaara amarehemu ethu aarina huma yoosilana, ntumpho Nnyizinku aari ottakhulananaamo Munsa heema yaya eto yaattaliwe nkama etthiipo Nluku anrumiyeezo Musa yoori aattale, alikanisanaka etile anthoonyeziweeyo. **45** N'oopwekherela heema etile yoosilana, amarehemu ethu khuthuula khumwinkha olokozela Yosuwa, wakathi athuuliyeovo nti wa omathi opule Nnyizinku eekariyeeyo. Heema yaya eto khwiyya nti otthuupo mpakha wakathi wa Daawuuda. **46** Otu khupwekherala mahala mmakhono wa Nnyizinku, khuveka yoori anjekeliye nyuupa Nnyizinku wa Yaakhumpa. **47** Ila ti Seleyimaana anjekeliye nyuupa yaya.

48 T'iito Nnyizinku khaniikhala nnyuupa yoojekiwa ti pinaatamu, nkama etthiipo alupiyeeyo napiyu yoori:

49 'Pingu khukulu yaka,
 vathi tarikhi ya moolu aka.
 Nanna-ni ya nyuupa
 mweeyo mwinttelaaaye okijekela?
 alupaka Mbwana,
 ama, onteela wiyya yayi
 puuro yaka yoovumula?
50 Khihiye miiyo kaattaliyeeyo
 vitthu zaya epo zooshi?'

51 Attu ookifilina ootakhala rooho zaya epo zooshi! Mweeyo mwinlikanana na amarehemu enu aari okatthalaaye Rooho Ttakatthiifu!
52 Napiyu-ni amarehemu enu ahinlupattheeni? Yo amuula otule aari ohaayi wa anashariya, othuuto mwinrettiyeeyo onamalupattha na ohusuti.
53 Mweeyo mwipwekhereliyeeyo kano khwa khaazi za malayikha wala khushi shutuleli."

Ofwa wa Shiteefanu

54 Asiiliyeovo mattakhuzi apale khuwaapattha katapu nroho mwaya, khusala anlumele meeno. **55** Ila Shiteefanu wawiitaala wene Rooho Ttakatthiifu khweekesa otulu khoona siifwa za Nnyizinku na Yinsa ari nkono-nlume wa Nnyizinku. **56** Khulupa yoori: "Kinoona pingu eri yoo-fukuwa na Mwaana wa Pinaatamu eemeliye nkono-nlume wa Nnyizinku."

57 Ye khwaaza okhuwa woonyakulavo, yo khuttiyela mashilo aya na khunrikanyela. **58** Khunsusisela othetekele wa sitati khusala anoonya na mawe, oshahiti aya khunlikhavo shapu aari wiithiwaaye Saawulo yoori asalane kuwo zawe epile aawaliyeezo. **59** Eettaka onvonya etthiipile, Shiteefanu khusala alompa araka: "Mbwanaka Yinsa, pwekherela nafusi

yaka.” ⁶⁰ Attaaphale khukokhora khusala akuwa channu araka: “Mb-wanaaka, ohiwaalokoveze twampi eti!” Nawiisha olupa mattakhuzi apale, khufwa.

8

¹ Saawulu na-ye aari khuntti ya atthu atthaapale akhupaleliyeyo wuluwa Shiteefanu.

Saawulu oniwaalupattha anamalottela a Yinsa

Siikhу zaya epile yaapuwiye lupattha khuluweene ya anamalottela a Yinsa Yeruzaleemu. Ila maaswihaapa khayaawaasikaniye maana yo aaretiye amwazeyiye ari Yudeya mpakha Samariya. ² Atthu akina ooshapweya rooho khunthuula Shiteefanu otule khulawa khunzikhа eettaka onlilela. ³ Aphano Saawulu aari ojilipisa yoori eeshise khunthi ya atthu apale aari onlottaaye Yinsa. Ye aari ovira nyuupa khwa nyuupa khusala awaakho alume na aakha apale aari onlottaaye Yinsa n'ooawaattha nkalapooso.

Otfusiri wa Filiipe nti wa Samariya

⁴ Atthu apale omwaziyeeyeyo aari ovira alaleyaka hapari wakhula vahali aari ofiyaavo. ⁵ Filiipe eettiye sitati ya Samariya, n'oofiya khusala owoza atthu monkoni wa Yinsa. ⁶ Wakathi atthu asiiliyeevo saneene hapari epile aari olupaazo Filiipe na knoona minjuza aari rettaazo, yo aashineheliye mattakhuzi apale ye aari olupaaye. ⁷ Atthu akina aariina majini aari owaasaruwa eettaka onyakhula, alupa oorakala enkeene opiya ti sapiyeeene na apale oorakala. ⁸ Sitati yaya etile waapuwiyeyo furaha khuluyeene.

Simawu Namajintta

⁹ Aarivo mwinyi mmote aari wiitthiwaaye Simawu, aari wiikhalaaye sitati ethiitile, aari nshawi, atthu ooshi asamariya aari onshankela vitthu za majintta aari rettaazo. Ye aari ojoona wiiya munumunu, ¹⁰ atthu ooshi, waaza ntunkhulu mpakha nsimaana na ontottopela araka: “Otu onaaye aariinaaye walankha pinkuuni, onjuwiwaaye yoori owahi nwulweene.” ¹¹ Aphano, yo khusala alipana othuuuto mwaasa yoori aaziye raku retta vitthu za majintta za owaatikinisa. ¹² Ila paata ya Filiipe owaatafusirela monkoni wa hapari zooshapweya ya ofwalume wa Nnyizinku khwa nzina la Yinsa Al-Masiihu, yo khukhupali na khulawa khoosiwa, alume enkeene mpakha aakha. ¹³ Simawu othuuto aari rettaaye majintta, na-ye khunkhupali Yinsa khoosiwa, khusala onlottelela Filiipe wakhula phantte aari weettaaye, oonaka vitthu zootikinisa na minjuza miwuluzene zaari rettikhanaazo.

¹⁴ Wakathi maaswihaapa asiiliyeevo ari Yeruzaleemu, oriwa atthu a Samariya opokherela ntakhuzi la Nnyizinku, khumperekhawо Pheeturu na Yaahaya. ¹⁵ Yo n'oofiya khwaalompela atthu aya apale yoori apokherela Rooho Ttakathhiifu. ¹⁶ Maana khaarivo hatha mmote wa yo ompokhereliyeyo Rooho Ttakathhiifu, ila eettiye woosiwa paasi khwa nzina la Bwana Yinsa. ¹⁷ Pheeturu na Yaahaya khuwaattela makhono atthu apale khupokherela Rooho Ttakathhiifu. ¹⁸ Simawu nawoona yoori nthu aari opokherela Rooho Ttakathhiifu paata ya ottheeliwa makhono ti maaswihaapa, ye khulaza nzurukhu, ¹⁹ khuwooza maaswihaapa yoori: “Kintakha na-miyo mwinkhе owahi nkhamma otthuupo mwiriina, kisala kiwaattheela makhono atthu n'oopokherela Rooho Ttakathhiifu.”

²⁰ Pheeturu khunjipu yoori: “Nzurukhu awo otthuupo ontta wuuthow-elelisa! Weeyo onoona yoori tthuva ya Nnyizinku enuuzyanya na nzurukhu? ²¹ Weeyo nkathhi wa khaazi yetthu eti Nnyizinku khaniwinkha hatha phantte maana rooho yawo khahi rooho saana. ²² Othupwiye vitthu zootakhala na olompe khwa nzina la Nnyizinku. Talili othuuto oswammihi khwa ofikhiri opo woovonyeya wa nroho mwawo, ²³ kinoona yoori nroho mwawo ziwaamo pure vitthu zoovonyeya na washwashawiwa ti twampi.”

²⁴ Simawu khujipu yoori: “Mwikilopele, yoori zooshi epo mwilupiyeelo khwa miiyo zihikirettikhanele.”

²⁵ Paata ya Pheeturu na Yaahaya olawela oshahipi na ofatufisiri ntakhuzi la Nnyizinku khulankha khusala arutela Yeruzaleemu, olawaka aari ovira atafusiraka miti mikina za Samariya ethitile.

Filiipe na Mwiitiyoopiya

²⁶ Nlayikha la Mbwana khumuza Filiipe yoori: “Weette ntarikhi elikhya raku oviriwa eriye phantte ya kusini elankhiyeeyo Yeruzaleemu enishukhelaaye sitati ya Kaaza.” ²⁷ Filiipe nauuuziwa khulankha khusala alawa. Ntarikhi khunsikana mwinyi mmote wa Etiyoopiya woohimemi, alankhaka Yeruzaleemu eettaka owawe. Oto aya aari nakhazi nwulu enkhieweyo othokorela mizurukhu za Rayisi nwulu wa Etiyoopiya aari wiithiwaaya Khantase. Eettiye Yeruzaleemu omwaapetu Nnyizinku. ²⁸ Arutaka, apakhiriye varikisho khusala asoma kithaapu ya napiyu Ezaaya. ²⁹ Aphano, Rooho Ttakatthiifu khumuza Filiipe yoori: “Otthirele rikisho etile osala olottelela.”

³⁰ Filiipe khutthirela rikisho etile khusikana khusala ansiila mwiitiyoopiya otule asomaka kithaapu ya napiyu Ezaaya, ye khumuuzela yoori: “Mattakhuzi apo mwinsomaaye anieeleyani?” ³¹ Ye khujipu araka: “Anikeeleza toovi kihina ntthu wookeeleza?” Khumuza Filiipe yoori owele varikisho attaaphale aarivo ye. ³² Mattakhuzi aari osomaaye mwiitiyoopiya otu a nkithaapu mpule ari olupu toono:

“Ye aathuuliwe nkhamma pwittipwithi eneettelaaye wuuliwa,
nkha pwittipwithi yoohittakhuli

 eri vakatthi wa apale ankasaaye ovuziwa pwittipwithi,
Ye khaattakhuliye hatha ethtu.

³³ Ye aari woojipushuwisa ila khukattaliwa
 khuretteliwa vitthu zoohiyi ya shariya.
Khi paani ariina ruhusa ya owaattakhula
 apale aninlottaaye?
Ye ohaayi awe khahiyo wa vathi apha.”

³⁴ Aphano, mwiitiyoopiya khumuuzela Filiipe yoori: “Mattakhuzi apa a nkithaapu eti ya Ezaaya aninlupa paani? Ye mwennyewe ama ntthu nkina?”

³⁵ Paata ya toole, Filiipe khwaaza omuuza hapari zooshapweya mwiitiyoopiya otule, khwa mattakhuzi atthaapale ari osomaaye a nkithaapu ya Ezaaya.

³⁶ Ari ntarikhi enttaka olawa ooshi, khufiya vahali aarivo maati. Mwiitiyoopiya otu khumuza Filiipe yoori: “Apha awaapho maati. Niini ekhattazaaye woosiwa miiyo?” ³⁷ Filiipe khunjipu yoori: “Khayiivo hatha ethtu moote enkhattazaaye paata ya weeyo okhupali na rooho yawo yooshi.” Ye khujipu yoori: “Miiyo kinkhupali yoori Yinsa Mwaana wa Nnyizinku.” ³⁸ Aphano, khweemesa rikisho etile, khwiishukha owiri, Filiipe khulawa khumoosa

mwiitiyoopiya otule. ³⁹ Wakathi ovuwiyeemo mmati, Rooho Ttakatthiifu khunthuula Filiipe, mwiitiyoopiya otule khuhimooni theenya, na-ye khurutela safari yawe etile aari weettaaye ari woofurahi saaneene. ⁴⁰ Filiipe khulawaniwa sitati ya Azotu, khulikhiwa ottuukho ti Rooho Ttakatthiifu, khusala avira alawaka mpakha Sezareeya alaleyaka hapari zooshapweya wakhula vahali aari ofiyaavo.

9

Okhupali wa Saawulu

¹ Zinrettikhanaru vitthu zaya epo, Saawulu aarettiye ahilikhelelaka owaatuturucha na owaala maaswihaapa a Mbwana. Khulankha khulawa wa nttunkhulu a mahaakhimu a tiini, ² khumvekela warakha yoori alawe mmapamanyupa anthukumaniaamo sitati ya Damashiku yoori amana awaasikanamo anamalottela a Yinsa, waaza alumre mpakha aakha awaathuule awaalawane Yeruzaleemu awaatthe nkalapooso. ³ Khulankha khusala alotta tarikhi, asaleelaka ofiya Damashiku, khumpuwela nuuru yaalankha pinkuuni khusala yaara aphale aarivo, ⁴ Aphano ye khukwela vathi, khusila huula yaari omuuzaaye yoori: "Saawulu, Saawulu mwaasa aya niini onikilupathelaaye?"

⁵ Saawulu khuuzela yoori: "O paani weeyo, Mbwana?"

Ye khujipu araka: "Miiyo ki Yinsa, otule weeyo oninlupathaaye."

⁶ Olankhe olawe nsitati ena anttelaaaye owuuza weeyo ethtu yooretta."

⁷ Atthu aari olawanaaye vamote Saawulu khweemela ari oosuthuwa, khusiila huula khuhisala amoona hatha ntthu. ⁸ Saawulu khulankha vathi aphale akweliyeovo, afumulaka maasho khuhisala awahi woona hatha ethtu, atthu khunkholela khunlawana mpakha Damashiku. ⁹ Khwiikhala siihii ttatthu ari woohooni, woohiji ethtu na woohinywi ethtu.

¹⁰ Damashiku aarivo namalottela aari wiitthiwaaye Ananiya. Mbwana khunkhewela muulotha yoori: "Ananiya!"

Khujipu yoori: "Lape, Mbwana."

¹¹ Mbwana khumuuba yoori: "Olawe owawe Yuuda, tarikhi enitthiwaaye Yookowa, omuuzelele ntthu mmote wa Tarusu anitthiwaaye Saawulu. Otu aya entta olompa; ¹² muulotha khumoona mwinyi aari wiitthiwaaye Ananiya atiye anttheeliye makhono yoori arutele woona."

¹³ Ananiya khujipu yoori: "Mbwanaaka, kaaza raku osiila vitthu anret-tazo mwinyi oto na vitthu zooshi zootakhala aniwaarettelaazo mattakatthiifu awo Yeruzaleemu. ¹⁴ Ye ata okhuno khwa ruhusa ya attunkhulu a tiini yoori ate awaakhole ooshi apale ansifwaaye nzina lawo."

¹⁵ Ila Mbwana khumuuba Ananiya yoori: "Olawe! Mwinyi oto tu waaka, yaana yaka ethawuliweeyo yoori ethuule nzina laka ewaalawanelaka makafiri na awfalume awe na vakatthi wa atthu a Ezirayeele. ¹⁶ Kinlawa kooothoonyezeri nanna atthu anttelaaazo ohoowa mwaasa wa nzina laka."

¹⁷ Aphano, Ananiya khulankha khulawa. N'oofiya khuvira nnyupa khunteela makhono khumuuba yoori: "Ttwiyyaku Saawulu, Mbwana Yinsa, otule oopuweleliyeovo ntarikhi ataaka ohali waari olankhaawo, akiperekha miyo yoori orutele woona na wiiye wa wiitaala Rooho Ttakatthiifu."

¹⁸ Nasaapiru vitthu nkhama mavalako khusaruwa mmaasho, khwaaza woona opheya. N'oolankha khulawa khoosiwa. ¹⁹ Wakathi ajiyeevo ethtu-yoojiwa, khurutelamo kuvu zawe.

Saawulu onlaleya hapari zooshapweya

Saawulu aavirisiiye siikhu vattitthiiru aari na anamalottela sitati wa Damashiku. ²⁰ Wakathi otthuupule khwaaza olaleya mmanyupa a Nnyizinku yoori Yinsa mwaana wa Nnyizinku. ²¹ Ooshi apale aari onsiilaaye khwiyya ootkinisiwa channu, khusala alupa yoori: "Khahiyo otthuutu nlume otule aari weekesakaaye owoola apale ooshi aari osifwaaye nzina la Yinsa? Khaatiye okhuno oteela owaathuula atthu nkhamma anamafukiwa yoori awaalawane Yeruzaleemu wa attunkhulu a anamalokozela a tini?" ²² Saawulu khusala avira ajilipisaka wakhlu siikhu, mayaahuuti khusala amwaakanyerela yoori oniikhala Damashiku athoonyezaka yoori Yinsa ti Almasiihu.

²³ Ziviriyeovo siikhu za waatta, mayaahuuti khusiilana ooshi aya wahati woomuula, ²⁴ ila Saawulu khwiyya woojuwa shawuri zaya epile. Nthana na osikhu aari wiiya oothotolela milako za sitati etile yoori apatthe omuula. ²⁵ Anakhiyoni awe khunthuula n'oosikhu khunwelisa khumwishushela onyuma khwa vahali wa pwejiweeve wa muuri.

²⁶ Wakathi afiyeovo Yeruzaleemu khutakha owaakusanya anakhiyoni a Yinsa, ila ooshi khusala amoova mwaasa woohinkhupali yoori khweele nakhiyoni. ²⁷ Aphano Baranabe khuwaathuula maswihaapa khusala awooza yoori ntarikihi, Saawulu amoona Mbwana amuuziyeeyo nanna awahiyeozo olaleya hapari zooshapweya woominyalavo khwa nzina la Yinsa Damashiku. ²⁸ Attaaphale, Saawulu khwiyya vamote na yo, khusala eettetta woochoovi Yeruzaleemu, alaleyaka woominyalavo khwa nzina la Mbwana. ²⁹ Khusala attakhula na weelezana na mayaahuuti aari ottakhu-laaye luuka ya ekereku, ila apo aya aari otakha omuula. ³⁰ Attwiize n'oojuwa mattakhuzi apale, khunthuula khunlawana nti wa Sezareeya khumpakhirisa yoori alawe nti wa Tarusu.

³¹ Siikhu zaya epo kereja yaari ya heeri nti wooshi wa Yudeya, Kalileya na wa Samariya. Atthu a waamini aari otepa okhomaala na Rooho Ttakathiiifu na waatta, khwa meekhazi oomoova Mbwana.

Aneya na Dooroka

³² Pheeturu khusala eettetta wakhula phantte, khulawa owaathotola at-takathiiifu apale aari wiikhalaaye Liida. ³³ Otthuukhule khunsikana ntthu woorakala aari wiithhiwaaye Aneya eettiye orapalela nyaakha minaane. ³⁴ Pheeturu khumuuzu yoori: "Aneya, Yinsa Al-Masiihu onta wuvonisa! Olankhe okhaje olili awo." Ye khulanka nasaapiru. ³⁵ Atthu ooshi apale aari wiikhalaaye Liisa na Sarona, n'oosila khunkhupali Mbwana.

³⁶ Yoopa aariwo nakhiyoni wankha aari wiithhiwaaye Tabita, khwa luuka ya ekereku lina maana a Dooroka. Ye aari orettakaaye vitthu zooshapweya na winkha zimola. ³⁷ Khumpattha olwele khufwa, mwiili awe khoosiwa khupwehiwa nnyupa ya korofwa yootulu. ³⁸ Liida waattamaniye nti wa Yoopa. Wakathi asiliyeovo anakhiyoni yooriwa Pheeturu ari nti wa Liida, khuwaaruma atthu awiri olawa omuuza yoori: "Ohirupaze ota okhuno niriwo."

³⁹ Pheeturu khulawa vamote na yo, n'oofiya khuthuuliwa khulawaniwa nnyupa ya korofwa y'oottulu. Anakhwele ooshi khunzukulela khusala alila na anthoonyezaka ajapi na kuwo kiina Dooroka aattaliyeozo ari vamote na yo.

⁴⁰ Pheeturu khuwooza ooshi osaruwa okathi okhule, attaaphale khukokhora khusala alompa. Khulankha khulawa aphale aarivo muukha otule woofwa, khumuuzu yoori: "Tabita, olankhe!" Ye khufunula maasho awe, khumoona Pheeturu khwiikkala. ⁴¹ Khunkholela khusala anlansa

yoori eemele, aphano khuwaakhuwela anakhiyoni a anakhwele apale khuwenkha eettaka woona. ⁴² Vitthu epile khwiya zoofuwiwa sitati yooshi ya Yoopa, atthu a waatta khunkhupali Mbwana. ⁴³ Pheeturu eekhaliye nti wa Yoopa siikhu za waatta, owawe mwinyi mmote aari wiitthiwaaye Simawu aari waattalaaye shapala za nyama.

Warakha ya mwanzo ya Paawulu amwaatikhelaka Timootiyu

Salamu

¹ Miyo Paawulu, aswihaapa wa Yinsa Al-Masiihu khwa oruma wa Nnyizinku namuusuru etthu na wa Yinsa Al-Masiihu nroromelo etthu, ² kiniwaatikhela weeyo Timootiyu, mwanaka w'eekhweele nkatthi wa tiini yoori rehema, huruma na heeri ya Nnyizinku papeetthu na ya Yinsa Al-Masiihu Mbwaneeththu, yiye vamote na-weyo.

Phoole na anamanozela a mwentto woovonyeya

³ Nkhama ethhiipo kaawuuziyeezo wakathi opule kaari weettaavo nti wa Masedoniya, yoori amana osala nti wa Efeeziyu owaahirimize atthu akina yoori ahikhanyarele osomisa mwentto woovonyeya. ⁴ Owoozaka theenya yoori alikhe olottela hantisi na waalaka mazina a marehemu. Epo zaya zintiisa onyakulisana na enlikhiswa mwentto wa Nnyizinku onlottaniwaaye amini. ⁵ Maana a masomi aya apa ophetana wa rooho y'ookemaani, na ojuwa othawula yooshapweya vakatthi wa yootakhala, na amini yoohiiyi yoonaafikhi. ⁶ Akinoko ajilaziyeemo, arutelaka olottela vitthu zootakhala zoohiina fwayita. ⁷ Yo antakha ojiretta wiiya anamanozela a kano za Nnyizinku, ila khiniweeleya, wala epile anlupaazo na haakhi yaya khanjuwu.

⁸ Apha ninuwacha yoori kano pi zooshapweya zirumeeyeliwaru khwa nanna zinlupaazo. ⁹ Njiuwaka ethhiipo yoori kano khazaawaateeliye atthu apale aneettettelaaye shariya, ila zaawaateeliye apale ooohiiyi a shariya na anamakhijili, zaawaateeliye makaafiri na anatwampi, zaawaateeliye anamatalkhala-rooho na anamakufuru, zaawaateeliye apale aniwoolaaye apapazaya na amamazaya, zaawaateeliye apale aniwoolaaye azaaya, ¹⁰ zaawaateeliye anamajansili na apale aniwaalalanaaye alumbe azaaya, zaawaateeliye apale aniwaakholaaye atthu na owoozanyisa na anamahata, zaawaateeliye apale anlapphaaye eettaka ohata, na ooshi apale mwentto woozuri ahintakhaaye. ¹¹ Mwentto opo ori nhapari zooshapweya zinlankhaayo nkatthi wa nuuru ya Nnyizinku wa parakha, kinkhiweeyo miiyo olaleya.

¹² Yinsa Al-Masiihu Mbwaneeththu akinkhiyeeyo kuvu, Ye akoona wiya nthu wa waamineya, khukinkha onrumeyela, kininshukhurwela. ¹³ Miyoena omwanzo kaari namakufuru, namalupattha, namahusuti, wakathi aya opule miyo akaarina amini, etthu kaari orettaaye akaari ojuwa, apha kooneliwa huruma. ¹⁴ Rehema yooziti ya Mbwaneeththu khukiishukhela, khukipathisa ompheta na omwaamini Ye. ¹⁵ Mattakhuzi apa pi ookhweele na ansuhi okhupaleliwa: Yinsa Al-Masiihu ti ye aatiyeeyo voolumwenku oteela owoosuru anatwampi, wootepacha waya ti miyo. ¹⁶ Ti eto kooneliweeyo huruma, yoori khwa miiyo, wootepacha waya, Yinsa Al-Masiihu akivilela yoori awaathoonyeze ooshi apale anttelaaaye omwaamini apatthe ohaayi wa mileele. ¹⁷ Apho, Mfwalume wa mileele attottopeliwe na asifwiwe siikhu zooshi, Ye ahinifwaaye wala ahinooneyaaye, Nnyizinku mmote othuuto. Amiina!

¹⁸ Masomi atthaapo kinuutumerela weeyo mwanaka Timootiyu, nkhamma khwa weyo yuulupeziyeezo Rooho Ttakathiifu, wuupuwelaka mattakhuzi apa wuuziweeyo, onttela owahi wuumana viittha ya nmafusi,

¹⁹ ojilipisanaka amini na ojuwa othawula yooshapweya vakatthi wa yootakhala. Mwaasa woohitakhi othawula yooshapweya, atthu akina amini yaya apwetecha. ²⁰ Akina aya ti Hemeeni na Alishantere. Yo kawaalikhela Epiliisi yoori awaahoowise, ajuwe ohikufuru.

2

Nina yoowaalompela atthu ooshi

¹ Apho, ehinarettiwe hatha ethhu, kinuuhirimizani olompa; lompa yookhola moolu, yoovekeleliwa anaatamu ooshi na lompa yooshukhwrela. ² Mwiwaalompel afwalume na attunkhulu ooshi apale ariinaaye yenzi yoori fweeyo niiyane meekhazi a wiithaala, a heeri, eemaani na hishima khuluyeene. ³ Epo pi ziyyiye zooshapweya na zontuvela Nnyizinku Namuusuru ethhu. ⁴ Ye ontakha yoori eeye a wuusurukha atthu ooshi na ajuwe haakhi.

⁵ Nnyizinku ori mmote paasi,
na namasiilanisa wa atthu na Nnyizinku
na-ye ori mmote paasi,
Yinsa Al-Masihu pinaatamu,
⁶ otu aleviyeyeo ohaayi awe
khuriphia hisapu za twampi za atthu ooshi,
oshaahiti opu Nnyizinku enkha wakathi khwaamili.

⁷ Akintta ohata kinlupa khwhee, keetta othawuliwa yoori kiiye namalaleya, kiiye aswihaapa na kiiye namanozela wa mattakhuzi apa a amini na a haakhi, khwa khapila zooshi.

⁸ Apho, alume ooshi kintakha yoori wakhula vahali ankusanyeyaavo alompe alansaka makhono na rooho y'eemaani woohikatipukhi na woohinyakulisani.

Aakha apale eeyiye anamalottela a Yinsa

⁹ Aakha na-yo kintakha yoori awale kuwo wa hishimavo, ajishapweyise woohijitayiti khwa nanna eneezelaa, oshapweya waya ohiyiwoofuka mattunttu oohifwayi wala owala thahapu wala osaka ama kuwo za waatta nzurukhu, ¹⁰ oshapweya waya wiiye wa khaazi zooshapweya nkhamma aakha animwaaputwaaye Nnyizinku.

¹¹ Aakha, amana anozeliwaka ana yoojiithaaza na ojinyamaza. ¹² Akiniwaatakhisa aakha onozela wala ojinkha yenzi vakatthi wa alum, ana yawiya oonyamala. ¹³ Maana tthakuzi wa wumpiwa ti Adamu, aphano khumpiwa Haawa. ¹⁴ Aattettekhiweeyo khahiyo Adamu, muukha ti ye aattettekhiweeyo pi ohata wa Epiliisi, khusutukhwana akwelaka ntwampi. ¹⁵ Apho, aakha hatha nkhamma awaapattha aana, anuusurukha eeyaru nkaththi wa epaata na pheta, na ottakathifu na hishima.

3

Namalokozela wa ojama wa Nnyizinku

¹ Mattakhuzi apa pi ookhweele: amana ntthu atakha wiiya namalokozela wa Ojama wa Nnyizinku, onhithajiya khaazi yooshapweya. ² Namalokozela wa Ojama wa Nnyizinku eeye ntthu woohaakanyereliwi ethhu, eeye nlume wa wiiyana muukha mmote, woojiinanel, woojiithaaza, wooshitahiwa, woomakeleya na ankhituraaye osomisa. ³ Ahiiye ntthu woohapaliwa ama

woohusuti, eeye nthu woovilela na wa heeri. Ahiiye nthu wontuvela nzurukhu. ⁴ Eeye nthu wa weettettisa vaje vawe saana, wooshututeliwa pi aanaawe na wooshitahanana. ⁵ Nkhama nthu khaneettettisa saana vaje vawe, onlokozela toovi ojama wa Nnyizinku? ⁶ Namalokozela wa Ojama wa Nnyizinku ahiiye nthu anttaaye onjuwaru Yinsa, maana enwaheya ompattha ojikhupali, khukwelana ophukiwa otthuupo aphukiweeyo Sheethwani. ⁷ Apho, namalokozela wa Ojama wa Nnyizinku eeye nthu wooshitahiwa pi atthu apale oohiiyi a Ojama wa Nnyizinku, yoori ahikwele mmiraakho za Sheethwani eeya wootaraweya.

Anamarumeyela a ojama wa Nnyizinku

⁸ Khwa nanna eththiipo anamarumeyela na-yo eeye atthu ooshitahiwa, ahiiye amwanomwaano, ahiiye oohapaliwa wala oowaatuvela opattha fwayita yoohiiyi ya haakhi. ⁹ Eeye atthu oohikheetiwi pi rooho zaya na oojilipisana mwentto wa amini athoonyeziweeyo ti Nnyizinku. ¹⁰ Na-yo ahinenkhiwe orumeyela ana yawooniwa khapula mwentto aya, amana ahoonaniwi mwentto wootakhala phi aninkhiwaavo orumeyela. ¹¹ Khwa nanna eththiipo na-yo aakha anrumeyelaaye eeye ooshitahiwa, eeye atthu oohittakhuli pure, oosuluheya na awaamineya khwa zooshi. ¹² Anamarumeyela eeye alume awiyyana muukha mmote, oowaalela aanaaya saana na aweettettisa vaje vaya. ¹³ Amana arumeyela saana ampattha shitaha khuluyeene na okhomaala nkaththi wa amini ariinaaye na Yinsa Al-Masiihu.

¹⁴ Kiniwaatkhela weeyo Timootiyu warakha eti, keekeselaka oteela wuthotola nasaapi, ¹⁵ ila amana kirupaza, warakha eto entta owuuza nanna yoojeettettisa vakatthi wa Ojama wa Nnyizinku. Opu wiyyieeyo kerezha ya Nluku Woohaayi, nripu na nchina l'ookhweele. ¹⁶ Khaavo hatha nthu mmote antakhaaye okheeti yoori etile Nnyizinku athoonyeziyeeyo monkoni wa Yinsa Al-Masiihu ti yootikinisa:

Ye aa jithoonyeziye nkhamma pinaatamu
khuhakikhiwa ti Rooho Ttakatthiifu,
khooniwa pi malayikha,
khulaleyiwa tuniya zooshi,
khukhupaliwa voolumwenku,
khuweziwa pinkuuni nkaththi wa nuuru.

4

Ohirimiziwa wa Timootiyu

¹ Rooho Ttakatthiifu enlupa saaneene yoori omwiisho anlawa atthu akina alikhe amini, asilezaka nafusi zoottettekha na masomi a masheethwani. ² Masomi aya apo anlankha mmakhono wa manaafikhi na anamahata, ariina rooho zoolukula ahinjuwaaye eththu yootakhala wala yooshapweya. ³ Yo aniwooza atthu yoori oralana mwiikho na vitthu-zoojiwa kinoko zaya haraamu. Vitthu-zoojiwa epile Nnyizinku aphattucha yoori apale animwaaminaaye na anjuwaaye haakhi, aje anshukhurwelaka. ⁴ W'eehkweele, epile Nnyizinku aphattuchiyeeyo pi zooshapweya zooshi, ehiyevu hatha moote enthanyiwaaye amana yiyya yoopokhereliwa wonshukhurwelavo Nnyizinku. ⁵ Vitthu-zoojiwa zaya epo zinhalaalishiwa ti ntakhuzi la Nnyizinku na lompa.

Karumeya woororomeleya wa Yinsa

⁶ Amana weeyo owaanozela attwiizo mattakhuzi apa, oniiya karumeya wa Yinsa Al-Masiihu wookemaani, ojilipisanaka mattakhuzi a amini na masomi ookhwewe apa olottiyeeyo. ⁷ Masomi oovonyeya na hantisi zoololo ojiwerawerisane. Ojikhomaaze na emaani. ⁸ Okhomaaza makhonkolo fwayita yaya vattithiiru, ila emaani ti ye eriina fwayita khwa zooshi, maana entana nroromelo w'oohaayi otthuupo na aahera. ⁹ Mattakhuzi apa pi awaamineyaa na ansuhi okhupaleliwa. ¹⁰ Ti eto ninjuumanisaaye na okhola khaazi mwaasa yoori nroromelo ethu nattha wa Nnyizinku Woohaayi. Ye Namuuusuru wa anaatamu ooshi, haaswa-haaswa khwa apale animwaamiaaaye.

¹¹ Mattakhuzi apa ohirimize na osomise. ¹² Hatha ntthu mmote ahitarawu oshaapu awo, ila khwa ottakhula wawo, mentezi awo, pheta, amini na wookemaanivo wiiye nthoonyezo wa anamwaamini. ¹³ Vakatthi wa analmalottela, mpakha miyo ota, olipane osoma, ofafusiri na osomisa Nttakhuzi la Nnyizinku. ¹⁴ Wakathi waattheeliweeveo makhono pi attunkhulu veeshwa vawo oolompelaka, Nnyizinku nkaththi wa Rooho Ttakatthiifu awinkha tthuwo. Ohisahawu orumeyela.

¹⁵ Vitthu epi weettettise saana na ojilipisane ethiipi yoori okhomaala wawo nkaththi wa amini wiiye wa wooniwa pi atthu ooshi. ¹⁶ Ojiinanele weeyo na wiiyane phoole na mwentto opu onsomisaaye, vitthu epo ojilipise oretta. Amana okhanyarela oretta ethiipo, ontta ojuusuru weeyo na apale anuusiilaaye.

5

Nanna yoowaatthantta anamafweliwa pi amanna zaya

¹ Nlume wa wuuziti owula ohisala ommaruwela, ila onlipisele saana nkhama papaawo, mashaapu nkhama attwiizo, ² aakha a wuuziti owula nkhama amamazo, na aamwari nkhama alupuwo wookemaanivo.

³ Owaatthantte aakha oofweliwa pi amanna zaya, apale khweele ahina ntthu woowaatthantta. ⁴ Ila nkhama owaapho namafweliwa ti mannawe ariina aana ama atuuul, atthaapo mwanzo asome mwentto wa tiini antthanttaka jamaayaya. Etthiipo apapazaya phi aniwaaripaavo. Eto ethu enintuvelaaye Nnyizinku. ⁵ Muukha woofweliwa ti mannawe, woohiina ntthu wontthantta, nroromelo awe onttha wa Nnyizinku, akhanyare-laka olompa avekaka waawunikha nthana na osikhu. ⁶ Ila otule anjitungweezaaye nkaththi wa tuvela z'oolumwenku, hatha nkhama ori haayi oniiya woofwa. ⁷ Owaarume oretta ethiipo theenya, yoori vakatthi vaya ehooniweeveo paathuli. ⁸ Ntthu amana ajamaaze haaswa-haaswa mamaawe na pipiyaawe ahiwaatthantti, akatthala epaata yawe na oninziti kaafiri.

⁹ Ahaatikhiwe nwarakha yawiinaneliwa namafweliwa ti mannawe muukha woohiina nyaakha siithiini na eeye muukha araliweeyo nlume moote paasi. ¹⁰ Amana eeya muukha woojuwanwiwa oretta vitthu zooshapweya, woowaalela saana aanaawe, woomakeleya, amana eeya muukha aari woosakaaye moolu a atthu oottakatthiifu a Nnyizinku, aari owaawunakaaye anamathowiwa na aari okholakaaye khaazi zooshi zooshapweya, othuuto ti aatikhiwe nwarakha ya anamafweliwa pi amanna zaya.

¹¹ Aakha awiyya anakhinzi nwarakha ya anamafweliwa pi amanna zaya ohiwaatikhemo, maana amana tuvela zaya ziziti ojinkha mmakhono wa

Yinsa Al-Masiihu, antakha oraliwa. ¹² Khwa nanna ethiito, antta ojipatthisa paathuli mwaasa wookattha wahati aya opule wamwanzo aaret-taniyeeyo Nnyizinku. ¹³ Theenya antta ojinozela oviliwa, weettetta nyuppa khwa nyuupa, khahiyoo oviliwaru paasi, ohankawaani, waapa na ottakhula vitthu zoohifwayi. ¹⁴ Apho, kintumerela yoori anamafweliwa pi amanna zaya apale eeyiye anakhinzi araliwe, eeyane aana alokozele vaje vaya, ahimwinkhe kiphenyo atwi ethu yoowaalupeza vitthu zootakhala. ¹⁵ Akinoko aya apathuli anlotta Epiliisi.

¹⁶ Muumini amana eeyana jamaaye woofweliwa ti mannawee, ona yont-thantta, ahinlikhele Ojama wa Nnyizinku. Alikhe yoori owahi owaatthanitta apale akina oofweliwa pi amanna zaya ahina ntthu woowaatthanitta.

Monkoni wa attunkhulu oojama wa Nnyizinku

¹⁷ Attunkhulu apale ankholaaye khaazi saana, Ojama wa Nnyizinku ona yoowaashitahi swaafu piiri, haaswa-haaswa apale antafusiraaye na apale ansomisaaye. ¹⁸ Nttakhuzi la Nnyizinku linlupa yoori: "Milomo za mompe ettukuttaka tiriku mwhifuke." Khulupa theenya liraka: "Nakhaazi onsuhu wiyyana phakari yawe." ¹⁹ Otule eeyiye ntatkhusi la Ojama wa Nnyizinku ohikhupale olokoveziwa, aheetteeni opunu atthu awiri ama attathu awiyya mashaahiti. ²⁰ Wakhula otule anrettaaye twampi onshowere vakatthi wa Ojama wa Nnyizinku yoori theenya apale akina aya oove.

²¹ Miyo kiniwuua kuulipiselaka channu mmakhono wa Nnyizinku na Yinsa Al-Masiihu na malayikha apale oothawaziwa, kuutumerelaka yoori mattakhuzi apa oshututele, ohiinanelaka wala ohinthawulaka hatha ntthu.

²² Ohaakuve onthawaza ntthu nkathi wa khaazi ya Nnyizinku yoori oheettemo ntwampi za atthu akina; ojiverawerise wookemaanivo.

²³ Mwaasa wa ejohojooh yawo na marati apale oniyyanakaaye, ohisala onywa maatiru paasi, osala onywa nenkawu viinyu vattithiiru.

²⁴ Awaapho atthu akinoko zinooneyaaye twampi zaya ahineeyane paathuli, ilaa twampi za atthu akinoko wooneya waya ziniyya zoorupaza.

²⁵ Khwa nanna ethiito na-ye khaazi zooshapweya zinooneya, hatha epile zoohooneyi khazinwahi ojivitha.

6

¹ Ooshi apale eeyiye amwiitthwaana ambwana zaya ana yoowaashitahi, yoori nzina la Nnyizinku na masomi ethu ahitarawiwe. ² Apale ariina mbwana wa wiyya namalottela wa Yinsa, ahilikhe onshitahi maana ttwiyyaya. Okinoko waya ana yoowaakholela khaazi yooshapweyacha, maana apale ampatthelaaye fwayita khaazi etile ankholaaye yo mamuumini na pi oophetiwa.

Pheta ya Nzurukhu

Mattakhuzi apa osomise na ohirimize. ³ Nkhama ntthu onsomisa mwentto woofwarikhana ohinkholananaaye na mattakhuzi oolikana a Mb-waneetthu Yinsa na mwentto wa emaani, ⁴ ntthu aya oto tu woojikhupali na woohijuwi hatha ethu. Onaaye olwele wontuvela onyakulisana na okheetisana nkathi wa mattakhuzi antisaaye nrima, wuumani, mattukhano, waakanyerelana vitthu zootakhala, ⁵ na oshinttana woohilikheli. Nkhama ethiipile azowereliyeego atthu awiyyana akhili za wuntuwanyiwa, eeyeliweeyo haakhi yaya, apo aya anoona yoori tiini ethu enreelisaaye. ⁶ W'eehkweele, tiini enreelisa channu khwa atthu apale amfurahelaaye epile ariinaazo. ⁷ Voolumwenku apha khanaataneyo hatha ethu na

khaninthuulavo hatha ethu. ⁸ Amana niiyana kuwo na ethu-yoojiwa nifurahelo ethhiipo. ⁹ Ila apale aneekesaaye oreela ankwela muuzayiniwa na mmiraakho za Sheethwani, allottelelaka tuvela zoololo zimp-wetechaaaye. Ethhiipo eniwaatupweeza muuthowelela na nwantipweyä. ¹⁰ W'ekhwheeble pheta ya nzurukhu nchina la vitthu zooshi zootakhala. Mwaasa w'oomaashokopho na nzurukhu, atthu akina alikha epaata yaya khusala ajihoowisa venkivene.

Meekhazi omwaamini Nnyizinku

¹¹ Ila weeyo, ntthu wa Nnyizinku, vitthu zaya epo owerawere. Weekese weettettisa shariya, emaani, epaata, pheta, ovilela na ojithuza. ¹² Wuumane viitha yooshapweya y'eepaata, okholelele ohaayi wa mileele. Okhuweleli-weeyo n'oolaza oshaahiti wooshapweya wa tukhuru yawo omaasho wa atthu a waatta. ¹³ Aphano, mmakhono wa Nnyizinku otule aninkhaaye ohaayi zumpe zooshi, na mmakhono wa Yinsa Al-Masiihu, otule alaziyeeyo oshaahiti wooshapweya wa tukhuru omaasho wa Pontiyu Pilaatu, miiyo kinuuruma weeyo, ¹⁴ yoori otthe nroho nrumo swaafi na woohilokoveziwi hatha ethu, mpakha epuwelelo ya Mbwaneethu Yinsa Al-Masiihu. ¹⁵ Etthu yaya eto Nnyizinku onlawa arettikhaniise, amana ofiya wakathi wa khweele.

Nnyizinku othuuto eeyiyeeyo wooshapweya na ariina owahi vatulu wa zooshi,

Mfwalume wa afwalume na mbwana wa ambwana.

¹⁶ Ye otthwe khamfwaa

na oniikhala nnuuru ehinaattameyaaye,
khina anamoone,
wala anwahaaye omoona.

Ottithimisiwa wiiye Waawe na owahi khwa mileele. Amiina.

¹⁷ Monkoni wa mathaajiri voolumwenku apha, owaahirimize yoori ahisala ajinkhelela, wala thwaama zaya ahitthe nkatthi wa maali epile zoohilipaneyi; ila thwaama zaya atthe wa Nnyizinku, Ye oninkha wa waattavo vitthu zooshi yoori nisala nijirela. ¹⁸ Owaahirimize oretta saana na eeye mathaajiri a khaazi zooshapweya, awiiyana rooho yooleva na wiiya atthu anwahaaye omeela epile aniiyanaaazo. ¹⁹ Khwa nanna ethiito antta wiiyana okhu ninttaawo akhipa yookhomaala, yoori apatthe ohaayi wa khweele.

²⁰ Weyo Timootiyu! Etile olikheliweeyo otthe nroho. Owerawere mat-takhuzi oololo aninveyisaaye Nnyizinku na akhili zoovonyeya zinooni-waaye nkhamma ojuwa ila zihiiyenei. ²¹ Akinoko aari olottelaaye akhili zaya epo, alaamo mwilipaataa.

Rehema ya Nnyizinku yiiye vamote na mweeyo.